

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuut aatsitassanut suliassa qarfiup nutarterneqarneranik ineriartortinneqarneranillu, Naalackersuisut 2023-mi Inatsisartut upernaakkut ataatsimiinnerisa nalaanni aallartitaannik, ingerlatitseqqiineruvoq.

Aatsitassanut tunngasunik suliaqarneq pillugu Inatsisartut inatsisaat (UKA2023/49) aammalu aatsitassat pillugit ingerlatallu tamatumunnga pingaarutillit pillugit Inatsisartut inatsisaanni (aatsitassanut ikummatissanullu inatsit) sunniuteqartitsilluni allanngortitsineq (UKA2023/50) 2023-mi Inatsisartut upernaakkut ataatsimiinneranni saqqummiunneqarput. Siunnersuutit malitsigisaannik aatsitassanut tunngasunik suliaqarnermut nalinginnaasumut (annertuunut) suliassa qarfik aatsitassanut ikummatissanullu inatsimmiit nammineq inatsimmut immikkoortinneqarpoq.

Siunnersuummi aatsitassanut ikummatissanullu inatsimmit ingerlatassat allat makku taakkununga inatsimmut immikkoortumut avissaartinneqarput:

1. Inuit ataasiakkaat akuersissummik peqaratik aatsitassanik katersisarnerat piiasernerallu.
2. Annikitsumik aatsitassarsiornermut suliassa qarfik.
3. Kalaallit Nunaanni illuliortiternermut suliassami imaluunniit sanaartornermi suliassami illuliornermut atortussatut imaluunniit sanaartornermut atortussatut atugassanik ujaraaqqanik, ujaqqanik assigisaannilluunniit aatsitassanik piianeq.

Siunnersuutip ingiaqatigisaanik aatsitassanut ikummatissanullu inatsisip sunniuteqartitsilluni allanngortinneqarnissaanut siunnersuut saqqummiunneqarpoq.

Namminersorlutik Oqartussat aatsitassanut suliassa qarfik tigusunnaagaat, taamaalillutillu Namminersorlutik Oqartussat aatsitassanut suliassa qarfiup iluani inatsisiliortunngorsinnaasut ingerlatsisunngorsinnaasullu, Kalaallit Nunaanni Namminersorneq pillugu inatsimmi aalajangersarneqarpoq. Aatsitassanut suliassa qarfik Kalaallit Nunaanni Namminersorneq pillugu inatsimmut ilanngussami allattuiffik II-imi allassimavoq. Kalaallit Nunaanni Namminersorneq pillugu inatsimmi § 3, imm. 2-mi aalajangersagaq malillugu suliassa qarfiit ilanngussami allattuiffik II-imi allassimasut, naalagaaffimmi oqartussanut isumaqatiginninniareernermi, piffissani Namminersorlutik Oqartussanit aalajangersarneqartuni Namminersorlutik Oqartussanut tunniunneqartussaapput.

Namminersorlutik Oqartussat aatsitassanut suliassa qarfik ulloq 1. januar 2010 akisussaaffigilerlugu tiguaat. Aatsitassanut suliassa qarfiup ulloq 1. januar 2010 Namminersorlutik Oqartussanit akisussaaffigilerlugu tiguneqarneranut peqatigitillugu

aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-imeersoq (aatsitassanut ikummatissanullu inatsit) atuutilerpoq. Kalaallit Nunaanni aatsitassanik naapertuuttumik piiaanissap aammalu nunap iluaneersunik aammalu ingerlatanik tamatumunnga attuumassuteqartunik atuinissap qulakkeernissaa siunertaralugu, aatsitassanut ikummatissanullu inatsit akuerineqarpoq. Aatsitassanut ikummatissanullu inatsisip 2010-imi atuutilernerata kingorna, aatsitassanut suliassaqrifiup, aatsitassarsiornermi suliffissuaqarnerup aammalu inuiaqatigiit kalaallit ineriartornerat ilutigalugu inatsit nutarterniarlugu naleqqussarniarlugulu, arlaleriarluni allanngortinneqartarpoq.

Aatsitassarsiornermut suliassaqrifik, aatsitassanut suliassaqrifimmut ilaasoq, Kalaallit Nunaannut inuiaqatigiinnullu kalaallinut annertuumik pingaaruteqarpoq. Naalakkersuisut aatsitassanut suliassaqrifiup, ilanngullugu aatsitassarsiornermut suliassaqrifik, ineriartortinneqarnerata ingerlaannarnissaa kissaatigaat, taamaalilluni suliassaqrifik Kalaallit Nunaanni suli annertunerusumik annertuumik ingerlataqarfiulissalluni aammalu annertuumik suliffissuaqarfiulissalluni. Aatsitassarsiornermut suliassaqrifiup ineriartortinneqarnerata ingerlaannarnera, aatsitassarsiornermut suliassaqrifiup iluani suliffissanik aammalu suliffeqrifiit suliassaannik annertunerusunik pilersitsinissamut iluaqutaassaaq, aamma aatsitassarsiornermut suliassaqrifik nunap karsianut annertunerusumik isertitaqartitsissalluni aammalu inuiaqatigiinnut kalaallinut iluaqutaasumik aningaasaqarnikkut ineriartornermut iluaqutaassalluni.

2. Siunnersuummi immikkoortut pingaernerit

2.1. Siunertaq

Siunnersuut maannamut suliassaqrifiup ”annikitsumik aatsitassarsiornermik” taaneqartartup, siunissami najukkami inissisimalluni aatsitassarsiornermi suliffissuaqarnertut ineriartorsinnaanissaa neriuutigalugu, attatiinnarnissaanut ineriartorteqqinnissaanullu Naalakkersuisut periusissiaanni ilaavoq. Tamatuma saniatigut suliassaqrifiup innuttaasut piviusumik isertitaqarnissamut periarfissaanissaata qulakkeernissaa pillugu Naalakkersuisut periusissiaanni ilaavoq. Naalakkersuisut naliliipput, aatsitassanut suliassaqrifiup ineriartorteqqissinnaanissaanut atugassarititaasunut killissaliussat pitsaasuunissaat ersarissuunissaallu pingaaruteqartoq.

Innuttaasut ileqquusumik aatsitassanik piiaaneremut aammalu tuniniarneqartussanik piiaaneremut tunngatillugu, nammineq pinngortitami pisuussutiminnik piiaanissamut pisinnaatitaaffeqrarnissaat aamma siunnersuummi qulakkeerneqassaaq. Aamma suliassanik annikinnerusumik angissusilinnik aatsitassarsiorfissanngorlugit ineriartortitsinissamut najukkani periarfissat siunnersuummi pisariinnerulersinneqarput.

Tamatuma saniatigut siunnersuummut siunertaavoq, ilaatigut nutartikkamik paasiumarnerusumillu, ersarissumik, naapertuuttumik atoruminartumillu maleruagassiinissaaq. Nutarterineq ilaatigut aatsitassanut ikummatissanullu inatsisip ulloq 1. januar 2010 atuutilerneraniilli suleriaatsit misilittakkallu aammalu annikitsumik

aatsitassarsiornermut suliassaqarfimmi aammalu aatsitassarsiornermi suliffissuaqarnermi ineriartorneq tunngavigalugit pissaaq.

Siunnersuummi siunertaavoq annikinnerusumik annertussusilimmik naapertuuttumik sunniuteqarluartumillu aatsitassarsiorluni misissuinissamut aatsitassanillu piiaanissamut aamma Kalaallit Nunaanni illuliornermut suliassami imaluunniit attaveqaasersuutitut suliassami illuliornermut atortussatut imaluunniit sanaartornermut atortussatut atugassanik aatsitassanik piiaanermut tapersiinissaq. Tassunga ilanngutissaaq aatsitassat pillugit ujarassiorluni takornariartitsinernik ingerlataqarnernik suliaqarnermut aamma tamatumunnga akuersissummik peqarani aatsitassanik katersinermut piiaanermullu tapersiinissaq.

Siunnersuut sinaakktissatut inatsisaassaaq, suliassaqarfiup aqunneqarneranut tunngaviusunik pingaarnepaanik aalajangersaaviusoq. Sinaakktissap taassuma iluani Naalakkersuisut aalajangersakkanik atugassarititaasunillu erseqqinnerusunik aalajangersaanissamut piginnaatinneqarput. Naalakkersuisut ilaatigut nalunaarutini, akuersissutitut ilusiliani akuersissutinullu atugassarititaasuni nalinginnaasuni aamma akuersissuteqarnerni pisinnaatitsissummik pigisaqartunut imaluunniit akuersissuteqarneq malillugu pisinnaatitaasumut nalunaarutigineqartuni aalajangersakkanik aalajangersaasinnaapput. Aatsitassanut ikummatissanullu inatsit aatsitassanut suliassaqarfimmi maleruagassiinermut taamaaqataanik sinaakktissatut inatsisitut atorneqarpoq.

Ingerlatassat pineqartunut ilaatinneqartut isumannaallisaanermut, peqqissutsumut, avatangiisinut isumalluutinillu atuinermut aamma inuiaqatigiinni piujuaannartitsisumik sunniuteqartitsinissamut tunngatillugu isumannaatsumik aammalu naapertuuttumik aamma pissutsini taamaaqataanni nunani tamalaani suleriaatsinut pitsaasunut akuerisaasunut naapertuuttumik suliarineqartarnissaat siunnersuummi qulakkeerneqassaaq.

Isumannaatsumik isumalluutinik atuneq ilaatigut paasineqassaaq tassaasoq, ingerlatassat pisariaqanngitsumik isumalluutinik maangaannartitsinani aammalu qanittumi ungasinnerusumilu inuiaqatigiit soqutigisaat eqqarsaatigalugit pissasoq. Tassani ilaatigut ilaatinneqarput aatsitassanik ilaalu ilanngullugit annikitsumik aatsitassarsiorluni piiaanerup ingerlanneqarnerani inuiaqatigiit soqutigisaat, ingerlatassanik pilersitsisarneq aammalu aalajangersimasumik najugaqartut allallu suleqatigisat ingerlatassanik siunnersuummi pineqartunut ilaasunik suliaqartut misilittagaqalernissaat piginnaasaqalernissaallu.

Inuiaqatigiinni piujuaannartitsisumik sunniuteqartitsinissaq pillugu piumasaqaatip atuunnerani, akuersissummik imaluunniit atortussanut akuersissuteqarnermik tunniussisoqarsinnaanersoq tunniussisoqartariaqarnerorlu aalajangiisoqartussanngornerani, ilaatigut ingerlatassat atituumik isigalugu inuiaqatigiinni piujuaannartitsisumik sunniuteqartinneqarnissaat eqqarsaatigineqartassaaq. Assersuutigalugu suliffissaqartitsinikkut, inooqatigiinnikkut aaqqissugaanikkullu sunniutaasussat, ingerlatassat inuiaqatigiinnut aammalu inuiaqatigiinnut aningaasaqarnermullu tunngasunut sunniutigisinnaasai, aammalu

iliuusissat pissutsillu pitsaasumik sunniuteqartitsinissamut aammalu annertuunik sunniinerlunnissat pakkersimaarnissaannut ingerlanneqarsinnaasussat ingerlanneqartariaqartullu, nalilersorneqartariaqarput.

Ingerlatassat siunnersuummi pineqartunut ilaasut pilersaarusionerqarneranni aqunneqarnerannilu, ingerlatassat nunamut namminermi najukkanilu inuiaqatigiinnut sunniutigisinnaasaannik nalilersuinerit aamma aallaavigineqarnissaasa qulakkeernissaanut, siunnersuummi inuiaqatigiinni piujuaannartitsisumik sunniuteqartitsisarneq pillugu maleruagassat qulakkeerinneqataassapput.

2.2. Inatsisit nalinginnaasut

Matuma kinguliani siunnersuummi qulequttanut pingaarnernut pingasunut inatsisitigut inissisimaneq naatsunngorlugu issuarneqarpoq:

1. Inuit ataasiakkaat akuersissummik peqaratik aatsitassanik katersisarnerat paaasernerallu.
2. Annikitsumik aatsitassarsiornermut suliassaqqarfik.
3. Kalaallit Nunaanni illuliortiternermut suliassami imaluunniit sanaartornermi suliassami illuliornermut atortussatut imaluunniit sanaartornermut atortussatut atugassanik ujaaraqqanik, ujaqqanik assigisaannilluunniit aatsitassanik paaaneq.

Inuit ataasiakkaat akuersissummik peqaratik aatsitassanik katersisarnerat paaasernerallu pillugu

Inuit aalajangersimasumik najugaqartut aamma aalajangersimasumik najugaqartuunngitsut, taakkualu sioqqutsisumik akuersissummik peqaqqaaratik aatsitassanik katersisinnaanerit paaasinnaanerallu, aatsitassanut ikummatissanullu inatsimmi immikkoortinneqarput. Aatsitassanut ikummatissanullu inatsisip atuunnerani inuit aalajangersimasumik najugaqartuunngitsut nammineerlutik aatsitassanik katersinissaat inerteqqutigineqarpoq. Kisianni aalajangersimasumik najugaqartut aalajangersimasumik annertussusilimmik aatsitassanik katersisinnaapput paaasinnaallutillu, taamaattoq sumiiffimmut katersiviusumut tunngatillugu aammalu katersorneqartut nalinginut (100.000 koruunit killissaliussat) aalajangersimasunik killilersorneqarlutik, taamatullu aalajangersimasumik najugaqartut inuussutissarsiutigalugu aamma inuussutissarsiutigiginagu ingerlatassanik taakkuninnga suliqaqartarnerat immikkoortinneqarpoq.

Innuttaasut aalajangersimasumik najugaqartut aatsitassanik katersinissamut paaanissamullu periarfissaqarnerat kissaatigineqartuniit sukannernerulersimasooq pisariunerulersimasorlu, aatsitassanut ikummatissanullu inatsimmi misilittakkat takutippaat.

Annikitsumik aatsitassarsiornermut suliassaqqarfik pillugu

Aatsitassanut ikummatissanullu inatsit malillugu annikitsumik aatsitassarsiornerinissamut akuersissut taamaallaat inunnut tunniunneqarsinnaavoq. Akuersissut taamaalilluni inummut pineqartumut tunngassuteqarpoq, aammalu ingerlatseqatigiiffimmi pigisatut

ilaatinneqarsinnaanani. Misilittakkat takutippaat tamanna annikitsumik aatsitassarsiornermik suliaqartut aningaasaliisussarsiornissamut periarfissaannik aammalu ingerlatassanut aningaasalersuutissarsinissamut periarfissaannik ajornakusuulersitsisinnaasoq. Taamaalilluni annikitsumik aatsitassarsiorniluni suliassat ineriartortinneqarnerat aammalu annikitsumik suliassap annertunerusumik annertussuseqalerluni inerikkiartorsinnaaneranut periarfissaqarneq ajornakusuulersinneqarput.

Aatsitassanut ikummatissanullu inatsimmi annikitsumik aatsitassarsiornermut suliassaqarfimmi akuersissutit suussusai marluk immikkoortinneqarput: Kisermaassisussaataitaalluni imaluunniit kisermaassisussaataitanani akuersissut. Kisermaassisussaataitaalluni annikitsumik aatsitassarsiornissamut akuersissut sumiiffimmi 1 kvadratkilometerimut tunngassuteqarpoq, kisermaassisussaataitanani annikitsumik aatsitassarsiornissamut akuersissummi kommuni sumiiffia tamakkerlugu ilaatinneqarluni. Akuersissutip suussusaa apequtaalluni pisinnaatitsissummik pigisaqartoq atortorissaarutiniq assigiinngitsunik (sakkut, maskiinat il.il.) atuisinnaavoq. Taamaattoq pisinnaatitsissummik pigisaqartoq qinnuteqarnermini atortorissaarutiniq allanik atuinissamut akuerineqarsinnaavoq. Maleruagassiinerup pisariinnerulersinnissaa pisariaqartinneqartoq kiisalu aalajangersimasumik najugaqartut akuersissummik peqaratik susinnaanersut aammalu aalajangersimasumik najugaqartut ingerlatanik sunik akuersissummik taakkunungalugu ataani akuersissuteqarnermik peqarlutik suliaqarsinnaanersut, killissaanut ersarinnerusumik malittarisassiornissamik qulakkeerinissaq pisariaqartinneqartoq, annikitsumik aatsitassarsiornermut suliassaqarfimmi misilittakkat takutippaat.

Kalaallit Nunaanni illuliortiternermut suliassami imaluunniit sanaartornermi suliassami illuliornermut atortussatut imaluunniit sanaartornermut atortussatut atugassanik ujaraaqqanik, ujaqqanik assigisaannilluunniit aatsitassanik piiiameq pillugu

Aatsitassanut ikummatissanullu inatsit malillugu sioqqanik, ujaraaqqanik il.il. nunarput tamakkerlugu suliassani illuliornermut sanaartornermullu atortussatut atorneqartussanut piiiameqartussamut ingerlatassanut Naalakkersuisut oqartussaapput. Tassa imaappoq, aatsitassat akuersissuteqarneq taamaattoq malillugu piiiameqartut nunatsinniit avammut anninneqarsinnaanngitsut, kisianni taamaallaat Kalaallit Nunaanni atorneqarsinnaasut. Atortussanik taakkuninnga piiiameqartussamut akuersissuteqarneq, annertunerusumik annertussusilinnik piiiameqartussamut suliassanik allanik, sukanninnginnerusumik atugassarititaasunik tunngavilimmik tunniunneqartussaapput. Siunertaavoq nunarput tamakkerlugu illuliornermut sanaartornermullu atortussanik, aningaasaqarnikkut siuariartornerup ingerlaannarnissaa qulakkeerniarlugu aalajangiisuulluinnartumik ilaasutut nalilerneqartunik, ajornannginnerusumik pissarsisinnaanerup qulakkeernissaa.

2.3. Siunnersuuttip imarisai

Siunnersuummi inuit ataasiakkaat aatsitassanik katersinissamut piiiameqartussamullu periarfissaqarnerat ammanerulersinneqarpoq pisariinnerulersinneqarlunilu. Siunnersuummi aalajangersimasumik najugaqartut aamma aalajangersimasumik najugaqartuunngitsut

akornanni aatsitassanut ikummatissanullu inatsimmi immikkoortitsisarneq ingerlatiinnarneqarpoq, aammalu aalajangersimasumik najugaqartut pisinnaatitaaffii annertuumik annertusitinneqarlutik.

Siunnersuummi "aalajangersimasumik najugaqartunut" nassuiaassut ersarissarneqarpoq sukannerulerinneqarlunilu. Siunnersuut malillugu "aalajangersimasumik najugaqartoq" nassuiarneqarpoq tassaasoq inuk Kalaallit Nunaanni ukiuni siulliini tallimani aalajangersimasumik najugaqarsimasoq tamakkiisumillu akileraartartuusimasoq.

Siunnersuut malillugu aalajangersimasumik najugaqartut aatsitassanik katersinerminni piiaanerminnilu siunissami atortorissaarutininik tigungmiaannartakkanik motoorilinnik atuisinnaapput. Taamatuttaaq siunnersuut malillugu aalajangersimasumik najugaqartut taamatut suliaqarneq, sumiiffinni ingerlatseqatigiiffiup aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummik tunineqarfigisaani, ingerlassinnaavaat. Taamaattoq sumiiffiit piiaanissamut akuersissutinik tunniussiviusimasut, aalajangersimasumik najugaqartut katersinissaannut suli mattussiviupput. Tamatumunnga tunngavilersuutigineqarpoq, piiaanissamut akuersissutit amerlanertigut suliassaasarmata annertooujussuarmik ingerlalluarneqalereersimasut, aammalu annertunerusumik isumannaallisaaneq isumagineqartussaq mianerineqartussaasarluni.

Taamaattoq sumiiffiit akuersissummi aatsitassarsiorluni misissuinissamut akuersissummi, siunnersuutip atuutilinnginnerani tunniunneqartumi, pineqartunut ilaasut, aatsitassanut ikummatissanullu inatsimmi maleruagassani pineqartut suli ilaatinneqassapput. Siunnersuutip matuma peqatigisaanik aatsitassanut ikummatissanullu inatsisip allanngortinneqarnissaanut siunnersuut saqqummiunneqarpoq, taanna malillugu "aalajangersimasumik najugaqartut" siunnersuummi matumanisuut nassuiarneqarlutik, aammalu aalajangersimasut akuersissummik peqaratik katersinissaannut 100.00 koruuninik aningaasartaannut killiliineq atorunnaarsinneqarluni.

Sumiiffinnut aatsitassarsiorluni misissuinissamut akuersissutini, siunnersuutip atuutilereernerata kingorna tunniunneqartuni, pineqartunut ilaatinneqartunut tunngatillugu, aalajangersimasumik najugaqartut aatsitassanik akuersissummi pineqartunut ilaatinneqanngitsunik piiaasinnaassapput. Aatsitassarsiorluni misissuinissamut akuersissutinut atugassarititaasut nalinginnaasut atuuttut malillugit akuersissummi aatsitassat tamarnik pineqartunut ilaatinneqarput, ikummatissiassat aamma aatsitassat qinngornernik ulorianartunik akullit ilaatinneqaratik. Aatsitassarsiorluni misissuinissamut akuersissutini siunissami tunniunneqartartussani, aatsitassat najukkaneersut suliaqartartut immikkut soqutigintartaat, aallaaviatigut pineqartunut ilaatinneqartassanngillat. Tamanna isumaqarpoq, ujaqqat pinneraasiassat aammallu aatsitassat katersorneqartartut erseqqinnerusumik aalajangerneqartut ilai, aatsitassarsiorluni misissuinissamut akuersissutini, siunissami tunniunneqartartussani, aallaaviatigut ilaatinneqartassanngitsut, aatsitassat taakkua

aalajangersimasumik najugaqartunut inniminnerneqartassallutik.

Siunnersuut malillugu ujarassioortitsilluni takornariatitsinermik inuussutissarsiuteqarneq ammanerulersitsivigineqarpoq. Tassa imaappoq, nunatsinni nunap sannaata takusartinniarlugu ilitersuisoqarluni angalaarnernik aaqqissuussinissaq akuersissuteqarnissamik aammalu immikkut akuersissuteqarfigineqarnissamik piomasaaqateqarfiujunnaartoq. Taamaattoq sulii inuit aalajangersimasumik najugaqartut kisimik ujarassioortitsilluni takornariatitsinernik aaqqissuussinnaapput.

Aammattaaq aalajangersimasumik najugaqartut siunissami Kalaallit Nunaanniit aatsitassanik killilersugaanngitsumik annissinnaapput, annertussutsit apeqqutaanatik aammalu aatsitassat inuussutissarsiutiginnissaat imaluunniit inuussutissarsiutiginninnissaat siunertaralugu katersorneqarsimanersut piiarneqarsimanersulluunniit apeqqutaanani.

Siunnersuut malillugu aalajangersimasumik najugaqartuunngitsut, qaammatini siuliini pingasuni nunatsinniissimasut, katersineq inuussutissarsiutiginnagu pisimappat, killilimmik annertussusilinnik katersinnaavoq. Aalajangersimasumik najugaqartuunngitsut sulii aatsitassanik piiaaqusaanngilaq. Tassa imaappoq, aalajangersimasumik najugaqartuunngitsut katersinermi atororissarutinik sunilluunniit atueqqusaanngitsut. Aatsitassanik maaniinnarmiittunik katersinissaq periarfissaasoq taamaallaat tassani pineqarpoq. Siunnersuutigineqarpoq annertussutsinik killilersuisoqassasoq, taamaalilluni aalajangersimasumik najugaqartut aamma aalajangersimasumik najugaqartuunngitsut pisinnaatitaaffii erseqqissumik immikkoortinneqarlutik. Aalajangersimasumik najugaqartuunngitsut aatsitassanik annertunerusumik annertussusilinnik nunatsinniit annissinissamik kissaateqarpat, aalajangersimasumik najugaqartuunngitsup annertuallaarutaasut aalajangersimasumik najugaqartumit pisiarineqarsimasut imaluunniit ilisimatussutsimik siunertaqarluni katersorneqarsimasut, uppersarsinnaassavaa.

Inuit aalajangersimasumik najugaqartuunngitsut, qaammatinit 3-nit sivikinnerusumik nunatsinniissimasut, tamanna aalajangersimasumik najugaqartumit aaqqissuunneqartumik ilitersuisoqarluni angalaarnermi peqataanerup nalaani pisimanngippat, sulii aatsitassanik katerseqqusaanngillat imaluunniit piiaaqusaanatik. Aamma aalajangersimasumik najugaqartuunngitsut avammut annissinissamut akuersissummik peqaratik imaluunniit aatsitassat aalajangersimasumik najugalimmit pisiarisimallugit uppersarsateqaratik, sulii aatsitassanik annisseqqusaanngillat.

Sumiiffiit akuersissummi aatsitassarsiorluni misissuinissamut akuersissummi, siunnersuutip atuutilinnginnerani tunniunneqartumi, pineqartunut ilaasut, aatsitassanut ikummatissanullu inatsimmi maleruagassani pineqartut sulii ilaatinneqassapput. Tassa imaappoq, aalajangersimasumik najugaqartuunngitsut sumiiffinni taakkunani aatsitassanik sulii katersinnaanngitsut.

Aalajangersimasumik najugaqartut, qaammatini siuliini pingasuni nunatsinniissimasut, aatsitassanik pīaasarnerattuut, aalajangersimasumik najugaqartuunngitsut sumiiffinni aatsitassarsiorluni misissuinissamut akuersissutini pineqartunut ilaatinneqartuni, siunnersuut malillugu aatsitassanik akuersissummi pineqartunut ilaatinneqanngitsunik, katersisinnaassapput. Tassa imaappoq, aalajangersimasumik najugaqartuunngitsut aatsitassanik, siunnersuut malillugu aalajangersimasumik najugaqartut, pīarsinnaasaannik, katersisinnaapput.

Siunnersuummi annikitsumik aatsitassarsiornermut najoqqutassaq, aatsitassanut ikummatissanullu inatsimmit ilisimasarput, atorunnaarsinneqarpoq. Siunissami suli annikinnerusumik annertussusilimmik aatsitassanut tunngasunik suliaqarnissamut akuersissummik qinnuteqartoqarsinnaassaaq, kisianni aaqqissuussineq annertuumik iluarsaassivigeqqinneqarpoq. Allanguutit annertuujunerat pissutigalugu aamma oqaatsip ”annikitsumik aatsitassarsiorneq” atorunnaarsilluinnarneqarnissaa naapertuussorineqarpoq, taamaalilluni aaqqissuussinitoqaq aammalu aaqqissuussineq nutaat imminnut akuliutsinneqassanatik.

Siullertut akuersissut ”kisermaassisussaatitaanani” atorunnaarsinneqarpoq. Tamanna aalajangersimasumik najugaqartut akuersissummik peqaratik aatsitassanik katersinissamut pīaanissamullu pisinnaatitaaffeqarnerisa (takuuk matuma siulianiittoq) annertusitinneqarnerata sunniutigaa. Taamaalilluni akuersissut ”kisermaassisussaatitaanani” annertunerpaatigut pisariaarutsinneqarpoq. Aalajangersimasumik najugaqartup atortorissaarutiniit tiggummaaannartakkanit allaanerusunik atuinissaq kissaatigippagu, inuk kisermaassisussaatitaalluni akuersissummik qinnuteqarnissamik innersuunneqassaaq.

Aappaattut akuersissut ”kisermaassisussaatitaalluni” ingerlateqqinneqarpoq ikittunik allanguuteqartinneqarluni. Piffissaq akuersissuteqarfiusoq ukiunut 5-inut sivitsorneqarpoq (aatsitassanut ikummatissanullu inatsit malillugu piffissaq akuersissuteqarfiusoq ukiunik 3-nik sivisussuseqarpoq), taamaalilluni piffissaq akuersissuteqarfiusoq aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissutitut nalinginnaasutut sivisussuseqalerluni. Siunissami kisermaassisussaatitaalluni akuersissummut pisinnaatitsissummik pigisaqartoq pīaanissamut matusinissamullu pilersaarummik nassiussinissamik pisussaaffeqassaaq. Tamanna maannakkut aatsitassanut ikummatissanullu inatsisip ilaanik ingerlatitseqqiineruvoq, tassani pisinnaatitsissummik pigisaqartoq pīaaniaruni § 38 naapertorlugu akuersissuteqarnermik taaneqartartumik pissarsinissamik pisussaaffeqarluni. Pīaanissamut matusinissamullu pilersaarut sunik imaqassanersoq siunnersuummi erseqqissarneqarpoq, taamatullu matusinermi ingerlatassanut qularnaveeqqusiinissamik pīumasaqarnissamut erseqqissumik inatsimmi tunngavissamik qulakkeerisoqarluni.

Nutaatut allap matusinermik suliaqarnera qanoq akeqassanersoq missingersuinermik kisermaassisussaatitaalluni akuersissummut matusinissamut pilersaarut imaqartussaavoq.

Missingersuineq taanna ingerlatassap pissusiviusuni annikinnerusumik annertussuseqartumik suliaqarnerusussaanersaq, imaluunniit tamatumunnga taarsiullugu aatsitassanut tunngasunik suliaqarnej pillugu Inatsisartut inatsisaannit maleruagassiivigineqartussaalluni ingerlatassaq annertussuseqarnersaq, naliliinissamut atorneqassaaq. Nutaaliorneq taanna maannakkut aatsitassanut ikummatissanullu inatsisip annikitsumik aatsitassarsiornerup aamma nalinginnaasumik annertussusilimmik aatsitassarsiornerup akornanni ersarissunik nassuiaassuteqannginnerannut takussutissaavoq, tamatumami ilaatigut annikitsumik aatsitassarsiornermiit nalinginnaasumik angissusilimmut ikaarsaarnissaq ajornakusuulersimmagu.

Siunnersuummi inunnut 10-nut killiliussiaq, maannakkut aatsitassanut ikummatissanullu inatsimmit ilisimaneqartoq, atorunnaarsinneqarpoq. Siunissami annikinnerusumik annertussusilimmik aatsitassarsiornerissamut akuersissummut ilisarnaataasoq tassaassanngilaq sumiiffimmi akuersissuteqarfiusumi inuit sulisinneqartut amerlassusaat, kisianni tamatumunnga taarsiullugu matusinermut aningaasartuutit annertussusaat ilisarnaataassalluni (takukkit matuma siulianiittut).

Siunnersuummi aammattaaq 100.000 koruuninut killiliussatut taagorneqartoq atorunnaarsinneqarpoq. Inatsisit atuuttut malillugit aalajangersimasumik najugaqartut akuersissummik peqaratik ukiumut 100.000 koruunit angullugit nalilinnik aatsitassanik katersisinnaapput piasinnaallutillu. Maannakkut aatsitassanut ikummatissanullu inatsit atuuttoq malillugu 100.000 koruuninut annertunerusumik nalilinnik katersiniaruni piasaniarunilu, tamatumani annikitsumik aatsitassarsiornerissamut akuersissuteqarnissaq piunasaqaataavoq. Siunissami aalajangersimasumik najugaqartoq akuersissummik peqassanersaq peqassannginnersorluunniit, aatsitassat nalingat aalajangiisuussanngilaq. Siunissami taamaallaat aalajangersimasumik najugaqartoq sumiiffimmut kisermaassisussaatitaanissamik kissaateqarpat, imaluunniit atortorissaarutinit tigummiannartakkanit annertunerusunik atuinissamik kissaateqaannarluni, tamatumani akuersissummik peqarnissaq piunasaqaataavoq.

Siunnersuutip aamma atuunnerani pisinnaatitsissummik pigisaqartut annertusitinneqarput. Maannakkut aatsitassanut ikummatissanullu inatsimmi atuuttumi annikitsumik aatsitassarsiornerissamut akuersissutaasartut taamaallaat inunnut tunniunneqartarlutik, pisinnaatitsissummik pigisaqartoq inuup ataatsip suliffeqarfigissagaa imaluunniit ApS-iussasoq imaluunniit A/S-iussasoq pillugu piunasaqaammik siunnersuut imaqarpoq. Taamaattoq ingerlatseqatigiiffimmi aalajangiisuusumik sunniuteqarneq inunnit Kalaallit Nunaannut atassuteqarnissaq pillugu taamaaqataanik piunasaqaammik naammassinnittunit nakkutigineqartussaavoq, soorlu maannakkut aatsitassanut ikummatissanullu inatsimmi atuuttumi tamanna piunasaqaatigineqartoq. Taamaalilluni aatsitassanut tunngasunik suliaqarnerit ingerlatseqatigiiffittut ilusilimmi ingerlanneqarsinnaanerannut periarfissaq ammaanarpoq, taamaalillunilu aningaasalersuinissap il.il. qulakkeernissaanut periarfissarissaarnerulissalluni, peqatigisaanillu inuit Kalaallit Nunaannut atassuteqarnissaat

pillugu piumasaqaat atuutsiinnarneqassalluni.

Tamatuma saniatigut siunnersuutip atuunnerani akuersissutip akuersissuteqarnerullu oqaasertaasa tamanut saqqummiunneqarsinnaanerata periarfissaqalerpoq. Aammattaaq akuersissummut imaluunniit akuersissuteqarnermut atatillugu Inatsisartut inatsisaat naapertorlugu aalajangiinerit aalajangersimasut tamanut saqqummiunneqarsinnaapput. Siunnersuummi suliassaqaarfimmi ammanerunissaq paasiuminartitsinerunissarluni qulakkeerneqassaaq, ilanngullugu paatsoornernut tunngavissat iliuuseqarluni annikillitseqataavigineqassallutik. Akuersissutinut akuersissuteqarnerullu allakkiat assigiissaartumik oqaasertaqartutut annertuumik nalilerneqarput (soorlu maannakkut aatsitassanut ikummatissanullu inatsimmi atuuttumi taamaattoq), akuersissut imaluunniit akuersissuteqarnerq naapertorlugu aalajangiisoqassappat, taakkua aalajangersimasumut tunngasuunerussasut aammalu pisinnaatitsissummik pigisaqartoq imaluunniit allat pillugit paasissutissanik sukumiinerusunik imaqaarsinnaassasut naatsorsuutigineqarluni. Taamaattumik aalajangiinerit Inatsisartut inatsisaata atornerqarnerata paasineqartarneranut pingaaruteqartutut imaluunniit allatigut tamanut soqutiginaateqartutut nalilerneqartut kisimik tamanut saqqummiunneqartartussaasut, oqaasertaliineq ilanngunneqarluni.

Aatsitassanut ikummatissanullu inatsisip paarlattuanik siunnersuut aatsitassanut ikummatissanullu aqutsisoqarfik pillugu aalajangersakkanik imaqaanngilaq. Tamatuma kingunerisaanik Naalakkersuisut allaffissornikkut aqutsineranni ingerlatsiviup aaqjissuussaannikkut inissinneqarnissaa – suliassaqaarfiit allat amerlanerpaat assigalugit – Naalakkersuisut Siulittaasuanit, taassuma suliassaqaarfinnut akisussaaffeqarfinnik nalinginnaasumik agguaanerani, aalajangiiffigineqassalluni. Aatsitassanut ikummatissanullu inatsimmi ataatsimoortumik akuutitsiviusumillu oqartussat suliarinnittarnerat pillugu tunngaviusoq kiisalu matu ataasiinnaassasoq tunngaviusoq siunnersuummi atuutsiinnarneqarput. Tamatuma kingunerisaanik oqartussap imaluunniit oqartussat Naalakkersuisut Siulittaasuata suliassaqaarfinnut akisussaaffinnik agguaanera malillugu tassaasut oqartussat attuumassuteqartut, ataatsimoortumik akuutitsiviusumillu oqartussat suliarinninnissaat qulakkiissavaat, taamatullu pisinnaatitsissummik pigisaqartut allallu oqartussamik ataasiinnarmik attaveqaqateqartussaallutik suli naatsorsuutigisinnaallugu.

Siunnersuut aammattaaq Naalakkersuisut royaltymik aalajangersaasinnaanerannut inatsimmi tunngavissamik imaqaarpoq.

3. Pisortanut aningaasaqarnikkut allaffissornikkullu sunniutaasussat

Aatsitassarsiornermut suliassaqaarfik nunatsinni aningaasaqarnikkut inuussutissarsiornikkullu ingerlatanut siuariartortitsinermullu tapertaasussatut siuariartortitsiviusasooq pillugu Naalakkersuisut periusissiaannut naapertuuppoq. Ingerlatassat taakkua ilai aammalu siuariartortitsineq taanna, aatsitassarsiornermut suliassaqaarfiup iluani sulisartut amerlanerusut suliffissaqartinneqarnerisigut aammalu suliffeqarfinni ingerlatassanik annertunerusunik suliqaarinnikkut, pisinnaassasoq naatsorsuutigineqarpoq. Tamanna ataatsimut isigalugu

inuussutissarsiornermi ingerlataqarnerulernerumut, inuussutissarsiortut isertitaqarnerulernerannut, pisortat isertitaannut aammalu inuuniarnerup pitsaanerulerneranut iluaqutaassaaq.

Taamaalilluni pisortanut inuiaqatigiinnullu aningaasaqarnikkut allaffissornikkullu pitsaasumik sunniuteqartitsinerup tunngavissinneqarnissaa, siunnersuummi siunnerfigineqarpoq. Taamaattoq siunnersuut pisortat aningaasaqarnerannut qanoq sunniuteqassanersoq, aningaasartaasa missiliorniarsarinissaat annertuumik nalorninartortaqrpoq. Tamatumunnga ilaatigut pissutaavoq, aatsitassanut suliassaqrarfiup nunarsuarmi akit nikerarnerannit annertuumik sunnerneqartarnera, ilanngullugit aatsitassanut niuerfimmi akigitat. Tamatuma saniatigut tamatumunnga pissutaavoq, pissutsit arlallit assigiinngitsorujussuillu aammalu nikerartut pitsaasumik pitsaanngitsumillu sunniutaasinnaasunut pingaaruteqartussaannerat.

Naatsorsuutigineqarpoq ataatsimut isigalugu sulisut aatsitassanut suliassaqrarfiimmi ingerlatsivimmi aqutsinermik suliaqartut suliassatigut piginnaanngorsarnissaannut amerlisinnissaannullu aningaasanik annertuumik amerlanerusunik immikkoortitsisoqassanngitsaq. Taamaakkaluartoq aningaasanik taamaattunik pisariaqartitsisoqalissappat, taakkua sapinngisamik pisinnaatitsissummik pigisaqartup oqartussat sularinninneranni aningaasartuutinik utertitsilluni akiliineranit matussuserneqartassapput.

Aallartisarnermi paasissutissiisarnermut suliniuteqarnerulernerumut aamma immersugassanik il.il. nutarterinermut aningaasartuutit saniatigut, siunnersuutip pisortanut annertunerusunik aningaasaqarnikkut allaffissornikkullu sunniuteqarnissaa naatsorsuutigineqanngilaq.

4. Inuussutissarsiortunut aningaasaqarnikkut allaffissornikkullu sunniutaasussat

Pitsaasumik sunniutaasinnaasunut ilaatigut siunnersuut malillugu akuersissutinik qanoq annertutigisumik tunniussisoqartarnissaa aammalu pisinnaatitsissummik pigisaqartut akuersissutit malillugit ingerlatassanik qanoq annertutigisunik suliaqarnissaat, tamatumunngalu atatillugu isertitaqartarnissaat, apequtaasussaapput, ilanngullugu pisinnaatitsissummik pigisaqartut aatsitassanut tunngasunik suliaqarneq pillugu Inatsisartut inatsisaat malillugu pijaanissamut akuersissutinik pissarsissanersut.

Siunnersuut nalinginnaasumik inuussutissarsiortunut aningaasaqarnikkut imaluunniit allaffissornikkut nammagassaqrarnerulernerumik malitseqartussaannngilaq.

5. Avatangiisinut, pinngortitamut inuillu peqqissusaannut sunniutaasussat

Suliassaqrarfiimmi Inatsisartut inatsisaannik nutaamik akuersineq najukkani aatsitassanut tunngasunik suliaqarnerumut soqutiginninnerulersitsissasoq, taamaalillunilu suliassaqrarfiimmi suliaqarnerulernerumik malitseqassasoq, ilimagineqarpoq. Tamatuma pitsaanngitsup tungaanut avatangiisit pinngortitarlu sunnersinnaassavai.

Suliaqarnerulersinnaanerup annertussusaa sioqqutsisumik nalilerneqarsinnaangilaq, kisianni siunnersuummi annikinnerusunik annertussusilinnik suliaqarnerit maleruagassiivigineqarmata, aammalu siunnersuummi avatangiisini sunniinissap killilersimaarnissaa ukkatarineqarluni, siunnersuut avatangiisinut pinngortitamullu killilinnik taamaallaat sunniuteqassasoq naatsorsuutigineqarpoq.

Siunnersuut inuit peqqissusaannut sunniinernik malitseqassasoq naatsorsuutigineqanngilaq.

Siunnersuummi qulequttat matuma siuliani taaneqartut pillugit aalajangersakkat annertunerpaatigut aatsitassanut tunngasunik suliaqarneq pillugu Inatsisartut inatsisaanni qulequttat assingi pillugit aalajangersakkanut assingupput.

6. Innuttaasunut sunniutaasussat

Siunnersuutip atuunnerani nalinginnaasumik inunnut ataasiakkaanut aalajangersimasumik najugaqartunut ammanerulersitsisoqarpoq pisariillisaasoqarlunilu. Taamaattumik nunatsinni innuttaasut amerlanerusut aatsitassanut suliassaqaqarfiup iluani inuussutissarsiummik ingerlatsillutik aallartissinnaanerannut tunngavissaliisutut siunnersuut nalilerneqarpoq.

7. Sunniutaasussat annertuut allat

Siunnersuutip allanik annertuunik sunniuteqarnissaa naatsorsuutigineqanngilaq.

8. Oqartussanut kattuffinnullu ilaalu ilanngullugit tusarniaaneq

Siunnersuut piffissami 2023-mi ulloq 12. oktober aallarnerfigalugu ulloq 17. novembari tikillugu tusarniaanermut nittartakkami www.naalakkersuisut.gl-imi tamanut ammasumik saqqumitinneqarpoq.

Siunnersuut piffissami tassani oqartussani, kattuffinni ilaalu ilanngullugit makkunani tusarniaassutigineqarpoq:

Asiaq, Avannaata Kommunia, DCE, GEUS, Nunatta Eqqartuussivia, Sulisitsisut, Pinngortitaleriffik, Kalaallit Nunaanni Politiit, ICC, Kommune Kujalleq, Kommune Qeqertalik, Kommuneqaarfik Sermersooq, Nunatta Nakorsaaneqarfia, Nunatta Katersugaasivia Allagaateqarfialu, Nuna Advokaatit, Nunagreen, NUSUKA, Qeqqata Kommunia, SIK, Tusass, Ilangaaserisoqarfik, Transparency International Greenland, WWF, Urani naamik, Mingutsitsinngitsumut Allanngoriartortitsinermut Siunnersuisooqatigiit, Ataavartumik Nukissiorneq, Nuup Kangerluata Ikinngutai, Visit Greenland, pisinnaatitsissummik pigisaqartut aatsitassat ikummatissallu pillugit Inatsisartut inatsisaat malillugu paaanissamut akuersissummik peqartut tamarmik aamma annikitsumik aatsitassarsiorinissamut akuersissut malillugu pisinnaatitsissummik pigisaqartut tamarmik.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut

Naligiissitaanermullu Naalackersuisoqarfiup oqartussanit, kattuffinnit ilaalu ilanngullugit, tusarniaanermut akissuteqaatit makkua tiguai:

Amaroq Minerals Ltd, Anglo American, BDO, Bluejay Mining Plc, Bo Eder-Jensen, Energy Transition Minerals Limited, Greenfields Exploration Limited, Greg Barnes, Sulisitsisut, Grønlandsbanken, Hudson Resources Inc., Kaali Fencker, Kommune Kujalleq, Kommunarfik Sermersooq, Lumina Sustainable Materials A/S, Dykkerfirmaet MASIK, Nalik Ventures, Nuna Advokaatit, Palle Møller, Qeqqata Kommunia, Resource 500, SIK aamma Transparency International Greenland.

Tusarniaanermut takussutissiaq oqaaseqaateqarfigineqartoq, ilanngussatut ilanngunneqartoq, innersuussutigineqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Aalajangersagaq siunertanut paragraffiuvoq, taamaalillunilu atugassarititaasunik aalajangersaanissamut imaluunniit aalajangiinissamut kisimi inatsimmi tunngaviusinnaanani. Naalackersuisut siunnersuut malillugu oqartussat suliarinninnermut atatillugu inatsisit malillugu mianerisassat suut eqqarsaatigisinnaanerat, aalajangersakkami taamaallaat allassimavoq.

Imm. 1-imut

Aalajangersakkami siunnersuummi siunertaq pingaarneq allassimavoq. Siunnersuummi § 1, imm. 1 malillugu ilaatigut Kalaallit Nunaanni aatsitassanut tunngasunik suliaqarnerit naapertuuttumik maleruagassiivigineqarnissaat qulakkeerneqassaaq. Taamaalilluni siunertaavoq siunnersuut inatsisit immersugassatut, aatsitassanut tunngasunik suliaqarnernik allanillu aatsitassanut tunngasunik suliaqarnernut atatillugu ingerlatassanut maleruagassiinnermut aamma oqartussat suliarinninnerannut tunngaviusunik pingaarnerpaanik aalajangersaaviussasoq, aammalu Naalackersuisut killissaliussat taakkua iluanni aalajangiinissamut aamma aalajangersakkanik pisariaqartunik aalajangersaanissamut piginnaatinneqassasut.

Aalajangersakkani mianerisassat pissutsillu suut atugassarititaasuni nalinginnaasuni aammalu akuersissutinut ilusiliani aatsitassanut suliaqarfimmi suliarineqartussani, aammalu aalajangiinerni aatsitassanut suliaqarfimmi Naalackersuisunit aalajangiunneqartussani ilanngunneqarnissaannut killissaliussat pingaarnerit ilaatigut aalajangersarneqarput. Siunnersuummi ataatsimut isigalugu aatsitassanut suliaqarfimmi ineriartortuutimik nassuiaasinnaanissaq qulakkeerneqarpoq, taamaalilluni aatsitassanut suliaqarfimmi ilisimasat nutaat aamma teknologii, inatsit allanngortinneqartariaqarani, ingerlaannaq atorneqarsinnaalertassallutik.

Naapertuuttumik aatsitassarsiorluni misissuinnermi aammalu aatsitassanik piiiaanermi ataatsimut isigalugu ingerlatassat naapertuuttumik, ilanngullugu imm. 2-imi mianerisassanut naapertuuttumik, aqqissuunneqarnissaat suliarineqarnissaallu tunngavissaatinneqarpoq. Naapertuuttumik aatsitassanik piiaanissap ilaatigut kingunerisaanik, siunnersuut aatsitassanut tunngasunik suliaqarnerup ingerlanneqarnerani, ilanngullugu pingaartumik aatsitassanik piiiaanermi, aningaasaqarnikkut pissarsiassanit inuiaqatigiit naapertuuttumik pissarsitinnissaannut aammalu ingerlatassat taakkua inuiaqatigiit qanittumi ungasissumilu pisariaqartitaannut naapertuuttumik suliarineqarnissaannik, qulakkeerineqataassaaq.

Sunniuteqarluartumik aatsitassarsiorluni misissuinnermi aatsitassanillu piiiaanermi nalinginnaasumik tunngavissaatinneqarpoq, ingerlatassat sunniuteqarluartumik suliarineqassasut, ilanngullugit mianerisassanut imm. 2-mi allassimasunut naapertuuttumik.

Tamatuma ilaatigut atuunnerani pisinnaatitsissummik pigisaqartup tunniussereernerup kingorna piffissami ajornarunnaarnerani ingerlatassat akuersissummi imaluunniit akuersissuteqarnermi pineqartunut ilaasut suliarineqarnerannik aallartittarnissaanut aammalu pisinnaatitsissummik pigisaqartup pisariaqanngitsumik imaluunniit sivisuumik unikkallarani imaluunniit kipititsinani akuersissuteqarnermut attuumassutilimmut naapertuuttumik piffissami akuersissuteqarfiusumi ingerlatassanik suliarinninnissaanik, siunnersuut qulakkeerineqataassaaq. Tamanna ilaatigut sumiiffimmik tunngavissaqanngitsumik pisariaqanngitsumillu “nunaminertamik inniminniisarnerit” pinngitsoortinnissaanut iluaqutaassaaq.

Aatsitassarsiorluni misissuinermit aatsitassanillu piiaanermut atatillugu ingerlatassanik suliaqarneq nalinginnaasumik paasineqassaaq tassaasoq, ingerlatassat allat tamarmik, ingerlatassanut pineqartumut attuumassuteqartut, ilanngullugit aatsitassarsiorluni misissuineq aatsitassanillu piiaaneq pillugit ingerlatassani saniatigut ingerlatassat imaluunniit ingiaqatigisaanik ingerlatassat. Ingerlatassanik allanik taamaattunik suliaqarneq pisut ilaanni immikkut akuersissuteqarfigineqarnissaat pisariaqartussaassaaq.

Imm. 2-mut

Aalajangersagaq malillugu, ingerlatassat isumannaallisaanermut, peqqinnissamut, isumalluutunik atorluaanissamut inuiaqatigiinnilu piujuartussamik sunniuteqartitsinissamut tunngatillugu innuttaasut peqqissusaannut ajoqusiinngitsumik aammalu naapertuuttumik isumannaatsumillu suliarineqartarnissaat, ilaatigut siunnersuummi tunngavissaatinneqarpoq.

aalajangersakkami ilaatigut illunik, suliaqarfissanik, atortulersuutunik ikkussukkanik attaveqatigiinnernillu ilaalu ilanngullugit pilersitsinermi ingerlatsinermilu sumiiffiini isumannaallisaaneq pineqartunut ilaapput. Siunnersuummi peqqissutsimut oqaaseq atorneqartoq atituumik nassuiarneqassaaq, aamma sulianut ataasiakkaanut atatillugu sullivinni avatangiisinut tunngatillugu peqqinnissamut, aamma nalinginnaasumik inuit peqqissusaannut tunngassuteqarluni.

Avatangiisini ilaatinneqarput avatangiisini mianerisassat nalinginnaasut, tamanna pillugu kapitalit immikkuullarissut naapertorlugit ingerlatassanik siunnersuummi pineqartunut ilaasunik suliaqarnermi inunntut, uumasunut, naasunut pinngortitamullu pingaaruteqartut.

Isumalluutunik isumannaatsumik atuineq ilaatigut paasineqassaaq, pisariaqanngitsumik isumalluutunik maangaannartitsinani aammalu qanittumi ungasissumilu inuiaqatigiit soqutigisaat mianeralugit, aatsitassarsiorluni ingerlatassat ingerlanneqassasut. Taakkunani ilaatinneqarput ilaatigut aatsitassarsiorluni ingerlatassanik suliaqarnermi aatsitassanillu piiaanermi, ingerlatassanik pilersitsinissamut, aammalu sulisussat aammalu nioqqtissanik kiffartuussinernillu pilersuisussat najukkameersut misilittagaqalernissaannut piginnaasaqalernissaannullu aammalu Namminersorlutik Oqartussat, sulisartut aamma nioqqtissanik kiffartuussinernillu pilersuisut najukkameersut isertitaqartilernissaannut

inuiaqatigiit soqutigisaqarnerat.

Siunnersuummi inuiaqatigiinni piujuartussamik sunniuteqartitsisarneq pillugu maleruagassat, ingerlatassanik siunnersuummi matumani pineqartunut ilaasunik pilersaarusernerup aqutsinerullu aamma ingerlatassat nunami namminerimi najukkamilu inuiaqatigiinnut sunniutigisinnaasaannik nalilersuineq aallaavigalugu aamma pisarnissaanut qulakkeerineqataassapput.

Aalajangersakkat atuunneranni taamaalilluni ingerlatassat siunnersuummi pineqartunut ilaatinneqartut tamarmik tamakkiisumik isiginnilluni pilersaaruserneqarnissaat aqunneqarnissaallu piumasaqaataavoq.

Imm. 3-mut

Aalajangersakkami aalajangersarneqarpoq aatsitassanut suliassaqarfimmi oqartussat suliarinninnerat ataatsimoortumik akuutitsiviusumillu oqartussat suliarinninnerattut aaqqissuunneqassasoq. Oqartussat suliarinninneranni siunnersuut ingerlatassallu tassunga atasut pillugit pissutsit tamarmik pineqartunut ilaatinneqarput. Naalackersuisut taamaalillutik nalinginnaasumik ingerlatassanut siunnersuummi pineqartunut ilaasunut oqartussaapput aqutsisussaasut.

Tamanna isumaqanngilaq allaffissornikkut aalajangiinerit tamarmik siunnersuut malillugu aalajangiiffigineqartut politikikkut aalajangiinerussasut. Siunnersuummi aalajangersakkat allaffissornikkut aqunnissaannut aammalu siunnersuut malillugu aalajangiinissanut piginnaatitaaneq annertuumik Naalackersuisumut aatsitassanut aamma/imaluunniit tamatumunnga atatillugu avatangiisinut tunngasunut, imaluunniit aqutsisoqarfinnut taakku ataaniittunut, suliassaqarfimmi akisussaasuusumut, suliakkiissutigineqarpoq.

Taamaattumik siunnersuut malillugu aalajangiinerit amerlanersai aammalu oqartussat suliarinninnerat tamarmi Naalackersuisumit aammalu Naalackersuisoqarfimmit imaluunniit taassuma ataani aqutsisoqarfinnit aatsitassanut akisussaasuusunit, isumagineqartussaapput.

Taamaattoq Naalackersuisut sukulluunniit suliakkiineq taanna allanngortissinnaavaat, ilanngullugu siunnersuut malillugu aalajangiinerit aalajangersimasut Naalackersuisunit tamarmiusunit imaluunniit Naalackersuisumit naalackersuisoqarfinni suliassaqarfimmut allamut akisussaasuusumit aalajangiiffigineqartassasut, aalajangersinnaallugu.

Oqartussat suliarinninnerat ataatsimoortoq akuutitsiviusorlu ingerlatsivimmi aqutsinerimi suliassaqarfimmi teknikkikkut ajornakusoortumi, aatsitassarsiorluni ingerlatassanut, ingerlatassanut ilaatinneqartunut, aatsitassarsiorlunissamut akuersissutinut, tamatumunnga atatillugu ujarassiornermut, teknikkimut aningaasaqarnermullu tunngasunut aammalu pissutsinut tamatumunnga atatillugu isumannaallisaaanermut, peqqinnissamut, avatangiisinut, isumalluutinik atorluaanissamut aamma inuiaqatigiinni piujuartitsisumik

sunniuteqartitsinissamut pingaaruteqarsinnaasunut ilisimasaqarnissamik pisariaqartitsiviusumi, tamakkiisumik isiginnilluni suliaassanik suliarinnittarnerup ingerlaannarnissaanut iluaqutaassaaq.

Aammattaaq oqartussat ataatsimoortumik akuutitsiviusumillu suliarinninneranni suliaasaqarfinni avatangiisunik, suliaassanik aatsitassanut suliaasaqarfimmi ingerlatsivimmi aqutsinermi pisariaqartumik pitsaassusilimmik, aammalu nunami namminermi nunanilu tamalaani aatsitassarsiornermut suliffeqarfiit naatsorsuutigisaannik, sukkulluunniit isumaginnissinnaasunik peqarnissaq qulakkeerreqassaaq nukittorsarreqassallunilu.

Aalajangersakkami aammattaaq aalajangersarneqarpoq, oqartussat attuumassuteqartut siunnersuummik allaffissornikkut aqutsinerminni aamma tassaasut inatsisit maleruagassallu allat malillugit, tamanna ajornarsimangippat, oqartussaq aalajangiisinnaatitaasoq.

Imm. 4-mut

Aalajangersagaq manna malillugu aatsitassanut suliaasaqarfimmi oqartussat suliarinninnerat attaveqatigiinnerlu matu ataasiinnarmut tunngaviusumik taagorneqartoq malillugu aaqqissuussaapput. Tamatuma atuunnerani pisinnaatitsissummik pigisaqartut allallu siunnersuummi pineqartunut ilaasut, nalinginnaasumik oqartussaq ataasiinnaq attaveqatigisassavaat.

§ 2-mut

Aalajangersakkami aalajangersarneqarpoq aatsitassanik Kalaallit Nunaanni nunap iluaniittunik atuinissamut paaanissamullu Namminersorlutik Oqartussat piginnittussaataasut, taamaalillutillu aamma Kalaallit Nunaanni nunap iluaniittut aatsitassat pillugit akuersissutinik tunniussinissamut pisinnaatitaasut.

Tamatuma ilaatigut malitsigisaanik siunnersuut malillugu akuersissut malillugu misissugassat tiguneqartut, akuersissutip atorunnaarnerani, Namminersorlutik Oqartussanit pigineqarput. Tamanna misissugassanut akuersissutip atorunnaarnerani Kalaallit Nunaanniittunut aammalu misissugassanut nunani allaniittunut atuuppoq.

Aalajangersagaq namminersornermut inatsimmut naapertuuppoq. Namminersornermut inatsit malillugu Namminersorlutik Oqartussat aatsitassanut suliaasaqarfik akisussaaffigilerlugu tiguppasuk, aatsitassat Kalaallit Nunaanni nunap iluaniittut pigilernissaannut atorluarnissaannullu Namminersorlutik Oqartussat piginnittussaataalertussaapput. Takuuk namminersornermut inatsimmut nassuiaatini nalinginnaasuni immikkoortoq 6. Namminersorlutik Oqartussat ulloq 1. januar 2010 aatsitassanut suliaasaqarfik akisussaaffigilerlugu tiguaat.

§ 3-mut

Imm. 1-imut

Siunnersuutip inuiaat pisinnaatitaaffiit naapertuuttumik nunap sumiiffiini atuuffiit aalajangersakkami aalajangersarneqarput, ilanngullugit Naalagaaffiit Peqatigiit (FN-ip) imaanut maleruagassiisarneq pillugu nunani tamalaani isumaqatigiissutaat 10. December 1982-imeersoq.

Kalaallit Nunaanni imartaq oqartussaaffigineqartoq killeqarfimmiit 3 sømilinut (5.556 meter) isorartussuseqarpoq. Nunavittap sumiiffiani ilaatinneqarput immap naqqa sumiiffimmilu nunap oqartussaaffiup pissusissamisoortumik nanginnerani tamarmi imartap akisussaaffeqarfiusup killeqarfianit silarlermiit nunavittap sumiiffiata killinganut silarlermut isorartussuseqartumi immap naqqata ilua. Imaanut maleruagassiisarneq pillugu nunani tamalaani isumaqatigiissummi artikel 76 malillugu tamanna pisussaavoq..

Nunavittap sumiiffia tamatigut killeqarfimmiit 200 sømilinik isorartussusilimmut killeqartinneqarsinnaavoq, tassangaaniit imartap akisussaaffeqarfiup silissusaa uuttoqarsinnaalluni. Nunavittap sumiiffiata killinga silarleq killeqarfinnut taakkununga qaninnerutillugu, aamma tamanna atuutissaaq. Naalagaaffiup sineriaqartup nunavittaata sumiiffia naalagaaffiit allat sumiiffianut killitsillugu, nunavittap sumiiffianut nunani tamalaani isumaqatigiissut malillugu killilersuineq naalagaaffiit sanileriit akornanni isumaqatigiissuteqarnikkut aalajangersarneqassaaq. Takuuk imaanut maleruagassiisarneq pillugu nunani tamalaani isumaqatigiissut artikel 76.

Kalaallit Nunaanni nunavittap sumiiffia naalagaaffinnut saniliusunut tamakkiisumik killissalersugaanngilaq. Naalagaaffiup sineriaqartup nunavittap sumiiffianut pisinnaatitaaffeqarneranut pisortatigoortumik tiguaasimanissaq imaluunniit nalunaarummik uppersaateqarnissaq piunasqaataanngilaq. Imaanut maleruagassiisarneq pillugu nunani tamalaani isumaqatigiissummi artikel 77 a malillugu nunavittap sumiiffianut pisinnaatitaaffiit taamatut imminermi aammalu nunavittap sumiiffiata killissalersorneqarsimanera apequtaatinnagu atuupput.

Imm. 2-mut

Sanaartukkanut aaqqissuussinernullu ilaalu ilanngullugit nunami akisussaaffiusumiittunut, imartami akisussaaffeqarfiusumiittunut, nunavittap sumiiffiani sumiiffinniittunut imaluunniit Kalaallit Nunaata aningaasarsiornikkut oqartussaaffigisaaniittunut, aammalu ingerlatassanut siunnersuummi pineqartunut ilaasunut atatillugu atorneqartunut siunnersuut atuutissasoq, aalajangersakkami aalajangersarneqarpoq.

§ 4-mut

Imm. 1-imut

Aalajangersakkami siunnersuutigineqartumi allassimasutut, avatangiisinik allanngutsaaliuineq

pillugu siunnersuummi maleruagassani aamma, kisianni taakkuinnaanngitsunut, silap pissusaanut tunngasut (silap pissusaanik allanngutsaaliuineq) aamma pinngortitamik allanngutsaaliuinissaq (pinngortitamik illersuineq) siunnerfigineqarput. Taamaattoq tamanna siunnersuummi taamaallaat aallaaviuvoq, tassami aalajangersakkami aalajangersarneqarpoq allatut aalajangersakkani ataasiakkaani allassimasoqarsinnaasoq.

Silap pissusaanut tunngassuteqartunut tunngatillugu oqaatigineqassaaq, oqaatsimi sumiiffimmiinnaq silap pissusaanut tunngassuteqartut annikitsuaqqat, ingerlatassap CO2-mut ilapittuina kiisalu siunissami silap pissusaata allanngornerani sunniutaasussat, soorlu assersuutigalugu erngup portuneruleriartornera, pineqartunut ilaatinneqarmata.

Siunnersuummi kapitalini allani, aamma avatangiisinut tunngasunut siunnerfeqartuni qalleraattoqarsinnaavoq. Qalleraattoqarnerani imaluunniit assigiittoqarnerani maleruagassaq qaffasinnerpaamik avatangiisinut malitassiinermik malitseqartoq, tamanna paasillugu avatangiisinik allanngutsaaliuinnermut qaffasinnerpaamik annertussuseqartoq, salliutinneqassaaq.

Siunnersuummi avatangiisinik allanngutsaaliuineq pillugu maleruagassat atorneqarneranni issittumi VVM-imut malittarisassat (Guidelines for Environmental Impact Assessment (EIA) in the Arctic) programmip Arctic Environmental Protection Strategy ataani Arctic Council-imit suliarineqartut, ingerlatassat annertussusaat il.il. malillugu naleqqussarlugit ilaatigut pingaartinneqarsinnaapput.

Imm. 2-mut

Aalajangersagaq siunnersuutigineqartoq malillugu silap pissusaanik allanngutsaaliuineq aamma pinngortitamik illersuineq taamaaqataanik taarsiinissamut akisussaasuuneq, mingutsitsinermut allatut akisussaasuuneq, avatangiisinut allatut sunniineq (avatangiisinut akisussaasuuneq) aamma avatangiisini ajoqusinernut taarsiisarneq pillugit siunnersuummi maleruagassani pineqartunut ilaatinneqarpoq.

§ 5-imut

Imm. 1-imut

Aalajangersakkami aatsitassanut tunngasunik suliaqarneq pillugu Inatsisartut inatsisaanni ”aatsitassat” nassuiaassutaat innersuussutigineqarpoq. Aatsitassanut suliaqarfik akimorlugu ”aatsitassat” assigiimmik nassuiarneqartarnissaat qulakkeerniarlugu, siunnersuummi aatsitassanut oqaatsimut immikkut nassuiaassummik allataqarnissaq eqqumaffigalugu toqqarneqanngilaq.

Inatsisartut inatsisaata aappaani nassuiaassut piffissap ingerlanerani naleqqussarneqassappat, nassuiaassut aatsitassanut suliaqarfik akimorlugu ingerlaannartumik atuuttussanngussaaq. Tamatumani nassuiaassutip suleriaatsillu assigiissaarneqarnissaat qulakkeerneqassaaq,

peqatigisaanillu aatsitassanut inatsisini assigiinngitsuni oqaatsip taassuma assigiinngitsumik nassuiaaserneqarsinnaanera pakkersimaarneqassalluni.

Imm. 2-mut

Aalajangersakkami oqaaseq ”najukkani aatsitassanut tunngasunik suliaqarneq” nassuiaaserneqarpoq. Nassuiaassut aatsitassanut suliaassarfiup iluani nutaaliornuvoq. Aalajangersakkami aalajangersarneqarpoq oqaaseq aningaasartanut killissaliussatut nassuiarneqassasoq, tassaalluni allap matusinissamut pilersaarummi suliaqarneranut aningaasartuutit missingersorneqartut.

Oqaatigineqarpoq aningaasartaannut killiliussaq aalajangersakkami aalajangersarneqartoq, atortussanut akuersissuteqarneq pillugu siunnersuummi kapitale 6-imi aalajangersakkanut sunniissanngitsoq. Maleruagassat assigiit atuupput aammalu atortussanut akuersissuteqarnerit assigiimmik suliarineqartussaallutik, ingerlatassat unitsinneqarnerannut atatillugu matusinermut aningaasartuutissat aalajangersakkami matumani aningaasartaannut killiliussanit annertunerunerat annikinnerunerallu apeqqutaanani.

Imm. 3-mut

Aalajangersagaq malillugu aalajangersimasumik najugaqartoq nassuiarneqarpoq tassaasoq inuk Kalaallit Nunaanni aalajangersimasumik najugaqartoq aammalu Kalaallit Nunaannut tamakkiisumik akileraartussaataasoq – aamma ukiuni siuliini tallimani taamatut inissisimasimasoq.

§ 6-*imut*

Imm. 1-imut

Ingerlatassani siunnersuummi kapitali 2 malillugu akuersissummik peqarani suliarineqartuni, avatangiisinik innarlitsaaliuinissaq pillugu Inatsisartut inatsisaanni § 6-imi avatangiisinik innarlitsaaliuinnermut maleruagassat atuuttut nalinginnaasut, malinneqartussaapput.

Aalajangersimasumik najugaqartut, imm. 1 malillugu ingerlatassanik suliaqartut, taamaalillutik avatangiisinut piumasaqaatit makkua malittussaavaat:

1. Aatsitassanik katersineq piianerlu, mingutsitsinissap navianaateqarnera sunniuteqarnissaalu sapinngisamik pitsaanerpaamik killilerneqartussanngorlugu, sumiiffimmi inissisimatinneqassaaq.
2. Katersinermi piianermilu piffissap sumiiffiullu toqqarneqarneranni sumiiffiup qanoq issusaa, ilanngullugit naasut uummasullu, maannakkut siunissamilu piianeq, kiisalu avatangiisinut isumannaatsumik imikoornert eqqagassallu iginneqarnissaannut periarfissat kiisalu ajutoornissanik pitsaaliuineq, eqqarsaatigineqassapput.
3. Aatsitassanik katersinermik piianermillu suliaqartoq imaluunniit aallartitsiniartoq,

mingutsitsinerup pitsaaliornissaanut pakkersimaarnissaanullu iliuusissat pisariaqartut aalajangiutissavai aammalu suliaqarneq sapinngisamik annertunerpaamik mingutsitsisinnaajunnaarlugu ingerlanneqassalluni.

4. Suliaqarnermi sanaartukkanik aaqqissuussinermi aammalu ingerlatsinerup aaqqissuunneqarnerani, ilanngullugu tunisassiornerup ingerlanissaannut, nioqutissiassanik, akuutissanillu iluaqutaasussanik toqqaanermi, sapinngisamik pitsaanerpaamik isumalluutininik atuinissap, mingutsitsinissaq eqqagassaqalersitsinissallu killilersimaarnissaat qulakkeerneqassaaq.

5. Silaannarmi, imeqartuni, sermeqartuni, qaqqani imaluunniit issuni mingutsitsisimasoq imaluunniit taamatut mingutsitsinerup pilersinnaanerani aarlerinartorsiortitsilersimasoq, mingutsitsinerup kingunerisassaasa sunniuteqarluartumik pitsaaliornissaannut pinngitsoortinnissaanullu iliuusissanik pisariaqartuninik iliuuseqassaaq. Tamatuma saniatigut maannamut qanoq issusaa iluarseqqinniarneqassaaq.

Imm. 2-mut

Aalajangersakkami allassimavoq, ingerlatassani siunnersuummi kapitali 2-mi pineqartunut ilaasuni, aatsitassanik qinngornernik ulorianartuninik akullinnik katersinissamut, piiaanissamut imaluunniit suliaqarnissamut pisinnaatitaaneq pineqartunut ilaatinneqanngitsoq. Aatsitassat qinngornernik ulorianartuninik akullit paasineqassaaq tassaasut aatsitassat pinngoqqaatinik qinngornernik ulorianartuninik akullit. Taakkua assersuutigalugu tassaapput uran, thorium aamma plutonium. Allattukkat tamakkiisuunngillat.

§ 7-imut

Imm. 1-imut

Aalajangersakkami innuttaasut aalajangersimasumik najugaqartut immikkut akuersissummik peqaratik aatsitassanik katersinissamut piiaanissamullu immikkut periarfissaqarnerat aalajangersarneqarpoq.

Aalajangersakkami aatsitassanik katersinerpiaq piiaanerpiarlu taamaallaat maleruagassiivigineqarput. Assersuutigalugu inatsisit allat malillugit sumiiffimmi angalaarnissamut akuersissummik peqarnissaq imaluunniit akuersissuteqarfigineqarsimanissaq piumasaqaatigineqarpat, aalajangersakkami aalajangersimasumik najugaqartoq akuersissummik imaluunniit akuersissuteqarnermik taassuminnga piniarnissamik pisussaaffeerutsinneqanngilaq. Taamaaqataanik aalajangersakkami aalajangersimasumik najugaqartoq aatsitassanik katersinermut piiaanermullu atatillugu ingerlatassanik suliaqarnermi inatsisinik allanik naammassinninnissamik pisussaaffeerutsinneqanngilaq. Assersuutigalugu inatsimmi allami aalajangersakkamik, sumiiffimmi assartuutininik imaluunniit suliaqarnermik aalajangersimasuninik atuinissamik killiliisunik, aalajangersaasoqarsimappat, aalajangersimasumik najugaqartup

assartuutip atorreqarnera imaluunniit suliaqarneq aalajangersagaq malillugu aatsitassanik katersinermut imaluunniit piaanermut atatillugu ingerlanneqaraluartoq, killiliinerit taakkua isiginiartussaavai. Taamaaqataanik inatsisini allani inerteqquteqarnerit ataqqineqartussaapput. Inatsisini allani sumiiffimmi angalaarnissaq imaluunniit ingerlatassanik suliaqarnissaq inerteqqutigineqarpat, inuit aalajangersagaq manna innersuussutigalugu sumiiffimmi angalaarsinnaanngillat imaluunniit ingerlatassanik suliaqarsinnaanatik. Inatsit alla taanna oqaasertai malillugit aatsitassarsiorluni suliaqarnernut atuutinngikkaluartoq, tamanna aamma atuutissaq.

Inatsisini allani aalajangersakkanik, aatsitassanik piaanissamik, katersinissamik, imaluunniit aserorterinissamik killiliisunik, aalajangersaasoqarsimatillugu, aalajangersakkat taakkua aamma aalajangersagaq manna malillugu aatsitassanik katersinermut piaanermullu tunngatillugu atuuttussaapput. Assersuutigalugu eqqissisimatitsineq pillugu nalunaarummi aatsitassanik katersineq imaluunniit piaaneq pillugu ingerlataqarnissamik inerteqquteqarneq aalajangersarneqarsimappat, inerteqquteqarneq suli atuuttussaavoq, aamma nalunaarut siunnersuummi § 10, imm. 1, nr. 3 malillugu sumiiffimmut nunap sannaatigut eqqissisimatitaasumut tunngassuteqanngikkaluartoq.

Aalajangersimasumik najugaqartunut tunngatillugu inuussutissarsiutigalugu aamma inuussutissarsiutigiginagu katersisarneq piasarnerlu immikkoortinneqanngillat. Naatsorsuutigineqarpoq aalajangersimasumik najugaqartut annikinnerusumik annertussusilimmik aatsitassarsiorfimmik ingerlatsinissamik eqqarsaateqarunik, aalajangersimasumik najugaqartut siunnersuummi kapitali 3 malillugu sumiiffimmi aalajangersimasumi kisermaassisussaataalluni akuersissummik qinnuteqarnissamut periarfissaqarnertik atorumanerussagaat.

Aalajangersakkami aalajangersarneqarpoq aalajangersimasumik najugaqartoq aalajangersagaq malillugu katersinissamut piaanissamullu atortunik tiggummaannartakkanik atuisinnaasoq. Atortut motorillit aamma motooreqanngitsut atorreqarsinnaapput. Aalajangiisuvoq sakkut tamarmik piaanerup nalaani tiggummaannarneqarsinnaasut, tamatumani assersuutigalugu qaartiterutissanik aammalu sakkunik avataaniit nukissiamik pilersorneqartunik, assersuutigalugu generatorinik dieselitortunik il.il. atuinissaq mattunneqarpoq. Taamaaqataa aamma aatsitassanik piaanissamut imaluunniit avissaartiterinissamut akuutissanik uumaatsunik atuilluni periaatsinik atuinissamut atuuppoq. Tamatumunnga tunngavilersuutigineqarpoq, atortunik taamaattunik atuinissaq kissaatigineqarsimappat, ilaatigut nunataanut inuillu isumannaatsuunissaannut tamatuma annertunerusumik sunnuteqarnissaa ilimagineqartariaqartoq. Aalajangersimasumik najugaqartut atortunik annertunerusunik atuinissamik kissaateqartut, siunnersuummi kapitali 3 malillugu sumiiffimmut aalajangersimasumut kisermaassisussaataalluni akuersissummik qinnuteqarnissamut periarfissaqarnertik atussagaat, innersuussutigineqarsinnaavoq.

Aalajangersakkami aatsitassanut aalajangersagaq malillugu katersorneqartunut imaluunniit

piarneqartunut nalinginut killiliussamik aalajangersaasoqanngilaq. Taamaalilluni aatsitassanut ikummatissanullu inatsimmi 100.000 koruuninut killissamik taagorneqartoq atorunnaarsinneqarpoq. Tamatumunnga tunngavilersuutigineqarpoq pisuni tamaginni taamaallaat atortut tigummiaannartakkat taamaallaat atorneqarsinnaanerit, taamaattumik annerpaamik nunap qaavani killilimmik ingerlataqartoqarnissaa naatsorsuutigineqarsinnaalluni kiisalu aalajangersimasumik najugaqartut annertunerusunik nassaarneranni, siunnersuummi kapitali 3 malillugu sumiiffimmut pineqartumut kisermaassisussaatitaalluni akuersissummik qinnuteqarnissamut periarfissamik atuerusunnerussasut naatsorsuutigineqarluni.

Imm. 2-mut

Aalajangersakkami ingerlatassanut imm. 1 malillugu suliarineqartussanut tunngatillugu killissaliineq aalajangersarneqarpoq.

Aalajangersagaq malillugu aalajangersimasumik najugaqartut, akuersissummik peqaratik piaanermik suliaqartut, sullumut isaarianik imaluunniit itersalianik, nunamut sanilliullugu uuttorlugu 1 meterinut itinerusunik pilersitseqqusaanngillat.

Aalajangersagaq nappaarissunut aamma nallaarissunut atuuppoq. Taamaalilluni aatsitassanik 1 meterit sinnerlugit nunap iluaniittunik imaluunniit assersuutigalugu qaqqap innartaaniittunik, paaasoqqaqusaanngilaq.

1 meterimik killiliineq nunataaniit uuttorneqassaaq.

Imm. 3-mut

Aalajangersakkami aalajangersarneqarpoq, ingerlatassat najukkaneersunit akuersissummik peqarani suliarineqartut, inuup ingerlatassanik suliaqartup, ingerlatassat taakkua tunngavigalugit, sumiiffimmut ingerlatassat suliarineqarfiannut qanorluunniit pisinnaatitaaffeqalersinnaaneramik, malitseqassanngitsut.

Ingerlatassat sumi suliarineqarnerat apeqqutaatinnagu, sumiiffiit aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi pineqartunut ilaareersut aammalu sumiiffiit aatsitassanut tunngasunik suliaqarnissamut akuersissuteqartoqarfigineqareersimasut imaluunniit akuersissummik tunniussivigineqarsimasut tassani pineqarlutik.

Taamaalilluni sumiiffimmi aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi pineqartunut ilaasumi ingerlatassanik suliaqarnissamut pisinnaatitaaffeqalertoqarsinnaasussaannngilaq, tassami sumiiffik kisermaassisussaatitaalluni aatsitassarsiornissamut akuersissummi pineqartunut ilaatinneqareermat. Aatsitassat aatsitassarsiorluni misissuinissamut imaluunniit piaanissamut pisinnaatitaaffeqalernissamik qinnuteqaatigineqartut, aatsitassanut tunngasunik suliaqarneq

pillugu Inatsisartut inatsisaat malillugu kisermaassisussaatitaalluni aatsitassarsiorluni pianaissamat akuersissummi pineqartunut ilaatinneqarnerseq apeqquataatinnagu, aammalu ingerlatassat suliarineqarusuttut ingerlatassat kisermaassisussaatitaalluni aatsitassarsiornissamat akuersissut malillugu suliarineqartut saniatigut ingerlanneqartussatut kissaatigineqarnerseq, apeqquataatinnagu, tamanna atuuppoq.

Sumiiffimmi aatsitassarsiorluni suliaqarnissamat akuersissummi pineqartunut ilaatinneqariingitsumi imm. 1 malillugu ingerlatassat suliarineqarpata, ingerlatassanik suliaqartoq taanna Inatsisartut inatsisaanni kapitali 3 malillugu najukkami aatsitassanut tunngasunik suliaqarnissamat kisermaassisussaatitaalluni akuersissummik, sumiiffimmut tunngassutilimmik, qinnuteqarsinnaavoq. Taamaattoq inuk sumiiffimmi imm. 1 malillugu ingerlatassanik suliaqarsimasoq, sumiiffimmi najukkami aatsitassanut tunngasunik suliaqarnissamat kisermaassisussaatitaalluni akuersissummut salliusussaatitaallisangilaq.

Aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamat akuersissutit malillugit pisinnaatitsissummik pigisaqartut, aamma aalajangersimasumik najugaqartut aalajangersakkami imm. 1 malillugu aatsitassanik katersisut imaluunniit piasut, akornanni akerleriittoqalinnginnissaa, aalajangersakkami qulakkeerneqarpoq kiisalu kisermaassisussaatitaanerup, aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamat akuersissutit imarisaata, apeqquuserneqarsinnaannginnissaa, qulakkeerneqarluni.

Aammattaaq aalajangersagaq malillugu aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamat akuersissut malillugu pisinnaatitsissummik pigisaqartoq, sumiiffimmi aatsitassarsiorluni misissuinissamat akuersissummi pineqartunut ilaasumi aatsitassanut tunngasunik suliaqarnissamat salliusussaatitaavoq, tassami taanna, aalajangersimasumik najugaqartup paarlattuanik, pisinnaatitaaffimmik, Naalakkersuisunit akuerineqarsimasumik, piginnittuummat.

Imm. 4-mut

Aalajangersakkami aalajangersarneqarpoq, aalajangersimasumik najugaqartut Kalaallit Nunaanniit aatsitassanik annissinissamat immikkut avammut annissinissamat akuersissuteqarfigineqartariaqanngitsut. Aalajangersakkami aalajangersagaq malillugu, assersuutigalugu killeqarfinni nakkutiginninnermut atatillugu, aalajangersimasumik najugaqartuunermut piumasaqaatinik uppersaasussaaneermut aalajangersimasumik najugaqartut pisussaajunnaarsinneqanngillat.

Imm. 5-imut

Inuup Kalaallit Nunaannut atassuteqarnera aallaavigalugu tamanna naapertuuttutut nalilerneqarpat, Naalakkersuisut qinnuteqarnikkut inuup aalajangersimasumik najugaqartuunngitsup imm. 1-4-mi pineqartunut ilaatinneqalersinnaanerani aalajangiinissaannut inatsimmi tunngavissamik aalajangersagaq imaqarpoq.

Assersuutigalugu inuk ilinniarnermik pissuteqartumik, Kalaallit Nunaata avataani suliaartortitaasimalluni imaluunniit napparsimaneq pissutigalugu Kalaallit Nunaata avataaniissimalluni, Kalaallit Nunaata avataaniissimappat, tamatumunnga immikkut ittumik akuersissuteqarneq nalunaarutigineqarsinnaavoq.

Najukkani aatsitassanut tunngasunik suliaqarnissamut akuersissutinut pisinnaatitsissummik pigisaqartunut ukiunut tallimanut piomasagaat pillugu, tassunga assingusumik Kalaallit Nunaaniinnissaq aamma Kalaallit Nunaannut akileraartussaaitaanissaq pillugu piomasagaatip saneqqunneqarnissaa pillugu aalajangersagaq § 14, imm. 3-mi takuneqarsinnaavoq.

§ 8-imut

Imm. 1-imut

Aalajangersagaq aalajangersimasumik najugaqartuunngitsut , qaammatini siuliini pingasuni Kalaallit Nunaanniissimasut aatsitassanik katersisinnaanerannut tunngassuteqarpoq. Ilaatigut ukiumut annertussutsinut killiliineq, ilaatigut katersineq inuussutissarsiutiginaq taamaallaat pisinnaasoq, aalajangersakkami erseqqissarneqarpoq.

Aammattaaq katersineq taamaallaat aatsitassanut kaanngarsimallutik maaniinnarmiittunut tunngassuteqartoq, aalajangersakkami aalajangersarneqarpoq. Taamaallilluni sakkunik atortoqarluni paaanissaq qanorluunniit ittoq mattunneqarpoq.

Inuit qaammatini siuliini pingasuni Kalaallit Nunaanniissimasut kisimik, aalajangersagaq malillugu aatsitassanik katersisinnaapput. Tassa imaappoq assersuutigalugu takornariat piffissami sivikinnerusumi Kalaallit Nunaanniittut, aalajangersagaq malillugu aatsitassanik katersisinnaangillat.

Imm. 2-mut

Aalajangersakkami aalajangersarneqarpoq, aalajangersimasumik najugaqartuunngitsoq, qaammatini siuliini pingasuni Kalaallit Nunaanniissimasoq, aatsitassanik imm. 1-imi killilersuinernut naapertuuttumik taassuma katersorsimasaannik, annissisinnaasoq. Tassa imaappoq, aalajangersimasumik najugaqartuunngitsoq taamatut ittumik annissinissamut avammut annissinissamut akuersissuteqarfigineqartariaqanngitsoq.

Aammattaaq aalajangersakkami aalajangersarneqarpoq, aatsitassat annertussusaat imm. 1-imi annertussutsinut killiliussamit annertunerusoq, aalajangersimasumik najugaqartumit pisiarisimallugu aalajangersimasumik najugaqartuunngitsup uppersarsinnaappagu, aamma immikkut avammut annissinissamut akuersissuteqarnissaq pisariaqanngitsoq. Assersuutigalugu uppersarsaat pisinermut allagartamik takutitsinikkut pisinnaavoq.

Inuit qaammatini siuliini pingasuni Kalaallit Nunaanniissimasut kisimik aalajangersagaq

malillugu aatsitassanik annissisinnaapput. Tassa imaappoq, assersuutigalugu takornariat piffissami sivikinnerusumi Kalaallit Nunaanniittut, aalajangersagaq malillugu aatsitassanik annissisinnaangillat.

§ 9-mut

Imm. 1-imut

Aalajangersakkami aalajangersarneqarpoq, inuit qaammatinit pingasunit sivikinnerusumik Kalaallit Nunaanniissimasut, tamanna siunnersuummi § 11 malillugu ilitsersuisoqarluni angalaarnerup nalaani pisimangippat, aatsitassanik katerseqqusaangillat imaluunniit piiaaqqusaanatik.

Imm. 2-mut

Aalajangersakkami aalajangersarneqarpoq, aalajangersimasumik najugaqartuunngitsoq, inuk tamatumunnga avammut annissinissamut akuersissummik tunineqarsimappat, aatsaat aatsitassanik annissisinnaasoq. Tamanna annissinerup inuussutissarsiutigalugu imaluunniit inuussutissarsiutigiginagu ingerlanneqarnera apeqqutaatinnagu atuuppoq, taamaattoq takuuk imm. 3.

Imm. 3-mut

Aalajangersakkami allassimavoq, aatsitassat aalajangersimasumik najugaqartumit pisiarineqarsimappata aammalu pisineq uppersarneqarsinnaappat, assersuutigalugu pisinermut allagartamik takutitsinikkut, inuk aalajangersimasumik najugaqartuunngitsoq tamatumunnga avammut annissinissamut akuersissummik peqarani aatsitassanik Kalaallit Nunaanniit inuussutissarsiutigiginagu annissisinnaasoq.

Aalajangersimasumik najugaqartumit aatsitassanik pisinermi aammattaaq aatsitassat aalajangersimasumik najugaqartumit aaqqissuunneqartumik ilitsersuisoqarluni angalaarnerup nalaani pisiarineqarsimasut aamma pineqartunut ilaatinneqarput, takuuk siunnersuummi § 11.

Aalajangersagaq malillugu inuk aalajangersimasumik najugaqartuunngitsoq, assersuutigalugu takornariaq, tamatumunnga avammut annissinissamut akuersissummik peqarani aatsitassanik Kalaallit Nunaanniit inuussutissarsiutigiginagu annissisinnaavoq, piumasaaqatit makku tamarmik naammassineqarsimappata:

1. Aatsitassat inummit aalajangersimasumik najugalimmit pisiarineqarsimassasut.
2. Pisineq uppersarneqarsinnaassasoq, assersuutigalugu pisinermut allagartamik takutitsinikkut.

Aalajangersakkami siunertaavoq, inummut aalajangersimasumik najugaqartuunngitsumut, ilanngullugu assersuutigalugu takornariaq, Kalaallit Nunaanni aatsitassanik pisinissamik taakkulu Kalaallit Nunaanniit anninnissaannik ajornaatsuutitsinissaq. Aalajangersakkamut

aammattaaq siunertaavoq inummut aalajangersimasumik najugalimmut, Kalaallit Nunaanni aatsitassanik tuniniaasartumut, aallannginnermi Naalakkersuisuni avammut annissinissamut akuersissuteqarnissamik qinnuteqaqqaarnissaq innersuussutigisariaqarnagu, ajornaatsuutitsinissaq. Pissutsit taaneqartut aammattaaq malitsigisaannik, aatsitassanik aalajangersimasumik najugalimmit pisiarinqartunik annissinissaq, inuup aalajangersimasumik najugaqartuunngitsup, ilanngullugu assersuutigalugu takornariaq, inummit aalajangersimasumik najugalimmit aatsitassamik pisineri aammalu aatsitassap Kalaallit Nunaanniit anninnissaanik kissaateqarneri tamaasa, avammut annissinissamut akuersissuteqarnernik tunniussinissamut allaffissornikkut aningaasartuuteqarnernik malitseqassanngillat.

Siunnersuummi imm. 3-mi aatsitassanut inunnit aalajangersimasumik najugalinnit pisiarinqartunut killiliinermi, Naalakkersuisut naammattumik annertussusilimmik aatsitassanik tuniniaanernik aammalu aatsitassanik annissinernik, inummit Kalaallit Nunaanni aalajangersimasumik najugaqartuunngitsup, ilanngullugu takornariaq, ingerlataanik, nakkutiginnissinnaanerit misissuisarsinnaanerallu qulakkeerqarpoq.

Imm. 4-mut

Aalajangersagaq malillugu aalajangersimasumik najugaqartuunngitsut tamatumunnga avammut annissinissamut akuersissummik peqaratik, aatsitassanik ilisimatusarnermik siunertalimmik katersorneqartunik imaluunniit piiarneqartunik killeqanngitsumik annissinnaapput.

Aalajangersakkami taamaallaat aatsitassat ilisimatusarluni misissuinernut, aatsitassanut tunngasunik suliaqarneq pillugu Inatsisartut inatsisaanni pineqartunut ilaanngitsunut, atatillugu katersorneqartut imaluunniit piiarneqartut, maleruagassiivigineqarput. Aatsitassanik ilisimatusarluni misissuinernut atatillugu katersorneqartunik imaluunniit piiarneqartunik annissinissaq kiisalu tamatumunnga atasumik suliaqarnerit, aatsitassanut tunngasunik suliaqarneq pillugu Inatsisartut inatsisaanni pineqartunut ilaatinneqartussaapput.

§ 10-mut

Imm. 1-imut

Aalajangersakkami ingerlatassanut siunnersuummi §§ 7-imi aamma 8-imi pineqartunut ilaasunut sumiiffinni killilersuinerit aalajangersarneqarput.

Aalajangersagaq malillugu inuit ataasiakkaat siunnersuummi §§ 7 aamma 8 malillugit katersinerat imaluunniit piiaaneri sumiiffinni Inatsisartut inatsisaat malillugu siunnersuummi kapitali 3 malillugu akuersissummik tunniussivigineqarsimasuni imaluunniit siunnersuummi kapitali 5 malillugu atortussanut akuersissuteqarfigineqarsimasuni, ingerlanneqarsinnaanngillat.

Aalajangersagaq malillugu inuit ataasiakkaat siunnersuummi §§ 7 aamma 8 malillugit katersinerat imaluunniit piiannerat, sumiiffinni piiaanissamut akuersissuummi aatsitassanut tunngasunik suliaqarneq pillugu Inatsisartut inatsisaat naapertorlugu tunniunneqarsimasumi pineqartunut ilaasuni, imaluunniit sumiiffinni aatsitassanut tunngasunik suliaqarneq pillugu Inatsisartut inatsisaat § 44 malillugu suliakkiussanut najoqqutassami pineqartunut ilaasuni, suliakkiussanut najoqqutassap tamanut ammasumik tusarniaassutigalugu nassiunneqareernerani aamma ingerlanneqarsinnaanngillat. Taanna malillugu paarlattuanik, sumiiffik aatsitassanut tunngasunik suliaqarneq pillugu Inatsisartut inatsisaat § 44 malillugu suliakkiussanut najoqqutassami pineqartunut ilaasimanngippat, aammalu suliakkiussanut najoqqutassaq tamanut ammasumik tusarniaassutigalugu nassiunneqarsimanngippat, inuit ataasiakkaat §§ 7 aamma 8 malillugit katersinerat imaluunniit piiannerat sumiiffinni, misissueqqaarnissamut imaluunniit aatsitassarsiorluni misissuinissamut akuersissuummi aatsitassanut tunngasunik suliaqarneq pillugu Inatsisartut inatsisaat naapertorlugu, tunniunneqarsimasumi kiisalu ilisimatuussutsikkut misissuinernut akuersissuummi inatsit taanna naapertorlugu tunniunneqarsimasumi, pineqartunut ilaasumi, ingerlanneqarsinnaapput.

Naggasiutigalugu aalajangersagaq malillugu inuit ataasiakkaat siunnersuummi §§ 7 aamma 8 malillugit katersinerat imaluunniit piiannerat sumiiffinni nunap sannaanik eqqissisimatitsiviusuni, aamma ingerlanneqarsinnaanngillat.

Imm. 2-mut

Aalajangersakkami § 7 malillugit piiannermi, aatsitassat, aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut kisermaassisussaataalluni akuersissuummi pineqartunut ilaatinneqartut taamaallaat saniatigut tunisassiassatut piarneqaqqusaalerlugit, killiliisoqarpoq.

Maannamut suleriaasiusimasoq malillugu, aatsitassarsiorluni misissuinissamut akuersissut aatsitassanut tamaginnut, ikummatissiassat aamma aatsitassat qinngornernik ulorianartunik akullit ilaanatik, kisermaassisussaataatitsivoq. Tamanna aatsitassarsiorluni misissuinissamut akuersissutinut atugassarititaasut nalinginnaasut imaraat. Siunissami aatsitassat, nalinginnaasumik aatsitassarsiorluni misissuinissamut akuersissuummi pineqartunut ilaasartussat, amerlassusaat killeqalertussaapput, taamaalilluni aatsitassarsiorluni misissuinissamut akuersissuummi ujaqqat pinnerasaasiassat aamma aatsitassat allat najukkani suliaqartuniit immikkut soqutigineqartut allat, aallaaviatigut ilaatinneqartarunnaassallutik. Tamatuma aalajangersimasumik najugaqartut sumiiffinni, aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissutini pineqartunut ilaasuni, ujaqqanik pinnerasaasiassanik il.il. piiaanissamik periarfissaqalersippai.

Ujaqqat pinnerasaasiassat aatsitassanut aalajangersimasumik najugaqartut ingerlatassaminni siunnerfigisagaasa akornanniipput, aammalu allanngortitsinermi najukkaneersut aatsitassanik piiaanissamut periarfissaqarnissaat pillugu Inatsisartut inatsisaanni siunertaasoq

mianerineqassaaq.

Aammattaaq aatsitassat najukkaneersunit suliaqartartunit immikkut soqutigineqartut allat ilaatinneqassanngillat. Taakkua assersuutigalugu tassaasinnaapput aatsitassat qaqutigooortut ujaqqanik katersisartunut soqutiginaatillit. Aatsitassat taakkua akornanniittut ilaatinneqannginnissaannut tunngavissaatinneqarpoq, taakkua annertunerusumik niuerutigineqartussatut piiarneqarsinnaasussaanninnerat, taamaalillunilu aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissutit malillugit pisinnaatitsissummik pigisaqartunut soqutiginaateqannginnerat.

Aatsitassanut tunngasunik suliaqarneq pillugu Inatsisartut inatsisaata allanngortinneqarneratigut, aatsitassanut tunngasunik suliaqarneq pillugu Inatsisartut inatsisaat naaportorlugu nalunaarummik atuutilersitsinikkut imaluunniit aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissutinik tunniussinermi suleriaatsip allanngortinneqarneratigut, allanngortitsineq pissaaq.

Allanngortitsineq sumiiffinnut ulloq 1. oktober 2024 kingorna aatsitassarsiorluni misissuinissamut akuersissutini pineqartunut ilaatinneqartunut taamaallaat atuutissaaq. Tamatumunnga takuuk § 77, imm. 5.

Aatsitassat aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi pineqartunut ilaasut taamaallaat siunnersuummi § 7 malillugu saniatigut tunisassiassatut piiqaqusaanerat isumaqarpoq, aalajangersimasumik najugaqartut akuersissummik peqanngitsut, aatsitassanik akuersissummi pineqartunut ilaasunik piiaanissamut sammititamik piiasoqaqqusaanngitsaq, aammalu aatsitassat taakkua, piiarneqarsimassagunik, nierutigineqarlutik atorneqaqqusaanngitsut.

Aalajangersimasumik najugaqartut akuersissummik peqanngitsut aatsitassanik annertunerusunik annertussusilinnik, niuerutigineqarlutik atorneqaqqusaanngitsunik, taamaalillunilu maangaannartinneqarlutik piiarneqartunik, sumiiffimmit akuersissuteqarfiusumit qimagutsillugit assartuisarnissaat naatsorsuutigineqanngimmat, aatsitassat akuersissummi pineqartunut ilaasut saniatigut tunisassiassatut piiarneqarsinnaagaluartut, aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissut malillugu pisinnaatitsissummik pigisaqartup kisermaassisussaatitaanera ajoquserneqarsimanani taamaaginnartussaavoq.

Imm. 3-mut

Aalajangersakkami aalajangersarneqarpoq aalajangersimasumik najugaqartut, sumiiffimmi aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut kisermaassisussaatitaalluni akuersissummi pineqartunut

ilaasumi, katersisut imaluunniit piiaasut, aatsitassanut tunngasunik suliaqarnerup ingerlannissaanut aatsitassarsiorluni misissuinissamut akuersissummi pisinnaatitaaffiit malillugit pisinnaatitsissummik pigisaqartoq ataqqissavaat.

Tamanna isumaqarpoq, aatsitassarsiorluni misissuinissamut akuersissut malillugu pisinnaatitsissummik pigisaqartoq sumiiffimmi akuersissummi pineqartunut ilaasumi aatsitassanut tunngasunik suliaqarnerup ingerlannissaanut salliusussaataaasoq. Aalajangersimasumik najugaqartoq akuersissummik peqanngitsoq taamaalilluni, aalajangersimasumik najugaqartup, pisinnaatitsissummik pigisaqartup ingerlataannut kattunneqarsinnaanngitsumik, ingerlatassanik suliaqarnissaq kissaatigippagu, imaluunniit taakkununga akornutaappat, illuartariaqassaaq. Ingerlatassat pisinnaatitsissummik pigisaqartumit suliarineqartut, Naalakkersuisunit akuerineqarsimanissaat, tassani tunngavissaatinneqarpoq.

Imm. 4-mut

Aalajangersagaq imm. 1-imi ilaatitsinnginnermut aalajangersagaavoq. Aalajangersagaq malillugu inuup uppersarsinnaappagu tamanna pillugu sumiiffimmut pisinnaatitsissummik pigisaqartoq attuumassuteqartoq isumaqatigiissuteqarfigineqarsimasoq uppersarsinnaappagu, inuit ataasiakkaat siunnersuummi §§ 7 aamma 8 malillugit katersinerat imaluunniit piiaanerat sumiiffinni imm. 1, nr. 1-3ii aamma imm. 2-mi taaneqartuni taamaakkaluartoq ingerlanneqarsinnaapput. Taamaalilluni isumaqatigiissuteqarnissamut killilersuisoqannginnissaa aammalu sumiiffinni pisinnaatitsissummik pigisaqartup ingerlataasa ingerlatamut aalajangersimasumut, aatsitassamut aalajangersimasumut, ukiumi piffissamut aalajangersimasumut assigisaannulluunniit tunngassuteqartitaanni, aammalu siunnersuummi §§ 7 aamma 8 malillugit inuit ataasiakkaat katersinerat imaluunniit piiaanerat pisinnaatitsissummik pigisaqartup soqutigisaannut ataatsimoortinneqarsinnaassappat, allanngorartitsinissamut periarfissaqarnissaq qulakkeerneqarput.

§ 11-mut

Imm. 1-imut

Aalajangersagaq aatsitassanut ikummatissanullu inatsimmut atuuttumut sanilliullugu nutaalierneruvoq. Aalajangersakkami ujarassiorluni takornariartitsinermik inuussutissarsiteqartunut ammanerulersitsisoqarpoq, taamaalilluni aalajangersimasumik najugaqartoq ilitersuisoqarluni aatsitassarsiorluni angalaarnernik aaqqissuussinissamut immikkut akuersissuteqarfigineqartussaajunnaarluni. Taamaattoq ujarassiorluni takornariartitsinermik ingerlatsinissamik pisinnaatitaanermut aalajangersimasumik najugaqartut suli salliutinneqarput. Aalajangersakkami aalajangersimasumik najugaqartoq akuersissuteqarnernik imaluunniit akuersissutinik, ujarassiorluni takornariartitsinernik ingerlataqarnissamik pilersaaruteqarneq pillugu inatsisit allat malillugit pisariaqartunik, assersuutigalugu ilaasunik angallassinissamut angallatinut piumasaqaatit, piniarnissamik

pisussaajunnaarsinneqanngilaq.

Imm. 2-mut

Aalajangersagaq malillugu aalajangersimasumik najugaqartuunngitsut imm. 1 malillugu ilitersuisoqarluni angalaarnerit nalaanni, aalajangersimasumik najugaqartumut angalaarnermik aaqqissuussisumut tunngavissarititaasut assingi atuutsillugit taamaaqataannik ingerlatassanik suliaqarsinnaapput.

Imm. 3-mut

Aalajangersagaq malillugu aatsitassanik annissisarneq pillugu maleruagassat taamaaqatai, aatsitassanut imm. 1 malillugu ilitersuisoqarluni angalaarnerup nalaani katersorneqarsimasunut imaluunniit piiarneqarsimasunut, aatsitassanut ataatsimut isigalugu atuuttutut, atuutissapput.

Tassa imaappoq, inuit aalajangersimasumik najugaqartuunngitsut, qaammatini siuliini pingasuni Kalaallit Nunaanniissimasut, qaammatisiutit malillugit ukiumi ataatsimi aatsitassanik 1 kg-nik annissisinnaasut. Inuit aalajangersimasumik najugaqartuunngitsut, qaammatinit pingasunit sivikinnerusumik Kalaallit Nunaanniissimasut, tamatumunnga avammut annissinissamut akuersissuteqarfigineqarsimagunik imaluunniit aatsitassat aalajangersimasumik najugaqartumit pisiarisimallugit, assersuutigalugu ilitersuisoqarluni angalaarnermik aaqqissuussisumit, uppernarsarsinnaagunikku, aatsaat aatsitassanik annisseqqusaapput.

Imm. 4-mut

Aalajangersakkami ingerlatassanut imm. 1-imi pineqartunut ilaasunut sumiiffinnut killilersuinerit aalajangersarneqarput.

Aalajangersagaq malillugu ilitersuisoqarluni aatsitassarsiortitsilluni angalaarnerit sumiiffinni, siunnersuummi kapitali 3 malillugu akuersissummik imaluunniit siunnersuummi kapitali 5 malillugu atortussanut akuersissuteqarnermik Inatsisartut inatsisaat malillugu tunniussivigineqarsimasuni, ingerlanneqaqqusaanngillat.

Aalajangersagaq malillugu ilitersuisoqarluni aatsitassarsiortitsilluni angalaarnerit sumiiffinni, piiaanissamut akuersissummi aatsitassanut tunngasunik suliaqarneq pillugu Inatsisartut inatsisaat naapertorlugu tunniunneqarsimasumi pineqartunut ilaasuni, imaluunniit sumiiffinni aatsitassanut tunngasunik suliaqarneq pillugu Inatsisartut inatsisaat § 44 malillugu suliakkiussanut najoqqutassami pineqartunut ilaasuni, suliakkiussanut najoqqutassap tamanut ammasumik tusarniaassutigalugu nassiunneqareernerani, aamma ingerlanneqarsinnaanngillat. Taanna malillugu paarlattuanik, sumiiffik aatsitassanut tunngasunik suliaqarneq pillugu Inatsisartut inatsisaat § 44 malillugu suliakkiussanut najoqqutassami pineqartunut ilaasimanngippat, aammalu suliakkiussanut najoqqutassaq tamanut ammasumik tusarniaassutigalugu nassiunneqarsimanngippat, ilitersuisoqarluni aatsitassarsiortitsilluni

angalaarnerit sumiiffinni, misissueqqaarnissamut imaluunniit aatsitassarsiorluni misissuinnissamut akuersissummi, aatsitassanut tunngasunik suliaqarneq pillugu Inatsisartut inatsisaat naapertorlugu, tunniunneqarsimasumi kiisalu ilisimatuussutsikkut misissuinerut akuersissummi inatsit taanna naapertorlugu tunniunneqarsimasumi, pineqartunut ilaasuni, ingerlanneqarsinnaapput.

Naggasiutigalugu aalajangersagaq malillugu ilitsersuisoqarluni aatsitassarsiorluni angalaarnerit sumiiffinni nunap sannaanik eqqissisimatitsiviusuni, aamma ingerlanneqarsinnaanngillat.

Imm. 5-imut

Aalajangersagaq imm. 2-mi ilaatitsinnginnermut aalajangersagaavoq. Aalajangersagaq malillugu aalajangersimasumik najugaqartup ilitsersuisoqarluni aatsitassarsiorluni angalaarnermik aaqqissuussisup tamanna pillugu sumiiffimmut pisinnaatitsissummik pigisaqartoq attuumassuteqartoq isumaqatigiissuteqarfigineqarsimasoq uppersarsinnaappagu, ilitsersuisoqarluni aatsitassarsiorluni angalaarnerit sumiiffinni imm. 2, nr. 1-imi aamma 2-mi taaneqartuni taamaakkaluartoq ingerlanneqarsinnaapput. Taamaalilluni isumaqatigiissuteqarnissamut killilersuisoqannginnissaa aammalu sumiiffinni pisinnaatitsissummik pigisaqartup ingerlataasa ingerlatamut aalajangersimasumut, aatsitassamut aalajangersimasumut, ukiumi piffissamut aalajangersimasumut assigisaannulluunniit tunngassuteqartitaanni, aammalu ilitsersuisoqarluni aatsitassarsiorluni angalaarneq pisinnaatitsissummik pigisaqartup soqutigisaannut ataatsimoortinneqarsinnaassappat, allanngorartitsinissamut periarfissaqarnissaq qulakkeerneqarput.

§ 12-imut

Imm. 1-imut

Aalajangersagaq siunnersuummi kapitali 2 malillugu katersisarneq, piiasaarneq annissisarnerlu pillugit aalajangersakkanik, ilanngullugu atortunik aalajangersimasunik atuinissamut, atortut akuerisaasut arlallit nassuiaassutaannik aammalu aatsitassat aalajangersimasut pillugit immikkut maleruagassanik aalajangersaanissamut, Naalakkersuisut aalajangersaanissaannut inatsimmi tunngavissamik nalinginnaasumik imaqarpoq. Assersuutigalugu taakkua tassaasinnaapput aatsitassat nalituut imaluunniit qaqutigoortut, soorlu assersuutigalugu tugtupit-it, diamantit, safirit, rubinit, smaragd-it, chrysoberyl-it aamma opal-it.

Aammattaq aalajangersagaq malillugu annissisarneq pillugu immikkut aalajangersakkanik Naalakkersusiut aalajangersaasinnaassapput, ilanngullugu assersuutigalugu aatsitassat aalajangersimasut, imaluunniit aatsitassat sumiiffinnit aalajangersimasuneersut assigisaalluunniit, immikkut annissinissamut akuersissuteqarneq nalunaarutigineqarsimappat, aatsaat anninneqarsinnaasut.

Imm. 2-mut

Aatsitassat tuniniaqqusaalinnginneranni imaluunniit anniseqqusaalinnginneranni aatsitassanut aalajangersimasunut immikkut nalinginik nalilersuisoqartassasoq pillugu aalajangersakkanik, aalajangersagaq malillugu Naalackersuisut aalajangersaasinnaapput.

Inatsisit attuumassuteqartut, ilanngullugu assersuutigalugu akileraartarnermut inatsisit, saneqqutaarnissaat siunertaralugu aatsitassat akigititanut niuerfimmi akigititat inorlugit annertussusilinnut tunineqarnissaasa pinngitsoortinnissaa, aalajangersakkami siunertaavoq.

§ 13-imut

Imm. 1-imut

Aalajangersagaq malillugu sumiiffimmut erseqqinnerusumik killissalersugaasumut aammalu atugassarititaasut erseqqinnerusumik aalajangersarneqartut malillugit najukkani aatsitassanut tunngasunik suliaqarnissanut kisermaassisussaatitaalluni akuersissummik tunniussisoqarsinnaavoq. Taamaalilluni maannakkut aatsitassanut ikummatissanullu inatsimmi atuuttumi kisermaassisussaatitaanani akuersissutinik tunniussinissamut periarfissaq atorunnaarpoq.

Kisermaassisussaatitaanerup atuunnerani sumiiffimmut ataatsimut akuersissummik unammillertussamik tunniussisoqarsinnaanngilaq.

Akuersissutini aalajangersagaq malillugu tunniunneqarsimasuni ilaatinneqarput aatsitassarsiorluni misissuineq aamma aatsitassanik piiaaneq. Aatsitassat tamarmik pineqartunut ilaatinneqarpoq, aatsitassat qinngornernik ulorianartunik akullit ilaanatik. Aatsitassat qinngornernik ulorianartunik akullit paasineqassaaq tassaasut aatsitassat pinngoqqaatinik qinngornernik ulorianartunik akullit. Taakkua assersuutigalugu tassaapput uran, thorium aamma plutonium. Allattukkat tamakkiisuunngillat.

Imm. 2-mut

Akuersissummut pisinnaatitsissummik pigisaqartoq immikkut avammut annissinissamut akuersissuteqarfigineqarani aatsitassanik akuersissut malillugu piarneqarsimasunik, ilanngullugit aatsitassat misileraanissamut tiguneqarsimasut, annissinissamut pisinnaatitaavoq.

Aalajangersagaq § 20, imm. 3-mut ataqatigiissillugu atuarneqassaaq, taanna malillugu aatsitassanut aalajangersimasunut tunngatillugu, aatsitassat tuniniarneqaqqusaalinnginneranni imaluunniit anninneqaqqusaalinnginneranni immikkut nalingannik nalilersuineramik suliaqartoqartussaasoq pillugu aalajangersakkanik Naalackersuisut aalajangersaasinnaallutik. Inatsisit attuumassuteqartut, ilanngullugu assersuutigalugu akileraartarnermut inatsisit, saneqqutaarnissaat siunertaralugu aatsitassat akigititanut niuerfimmi akigititat inorlugit

annertussusilinnut tunineqarnissaasa pinngitsoortinnissaa, aalajangersakkami siunertaavoq.

§ 14-imut

Najukkani aatsitassanut tunngasunik suliaqarnissamut akuersissummut pisinnaatitsissummik pigisaqartumut piumasaqaatit aalajangersakkami aalajangersarneqarput. Piumasaqaatit akuersissummik tunniussinerup nalaani aammalu piffissaq akuersissuteqarfiusoq tamakkerlugu atuupput.

Imm. 1-imut

Aalajangersagaq maannakkut aatsitassanut ikummatissanullu inatsimmut atuuttumut sanilliullugu nutaalierneruvoq. Aalajangersakkami aalajangersarneqarpoq, pisinnaatitsissummik pigisaqartoq (annikitsumik aatsitassarsiornissamut akuersissutit pillugit maannakkut aatsitassanut ikummatissanullu inatsisip atuuttup akerlianik) Kalaallit Nunaanni inuussutissarsiortutut nalunaarsorsimassasoq kiisalu Kalaallit Nunaanni angerlarsimaffeqassasoq. Aammattaaq aalajangersakkami allassimavoq, suliffeqarfiit qanoq aalajangersimasumik iluseqartillugit pisinnaatitsissummik pigisaqartoq nalunaarsorsimassanersoq.

Imm. 2-mut

Aalajangersakkami ingerlatseqatigiiffimmi pisinnaatitsissummik pigisaqartuusumi aalajangiisuusumik sunniuteqarnissamut piumasaqaatit aalajangersarneqarput. Tassani pineqarsinnaapput inuk ataaseq imaluunniit inuit arlallit peqatigiillutik.

Pinngitsoorani piginnittuusooq imaluunniit piginnittuusut, piumasaqaatinik naammassinnittussaapput. Ingerlatseqatigiiffimmi pisinnaatitsissummik pigisaqartumi aalajangiisuusumik sunniuteqarneq pisinnaatitaallutillu pisussaatitaasunit ataatsimit arlalinniilluunniit atornerqarpat, pisinnaatitaallutillu pisussaatitaasuni taakkunani aalajangiisuusumik sunniuteqarnermik atuneq, piumasaqaatip naammassinnaanut aalajangiisuusaaq.

Aalajangersagaq malillugu ingerlatseqatigiiffimmi inuit pisinnaatitsissummik pigisaqartumi aalajangiisuusumik sunniuteqartut Kalaallit Nunaanni inuit nalunaarsorsimaffianni nalunaarsorsimasumi najugaqassapput kiisalu Kalaallit Nunaannut tamakkiisumik akileraartussaataassallutik – aammalu siuliini ukiuni 5-*ini* taamaassimassallutik.

Inuk ukiut 5 kingulliit iluanni Kalaallit Nunaata avataani inuit nalunaarsorsimaffianni nalunaarsorsimasumi najugaqarsimappat imaluunniit piffissami tassani Kalaallit Nunaannut tamakkiisumik akileraartussaataasimangippat, ukiut 5-it taakkua kipitinneqarsimasutut isigineqassapput. Qinnuteqartup taamaalilluni, Naalackersuisut imm. 3 malillugu allamik aalajangersimangippata, piumasaqaat naammassisimassanngilaa, taamaattumillu akuersissummik tunineqarsinnaasusnaanani. Takukkit imm. 3-mut nassuiaatit.

Tamatuma saniatigut inuit akuersissutip tunniunneqarnerata nalaani aammalu piffissaq akuersissuteqarfiusoq tamaat namminersorsinnaatitaassapput. Inuit taamaalillutik akuersissut ilaalu ilanngullugit malillugit pisussaaffeqalersinnaassapput.

Piumasaqaatit naammassineqarsimanerat pisinnaatitsissummik pigisaqartoq uppersaasinnaanissamut pisussaaffeqarpoq.

Imm. 3-mut

Tamanna inuup Kalaallit Nunaannut atassuteqarnera aallaavigalugu naapertuuttuut nalilerneqarpat, imm. 2, nr. 1-imi aamma 2-mi piffissanut minnerpaamik ukiunik 5-inik sivilissusilinnut piffissatigut piumasaqaatit tamakkiisumik ilaannaasumilluunniit saneqqunneqarnissaannut Naalakkersuisunut inatsimmi tunngavissamik aalajangersagaq imaqarpoq.

Assersuutigalugu inuk ilinniartitaanermik pissuteqartumik Kalaallit Nunaata avataaniissimappat, inuk sulinermi malitsigisaanik Kalaallit Nunaata avataani sulitinneqarsimappat, imaluunniit inuk napparsimanini pissutigalugu Kalaallit Nunaata avataaniissimappat, tamatumunnga immikkut ittumik akuersissuteqarneq pisinnaavoq.

Aalajangersimasumik najugaqartunut ukiunik tallimanik piumasaqaat pillugu immikkut ittumik akuersissuteqarsinnaaneq assingusoq § 7, imm. 5-imi takuneqarsinnaavoq.

Imm. 4-mut

Aalajangersagaq malillugu pisinnaatitsissummik pigisaqartoq taanna qaammatisiutit malillugit ukiumi tassani akuersissutinik 5-init amerlanerusunik tunineqarsinnaanngilaq. Pisinnaatitsissummik pigisaqartoq qaammatisiutit malillugit ukiup taassuma iluani akuersissutit 6-issaannik tunineqarnissamik qinnuteqarpat, akuersissutit tunniunneqareersut arlaat utertinneqariinngippat imaluunniit allamat tunniunneqariinngippat, akuersissutit 6-issaat tunniunneqarsinnaanngilaq.

Aammattaaq pisinnaatitaasut pisussaataitaasullu arlaannaalluunniit ataatsikkut ingerlatseqatigiiffinni 5 pisinnaatitsissummik pigisaqartuni 5-init amerlanerusuni aalajangiisuusumik sunnuteqarsinnaanngillat. Aalajangersakkami siunertaavoq isertortukkut akunnermiliuttut suliffeqarfittut taagorneqartut pitsaaliorneqarnissaat, tassani aalajangersimasumik najugaqartut imm. 2-mi atassuteqarnissamut piumasaqaatinik naammassinnittut "pisuusaartumik" ingerlatseqatigiiffinni piginnittunit ikkunneqarlutik, taamaalillunilu atassuteqarnissamut piumasaqaatit pillugit maleruagassat avaqutaarneqarsinnaalersillugit.

Imm. 5-imut

Aalajangersagaq malillugu pisinnaatitsissummik pigisaqartoq piffissaq akuersissuteqarfiusoq

tamaat akuersissut malillugu ingerlatassat suliarinissaannut teknikkikkut suliaassanullu pisariaqartunik piginnaasaqassaaq (sulianut paasisimasaqarneq) aammalu aningaasaqarnikkut aningaasalersuinikkullu piginnaasaqassalluni (aningaasalersuineranut pisinnaasaqarneq) aamma akuersissut immaqalu akuersissuteqarnerit tassunga atasut il.il. pillugit pisussaaffimminik naammassinnissalluni.

Pisinnaatitsissummik pigisaqartoq taamaalilluni aningaasaqarnikkut pisinnaassuseqassaaq pisariaqartunillu sulianut paasisimasaqassalluni.

Pisortat ingerlatsinerannut inatsisini nalinginnaasuni annertoqqatigiimmik pinninnissamut tunngaviusut nalinginnaasumik malitsigisaannik aningaasaqarneq sulianullu paasisimasaqarneq pillugit piunasaqaatit, suliffeqarfik minnerusoq killilimmik ingerlataqartoq, taamaallaat tigummiaannartakkanik sakkunik biilnik maskiinanillu annikitsunik atuilluni ingerlataqartoq, nalinginnaasumik tassani pineqartussaananeranut sanilliunneqarput.

Sulianut paasisimasaqarluni aningaasaqarnikkullu tunuliaqutaqarnissamut pisuni ataasiakkaani piunasaqarneqartumut, ingerlatassat annertussusaat, pisariussusaat aarlerinaateqarnerat ilaalu ilanngullugu, apeqqutaassapput. Ingerlatassat annertussusaasa qanoq issusaasalu akornanni naleqquttumik annertoqqatigiissitsinissaq anguniarneqassaaq.

§ 15-imut

Imm. 1-imut

Aalajangersagaq malillugu ukiuni 5-ini piffissamut akuersissuteqarfiusumut akuersissut tunniunneqarsinnaavoq. Piffissaq akuersissuteqarfiusoq aatsitassarsiorluni misissuinissamut akuersissutinut nalinginnaasunut, aatsitassanut tunngasunik suliaqarneq pillugu Inatsisartut inatsisaat malillugu tunniunneqartunut piffissamut akuersissuteqarfiusumut assinguvoq. Akuersissutit assigiinngitsut marluk taakkua assigiinngitsunik atuuffissaqarnissaannut pingaarutilinnik tunngavilersuuteqartoq naliliisoqanngilaq. Siunnersuummi aatsitassanut ikummatissanullu inatsisit akimorlugit akuersissutit aqqissugaanerat assigiissaartunngortinneqarpoq.

Imm. 2-mut

Aalajangersakkami piffissaq akuersissuteqarfiusup atuutilerfissaanut piffissaq nassuiarneqarpoq. Siunnersuummi allaffissornikkut suleriaaseq atuuttoq inatsimmiitilerneqarpoq.

Imm. 3-mut

Piffissap akuersissuteqarfiusup imm. 1-imi taaneqartup sivitsorneqarnissaanut pissutsit suut naammassineqarsimassanersut, aalajangersakkami maleruagassiivigineqarpoq.

Aalajangersakkami allassimavoq, pisinnaatitsissummik pigisaqartup imm. 1 malillugu

piffissami akuersissuteqaqqaarfiusumi akuersissut aamma akuersissut malillugu ingerlatassat, ilanngullugit taakkua ataanni akuersissuteqarnerit, pillugit pisussaaffiit tamaasa naammassisimappagit aammalu aatsitassanik paaaneq imaluunniit niuerutigineqartussanik ingerlataqarnerit pillugit ingerlatassat suliarineqarnerat aallartissimallugu, pisinnaatitsissummik pigisaqartoq piffissap akuersissuteqarfiusup sivitsorneqarnissaanut pisinnaatitaavoq. Niuerutigineqartussanik ingerlataqarnerit allat assersuutigalugu taassaasinnaapput ujarassiorititsilluni takornariartitsineq pillugu ingerlatassat.

Imm. 4-mut

Aalajangersakkami sivitsuinerit sivilissusissai maleruagassiivigineqarput. Aalajangersagaq malillugu piffissaq akuersissuteqarfiusoq siullermeertumik piffissamut ukiunik 5-inik sivilissusilimmuut sivitsorneqassaaq. Tamatuma kingorna sivitsuisoqassappat tamanna ukiut pingasukkaarlugit pissaaq. Aaqquissuussineq taanna aatsitassarsiorluni misissuinissamut akuersissutinit aatsitassanut tunngasunik suliaqarneq pillugu Inatsisartut inatsisaat malillugu tunniunneqartunit ilisimaneqarpoq. Akuersissutit assigiinngitsut marluk taakkua assigiinngitsunik atuuffissaqarnissaannut pingaarutilinnik tunngavilersuutissaqartoq nalilerneqanngilaq. Siunnersuummi aatsitassanut ikummatissanullu inatsisit akimorlugit piffissat akuersissuteqarfiusut assigiissaartunngortinneqarput.

Nutaanik sivitsuinerni imm. 3-mi piumasagaatit taamaaqataanik siullermik sivitsuinertuulli atuuttut, aalajangersakkami aammattaq allassimavoq.

Imm. 5-imut

Aalajangersagaq malillugu akuersissutip atorunnaannginnerani piffissaq akuersissuteqarfiusup sivitsorneqarnissaa qinnuteqaatigineqassaaq. Aalajangersagaq malillugu akuersissutip atorunnaannginnerani qinnuteqaat Naalakkersuisuni tiguneqareersimassaaq. Assersuutigalugu qinnuteqaat allakkatigit nassiunneqarpat, akuersissutip atorunnaannginnerani allakkat Naalakkersuisuni tiguneqareersimassapput.

Akuersissut assersuutigalugu ulloq 31. decembari atorunnaarpat, ullup taassuma kingorna sivitsuinissaa qinnuteqaatigineqarsinnaanngilaq.

Imm. 6-imut

Akuersissummumut piffissaliussap katillugu ukiunit 10-init sivilissusumut sivitsorneqarpat, piffissap akuersissuteqarfiusup sivitsorneqarnerini tamaginni akuersissummumut atugassarititaasunik allannortinneqartunik aalajangersaanissaannut inatsimmi tunngavissamik aalajangersagaq imaqarpoq.

Taakkua assersuutigalugu tassaasinnaapput, aatsitassanik paaanermik imaluunniit akuersissut malillugu ingerlatassanik allanik suliaqarnermut atatillugu taanna atorneqanngippat, pisinnaatitsissummik pigisaqartup akuersissut imaluunniit ingerlatassanut pilersaarutit malillugit pisussaaffii pillugit atugassarititaasut allannortinneqartut.

Imm. 7-imut

Aalajangersakkami allassimavoq, kisermaassisussaatailluni najukkani aatsitassanut tunngasunik suliaqarnissamut akuersissummut piffissaq akuersissuteqarfiusoq ukiunit 30-nit sivisunerusinnaangitsoq.

§ 16-imut

Imm. 1-imut

Aalajangersakkami akuersissutip piffissaq atorunnaarfissaa maleruagassiivigineqarpoq. Aalajangersakkap atuunnerani annikitsumik aatsitassarsiornissamut akuersissut, § 15 malillugu piffissamit akuersissummi nalunaarutigineqartumit, siusinnerusukkut atorunnaarsinnaavoq. Tamanna assersuutigalugu pissaaq Naalackersuisut tamanna tikinngikkaa pisinnaatitsissummik pigisaqartup akuerissut utertissagaa akuersissuteqarpata imaluunniit Naalackersuisut akuersissummik utertitseqqusippata.

Imm. 2-mut

Pisinnaatitsissummik pigisaqartup akuersissutip atorunnaanginnerani akuersissut malillugu pisussaaffiit tamaasa naammassisimassagai, aalajangersakkami erseqqissarneqarpoq, ilanngullugit tamanna pillugu maleruagassat malillugit matusinermi ingerlatassat, tamatuma kingorna alapernaarsuineq ilaatinneqarani.

Siunnersuummi siunertanut aalajangersakkami allassimasunut mianerisassanut naapertuuttumik matusinermi ingerlatassallu unitsinneqarneranni avatangiisini isumannaallisaanermilu mianerisassat isumagineqarnissaat aamma saliinerup ilaalu ilanngullugit qulakkeerneqarnissaa, aalajangersakkami immikkut ukkatarineqarput.

Taamaattoq pisinnaatitsissummik pigisaqartup avatangiisini alapernaarsuineramik allanillu tamatuma kingorna ingerlatassanik iliuusissanillu suliaqarnissamut pisussaaffeqarnera, imm. 1 malillugu akuersissutip atorunnaareernerata kingorna suli atuutiinnartussaavoq.

§ 17-imut

Imm. 1-imut

Aalajangersakkami sumiiffiup akuersissuteqarfiusup nalinginnaasumik angissusissaa maleruagassiivigineqarpoq. Nalinginnaasumik sumiiffiup angissusissaata allanneqarnera qinnuteqartumut aammalu allaffissornermi aqutsisunut naapertuuttut nalilerneqarpoq. Sumiiffiup nalinginnaasup angissusaata annikitsuunera eqqarsaatigalugu, sumiiffimmik akuersissuteqarfiusumik suli minnerusumik pilersitsinissaq pisariaqartinneqanngitsoq naliliisoqarpoq.

Imm. 2-mut

Aalajangersagaq malillugu najukkani aatsitassanut tunngasunik suliaqarnissamut akuersissut sumiiffinni, siunnersuummi kapitali 3 malillugu akuersissut imaluunniit siunnersuummi kapitali 5 malillugu atortussanut akuersissuteqarneq Inatsisartut inatsisaat malillugu tunniussiviusimasuni, tunniunneqarsinnaanngilaq.

Aalajangersagaq malillugu sumiiffinni aatsitassanut tunngasunik suliaqarneq pillugu Inatsisartut inatsisaat naapertorlugu kisermaassisussaataalluni akuersissummi tunniunneqarsimasumi pineqartunut ilaasuni, akuersissut aamma tunniunneqarsinnaanngilaq. Tamanna aatsitassarsiorluni misissuinissamut aamma aatsitassanik piiaanissamut akuersissutinut atuuppoq.

Naggasiutigalugu aalajangersagaq malillugu sumiiffinni nunap sannaanik eqqissisimatitaaffiusuni, aamma akuersissut tunniunneqarsinnaanngilaq.

§ 18-imut

Aalajangersakkami aalajangersarneqarpoq, najukkani aatsitassanut tunngasunik suliaqarnissamut akuersissummi pisinnaatitsissummik pigisaqartoq illunut sanaartukkanullu akuersissut malillugu Naalakkersuisunit akuerineqarsimasunut sumiiffimmi akuersissuteqarfiusumi avataanilu nunaminertamik atugassiisarneq pillugu nunaminertanut inatsimmi piumasaqaatinik naammassinnittussaataanngitsoq.

Naalakkersuisut tamanna pillugu siunnersuummi maleruagassat malillugit piiaanissamut pilersaarummut akuersissuteqarnerat, ilanngullugu assersuutigalugu piiaanermi suliaqarfissamik, sanaartukkanik allanik imaluunniit illuutitik pilersitsinissamut tunngatillugu, nunaminertanut inatsit malillugu akuerisaasumik, peqatigisaanik nunaminertamik pineqartumik atuinissamut akuerissutaasussaavoq.

§ 19-imut

Aalajangersagaq malillugu pisinnaatitsissummik pigisaqartoq annertunerusumik akuersissuteqarfigineqanngitsumik atortut tigummiaannartakkat atorlugit aatsitassarsiorluni misissuineramik aatsitassanillu piiaanermik suliaqarsinnaavoq. Atortut motorillit aamma motooreqanngitsut, taakkua tigummiaannartagaappata, pineqartunut ilaatinneqarput. Aalajangersakkap atuunnerani pisinnaatitsissummik pigisaqartup annertunerusumik akuersissuteqarfigineqarani, siunnersuummi kapitali 2 malillugu tamatumunnga akuersissummik peqarani aalajangersimasumik najugaqartut akuersissuteqarfigineqanngitsumik suliaqarsinnaaneratuut, ingerlatassat taamaattut suliarisinnaavai. Erseqqinnerusumik nassuiaatinut kapitali 2-mi aalajangersakkanut nassuiaatit innersuussutigineqarput.

Peqatigisaanik aalajangersagaq malillugu pisinnaatitsissummik pigisaqartup atortut

tigummaannartakkat atorlugit ingerlatassat allat suliarinissaat kissaatigippagu, pisinnaatitsissummik pigisaqartoq siunnersuummi kapitali 4 malillugu akuersissuteqarfigineqassaaq, ilanngullugit piiaanissamut pilersaarut aamma matusinissamut pilersaarut il.il. suliarissallugit.

§ 20-mut

Imm. 1-imut

Aalajangersagaq najukkani aatsitassanut tunngasunik suliaqarnissamut akuersissutit, sukkulluunniit atuussinnaasut, amerlanerpaaffissai pillugit aalajangersakkanik aalajangersaanissamut inatsimmi tunngavissamik imaqarpoq. Pissutsit siunnersuutip siunertaanut aalajangersakkami taaneqartut eqqarsaatigalugit najukkani aatsitassanut tunngasunik suliaqarnermut Naalakkersuisut maleruagassiinissaat aalajangersakkami ajornarunnaarsinneqarpoq.

Imm. 2-mut

Sumiiffik erseqqinnerusumik killissalersorneqartoq najukkani aatsitassanut tunngasunik suliaqarnissamut inniminnerneqassasoq pillugu aalajangersakkanik aalajangersaanissamut aalajangiinissamullu inatsimmi tunngavissamik aalajangersagaq imaqarpoq.

Sumiiffik aalajangersagaq malillugu inniminnerneqarpat, sumiiffimmi pineqartunut ilaasumi aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut imaluunniit aatsitassanik piiaanissamut akuersissutinik nalinginnaasunik tunniussisoqarsinnaanngilaq.

Aalajangersakkamut siunertaavoq, Naalakkersuisut sumiiffiit najukkani aatsitassanut tunngasunik suliaqarnissamut immikkut naleqquttut inniminnerinnaassagaat, taamaalillutik suliffeqarfiit najukkani inissisimaffeqartut sumiiffinni pineqartuni ingerlatassanik suliaqarnissamut salliusussaataassallutik.

Imm. 3-mut

Aalajangersakkami, aatsitassat erseqqinnerusumik aalajangerneqartut tuniniarneqannginneranni imaluunniit anninneqannginneranni nalilersorneqassanersut pillugu aalajangersakkanik aalajangersaanissamut Naalakkersuisut tunngavissalerneqarput.

§ 20-mut

Najukkani aatsitassanut tunngasunik suliaqarnissamut akuersissummiit aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummut ikaarsaartarnermut aalajangersagaq tunngassuteqarpoq. Imm. 1-imi aamma 2-mi aalajangersagaq inatsisilerinikkut ataasiakkaatigut naleqqussarlugu aatsitassanut tunngasunik suliaqarneq pillugu Inatsisartut inatsisaanni § 42-miit nuunneqarpoq. Inatsimmi

siuliani taaneqartumi § 42-miit imarisaanni assigiingissuteqarnissaa eqqarsaatigineqanngilaq.

Imm. 1-imut

Pisinnaatitsissummik pigisaqartoq aatsitassanik peqarfimmik paasinarsisitsisimappat killissalersuisimallunilu, pisinnaatitsissummik pigisaqartup piiarniagaannik, aammalu najukkani aatsitassanut tunngasunik suliaqarnissamut akuersissut aamma akuersissut malillugu ingerlatassat pillugit pisussaaffiit tamaasa naammassisimallugit, najukkani aatsitassanut tunngasunik suliaqarnissamut akuersissut malillugu pisinnaatitsissummik pigisaqartup aatsitassanut tunngasunik suliaqarneq pillugu Inatsisartut inatsisaat aamma tamatumunnga aalajangersakkat atugassarititaasullu allat malillugit aatsitassanik piiaanissamut akuersissummik tunineqarnissamut pisinnaatitaaffeqarneranut, aalajangersagaq tunngassuteqarpoq.

Pisinnaatitsissummik pigisaqartup aatsitassanut tunngasunik suliaqarneq pillugu Inatsisartut inatsisaat malillugu aatsitassanik piiaanissamut akuersissummik qinnuteqarnermut atatillugu, maleruagassat Inatsisartut inatsisaat manna malillugu atuuttut isiginiassavai.

Imm. 2-mut

Aalajangersakkami aalajangersarneqarpoq piiaanissamut akuersissummik tunineqarnissamik piunarsaqarnissamut tunngavissarititaasut naammassineqarsimanersut Naalakkersuisut naliliisussaasut.

Naalakkersuisut najoqqutassanik nassiunneqartunik nammineerlutik nalilersuinissamut sukkulluunniit pisinnaatitaapput, ilanngullugu aamma suleqatinit avataaneersunit siunnersorneqarlutik ikiorneqarlutillu. Naalakkersuisut tassunga atatillugu pisinnaatitsissummik pigisaqartup nassiussaanni uppernarsaatini inerniliinernit pisussaaffilerneqanngillat, uppernarsaatit inummit tamatumunnga akuersissummik allagartaligaasumit suliarineqarsimanersut atsiorneqarsimanersullu apeqqutaatinnagu.

Imm. 3-mut

Imm. 1 malillugu aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummik tunniussinerup malitaasumik sunniutissaannut aalajangersagaq maleruagassiiviuvoq. Aalajangersagaq malillugu aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummik tunniussinerup kingunerisaanik, najukkani aatsitassanut tunngasunik suliaqarnissamut akuersissut uterteqquneqassaaq.

Aammattaaq aalajangersagaq malillugu, utertitseqqusineq matusinermik immaqalu avatangiisinik alapernaarsuineramik aallartitsinermik malitseqassanngitsoq, kisianni tamatumunnga pisussaaffiit tamatumunnga taarsiullugu akuersissummut nutaamut nuutinneqassasut pillugu atugassarititaasunik aalajangersaasoqarsinnaavoq. Utertitsinerup

sunniutai nalinginnaasut matusinertut il.il. ilusillit, sumiiffimmi qanittumi annertunerusunik ingerlatassanik aallartitsinissamik naatsorsuuteqarfigineqartumi aallartinneqannginnissaat, aalajangersakkami pitsaaliorneqassaaq.

§ 22-mut

Imm. 1-imut

Aalajangersagaq pisinnaatitsissummik pigisaqartup oqartussanut nalunaarusiortarneranut tunngassuteqarpoq.

Pisinnaatitsissummik pigisaqartoq aatsitassarsiorluni misissuineq piiaanerlu suliarineqareersut, ujarassioirtitsilluni takornariartitsinernik ingerlataqarnerit suliarineqarsimappata aammalu ingerlatassat allat akuersissut malillugu suliarineqareersut taakkualu inernerni pillugit nalunaarusianik Naalakkersuisunut tunniussissasoq pillugu Naalakkersuisut akuersissummut aalajangersakkanik atugassarititaasunillu aalajangersaanissamut inatsimmi tunngavissaannik aalajangersagaq imaqarpoq. Aalajangersagaq malillugu tamatuma saniatigut pisinnaatitsissummik pigisaqartoq nalunaarusianik, naatsorsukkanik, naatsorsuutininik aamma allakkiat allat assilinerinik aammalu piiaaneq taassumalu inernerit pillugit paasissutissanik nalunaarsukkanik immaqalu aatsitassarsiorluni misissuinerup inernerinik paasissutissanillu nalunaarsukkanik taakkunangalu misissugassanik aamma pisinnaatitsissummik pigisaqartup nassuiaanerinik, inerniliussaannik tamatumunngalu inassuteqaataannik, kiisalu misissugassanik aamma qillerummit qaqitanik tunniussissasoq pillugu akuersissummut aalajangersakkanik atugassarititaasunillu Naalakkersuisut aalajangersaasinnaapput.

Aammattaaq nalunaarusianik aamma nalunaarusiat assilinerinik, naatsorsukkanik naatsorsuutininik allanillu allakkianik paasissutissanillu nalunaarsukkanik ilaalu ilanngullugit tunniussisarneq pillugu aalajangersakkanik nalunaarummi imaluunniit akuersissutininik imaluunniit akuersissuteqarnernut atugassarititaasut imaluunniit atugassarititaasut nalinginnaasut aalajangersagaq malillugu aalajangersaasoqarsinnaavoq. Aalajangersakkat imaluunniit atugassarititaasut siunnersummut taassumalu siunertaanut naapertuuttumik aalajangersarneqassapput.

Imm. 2-mut

Aalajangersakkami allassimavoq pisinnaatitsissummik pigisaqartup nalunaarusiai, aatsitassarsiorluni misissuinermi paasisai aamma aatsitassanik piiaanermi paasisai, paasissutissat nalunaarsukkat, misissugassat nassuiaanerillu, inerniliussat inassuteqaatillu ilaalu ilanngullugit, Naalakkersuisunut tunniunneqartut, Naalakkersuisunut tunniussinissamut killigititamiit piffissami ukiunik 5-inik sivilissusilimmi isertuussaasut.

Isertuussinissaq pillugu maleruagassanik aalajangersaanissaq pisariaqarpoq, tassami paasissutissat taaneqartut ingerlatsinermi isertuussaasinnaammata imaluunniit

inuussutissarsiornermi isertuussaasinnaallutik, piffissami isertuussiviusussami naleqquttumi isertuussasut pineqartariaqarlutik pineqartussaallutillu. Naalakkersuisut paasissutissanik taakkuninnga ilaalu ilanngullugit tunniussinissamut pisussaaffeqassappata imaluunniit pisussaaffeqarsinnaappata, ilanngullugu assersuutigalugu allagaatinik takunninnissamik qinnuteqartoqarnerani, tamatumani allat pisussaanatik iluaqutissarsitinneqarsinnaapput.

Aalajangersagaq pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaannut naapertuuppoq. Aalajangersagaq pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaannut naapertuuppoq. Inatsimmi § 3, imm. 1 malillugu, oqartussat, suliassaqarfiit imaluunniit allakkiat suussusai erseqqinnerusumik taaneqartut, §§ 7-14-imi aalajangersakkat nalinginnaasumik malillugit pisussat, allagaatinik takunninnissamik piunasaqarneq itigartinneqarsinnaasoq, Inatsisartut inatsisaanni ilaatinneqassanngitsut, pillugu maleruagassanik Naalakkersuisut aalajangersaasinnaapput.

Imm. 1 malillugu paasissutissat aallaaviatigut pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni §§ 12-14-imi pineqartunut ilaatinneqassapput. Imm. 2-imi aalajangersagaq taamaalilluni, pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat taaneqartut taakkua ilanngullugit, paasissutissat Naalakkersuisuni ingerlaartinneqartut aammalu Inatsisartuni ataatsimiititaliamut nassiunneqartut, allagaatini takunninnissami ilaatinneqannginnissaannik, qulakkeerinnissaaq.

Aalajangersagaq malillugu piffissaq isertuussiviususaaq Naalakkersuisunut tunniussinissamut piffissamut killigititamiit ukiunik 5-inik siviusussuseqarpoq, taamaattoq takuuk imm. 3. Taamaattoq pisuni tamaginni akuersissutip atorunnaarnerani, tunniussinissamut killigititamiit ukiut 5-it ingerlareersimanersut apequtaanani, isertuussinissaaq atorunnaartussaavoq. Akuersissutip atorunnaarnerani isertuussinissaaq atorunnaassaaq. Akuersissutip atorunnaarnerata kingorna pisinnaatitsissummik pigisaqartumut tunngatillugu illersuinissaaq mianerineqarunnaartussaavoq, aammalu neqeroortitsisoqassappat tamatumunnga atatillugu qinnuteqartuusinnaasunik tamaginnik naligiissitsinissaaq qulakkeerniarlugu, najoqqutassat tunniunneqartut tamarmik tamanut saqqummersinneqarsinnaanissaat Naalakkersuisunut pingaaruteqarpoq.

Imm. 3-mut

Aalajangersakkami allassimavoq Naalakkersuisut piffissami isertuussiviusussami paasissutissat isertuussat, nalunaarusiat, paasissutissat nalunaarsukkat, misissugassat, nassuiaanerit, inerniliussat inassuteqaatillu ilaalu ilanngullugit pillugit paasissutissat nalinginnaasut tamanut saqqummersissinnaagaat.

Aalajangersagaq malillugu Naalakkersuisut paasissutissanik nalinginnaasunik taamaattunik tamanut saqqummersitsinnginnerminni paasissutissat pisinnaatitsissummik pigisaqartumut

nassiutissavaat aammalu pisinnaatitsissummik pigisaqartoq piffissamut killiliussap naleqquttup minnerpaamik qaammatisiutit malillugit ullunik 14-inik sivilissuseqartup iluani tamatumunnga oqaaseqaatinik nassiussisinnaasoq immaqalu paasissutissat tamarmik imaluunniit ilaasa tamanut saqqummersinneqarnissaannut tunngavilersugaasumik akerliliissuteqarsinnaasoq, pisinnaatitsissummik pigisaqartoq paasissutissillugu. Pisinnaatitsissummik pigisaqartoq piffissamut killiliussap iluani paasissutissanik tamaginnik imaluunniit ilaannik tamanut saqqummersitsinissamut akerliliissummik nassiussippat, pisinnaatitsissummik pigisaqartup isertuussinissamik soqutigisaqarnerata mianerinissaa Naalackersuisut paasissutissanik pineqartunik tamanut saqqummersitsinissamut soqutigisaannit pingaaruteqarnerusorineqarpat, Naalackersuisut paasissutissat taakkua tamanut saqqummersissanngilaat.

Naalackersuisut paasissutissanik nalinginnaasutut isikkoqartunik tamanut saqqummersitsinissamut soqutigisaat assersuutigalugu tassaasinnaapput innuttaasut isumannaatsuunissaasa eqqarsaatigineqarnissaa, paasissutissanik aalajangersimasunik tamanut saqqummersitsinissamut inatsimmi pisussaaffiliisumik pisussaaffeqarnek imaluunniit Kalaallit Nunaanni nunap sannaanik nittarsaassinissamut atatillugu. Pisinnaatitsissummik pigisaqartoq akerliliissuteqaraluartoq, aalajangersagaq malillugu paasissutissat nalinginnaasut tamanut saqqummersinneqarsinnaanersut aalajangiinnermi ilaatigut pisinnaatitsissummik pigisaqartup paasissutissat isertuussaannissaannut niuernikkut soqutigisaqarsinnaanera, paasissutissat tamanut saqqummiunneqarnerat aningaasanut niuerfimmi pisinnaatitsissummik pigisaqartup nalunaarsorsimaffianni maleruagassanut unioqqutitsinerussanersoq aammalu paasissutissat nalinginnaasutut isikkoqaraluartut pisinnaatitsissummik pigisaqartut ataasiakkaat kinaassusersineqarsinnaanerat, mianerineqarsinnaapput.

Imm. 4-mut

Aalajangersakkami allassimavoq, imm. 2 malillugu piffissaq isertuussiviususaaq naappat, pisinnaatitsissummik pigisaqartup aamma Namminersorlutik Oqartussat nalunaarusianik, aatsitassarsiorluni misissuinnermi paasisanut, paasissutissanut nalunaarsukkanut, misissugassanut nassuiaanernullu, inerniliussanut inassuteqaatinullu ilaalu ilanngullugit tunniunneqartunut piginnittussaataasut akeqanngitsumillu atuisussaataasut atuisinnaataasullu.

Namminersorlutik Oqartussat piginnittussaataaneranni najoqqutassat Kalaallit Nunaanni aatsitassarsiorluni ingerlatassanut tunngatinneqarsinnaasut kisimik pineqartunut ilaatinneqarput. Assersuutigalugu softwarenut periaatsinullu najoqqutassat pilersinneqarnerannut atorneqartunut pisinnaatitaanerit Namminersorlutik Oqartussat pisinnaatitaaffigilissanngilaat.

Suliaqarnermi aatsitassanut ikummatissanullu inatsit maannakkut atuuttoq malillugu akuersissut aalajangersakkanik taamaaqataannik amerlanertigut imaqartarpoq. Siunnersuut malillugu akuersissutinut tamanna atuutissasoq naatsorsuutigineqarpoq. Taamaattoq

aalajangersakkap siunnersuummi toqqaannartumik allassimanissaa naapertuunnerusq naliliisoqarpoq.

Imm. 5-imut

Aalajangersagaq Naalackersuisut pissutsit imm. 1-4-imi taaneqartut pillugit aalajangersakkanik atugassarititaasunillu erseqqinnerusunik aalajangersaanissaannut inatsimmi tunngavissamik imaqarpoq. Taakkua assersuutigalugu tassaasinnaapput ingerlatassanik aalajangersimasunik suliaqarnermi aammalu pisut imaluunniit pissutsit aalajangersimasut pineranni nalunaarusiat imarisaat, ilusaat akulikissusaallu pillugit aalajangersakkat imaluunniit atugassarititaasut, ilanngullugit piffissani aalajangersimasuni tunniussisarneq pillugu.

Aamma assersuutigalugu tassaasinnaapput Naalackersuisut ingerlatat aalajangersimasut, paasisat, pisut pissutsillu pillugit paasissutissanik nalinginnaasunik tamanut saqummersitsinissamut periarfissaqarnerat pillugu aalajangersakkat imaluunniit atugassarititaasut.

§ 23-mut

Imm. 1-imut Aalajangersakkap atuunnerani, pisinnaatitsissummik pigisaqartoq allanik aammalu atortunik tigungmiaannartagaannarnit annertunerusunik, atuinnissamik kissaateqarpat, pisinnaatitsissummik pigisaqartoq piiaanissamut pilersaarummik (§ 24) aamma matusinissamut pilersaarummik (§ 25) suliaqarnissamut pisussaaffeqarpoq . Tassa imaappoq, pisinnaatitsissummik pigisaqartoq allanik aammalu tamatumunnga akuersissummik peqarani aalajangersimasumik najugaqartup suliarisinnaasaanit annertunerusunik suliaqarniarpat (kapitali 2).

Imm. 2-mut

Aalajangersakkami aalajangersarneqarpoq, ingerlatassat aallartinnginneranni, piiaanissamut matusinissamullu pilersaarut akuersissuteqarfigineqareersimassasoq. Aammattaaq aalajangersagaq malillugu, ingerlatassanut piareersaatitut ingerlatassat aallartinnginneranni, pisinnaatitsissummik pigisaqartoq pilersaarutitut akuersissuteqarfigineqareersimassaaq. Tamanna ilaatigut isumaqarpoq, akuersissuteqarfigineqariinngikkuni pisinnaatitsissummik pigisaqartoq atortussanik, sakkunik, biilnik il.il. suliaqarfiusussamut assartuisinnaanngitsoq.

Imm. 3-mut

Piiaanissamut matusinissamullu pilersaarutip atugassarititaasut erseqqinnerusut tunngavigalugit akuersissuteqarfigineqarnissaanut inatsimmi tunngavissamik aalajangersagaq imaqarpoq. suliaqarnermi taamatut akuersissuteqarneq pingaarnarpaatut tamatigut atugassarititaasunik imaqassasoq naatsorsuutigineqarpoq, ilanngullugit pingaartumik isumannaallisaanikkut, peqqinnissakkut, avatangiisini allanilu attuumassuteqartuni mianerisassaq. Atugassarititaasut piiaanermik ingerlatassat sioqqullugit, nalaanni

kingornannilu ingerlatassanut tunngassuteqassasut naatsorsuutigineqarpoq, ilanngullugit piffissami matusereernerup kingorna alapernaarsuinissaq pillugu atugassarititaasut.

Imm. 4-mut

Aalajangersagaq malillugu, piiiaanermik suliaqarnerup unitsikkallarnejarneranut atatillugu, taassuma aallartinnginnerani, ingerlatassanut il.il. pisinnaatitsissummik pigisaqartoq akuersissuteqarfigineqareersimassaaq. Akuersissuteqarnejq ilaatigut kingusinnerusukkut paasineqassagaluarpat ingerlatassat aallarteqqinneqarniannngitsut, piffissami ingerlatassat matoqqatinnejarneranni aammalu matusinissamut pilersaarutip ingerlannejarnerani isumannaallisaanermut aserfallatsaaliuinernullu tunngasut qulakkeernissaat siunertaralugu pissaaq. Aalajangersagaq aalajangersimasumik sivisussusilimmik unitsitsigallarnermut tunngatinnejarpoq. Ingerlatassat sivikinnerusumik uninngatinnejarnerat, assersuutigalugu silamik pissuteqartumik, aalajangersakkami aallaaviatigut pineqartunut ilaatinnejanngillat.

Imm. 5-imut

Piiaanissamut pilersaarut pingaarnejq (§ 24) ingerlatassanut ataasiakkaanut tamaginnut nassuiaatinik imaqqanngissinnaaneranut aalajangersagaq takussutissaavoq. Aalajangersagaq malillugu erseqqissarnejarpoq, pisinnaatitsissummik pigisaqartup ingerlatassanik annertunerusunik aalajangersimasunik aallartitsinissamik kissaateqarpat, soorlu assersuutigalugu qillerinerit, sullumut isaarianik appartitsinerit aamma qaarusuliornerit ilaalu ilanngullugit, tamanna pisuni ataasiakkaani tamaginni sioqqutsisumik akuersissuteqarfigineqassaaq.

Imm. 6-imut

Ingerlatassat aalajangersimasut akuersissuteqarfigineqassanngitsut, aalajangersakkanik erseqqinnerusunik aalajangersaasoqarsinnaaneranut inatsimmi tunngavissamik aalajangersagaq imaqarpoq, ilanngullugit akuersissuteqarnerni ataasiakkaani il.il. atugassarititaasut. Assersuutigalugu taakkua tassaasinnaapput akuutissanik uumaatsunik aalajangersimasunik, imaluunniit biiliniq, maskiinanik il.il. aalajangersimasunik, atuinissaq. Aalajangersakkat taamaattut atugassarititaasut erseqqinnerusumik aalajangersarneqartut tunngavigalugit aalajangersarneqarsinnaapput, ilanngullugu ingerlatassaq piffissani aalajangersimasuni ingerlannejarsinnaanngitsut imaluunniit taamaallaat sillimaniarnermi maleruagassat aalajangersimasut malillugit ingerlannejarsinnaasut.

§ 24-mut

Imm. 1-imut

Aalajangersagaq pissutsinut pingasunut, tamanna naleqquppat, piiaanissamut pilersaarutip ilaatigut imarisassaannut allattuiffimmik imaqarpoq.

Aatsitassanut ikummatissanullu inatsit maannakkut atuuttoq malillugu annikitsumik aatsitassarsiornissamut akuersissutinut piiaanissamut pilersaarutit aamma piiaanissamut

pilersaarutitut akuersissuteqarnerit atuuttut pissutsinik taakkuninnga aamma pissutsinik allanik naleqquttumik annertussusilinnik imaqarput. Aalajangersagaq malillugu, Naalackersuisut naliliinerat malillugu tamanna naleqquppat, piiaanissamut pilersaarut taamaalilluni pissutsinik allassimasunik taakkuninnga imaqassaaq.

Imm. 2-mut

Piiaanissamut pilersaarut naleqqutsillugu nutarterneqartassasoq allangortinneqartassasorlu aalajangersakkami allassimavoq.

Pisinnaatitsissummik pigisaqartoq allanik pingaaruteqannginngitsunik piiaanermik ingerlatassanik, Naalackersuisut imm. 1 malillugu akuersissuteqarfigeqqaagaaniit allaanerusunik, suliaqarnissamik kissaateqarpat, piiaanissamut pilersaarutip allangortinneqarnissaa ilaatigut pisussanngorsinnaavoq. Assersuutigalugu tassaasinnaavoq illunik, sanaartukkanik ikkussukkanillu ilaalu ilanngullugit nutaanik imaluunniit amerlanerusunik pilersitsinissaq, piiaanissamut pilersaarutaaqqaartumi pineqartunut ilaatinneqanngitsoq.

Piiaanissamut pilersaarutip sukkulluunniit piiaanermi ingerlatassanut nassuiaammik nutartikkamik, tunisassiornerup aaqqissuunneqarneranik, taakkununnga sanaartukkanik il.il. imaqarnissaa aalajangersakkami qulakkeerneqassaaq.

Aalajangersagaq malillugu ataasiakkaatigut ataatsimoortumillu naliliineq malillugu pissutsit allannguuteqarneranni tamanna pisariaqalersimappat, pisinnaatitsissummik pigisaqartoq sapinngisamik piaartumik piiaanissamut pilersaarummik nutartikkamik imaluunniit allangortinneqartumik suliaqassaaq tunniussissallunilu. Pisinnaatitsissummik pigisaqartoq piiaanissamut pilersaarummut nutarterneqartumut imaluunniit allangortinneqartumut Naalackersuisunit akuersissuteqarfigineqassaaq.

Naalackersuisut piiaanissamut pilersaarummik akuersissuteqarfigineqartussamik suliaqarnissamut aammalu allannguutit pisariaqartut piviusunngortinneqarnissaannut piffissamut killigititamik aalajangersaasinnaapput.

§ 25-mut

Imm. 1-imut

Tamanna naleqqussimappat, pissutsinut 7-nut allattuiffimmik matusinermut pilersaarutip ilaatigut imarisassaannik aalajangersagaq imaqarpoq.

Pisinnaatitsissummik pigisaqartup sanaartukkat illullu ilaalu ilanngullugit pisinnaatitsissummik pigisaqartumit pilersinneqartut imaluunniit atorneqartut, sumiiffik akuersissuteqarfiusoq aammalu sumiiffiit allat kallarneqartut pillugit qanoq iliornissaanut, aammalu pisinnaatitsissummik pigisaqartup piiaanerup, ilanngullugu tamatumunnga

atatillugu suliaqarneq ingerlatassallu, uninnerani matuneqarneranilu, pisinnaatitsissummik pigisaqartup sumiiffik akuersissuteqarfiusoq aamma sumiiffiit allat kalluarneqartut qanoq qimassanersai, matusinissamut pilersaarutip ilaatigut imarissavai.

Pisinnaatitsissummik pigisaqartoq sumiiffimmi akuersissuteqarfiusumi imaluunniit sumiiffinni kalluarneqartuni allani sanaartukkanik imaluunniit illunik ilaalu ilanngullugit qimatsinissamik pilersaaruteqarpat, aammalu sanaartukkat imaluunniit illut ilaalu ilanngullugit peqqinnissamik, isumannaallisaanermik imaluunniit allanik pissuteqartumik matusinerup kingorna aserfallatsaaliorneqartariaqarpata, alapernaarsorneqartariaqarpata imaluunniit allanik ingerlataqarnissaq imaluunniit iliuseqarnissaq pisariaqarpat, matusinissamut pilersaarut taakkununga pilersaarutininik imaqaassaaq.

Matusinerup kingorna, pisinnaatitsissummik pigisaqartoq sumiiffimmi sanaartukkanik ilaalu ilanngullugit qimatsimatillugu, piffissami aalajangersimasumi alapernaarsuineq ilaatigut naleqqutissaaq. Taamatut pisoqartillugu Naalackersuisut assersuutigalugu pisinnaatitsissummik pigisaqartoq matusinerup kingorna piffissami aalajangersimasumi sanaartukkanik qimanneqartunik aserfallatsaaliuissasoq alapernaarsuissasorlu pillugu akuersissuteqarnermut atugassarititaasunik aalajangersaasinnaapput.

Pisinnaatitsissummik pigisaqartoq pisussaaffimminik aammalu matusineq pillugu pisussaaffigisimasinnaasaminik naammassinninnissamut, matusinissamut pilersaarutip tamatumunngalu atatillugu ingerlatassat iliussissallu ingerlannissaanut qanoq qularnaveeqqusiissanersoq, aamma matusinissamut pilersaarummi allassimassaaq.

Matusinissamut pilersaarutit aamma matusinissamut pilersaarutininut akuersissuteqarnerit atuutereersut naleqquttumik annertussusilimmik pissutsinik taakkuninnga aammalu pissutsinik allanik imaqarput. Matusinissamut pilersaarutit taakkuninngalu akuersissuteqartarnerit pillugit suleriaaseq atuutereersoq siunnersuummi aalajangersakkat malillugit ingerlateqqinneqarsinnaavoq.

Aalajangersakkami isumannaallisaanermi mianerisassanik aammalu matusinermi aamma piiiaanermi ingerlatat unitsinneqarneranni, mianerisassanik siunnersuummi siunertanut aalajangersakkami allassimasunut, naapertuuttumik isumaginninnissaq immikkut ukkatarineqarpoq.

Imm. 1, nr. 7, siunnersuummi § 5-imut ataqatigiissillugu atuarneqassaaq, tassami allap matusinissamut pilersaarummik suliaqarneranut aningaasartuutissat missingersorneqartut aningaasartaat, ingerlatassat siunnersuutip atuuffissaasa iluanniinnersut, naliliinissamut atorneqartussaammata.

Imm. 2-mut

Pisinnaatitsissummik pigisaqartoq Naalackersuisut akuersissuteqarfigeqqaagaanniit

piiaanermik ingerlatassanik pingaaruteqannginngitsunik allanik suliaqarnissamik kissaateqarpat, matusinissamut pilersaarut allannguuteqartinneqartussanngorsinnaavoq. Assersuutigalugu taakkua tassaasinnaapput illunik, sanaartukkanik ikkussukkanillu ilaalu ilanngullugit nutaamik imaluunniit amerlanerusunik pilersitsinissaq, matusinissamut pilersaarutaaqqaartumi pineqartunut ilaatinneqanngitsut.

Matusinissamut pilersaarutip sukkulluunniit piiaanermi ingerlatassanut, tunisassiornerup aaqqissugaaneranut taakkununggalu sanaartukkanut ilaalu ilanngullugu nassuiaatinik nutartikkanik imaqarnissaanut aalajangersakkami qulakkeerreqassaaq.

Aalajangersagaq malillugu ataasiakkaatigut ataatsimoortumillu nalilersuineq malillugu pissutsit allanngorneranni tamanna pisariaqalerpat, pisinnaatitsissummik pigisaqartoq sapinngisamik piaartumik matusinissamut pilersaarummik nutartikkamik imaluunniit allanngortinneqartumik suliaqassaaq tunniussissallunilu. Pisinnaatitsissummik pigisaqartoq matusinissamut pilersaarummut nutarterneqartumut imaluunniit allanngortinneqartumut Naalackersuisunit akuersissuteqarfigineqassaaq.

Matusinissamut pilersaarummik akuersissuteqarfigineqartussamik aammalu allanngortitsinerit pisariaqartut piviusunngortillugit suliaqarnissamut piffissamut killiliussamik Naalackersuisut aalajangersaasinnaapput, ilanngullugu qularnaveeqqusiinissamut tunngatillugu.

§ 26-mut

Imm. 1-imut

Aalajangersagaq malillugu pisinnaatitsissummik pigisaqartut allallu pisussaaffiitut qularnaveeqqusiinissaq pillugu aalajangersakkanik atugassarititaasunillu Naalackersuisut aalajangersaasinnaapput.

Ingerlatassat aalajangersimasut aammalu piffissami akuersissuteqarfiusumi ingerlatassanik ilaalu ilanngullugit suliarinninnermut atatillugu iliuusissat naatsorsuutigineqartut annertussusaat qanoq issusaallu eqqarsaatigalugit, qularnaveeqqusiinnermut atugassarititaasut aalajangersarneqassapput. Qularnaveeqqusiinerup ilusiligaanera aamma pisinnaatitsissummik pigisaqartoq oqaloqatigalugu pissaaq.

Aalajangersakkamut siunertaavoq pisinnaatitsissummik pigisaqartup pisussaaffiisa naammassineqarnissaannut qulakkeerinneqataanissaq. Qularnaveeqqusiineq pisinnaatitsissummik pigisaqartup qularnaveeqqusiussaa, pisinnaatitsissummik pigisaqartup siunnersuut, aalajangersakkat aamma atugassarititaasut siunnersuut malillugu aalajangersagaasut, akuersissut, ingerlatassanut pilersaarutit, pilersaarutitut akuersissuteqarnerit kiisalu ingerlatassanut akuersissuteqarnerit allat aamma aalajangiinerit Naalackersuisunit aalajangiiffigineqartut malillugit pisussaaffiinek naammassinninnissaata eqqarsaatigineqarneranik isumaginninnermut takussutissaassaaq.

Imm. 2-mut

Aalajangersagaq malillugu, pissutsit allanngorneranni tamanna pisariaqalerpat, pisinnaatitsissummik pigisaqartoq qularnaveeqqusiinerup nutarternissaanut allanngortinnissaanullu aammalu tamatumunnga Naalakkersuisut akuersissuteqartinnissaanut, pisussaaffeqarpoq. Pisinnaatitsissummik pigisaqartup tamatuma saniatigut sapinngisamik piaartumik qularnaveeqqusiissut qularnaveeqqusiinerlu allanngortissavai aammalu Naalakkersuisut tamatumunnga aalajangiippata, qularnaveeqqusiissut qularnaveeqqutillu allanngortinneqarnera Naalakkersuisunit akuersissuteqarfigitissallugu.

Akuersissut tunniunneqartoq malillugu pisinnaatitsissummik pigisaqartoq ingerlatassanut pilersaarummut akuersissuteqarfigineqarpat, illunik, sanaartukkanik ikkussukkanillu ilaalu ilanngullugit nutaanik imaluunniit amerlanerusunik pilersitsinissaq pisariaqalersillugu, tamanna assersuutigalugu naleqqutilersinnaavoq. Taamatut pisoqartillugu illut, sanaartukkat ikkussukkallu ilaalu ilanngullugit taaneqartut ilaatilerlugit qularnaveeqqusiissutip annertusitinnissaa naleqqutilerlussaavoq.

Assersuutigalugu pisinnaatitsissummik pigisaqartoq illut sanaartukkallu ilaannik atuiunnaarluni, taakkualu peerlugit aammalu pisinnaatitsissummik pigisaqartup tamanna tunngavigalugu qularnaveeqqusiissutip maannamut pisunit annikinnerusunik aningaasartaqartilernissaa kissaatigalugu pisoqartillugu, tamanna naleqqutilersinnaavoq.

Pisinnaatitsissummik pigisaqartup qularnaveeqqusiissutaa sukkulluunniit pisinnaatitsissummik pigisaqartup siunnersuut malillugu pisussaaffiinit, aalajangersakkanut atugassarititaasunullu siunnersuut, akuersissut, ingerlatassanut pilersaarutit pilersaarutinullu akuersissuteqarnerit malillugit aalajangersagaasunut, sanilliullugu nutarterneqarsimanissaata qulakkeernissaanut aalajangersagaq iluaqutaassaaq.

Imm. 3-mut

Imm. 1 aamma 2 malillugit qularnaveeqqusiinissaq qularnaveeqqullu pillugit aalajangersakkanik atugassarititaasunillu erseqqinnerusunik aalajangersaanissamut inatsimmi tunngavissamik aalajangersagaq imaqarpoq.

Taakkua siunnersuutip siunnersuutip siunertaanut aalajangersakkamut aamma aalajangersakkanut allanut naapertuussimappata, pissutsit attuumassuteqartut tamaasa pillugit aalajangersakkanik atugassarititaasunillu Naalakkersuisut aalajangersaasinnaapput.

Qularnaveeqqutit qanoq ilusillit atorneqarsinnaanersut, aammalu atugassarititaasut suut qularnaveeqqusiinermut atuutissanersut pillugu aalajangersakkanik atugassarititaasunillu Naalakkersuisut ilaatigut aalajangersaasinnaapput.

§ 27-mut

Imm. 1-imut

Aalajangersagaq malillugu, Naalakkersuisut allatut akuersissuteqarsimangippata, akuersissut malillugu pisinnaatitsissummik pigisaqartup piffissaq akuersissuteqarfiusoq tamaat sanaartukkat illullu, pisinnaatitsissummik pigisaqartumit pilersinneqartut aammalu pisinnaatitsissummik pigisaqartumit atorineqanngitsut, peertassavai aammalu tamanna ajornartinnagu, sumiiffinni kallarneqartuni pinngortitami ilaalu ilanngullugit saliiassalluni aammalu naleqquttumik iluarseeqqittassalluni.

Pisinnaatitsissummik pigisaqartup piffissaq akuersissuteqarfiusoq tamaat ingerlaavartumik matusisarluni, saliiarluni aammalu pinngortitami iluarseeqqittarluni ilaalu ilanngullugit, matusinissamut pisussaaffimminik naammassinninnissaata qulakkeernissaa, aalajangersakkami siunertaavoq.

Imm. 2-mut

Pisinnaatitsissummik pigisaqartup imm. 1-imi oqaatigineqartutut peqqusissuteqarneq malinnippagu, aalajangersagaq malillugu Naalakkersuisut imm. 1-imi taaneqartut iliuusissat il.il. pisinnaatitsissummik pigisaqartup akiligassaanik annaasaqaatigisinnaasaanillu ingerlassinnaavaat.

Imm. 3-mut

Aalajangersagaq malillugu pisinnaatitsissummik pigisaqartup ingerlatassanik aamma iliuuseqarnermik imm. 1-imi aamma 2-mi taaneqartunik ingerlatsinissaq pillugu Naalakkersuisunit peqqussuteqarneq malinnippagu, Naalakkersuisut sanaartukkat illullu ilaalu ilanngullugit, (1) suliffeqarfinit inunnillu pineqartunit pigineqartut, (2) akuersissut imaluunniit akuersissuteqarneq malillugu ingerlatassanik suliaqarnermi atorineqarsimasut aammalu (3) sumiiffinni kallarneqartuniittut, peerneqarnissaat pillugu suliffeqarfinnut aamma inunnut allanut Naalakkersuisut peqqusissuteqarsinnaapput. Tunngavissaritaasut tamarmik naammassineqarsimassapput.

Aalajangersakkap malitsigisaanik pisinnaatitsissummik pigisaqartup, assersuutigalugu maskiinat imaluunniit atortut akuersissut malillugu ingerlatassanik suliaqarnermi atorineqarsimasut, sumiiffinnit kallarneqartunit peernissaannut pisussaaffini naammassisimangippagit, aammalu maskiinat pineqartut imaluunniit atortut pineqartut pisinnaatitsissummik pigisaqartumit pigineqaratik allamit pigineqarpata, Naalakkersuisut taamatuttaaq maskiinat pineqartut imaluunniit atortut pineqartut peeqqullugit piginnittumut peqqusissuteqarsinnaapput. Tamanna maskiinat pineqartut imaluunniit atortut pineqartut assersuutigalugu entreprenørimit taassuma ataaniittumit sumiiffimmi akuersissuteqarfiusumi suliaqarnermi suliarinnittumit imaluunniit suliffeqarfimmit attartortitsisartumit imaluunniit atukkiisartumit, taamaallaat maskiinanik imaluunniit atortunik pisinnaatitsissummik pigisaqartumut attartortitsisimasumit imaluunniit atukkiisimasumit pigineqarnerisut

apeqqutaatinnagu, tamanna atuutissaaq.

Saliinerup taamaattup kalaallit oqartussaasuinit ingerlanneqartariaqarani akilerneqartariaqaranilu, akuersissummi ingerlatassat kingorna sapinngisamik annertunerpaamik saliisoqarnissaata qulakkeernissaa, aalajangersakkami siunertaavoq.

Aalajangersakkami pisinnaatitsissummik pigisaqartup pisussaaffii killilerneqanngillat. Naalackersuisut tamanna pitinnagu taakkaa peernissaannik piginnittumut peqqusissuteqaqqaaratik, maskiinat aamma atortut allap pigisai pisinnaatitsissummik pigisaqartup akiligassaanik annaasaqaatigisinnaasaanillu peertissinnaavaat.

Assersuutigalugu maskiinanik imaluunniit atortunik piginnittup maskiinat pineqartut imaluunniit atortut pineqartut peernissaannik peqqusissuteqarneq malinngippagu, pisinnaatitsissummik pigisaqartoq aamma piginnittoq maskiinat pineqartut aamma atortut pineqartut peernissaannut nammaqatigiillutik akiliisussaassapput.

§ 28-mut

Imm. 1-imut

Pisinnaatitsissummik pigisaqartup pigisap nalillip pineqartup peerneqarneranut aningaasartuutunik akiliinissaata tungaanut, ilanngullugit pigisap nalillip peerneqarneranut atatillugu oqartussat suliarinninnerannut aningaasartuutit, Naalackersuisut pisinnaatitsissummik pigisaqartup pigisaasa naleqartut § 27, imm. 2 malillugu peersimasaasa tigungminissaannut Naalackersuisut ersarissumik inatsimmi tunngavissaqarnissaasa qulakkeernissaa, aalajangersakkami siunertaavoq.

Pisinnaatitsissummik pigisaqartup akuersissut malillugu ingerlatanik matusinissaanut saliinissaanullu aammalu aningaasartuutunik akiliinissaanut aalajangersagaq qulakkeereqataassaaq.

Imm. 2-mut

Pigisat pineqartut peerneqarnerannut aningaasartuutunik pineqartup akiliinissaata tungaanut, inuup imaluunniit suliffeqarfiup pigisaasa nalillit, aammalu Naalackersuisut § 27, imm. 3 malillugu peersimasaasa tigungminissaannut Naalackersuisut ersarissumik inatsimmi tunngaveqarnissaasa qulakkeernissaa, aalajangersakkami siunertaavoq.

Pigisat siunnersuut malillugu ingerlananut atatillugu atorneqarsimasut, aammalu pisinnaatitsissummik pigisaqartumit pigineqanngitsut, qimanneqartillugit, saliinermut nunap karsiata aningaasartuutaasa sapinngisamik amerlanerpaat matussuserneqarnissaannut aalajangersagaq qulakkeerinneqataassaaq.

Imm. 3-mut

Naalackersuisut taakkuninnga akiliusseqqaartariaqaratik, Naalackersuisut imm. 1 imaluunniit 2 malillugu piumasaqaatiminnik pisussaaffeqartup pigisaanni naammassinnitsitsiniaanissamut inatsimmi ersarissumik tunngavissaqarnissaat, aalajangersakkami qulakkeerneqartussaavoq.

Imm. 4-mut

Kina pigisamik nalilimmik piginnittuunersoq aammalu pigisamut tunngatillugu allat pisinnaatitaaffii imaluunniit pisussaaffii tuniniaanermi kallarneqassasut naatsorsuutigineqartariaqarnersoq, Naalackersuisut tamanut ammasumik kaattaassilluni tuniniaalinnginnermi misissussavaat. Assersuutigalugu tassaasinnaavoq qularnaveeqqusiussaqarluni taarsigassarsititsisoq pigisami pineqartumi qularnaveeqqummik pissaqartoq. Naalackersuisut pisortat nalunaarsuiffii attuumassuteqartut misissussavaat aammalu naapertuutsillugu pisinnaatitsissummik pigisaqartoq imaluunniit pigisamik piginnittoq tamatuminnga aperissallugu.

Pisinnaatitaaffiit imaluunniit pisussaaffiit pigisap tuniniarneqarneranit kallarneqarsinnaasut tuniniaanissaq pillugu ilisimatinneqartarnissaasa aammalu tuniniaanermut atatillugu soqutigisaminnik isumaginnissinnaanissamut periarfissinneqarnissaasa qulakkeernissaa, aalajangersakkami siunertaavoq.

Imm. 5-imut

Aalajangersakkami allassimavoq, imm. 3 malillugu tamanut ammasumik kaattaassilluni tuniniaanermi Naalackersuisut pigisat nalillit ataasiakkaat taakkua kaattaassilluni tuniniaasut ataatsimoorfianni imaluunniit elektroniskimik kaattaassilluni tuniniaanermi tuniniarneqartussat neqeroorutigissagaat. Taamaalilluni kaattaassilluni tuniniaariaaseq sorleq pisuni ataasiakkaani pigisamut akigititap qaffasinnerusumik akeqalerneranik malitseqarsinnaasutut ilimagineqartariaqarnersoq, Naalackersuisut aalajangertussaavaat.

Aammattaq aalajangersagaq malillugu Naalackersuisut kaattaassilluni tuniniaanerup ingerlanneqareernerata kingorna naliliippata nutaamik kaattaassilluni tuniniaanermi neqeroorummik qaffasinnerujussuarmik angusaqartoqarsinnaasoq, nutaamik kaattaassilluni tuniniaasoqassasoq Naalackersuisut aalajangersinnaapput.

Imm. 6-imut

Soqutigisaqartut pigisami pisinnaatitaaffimminnik tamakkiisumik matussusiivigineqanngitsut, qularnaveeqqusiillutik nutaamik kaattaassilluni tuniniaanissamik piumasaqarnissamut periarfissaqarnerannut, aalajangersagaq tunngassuteqarpoq.

Assersuutigalugu aningaasanik toqqorsivimmiititsinikkut imaluunniit aningaaserivimmi qularnaveeqqusiinikkut qularnaveeqqusiisoqarsinnaavoq.

Pigisamik piginnittup allallu neqeroorummi pigisamut tunngatillugu pisinnaatitaaffimminnik tamakkiisumik matussusiivigineqanngitsut soqutigisaminnik isumaginnissinnaanissaasa

qulakkeernissaa, aalajangersakkami siunertaavoq. Tamatuma saniatigut pigisat niuerfimmi akigititanut tunineqarnissaannut aalajangersagaq iluaqutaassaaq.

Imm. 7-imut

Aalajangersakkap kingunerisaanik pigisamut tunngatillugu pisinnaatitaaffiit allat matussuserneqannginneranni, kaattaassilluni tuniniaanermut aningaasartuutit tunisinermi iluanaarutinit ilanngaatigineqassapput.

Imm. 8-mut

Tuniniaanermi iluanaarutit qanoq atorneqassanersut aalajangersakkami aalajangersarneqarpoq. Tuniniaanermi iluanaarutit tulleriinnilersuineri taaneqartuni piunasaqaatinut makkununga matussusiissapput:

- 1) Kaattaassilluni tuniniaanermi aningaasartuutit, takuuk imm. 7.
- 2) Naalackersuisut piunasaqaataat, takuuk imm. 1 imaluunniit 2.
- 3) Pigisamut tunngatillugu pisinnaatitaaffiit allat (assersuutigalugu qularnaveeqqusiusaqarnermi pisinnaatitaaffiit).

Sinneqartooruteqarpat, taanna ilisimaneqarpat, taakkua pigisamik piginnittumut tunniunneqassapput. Pigisamik piginnittoq naapertuuttumik ilungersuuteqarluni aalajangerneqarsinnaanngippat, sinneqartoorutit nunap karsianut tutsinneqarnissaat aalajangersakkami qulakkeerneqarpoq.

§ 29-mut

Imm. 1-imut

Najukkani aatsitassanut tunngasunik suliaqarnissamut akuersissutitut royaltynik akiliinissaq pillugu aalajangersakkanik atugassarititaasunillu Naalackersuisut aalajangersaasinnaanissaannut aalajangersakkami periarfissiisoqarpoq. Assersuutit taagorneqartut tamakkiisuunngillat. Royalty pisinnaatitsissummik pigisaqartup aatsitassanik piiaanissamut pisinnaatitaanerminut akiliutigaa, taamaalillunilu akileraarutaanani. Akiliutissamik aalajangersaaneq siunissamut taamaallaat pisinnaavoq, tassa imaappoq, nalunaarutitut ilusilimmi akiliuteqarnissamik aalajangersaaneq taamaallaat akuersissutitut nalunaarutip tamanut saqqummiunneqareernerata kingorna tunniunneqartunut atuutissaaq.

Imm. 2-mut

Aalajangersagaq pisinnaatitsissummik pigisaqartumut, suliaqarneranut pisinnaatitsissummik pigisaqartumut akuersissummi pineqartunut ilaasumut, akileraarusiinnginnissamut Naalackersuisut periarfissaqarnerannut tunngassuteqarpoq.

Akileraarusiinnginnissamut tunngavissaatinneqarpoq piunasaqaatit marluk naammassineqarsimassasut. Siullertut suliffeqarfik imm. 1 malillugu royaltymik,

minnerpaamik akileraarusiinermituulli nammagassiitigisumik, pisussaaffilerneqarsimassaaq. Aappaattut royalty pisussaaffiliunneqartoq tamakkiisumik Kalaallit Nunaanni Namminersorneq pillugu inatsimmi § 7-imi isertitanut nassuiaassummi pineqartunut ilaassaaq.

§ 30-mut

Imm. 1-imut

Aalajangersagaq malillugu sumiiffimmuut imaanut nunamullu erseqqinnerusumik killissalersorneqarsimasumut aammalu atugassarititaasut erseqqinnerusumik aalajangersagaasut tunngavigalugit ujaraqqanik, ujaqqanik, sioqqanik assigisaannillu aatsitassanik piiaanissamut atortussanut akuersissuteqartoqarsinnaavoq. Nunami sumiiffiup aammalu imaani sumiiffiup tassunga killittup akornanni killeqarfiata, tinittarnerata ulittarneratalu qeqqa malippaat.

Akuersissuteqarneq taamaallaat atortussanut Kalaallit Nunaanni illuliassami imaluunniit attaveqaasersuutitut suliaassami kiisalu ingerlatassani taakkununga atasuni illuliornermut atortussatut imaluunniit sanaartornermut atortussatut atorneqartussanut tunngassuteqarpoq. Aatsitassat taamaalilluni nunani allani atorneqartussanngorlugit anninneqarsinnaanngillat. Kalaallit Nunaanniit aatsitassat tamarmik imaluunniit ilai anninneqassappata, tamatumani aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummik peqarnissaq piumasqaataavoq.

Taamaattoq pisinnaatitsissummik pigisaqartup atortussat pitsaassusaannik naleqqussusaannillu erseqqinnerusumik misissuinissaq siunertaralugu, nunani allani misissugassatut tiguneqartut annikinnerusut anninnissaannut Inatsisartut inatsisaanni maleruagassat malillugit avammut annissinissamut akuersissuteqarnissamik qinnuteqarsinnaanera, aalajangersakkami akornuserneqanngilaq.

Atortussanut akuersissuteqarneq malillugu, akuersissuteqarnermi aalajangersagaasunik annertussusilinnik aammalu atugassarititaasut malillugit, tamatumunnga piiaanissamut akuersissummik tunniussisoqarani ingerlatassat suliarineqarsinnaapput.

Tunngavissaatinneqarpoq aalajangersagaq malillugu atortussanut akuersissuteqarneq pisuni ataasiakkaani tamaginni ataasiakkaatigut nalilersuineq malillugu tunniunneqartassasoq, aammalu piffissamut killiligaanngitsumik atortussanut akuersissuteqartoqarsinnaanngitsaq.

Imm. 2-mut

Aalajangersagaq siunnersuutigineqartoq suliaqqarfimmi maannamut suleriaatsimut piginnaatitaanerillu agguagaanerannut naapertuuppoq, taanna malillugu taamatut ittumik suliaqqarnissamut nunaminertamik atugassiisarneq kommunalbestyrelsimit akuerineqartarluni. Tassani illoqarfinni nunaqqarfinnilu illuliortiternermut sanaartornermullu suliaqqarfimmiit

ujartuinerup naaperiaaffigineqarsinnaanissaanut, suliaqarnerup suussusaa nalinginnaasumik illoqarfimmut qanittumi inissisimasartoq pineqarpoq, taamaattumillu kommuni illoqarfinni illut akornanni suliffeqarfiit taakkua inissisimaffissaannut sunniuteqarnerminnik atuinissamik immikkut pisariaqartitsipput.

§ 31-mut

Atortussanut akuersissuteqarnermut pisinnaatitsissummik pigisaqartumut piunasaqaatit aalajangersakkami aalajangersarneqarput. Piunasaqaatit akuersissuteqarnerup nalaaniit aammalu piffissami akuersissuteqarfiusumi tamarmi atuupput.

Aalajangersakkami aalajangersarneqarpoq, pisinnaatitsissummik pigisaqartoq (annikitsumik aatsitassarsiornissamut akuersissutit pillugit maannakkut aatsitassanut ikummatissanullu inatsisip paarlattuanik) tassaassasoq pisinnaatitaasoq pisussaataasorlu aammalu taanna Kalaallit Nunanni inuussutissarsiummik ingerlataqartutut nalunaarsorsimassasoq. Aammattaaq aalajangersakkami allassimavoq, suliffeqarfiup ilusai aalajangersimasut sorliit atorlugit pisinnaatitsissummik pigisaqartoq nalunaarsorsimasuussanersoq. Nutaatut suliffeqarfik Kalaallit Nunaanni angerlarsimaffeqluni nalunaarsorsimasuussasoq pillugu piunasaqaat atuutsinneqalerpoq.

Tamatuma saniatigut pisinnaatitsissummik pigisaqartoq tassaasinnaasoq kommuni, periarfissamik aalajangersagaq imaqarpoq.

§ 32-mut

Imm. 1-imut

Atortussanut akuersissuteqarneq naapertorlugu aatsitassanik piiaaneq isumannaallisaanermut, peqqinnissamut avatangiisinullu tunngatillugu isumannaatsumik ingerlanneqassasoq pillugu maannakkut aatsitassanut ikummatissanullu inatsimmi aalajangersakkat, aalajangersakkami ingerlateqqinneqarput.

Imm. 2-mut

Atortussanut akuersissuteqarneq tassungalu atasumik ingerlataqarnerit pillugit aalajangersakkanik atugassarititaasunillu erseqqinnerusunik aalajangersaasinnaanissamut inatsimmi tunngavissamik aalajangersagaq imaqarpoq. Suliaqarnermi atortussanut akuersissuteqarneq pingaarnepaatigut tamatigut atugassarititaasunik arlalinnik imaqassasoq naatsorsuutigineqarpoq, ilanngullugit siunertamut aalajangersakkami mianerisassat.

Aammattaaq aalajangersakkami aalajangersarneqarpoq, siunnersuummi kapitali 4-mi akuersissuteqarnerit, ingerlatanik matusineq qularnaveeqqusiinerlu ilaalu ilanngullugit pillugu kiisalu kapitali 10-mi inuiaqatigiinni piujuaannartitsisumik ingerlatsinermik naliliineq (VSB) aamma avatangiisinik nalilersuineq (VVM) pillugit aalajangersakkat aamma atortussanut

akuersissuteqarnernut atuutissasut pillugu aalajangersakkanik atugassarititaasunillu aalajangersaasoqarsinnaasoq.

§ 33-mut

Aalajangersagaq malillugu atortussanut akuersissuteqarneq sumiiffinnut Inatsisartut inatsisaat malillugu siunnersuummi kapitali 3 malillugu akuersissummik tunniussivigineqarsimasunut, tunniunneqarsinnaanngilaq.

Aalajangersagaq malillugu sumiiffinnut, kisermaassisussaataalluni akuersissummi aatsitassanut tunngasunik suliaqarneq pillugu Inatsisartut inatsisaat naapertorlugu tunniunneqarsimasumi pineqartunut ilaasunut aamma akuersissuteqartoqarsinnaanngilaq. Siunnersuutip saqqummiunneqarnerata nalaani tamatumani aatsitassarsiorluni misissuinissamut aamma aatsitassanik piiaanissamut akuersissuteqarnissaq pisariaqarpoq.

Naggasiutigalugu aalajangersagaq malillugu sumiiffinni nunap sanaani eqqissisimatitsiviusuni aamma akuersissummik tunniussisoqarsinnaanngilaq.

§ 34-mut

Imm. 1-imut

Pineqartup pisinnaatitsissummik pigisaqartuunngitsup aatsitassanik Kalaallit Nunaanni inatsisit malillugit piarneqarsimasunik Kalaallit Nunaanniit annissinissamut periarfissaqarneranut aalajangersagaq tunngassuteqarpoq.

Inunni tassani pineqartuni ilaatigut inuit ingerlatassanik Inatsisartut inatsisaanni pineqartunut ilaasunik suliaqartut, kisianni tunngaviatigut aamma inuit allat, pineqartunut ilaatinneqarput, ilanngullugit assersuutigalugu ilisimatuut, ilisimatuussutsikkut inatsisit malillugit suliaqarnerminnut ilaatillugu misissugassanik katersisartut, ilanngullugit aatsitassat, aammalu taakkuninnga ilisimatusarnissaq siunertaralugu Kalaallit Nunaanniit misissugassanik taakkuninnga annissinissamik kissaateqartut.

Imm. 2-mut

Aalajangersagaq malillugu akuersissuteqarneq atugassarititaasut erseqqinnerusumik aalajangersarneqartut tunngavigalugit tunniunneqarsinnaavoq. Ilaatigut aatsitassat pineqartut siusinnerusukkut inatsisit malillugit Kalaallit Nunaanniit anninneqareersimagaluartut imaluunniit eqqunneqarsimagaluartut, Kalaallit Nunaanniit aatsitassanik annissineq tamatumunnga akuersissuteqarneq malillugu taamaallaat pisinnaasoq pillugu atugassarititaasut aalajangersarneqarsinnaapput. Taamaalilluni aatsitassanik annissinerit tamarnik taamaallaat tamatumunnga akuersissuteqarneq malillugu pisinnaasut pillugu atugassarititaasut aalajangersarneqarsinnaapput. Aatsitassat Kalaallit Nunaata aamma nunap allap imaluunniit nunat allat amerlanerusut akornanni akuttunngitsumik kaaviiartaraluartut,

aamma tamanna atuutissaaq. Aammattaaq nalunaarusiornerit il.il. pillugit atugassarititaasut aalajangersarneqarsinnaapput.

§ 35-mut

Aalajangersakkami aatsitassarsiorluni ingerlatassanut atatillugu avatangiisinik allanngutsaaliuineq maleruagassiivigineqarpoq, ilanngullugit silap pissusaanik allanngutsaaliuineq aamma pinngortitamik illersuineq, aammalu annertuumik ataatsimoortillugu allataalluni, taamaalillunilu aatsitassanut ikummatissanullu inatsimmi §§ 51, 55 aamma 59 malillugit avatangiisinik allanngutsaaliuineq ingerlateqqinneqarluni.

Imm. 1-imut

Imm. 1-imi allassimavoq, inuit inuuniarnerminni atugaasa aammalu pinngortitap ataqatigiinnerata kaaviiarfiisa, piujuartussamik ineriartortitsinermut ilaatillugu nunaminertanik pinngortitamilu pisuussutinik atorluaanissaaq pisariaqalersikkaat. Taamaalilluni avatangiisini ajornartorsiutit sumiiffiiniinnaq atuutinningsut aammalu nassuiarluagaaginnangitsut, kisianni paarlattuanik nunarsuarmi atuuttut, assigiinningsitaartut pisariusuusullu, nassuerutigisarnerata annertusiartornera aalajangersakkami tunngavigineqarpoq. Avatangiisinut politikimi inuit pinngortitamut ataqatigiinnerat tamakkiisuutillugu isiginninneq taamaalilluni aalajangersakkami siunnerfigineqarpoq aatsitassanik piianaanermiit, tunisassiornermut atuinernullu, eqqagassanik igitsisarnermut.

Siunnersuummi taamaalilluni silap pissusaa pinngortitarlu illersorneqassapput, taamaalilluni inuiaqatigiinni ineriartorneq, silap pissusaanut tunngasut taakkualu inuit inuuniarnermi atugarisaannut aamma uumasut naasullu piujuartinnissaannut pingaaruteqarnerat ataqqillugu, piujuaannartitsisumik ingerlatsinermik tunngavilimmik pisinnaassalluni.

Avatangiisit, silap pissusaata pinngortitallu allanngutsaaliorneqarnerat pillugu siunnersuummi aalajangersakkat atorneqarneranni, avatangiisinut, silap pissusaanut pinngortitamullu sunniutaasussat tamarmiusut pingaartinneqassapput.

Imm. 2-mut

Aalajangersakkami siunnersuutigineqartumi kapitalimi illersuinermi pineqartut allassimapput. Aalajangersakkap oqaasertalersugaanerani annertuumik nunani tamalaani tunngaviusut akuerisaasut, aamma danskit imaani avatangiisinut inatsisaanni siunertamut aalajangersakkamik oqaasertaliinermi takoqqinneqarsinnaasut, aallaavigineqarput.

Siunnersuutigineqarpoq siunnersuummi matumani avatangiisinik, silap pissusaanik pinngortitamillu allanngutsaaliuineq pillugit maleruagassat, mingutsitsinermik pitsaaliuinissamik, killilersimaarinissamik akiuniarnissamillu aammalu allatigut avatangiisit, silap pissusaata pinngortitallu ingerlatanit toqqaannartumik imaluunniit toqqaannangitsumik inuit peqqissusaannut navianartorsiortitsisinnaasunit, uumasunik imaluunniit naasunik

ajoqusiinnaasunit, nunamik, imaani, nunap iluanik imaluunniit pinngortitami pisuussutunik pisinnaatitaalluni atuinissamut ajoqutaasinnaasunit, inuit inuuniarnermi atugarisaannik ajornerulersitsisinnaasunit imaluunniit sukisaarsarnermut pingaaruteqarnera ingerlatanilluunniit ajornerulersitsisinnaasunit, allatut sunnerneqannginnissaat, siunnerfigineqassasoq.

Imm. 3-mut

Imm. 3-mi siunnersuutigineqartumi, mianerisassat inatsisip allaffissornikkut aqunneqarnerani isumagineqartussat, erseqqinnerusumik erseqqissarneqarput.

Nr. 1-imi kapitalimi anguniakkat pingaarnerit allassimapput. Taamaalilluni allassimavoq imaani, immap naqqani, nunap iluani, imermi, silaannarmi mingutsitsinissaq aamma silap pissusaanut tunngasunut ajoqusiisumik sunniinissaq kiisalu sajukulaartitsinermi nipiliornernillu ajoqutissartaqalersitsinissaq pitsaaliorneqassasoq, killilersimaarneqassasoq akiorniarneqassasorlu.

Isumalluutunik maangaannartitsinissap, takuuk nr. 2, aammalu mingutsitsinerup allatullu avatangiisinut ajoqusiisumik sunniinissap pitsaaliornissaanut killilersimaarnissaanullu, taamaalillunilu piujuartussamik ineriartortitsinermut pitsaanerusumik tunngavissiiinissamut, teknologiihimik minguinnerusumik atuilersitsinissaq inatsisip allaffissornikkut aqunneqarnerani imminnermini siunertaassasoq, nr. 3-mi siunnersuutigineqarpoq. Teknologii minguinnerusoq nassuiarneqarsinnaavoq tassaasoq tunisassiornermi sulianik ingerlatitsisarnerit, nioqqutissiassat, akuutissat iluaqutaasussat aamma tunisassiat isumalluutunik atuinermik annikinnerulersitsisussat aammalu mingutsitsinerup pilernissaanik pinngitsoortitsisussat, tunisassiornerup ingerlaneraniinnaangitsoq, kisianni aamma kingusinnerusukkut nioqqutissat tunisassiallu ingerlaarfiinut ilaatillugu.

Taamaattumik saliinermi iliuusissat, mingutsitsinermik ajornartorsiuteqarnerit ileqquusumik iliuuseqarfigineqarneranni periaasiusartut, oqariaatsimi "teknologii minguinnerusoq" pineqartunut ilaatinneqanngillat. Paasinarsisimavoq imermik maangaannartumik silaannarmillu saliineq, sinnikunik inissiinermi ajornartorsiuteqarnermik malitseqartartoq, taamaaliornermi mingutsitsinermik ajornartorsiuteqarneq allamik taarsiinnarneqartarluni. Ingerlaarfiinik isiginninnissaq aamma atoqqiisarnerunissaq aammalu eqqakkanik igitsinermut atatillugu ajornartorsiuteqartarnerup (ilanngullugit aamma ajornartorsiutit eqqakkat annertussusaasa kingunerisartagaat) killilersimaarnissaa pillugu nr. 4-mi anguniakkamut aamma tunngavigineqarpoq, taamaalillunilu teknologiihimik minguinnerusumik atuinerulersitsinissaq pillugu anguniakkamut qanimut atasuulluni.

§ 36-mut

Aalajangersagaq aatsitassanut ikummatissanullu inatsimmi § 52-imik ingerlatitseqqinneruvoq aammalu pissutsinut avatangiisinik, silap pissusaanik pinngortitamillu allanngutsaaliuineq

pillugu siunnersuummi aalajangersakkat atorneqarneranni allaffissornikkullu aqunneqarneranni pingaartinneqartussanut maleruagassiilluni.

Imm. 1-imut

Aalajangersakkami aalajangersarneqarpoq, siunnersuummi matumani maleruagassat atorneqarneranni allaffissornikkullu aqunneqarneranni teknikki pissarsiarineqarsinnaasoq pitsaanerpaaq pingaartinneqassasoq.

Teknikki pissarsiarineqarsinnaasoq pitsaanerpaaq paasineqassaaq tassaasoq, ingerlatassanik aamma ingerlatsinermi periaatsinik ineriartortitsinermi alloriarfiit sunniuteqarluarnerpaat nutaaliaanerpaallu aammalu teknikkip taassuma pinngitsoortitsinissamut imaluunniit tamanna ajornartillugu, aniatitsinernik allatullu avatangiisit tamakkiisuutillugit sunniinissap ataatsimut isigalugu killilersimaarnissaanut suliaqarnermi naleqqussusaa, ilanngullugit sumiiffiit piffissallu sunnertiaffiusut.

Tamanna paasineqassaaq:

Teknikki: Teknologii atorneqartoq aammalu suliaqarfiup qanoq ilusilersorneqarnissaa, sananeqarnissaa, aserfallatsaaliorneqarnissaa, ingerlanneqarnissaa matuneqarnissaalu.

Pissarsiarineqarsinnaanera: Teknikkip pineqartup aningaasaqarnikkut teknikkikkullu atugassarititaasinnaasut tunngavigalugit suliffissuaqarnermut suliaasaqarfimmi attuumassuteqartumi atorneqarsinnaaneramik malitseqartumik annertussusilimmi ineriartortinneqartoq, pisinnaatitsissummik pigisaqartoq teknikkimik atugassarititaasut naapertuuttut tunngavigalugit atugassaqsinnaappat, teknikkip sumi tunisassiarineqarsimanera imaluunniit atorneqareerneru apeqquaatinnagu, aningaasartuutissat iluaqutissartaasullu eqqarsaatigineqassallutik.

Pitsaanerpaaq: Avatangiisit tamakkiisuutillugit ataatsimut isigalugu qaffasissumik illersuisinnaanissamut teknikki sunniuteqarluarnerpaaq.

Teknologii minguinnerusoq pillugu tunngaviusoq, pitsaaliuisussamik suliniuteqarnikkut pisariaqanngitsumik isumalluutunik atuinerup maangaannartitsinerullu killilersimaarnissaanik siunnerfeqartoq, saliinermik iliuusissat paarlattuanni inissisimangilaq. Saliinermi aaqiissutissat avatangiisinik allanngutsaaliuineramik suliaqarnermi pingaaruteqartut ilaapput aammalu annertuumik taamaaginnartussaalluni. Kisianni tunngaviusumi pinngortitap ataqatigiinnera aallaavigalugu aamma inuiaqatigiit aningaasaqarnerat tamakkiisut isigalugu pingaarnersiuinissaq pisariaqartoq, tunngaviusumik oqariartuutigineqarpoq.

Suliffeqarfinni ataasiakkaani avatangiisinut piumasaqaatinut tunngatillugu suliffeqarfiup maannakkut inissisimanerata paasisimannissinnaanissaa aalajangiisuulluinnartumik pingaaruteqarpoq, taamatullu suliffeqarfik siunissami piumasaqaatit aamma

ilisimaneqarnissaat sapinngisamik annertunerpaamik qularnaarlugu, aningaasaliinissaminut pilersaarusiorsinnaanissamut periarfissaqassalluni.

Aammattaaq teknologii minguinnerusooq pillugu tunngaviusup atorneqarnerani, siunnersuut manna malillugu piumasaqaatinik aalajangersaanermi suliffeqarfiup nunani tamalaani unammillersinnaassuseqarnera ineriartornissamullu periarfissaasa eqqarsaatigineqarnissaat pisariaqarpoq.

Siunnersuutip matuma allaffissornikkut aqunneqarneranut pingaarnertigut mianerisassat tunngaviusullu taakkua, siunnersuut manna malillugu aalajangiinerni ataasiakkaani, ilitsersuutunik najoqqutassanillu Naalakkersuisut suleriaasiannut killissaliussassatut malittarisassatullu aalajangersaanermi aammalu siunnersuut manna malillugu maleruagassanik nalinginnaasunik aalajangersaanermi, atuutissapput.

Avatangiisit allanngutsaaliorneqarnera, silap pissusaata allanngutsaaliorneqarnera pinngortitallu illersorneqarnera pillugit Inatsisartut inatsisaanni aalajangersakkat allaffissornikkut aqunneqarneranni nunani tamalaani isumaqatigiissutit annertuumik aallaavigineqassapput.

Imm. 2-mut

Aalajangersagaq mingutsitsinerup pitsaaliornissaanut pakkersimaarnissaanullu iliuusissat annertussusissaannik suussusissaanillu naliliinermut tunngaviusunut tunngassuteqarpoq.

§ 37-mut

Aalajangersagaq oqaatsitigut aqqissuussinikkullu allannguuteqartillugu aatsitassanut ikummatissanullu inatsimmi § 53, imm. 1-2-mik ingerlatitseqqiineruvoq aammalu ingerlatassanut siunnersuummi pineqartunut ilaasunut atatillugu mingutsitsineq pillugu maleruagassanik aalajangersaaviulluni.

Imm. 1-imut

Aalajangersagaq malillugu kinaluunniit ingerlatassanik inatsimmi pineqartunut ilaasumik mingutsitsisinnaasumik aallartitsiniartoq, mingutsitsinissap navianaateqarnera sapinngisamik annertunerpaamik killilersimaarneqartussanngorlugu ingerlatassamut piffissamik aamma ingerlatassap sumiiffissaanik toqqaassaaq. Ingerlatassap suliarineqarnissaanut piffissamik sumiiffimillu toqqaanermi sumiiffimmi pinngortitap aamma sumiiffiup qanoq issusaa, ilanngullugu maannakkut atuinisaaq siunissamilu pilersaarutigineqartoq, eqqarsaatigineqassaaq. Aammattaaq imermik maangaannartunik, eqqagassanik allanillu akuutissanik atortussanillu mingutsitsisartunik naapertuuttumik igitsinissamut periarfissat eqqarsaatigineqassapput.

Sumiiffissarsiornissamat tunngaviusup siunnersuutigineqartup atuunnerani, ingerlatassaq mingutsitsisussaq avatangiisini mingutsitsinissamat patajaatsuni aammalu sumiiffiit sunnertiasut sapinngisamik annertunerpaamik mingutsitsinikkut sunnerneqartussaajunnaarlugit, inissinneqassaaq.

Imm. 2-mut

Aalajangersagaq malillugu kinaluunniit ingerlatassamik inatsimmi pineqartunut ilaasumik, mingutsitsinermik pilersitsisinnaasunik, aallartitsiniartoq, aallartitsisoq imaluunniit suliaqartoq, iliuusissanik mingutsitsinermut tassunga pitsaaliuisinnaasunik pakkersimaarinnissinnaasunillu aalajangersaassaaq aammalu suliffeqarfiup pilersinneqarnera, aaqqissuunneqarnera ingerlanneqarneralu sapinngisamik mingutsitsineq annikinnerpaamik malitseqartussanngorlugu aaqqissuutissallugu.

Aalajangersakkap siunnersuutigineqartup atuunnerani, suliffeqarfik mingutsitsisussaq iliuusissanik mingutsitsinermik killilersimannittussanik pisariaqartunik aalajangersaassaaq aammalu mingutsitsineq sapinngisamik annertunerpaamik killilersimaarneqartussanngorlugu ingerlatsineq aaqqissuutissallugu. Aalajangersagaq siunnersuummi § 4-mut ataqatigiissillugu isigineqassaaq.

Imm. 3-mut

Aalajangersagaq malillugu kialuunniit ingerlatassamik inatsimmi pineqartunut ilaasumik mingutsitsisinnaasumik aallartitsiniartup, aallartitsisup imaluunniit suliaqartup, atortunik ilaalu ilanngullugit, ilanngullugit maskiinat, atortut immaqalu unnuisarfiit, toqqarneqarneranni, pilersinneqarneranni aaqqissuunneqarnerannilu mingutsitsinerup, aniatitsinerit, eqqagassaqalertarnerit isumalluutinillu atuinerup sapinngisamik pitsaanerpaamik killilersimaarneqarnissaat qulakkiissavaa.

Aalajangersakkami aalajangersarneqarpoq, tamanna aamma ingerlatsinerup aaqqissuunneqarnerani qulakkeerneqassasoq, ilanngullugit aatsitassarsiorluni misissuinerup ingerlanissaannik, paaanerup ingerlanissaannik, suliaqarnerit ingerlanissaannik, nioqqutissiassanik, akuutissanik atortussanillu ingerlatsinermut atatillugu atorneqartussanik aammalu upalungaarsimanermut mingutsitsinernillu akiuiniarnernut suleriaasissanik toqqaanermi.

§ 38-mut

Aalajangersakkami siunnersuummi § 36, imm. 1 aamma 2, aammalu siunnersuummi § 37-mi sumiissusersiuinermut tunngaviusooq aamma mingutsitsinermik killilersimanninnissamat tunngaviusooq itisilerneqarput, aammalu aatsitassanut ikummatissanullu inatsimmi § 53, imm. 3-5-imik ingerlatitseqqinnerulluni.

Imm. 1-imut

Aalajangersakkami aalajangersarneqarpoq, suliffeqarfiit imaluunniit inuit avatangiisinik allanngutsaaliuineq imaluunniit mingutsitsinissamik pitsaaliuineq, mingutsitsinermik killilersimaarineq imaluunniit akiuiniarneq pillugit inatsisit malillugit pisussaaffeqartut, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, pineqartup pisussaaffiit naammassineqarneranni teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnissamut sapinngisamik pitsaanerpaanik atuinissaq qulakkiissagaat siuarsassallugulu.

Inuit siunnersuummi kapitali 2 malillugu ingerlatassanik suliaqartut aamma Inatsisartut inatsisaat malillugu pisussaaffeqartutut isigineqarput.

Siunnersuummi §§ 36-mut aamma 37-mut nassuiaatit innersuussutigineqarput.

Imm. 2-mut

Aalajangersagaq malillugu suliffeqarfiup imaluunniit inuup inatsit malillugu avatangiisini aarlerinaataasut paasineqarnissaat, nalilersorneqarnissaat aammalu suliaqarnermi naapertuuttumik ajornartinnagu sapinngisamik annertunerpaamik annikillisinneqarnissaat isumagisussaappagu, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, aammattaaq avatangiisinik allanngutsaaliuinissaq eqqarsaatigalugu, teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnermut sapinngisamik pitsaanerpaanik atuisoqarnera qulakkiissavaa siuarsassallugulu.

Imm. 1-imut aamma siunnersuummi §§ 35-mut aamma 36-mut nassuiaatit innersuussutigineqarput.

Imm. 3-mut

Aalajangersakkami aalajangersarneqarpoq, imm. 2 malillugu pisussaaffiit aammattaaq pisuni arlalinni atuuttut.

Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiussagai, suliffeqarfiup imaluunniit inuup isumagisussaappagu, nr. 1 malillugu pisussaaffiit atuutissapput.

Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiorsimanerai nakkutigineqarnissaa, suliffeqarfiup imaluunniit inuup isumagisussaappagu, nr. 2 malillugu pisussaaffiit atuutissapput.

Suliffeqarfik imaluunniit inuk avatangiisini aarlerinaataasut paasineqarnissaannut, nalilersorneqarnissaannut aammalu suliaqarnermi naapertuuttumik sapinngisamik annertunerpaamik annikillisinnissaannut peqataasussaappat, nr. 3 malillugu pisussaaffiit atuutissapput.

Avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit suliaqarnerup ingerlannissaanut pisariaqartumik inuk sulisorisaq ilinniartinneqassasoq ilitersorneqassasorlu sulisitsisup imaluunniit suliffeqarfiup allap imaluunniit inuup allap isumagisussaappagu, nr. 4 malillugu pisussaaffiit atuutissapput.

Avatangiisini aarlerinaataasut aarlerinaataajunnaarnissaat imaluunniit annikillisinnissaat suliffeqarfiup imaluunniit inuup isumagisussaappagu, nr. 5 malillugu pisussaaffiit atuutissapput.

Naggataatigut sanaartukkat, aaqqissuussinerit, umiarsuit imaluunniit angallatit allat, ilanngullugit pineqartup sannai, aaqqissugaanera atortulersugaanera ilaalu ilanngullugit, avatangiisitigut tamakkiisumik isumannaatsuusut, suliffeqarfiup imaluunniit inuup qulakkeertussaappagu, nr. 6 malillugu pisussaaffiit atuutissapput.

§ 39-mut

Pissutsinut Naalakkersuisut ingerlatassamut imaluunniit sanaartukkamik pilersitsinissamut ingerlatsinissamullu Inatsisartut inatsisaanni pineqartunut ilaasumut akuersissuteqarnissaq pillugu aalajangiinermi pingaartitassaannut, aalajangersagaq tunngassuteqarpoq.

Aalajangersagaq siunnersuutigineqartoq malillugu, ingerlatassamut imaluunniit sanaartukkamik pilersitsinissamut ingerlatsinissamullu siunnersuummi matumani pineqartunut ilaasumut akuersissuteqarnissaq pillugu Naalakkersuisut aalajangiippata, ilaatigut ajornerulersitsinissap pinngitsoortinnissaa imaluunniit silap pissusaanut tunngasunit sunniinerlunnissat Naalakkersuisut pingaartissavaat. Tassunga tunngatillugu ilaatigut pinngortitap kiisalu pinngortitap suussusaasa aamma nunami namminermi nunanilu tamalaani pinngortitamik allanngutsaaliuiffiusussatut toqqagaasuni uumasut najortagaasa ajorseriartinninnissaannik aammalu uumasut taakkua sumiiffinni toqqaanermi pineqartut akornusersorneqannginnissaannik mianerinninnissaq Naalakkersuisut pingaartissavaat.

Sumiiffiit sorliit nunami namminermi nunanilu tamalaani pinngortitamik allanngutsaaliuiffiunersut, aammalu nunami namminermi nunanilu tamalaani maleruagassat suut sumiiffinnut taamaattunut atuunnersut, nunami namminermi nunanilu tamalaani inatsisit Kalaallit Nunaanni atuuttut malillugit aalajangerneqartarpoq.

§ 40-mut

Ingerlatassaq imaluunniit sanaartugaq Inatsisartut inatsisaanni pineqartunut ilaasoq avatangiisinut, silap pissusaanut pinngortitamullu tunngasunut annertuumik sunniuteqarsinnaassasoq ilimagineqartariaqarpat, tamatuma malitsigisassai aalajangersakkami aalajangersarneqarput.

Imm. 1-imut

Siunnersuutigineqarpoq ingerlatassaq imaluunniit sanaartugaq § 39-mi taaneqartoq, avatangiisinut, avatangiisinut, silap pissusaanut pinngortitamullu tunngasunut annertuumik sunniuteqarsinnaassasoq ilimagineqartariaqarpat, ingerlatassap imaluunniit sanaartukkap avatangiisinut, silap pissusaanut pinngortitamullu tunngasunut sunniutissaannik nalilersuineq tunngavigalugu aatsaat akuersissuteqartoqarsinnaasoq. Tamat aamma oqartussat kattuffiillu kallarneqartussat tamatumunnga oqaaseqaateqarnissamut periarfissaqareersimanissaat aalajangersagaq siunnersuutigineqartoq malillugu piumasaqaataavoq.

Siunnersuutigineqarpoq nalilersuineq avatangiisinut sunniutaasussanik nalilersuinermit (VVM-mut nalilersuineq) maleruagassat malillugit pissasoq, takuuk siunnersuummi kapitali 10.

Imm. 2-mut

Imm. 2 malillugu siunnersuutigineqarpoq, ingerlatassaq imaluunniit sanaartugaq siunnersuummi § 38-mi taaneqartoq, nunami namminermit imaluunniit nunani tamalaani pinngortitami allannugtsaaliuiffiusussatut toqqagaasumut annertuumik sunniuteqarsinnaassasoq ilimagineqartariaqarpat, tassunga piujuaannartitsisumik ingerlatsinissamik siunertaqarneq eqqarsaatigalugu sumiiffimmut ingerlatassap imaluunniit sanaartukkap sunniutissaannik nalilersuineq tunngavigalugu aatsaat akuersissuteqartoqarsinnaasoq.

Naalackersuisut tamanna pisariaqartutut isigippassuk, akuersissuteqannginnermit sumiiffimmi sunniutaasussanik nalilersuineq pillugu tamanut tusarniaasoqassaaq. Tamanna VVM-mut nassuiaat pillugu tusarniaanermut atatillugu pisinnaavoq. Sumiiffimmi sunniutaasussanik nalilersuineq tusarniaassutigalugu nassiunneqassanersoq, pisuni ataasiakkaani ataasiakkaatigut nalilersuineq tunngavigineqassaaq. Sunniutaasussat qanoq annertutiginersut, peqatigisaanillu VVM-imik suliaqartoqassanersoq, ilaatigut tamatumunnga tunngavigineqarsinnaavoq.

Pisuni arlalinni ingerlatassamut imaluunniit sanaartukkamut akuersissuteqartoqannginnerani avatangiisinut sunniutaasussanik nalilersuinermit ingerlatsinissaq naleqquttussaavoq. Aalajangersagaq siunnersuummi kapitali 10-mi VVM pillugu maleruagassanut ataqatigiisillugu isigineqassaaq. Tassunga piujuaannartitsisumik ingerlatsinissamut siunertaasut mianeralugit suliaassap sumiiffimmut sunniutissaannik nalilersuinerup

ingerlanneqartarnissaa, aalajangersakkami siunnerfigineqarpoq. Taamatut nalilersuineq nalinginnaasumik VVM-mi misissuinermit ilaatillugu pisussaangilaq.

Siunnersuutigineqarpoq sumiiffiit nunami namminermi aamma nunani tamalaani pinngortitamik illersuiviusanersut, aammalu sumiiffinnut taamaattunut nunami namminermi nunanilu tamalaani maleruagassat suut atuutissanersut, nunami namminermi inatsisit aamma nunanilu tamalaani inatsisit Kalaallit Nunaanni atuuttut malillugit aalajangerneqassasoq.

Imm. 3-4-mut

Aalajangersagaq siunnersuutigineqartoq malillugu pisuni imm. 1-imi aamma 2-mi taaneqartuni akuersissuteqartoqarsinnaavoq,

- 1) ingerlatassaq imaluunniit sanaartugaq sumiiffiit nunami namminermi imaluunniit nunani tamalaani pinngortitamik illersuiviusut qanoq issusaannut ajoqusiissanngippat imaluunniit
- 2) inuiaqatigiit soqutigisaat annertuut, ilanngullugit inooqatigiinnermut imaluunniit aningaasaqarnermut tunngasut, ingerlatassat sularineqarnissaat imaluunniit sanaartukkamik pilersitsinissaq ingerlatsinissarluk pisariaqalersippassuk, taamaattoq takuuk imm. 4.

Sunniutaasussanut nalilersuinerup takutippagu suliassaq sumiiffinni nunani tamalaani pinngortitamik illersuiffiusuni ajoqusiissanngitsoq, tamatumunnga piumasagaatit attuumassuteqartut allatigut naammassineqarsimappata, ingerlaannaq suliassamut akuersissuteqartoqarsinnaavoq.

Kisiannili suliassap piviusunngortinneqarnerani sumiiffik annertuumik sunnerlunneqartussaasoq naliliisoqarpat, inuiaqatigiit soqutigisaat annertuut, ilanngullugit inooqatigiinnermut imaluunniit aningaasaqarnermut tunngasut suliassap ingerlanneqarnissaa pisariaqalersippassuk, suliassap nunamut imaluunniit nunap immikkoortuanut aalajangiisuullinnartumik pingaaruteqarnera pissutigalugu, aammalu suliassamut allatut inissiivissaqanngitsoq isumaqartoqarnera pissutigalugu, aatsaat suliassamut akuersissuteqartoqarsinnaavoq.

Inuiaqatigiinnut tunngasunik mianerinninnissap salliutinneqarnissaa imm. 3-mi taaneqartoq qanoq pisoqaraluarpalluunniit nunani tamalaani inatsisit, pisussaaffiit sumiiffiup nunami namminermi imaluunniit nunani tamalaani pinngortitami illersuiviusutut toqqagaaneranut atatillugu Kalaallit Nunaata pituttorsimaffigisaasa, iluanniitinneqarsinnaassapput. Akuersissuteqarneq sumiiffimmuut illersuiffiusumut inatsisitigut toqqagaasumut tunngassuteqartoq, illersuinermit inatsimmi periarfissiissutigineqartunit annertuneroqusaangilaq.

Imm. 5-imut

Siunnersuutigineqarpoq imm. 3 imaluunniit imm. 4 malillugit akuersissuteqartoqarnerani, Naalakkarsuisut naleqquttunik taartissatut iliussissanik aalajangersaassasut, ilanngullugit akuersissuteqarnermut atugassarititaasuni.

Aalajangersagaq siunnersuutigineqartoq malillugu taartissatut iliuusissanut aningaasartuutit akuersissuteqarfigineqarnissamik qinnuteqartumit matussuserneqassapput.

Sumiiffimmik annertuumik sunniinerluttoqartussaasoq paasineqaraluartoq imm. 3 siunnersuutigineqartoq imaluunniit imm. 4 malillugu akuersissuteqartoqassappat, taartissatut iliuusissanik naleqquttunik aalajangersaasoqassaaq. Assersuutigalugu taakkua tassaasinnaapput sumiiffinnik pinngortitamik illersuiffiusussanik allanik toqqaanermi imaluunniit aallaaniarnermut, ingerlatsinermut ilaalu ilanngullugit killilersuinernik atuutsitsilernermit sanaartukkani, ingerlatsinermit aserfallatsaaliuinermitu teknikkimik pissarsiarineqarsinnaasumik pitsaanerpaamik aammalu suleriaatsimik pissarsiarineqarsinnaasumik pitsaanerpaamik atuinertut ittumik, avatangiisinut sunniinerlunnermut taartissanut suliniutissat immikkut ittut pillugit atugassarititaasut. Taartissatut iliuusissanik naleqquttunik aalajangersaanermi pisuni ataasiakkaani ataasiakkaatigut nalilersuineq tunngavigineqassaaq aammalu annertoqatigiissitsinissamut tunngaviummut killissaliussat iluanni tamanna pissalluni.

§ 41-mut

Siunnersuutigineqarpoq avatangiisinik, silap pissusaanik pinngortitamillu allanngutsaaliuineq pillugu maleruagassanik erseqqinnerusunik aalajangersaanissamut Naalakkersuisut piginnaatinneqassasut, ilanngullugit pingaartumik pissutsit siunnersuummi §§ 35-40-mi taaneqartut pillugit, ilanngullugu avatangiisinik, silap pissusaanik pinngortitamillu allanngutsaaliuineq pillugu nunami namminermit imaluunniit nunani tamalaani maleruagassat, isumaqatigiissutit imaluunniit malittarisassat atorneqarnissaat.

Eqqarsaatigineqarpoq, siunnersuutip matuma sunniuteqarluarnissaa qulakkeerniarlugu tamanna naleqquppat aammalu siunnersuutip siunertaanut naapertuuppat, Naalakkersuisut aalajangersagaq siunnersuutigineqartoq tunngavigalugu §§ 35-40-mi maleruagassat ilassusersinnaagaat.

§ 42-mut

Aalajangersagaq avatangiisinut, silap pissusaanut pinngortitamullu tunngasunut tunngatillugu, annertuumik aatsitassanut ikummatissanullu inatsimmi § 84-imik aamma § 85, imm. 2-mik ingerlatitseqqinneruvoq.

Aalajangersakkami siunnersuutigineqarpoq Naalakkersuisut maannamut pisartutut aatsitassarsiorluni ingerlatassanik suliarinninnermit avatangiisinut, silap pissusaanut, pinngortitamut tunngasut pillugit aalajangersakkanik erseqqinnerusunik aamma peqqussutinik sukumiisunik aalajangersaasinnaasut nutarterisinnaasullu.

Assersuutigalugu suliarinnittarfik, assartuussivik kiisalu allatigut attaveqarneq, aatsitassarsiorluni misissuinermik imaluunniit aatsitassanik pīaanermik suliaqarnermut ilaatillugu pilersinneqartut, sumiiffiup akuersissummi ilaatinneqartup avataani tamakkiisumik ilaannaasumilluunniit inissinneqarsimassapput. Tassunga atatillugu aalajangiisuulluinnarpoq piginnaatitaanerit oqartussap suliarinninnerani aallaavigineqartut, aamma suliaqarfissanut ilaalu ilanngullugit taamaattunut atuuttut.

Naalakkersuisut ilaatigut avatangiisinik, silap pissusaanik pinngortitamillu allanngutsaaliuineq, tamatumunngalu atatillugu pisussaaffiit, akisussaaffik pissutsillu allat pillugit aalajangersakkanik aalajangersaasinnaapput. Naalakkersuisut aatsitassanut imaluunniit ingerlatassanut siunnersuummi pineqartunut ilaasunut atatillugu, inatsisit avatangiisit, silap pissusaa imaluunniit pinngortitaq pillugit pissutsinut pingaaruteqartut ataqqillugit, aalajangersakkanik taamaattunik aalajangersaasinnaapput, taamaaliornermi piginnaatitaaneq oqartussanut allanut inissinneqarluni.

§ 43-mut

Imm. 1-imut

Siunnersuut malillugu avatangiisinut ajoqusiineq qanoq paasineqassanersoq, aalajangersakkani nassuiarneqarpoq.

Ataatsimut isigalugu avatangiisini ajoqusiinermut ilisarnaataavoq, pissusissamisoortumik pinngortitap ataqatigiinnerata oqimaaqatigiinneranik nikisitsisoqarnera – pingaartumik mingutsitsinertut ittumik. Mingutsitsineq atituumik paasineqassaaq, taamaalillunilu aamma nipiliornerit, sajuppillatsitsinerit, kissarneq, qaamaneq assigisaalluunniit pineqartunut ilaatinneqarlutik.

Imm. 2-mut

Aalajangersagaq siunnersuutigineqartoq malillugu akisussaasuusoq paasineqassaaq tassaasoq ingerlatassamik siunnersuummi matumani pineqartunut ilaasumik suliaqartoq, aqutsisoq imaluunniit suliarineqarneranik nakkutiginnittoq.

§ 44-mut

Imm. 1-imut

Aalajangersagaq siunnersuutigineqartoq malillugu akisussaasuusoq paasineqassaaq tassaasoq ingerlatassamik siunnersuummi matumani pineqartunut ilaasumik suliaqartoq, aqutsisoq imaluunniit suliarineqarneranik nakkutiginnittoq. Pineqartoq ingerlatassamut tunngatillugu akuersissut imaluunniit akuersissuteqarneq malillugu pisinnaatitsissummik pigisaqartuunani allaappat, pisinnaatitsissummik pigisaqartoq aamma ingerlatassanut akisussaasuusaaq. Taamaattoqarnerani taakkua marluk ataatsimoorlutik (nammaqatigiillutik)

pisussaaffeqassapput akisussaasuussallutillu kiisalu kapitalimi matumani maleruagassat malillugit akisussaasuussallutik.

Mingutsitsinermut ingerlatassanit siunnersuummi pineqartunut ilaasuneersumut, aammalu avatangiisinut ajoqusiineq imaluunniit avatangiisinut ajoqusiinissamik annertuumik navianartorsiortitsineq akisussaasuunermik malitseqartoq, siunnersuut malillugu piunasaqaatitaqanngilaq, aammalu ingerlatassanik taakkuninnga ingerlatsinermut akisussaasuusup pisussaaffigalugu.

Oqaaseq ”akisussaasuusoq” tassaavoq inuk imaluunniit pisinnaatitaallunilu pisussaataaasoq imaluunniit pisortat ingerlatsineranni inatsisit malillugit inuk inuussutissarsiorluni ingerlatassanik ingerlatsisoq imaluunniit nakkutiginnittoq.

Imm. 2-mut

Siunnersuutigineqarpoq imm. 1 malillugu ingerlatassanut akisussaasuusoq, avatangiisini ajoqusiimasoq imaluunniit ajoquseeqataasimasoq imaluunniit avatangiisinut ajoqusiinissamik navianaateqarujussualersitsisoq imaluunniit pisooqataasoq, avatangiisinut ajoqusiinermut akisussaasuussasoq. Ajoqusiineq imaluunniit ajoqusiinissamik annertuumik navianartorsiorneq pissutsit pisinnaasut malitsigisaannik pilersimagaluarpalluunniit, ajoqusiineq imaluunniit ajoqusiinissamik annertuumik navianartorsiortitsinerup qanoq pilersimanera apeqqaatinnagu tamanna atuuppoq.

Taamaalilluni aallaaviusoq tassaavoq, ingerlatassanut akisussaasuusoq avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuusutut isigineqartoq, takuuk imm. 2. Taamaalilluni avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut, mingutsitsinerni ingerlatassanit siunnersuummi pineqartuneersunit pilersinneqartunut piunasaqaatitaqanngitsunik akisussaasuuneq atuuppoq.

§ 45-mut

Aalajangersakkami avatangiisini ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuusup pisussaaffii maleruagassiivigineqarput aammalu annertuumik aatsitassanut ikummatissanullu inatsimmi § 64-imik ingerlatitseqqinnerulluni, tassani aatsitassanut ikummatissanullu inatsimmi § 64, imm. 1, imm. 1-imut aamma 2-mut aggulunneqassasoq siunnersuutigineqarluni.

Imm. 1-2-mut

Siunnersuutigineqarpoq avatangiisinut ajoqusiinissamik annertuumik navianartorsiortitsinermut akisussaasuusoq pitsaaliuilluni iliuusissanik pisariaqartunik, avatangiisinut ajoqusiinissamut annertuumik navianartorsiortitsinermik pinngitsoortitsinnaasunik, ingerlaannaq aallartitsissasoq, aammalu navianartorsiorneq

iliusissallu pillugit Naalackersuisut kalerrissallugit. Aalajangersagaq siunnersuutigineqartoq malillugu avatangiisinut ajoqusiinermut akisussaasuusooq suliniutinik ajoqusiinerup annertussusaanik killilersimannissinnaasunik aammalu ajoqusiinerup annertunerulernissaanik pinngitsoortitsinnaasunik suliaqarnikkut ingerlanneqarsinnaasunik ingerlaannaq aallartitsissaaq, aammalu Naalackersuisut ajoqusiineq suliniutillu pillugit kalerrissallugit.

Taamaalilluni avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuusooq avatangiisinut ajoqusiinissap annertuumik navianaateqarnerata pinngitsoortinnissaanut iliusissanik pisariaqartunik ingerlaannaq aallaartitsinissamik kiisalu ajoqusiineq pereersimappat, avatangiisinut ajoqusiinerup annertunerulernissaata killilersimaarnissaanut pinngitsoortinnissaanullu suliniutissanik suliaqarnikkut ingerlanneqarsinnaasunik sunilluunniit ingerlaannaq aallartitsinissamik pisussaaffeqartoq, aalajangersarneqarpoq.

Taamaalilluni mingutsitsinerup imaluunniit mingutsitsinerup annertunerulernissaata pinngitsoortinnissaa naammangissinnaavoq, kisiannili aammattaq mingutsitsinerup pisup sunniuteqarnissaata sukkasuumik killilersimaarneqarnissaa pisariaqarsinnaalluni, assersuutigalugu mingutsitsinerup siaruarnissaata pinngitsoortinneratigut. Akisussaasuusup mingutsitsineq pisoq piaarnerpaamik piissagaa, assersuutigalugu assaallugu, iliusissanut pisussaaffiit taakkua taamaalilluni kingunerisinnaavaat. Oqaatigineqassaaq, iliuseqarnissamut pisussaaffiit taakkuninngalu atuutsitsinissamut, mingutsitsinerup pisup kingunerisaanik avatangiisini ajoqusiineq pisimasooq, imaluunniit tamatumunnga annertuumik navianaateqalersimasooq, akisussaasuusup paasisimassagaa pisariaqarpoq.

Imm. 3-mut

Aalajangersagaq siunnersuutigineqartoq malillugu pisussaaffiit naammassineqarnissaannut Naalackersuisut nakkutilliisuupput, aammalu naammassinninnissaat aamma tamatumunnga atatillugu iliusissanik suliaqarnissaaq pillugu Naalackersuisut peqqusissuteqarsinnaallutik.

§ 46-mut

Naalackersuisut avatangiisinut ajoqusiinerit pillugit maleruagassanut tunngatillugu peqqusissuteqarsinnaanerannut periarfissaqarnerat aalajangersakkami maleruagassiivigineqarpoq, aammalu oqaatsitigut aalajangersimasunik allannguuteqartillugu aatsitassanut ikummatissanullu inatsimmi § 65-imik ingerlatitseqqinnerulluni.

Imm. 1-imut

Siunnersuutigineqarpoq akisussaasuusooq paasisutissanik avatangiisini ajoqusiisoqarsimanersooq imaluunniit avatangiisini ajoqusiinissaaq annertuumik navianaateqarnersooq nalilersuinissamut pingaaruteqartunik Naalackersuisut tunniusseqqusinnaagaat. Aalajangersagaq siunnersuutigineqartoq malillugu mingutsitsinermut pisumut pissutaasut taakkualu sunniutissaasa paasinarsinneqarnissaat siunertaralugu,

akisussaasuusiq nammineq akilikkaminik misissuinernik, misissueqqissaarnernik, akuutissanik imaluunniit atortussanik uuttortaanernik assigisaannilluunniit suliaqassasq, peqqusissutigineqarsinnaavoq.

Avatangiisini ajoqusiiisoqarsimansoq imaluunniit tamanna annertuumik navianaateqarnerisq naliliinissamut pisariaqartunik nammineq akilikkaminik paasissutissanik tunniusseqqullugu, misissuinernik suliaqaqqullugu ilaalu ilanngullugit, pillugu akisussaasuusumut Naalakkersuisut peqqusissuteqarsinnaapput.

Imm. 2-mut

Siunnersuutigineqarpoq akisussaasuusup pigisamut aalaakkaasumut imaluunniit sumiiffimmuut mingutsinneqarsimasutut paasineqartumut atuisinnaatitaannginnera apeqqutaatinnagu peqqusissuteqartoqarsinnaasoq. Aalajangersagaq siunnersuutigineqartoq malillugu pigisap aalaakkaasup mingutsinneqartup imaluunniit sumiiffiup mingutsinneqartup ilaalu ilanngullugit iluarseqqinneqarnissaanut pisussaaffeqarnerq peqqusissuteqarnermi aalajangersarneqarsinnaavoq.

Akisussaasuusiq pigisamut aalaakkaasumut mingutsitsinermi kalluarneqartumut aammalu misissuiffigineqartussamut ilaalu ilanngullugit atuisinnaatitaanngikkaluartoq, imm. 2-mi siunnersuut malillugu aamma peqqusissuteqartoqarsinnaavoq. Aalajangersagaq pisariaqarpoq, pissutigalugu ingerlatassamut mingutsitsinermik malitseqartumut akisussaasuusiq aamma pigisamik aalaakkaasumik mingutsinneqartumik tamatigut tassaasanngimmat atuisinnaatitaasoq. Taamatut pisoqarnerani, misissuinerit ilaalu ilanngullugit naammassereerneranni pigisamik aalaakkaasumik iluarseeqqinnissamut pisussaaffeqarnerq peqqusissummi aalajangersarneqassaaq.

Imm. 3-mut

Siunnersuutigineqarpoq akisussaasuusiq pigisamut aalaakkaasumut imaluunniit sumiiffimmuut atuisinnaatitaanngippat, akisussaasuusup imaluunniit allat misissuinernik imaluunniit iluarseeqqinnernik ilaalu ilanngullugit suliaqarnerat akuereqqullugu Naalakkersuisut pigisamut aalaakkaasumut imaluunniit sumiiffimmuut atuisinnaatitaasoq peqqusinnaavaat.

Peqqusissuteqarnerit taarsiissutitalimmik arsaarinnissutaasussaatiillugit, peqqusissuteqartoqarsinnaassanngitsiq killilersuisoqartoq, imm. 2-mi aamma 3-mi aalajangersakkat paasineqassapput.

Imm. 4-mut

Siunnersuutigineqarpoq imm. 3 malillugu peqqusissuteqarnerq pigisamut aalaakkaasumut imaluunniit sumiiffimmuut mingutsinneqarsimasutut paasineqartunut atuisinnaatitaasumut kimulluunniit pisussaaffiliisuussasq. Imm. 1-3-mut nassuiaatit innersuussutigineqarput.

§ 47-mut

Aalajangersakkami avatangiisini ajoqusiineq pillugu maleruagassat malillugu Naalakkersuisut aalajangiinerinut maleruagassiisoqarpoq aammalu annertuumik aatsitassanut ikummatissanullu inatsimmi § 66-imik ingerlatitseqqittoqarluni, tassani aatsitassanut ikummatissanullu inatsimmi § 66, imm. 3, siunnersuut malillugu aalajangersakkatut immikkoortutut ingerlateqqinneqarluni.

Imm. 1-imut

Mingutsitsineq avatangiisinut ajoqusiinermik imaluunniit avatangiisinut ajoqusiinissamik annertuumik navianartorsiortitsinermik malitseqarluni pisoqartillugu iliuusissaasinnaasut ilaalu ilanngullugit pillugit aalajangiinissamut Naalakkersuisut aalajangersakkami piginnaatinneqarput.

Imm. 2-mut

Siunnersuutigineqarpoq Naalakkersuisut akisussaasumut aalajangiinerup nalunaarutiginerata saniatigut, aalajangiineq Naalakkersuisut nittartagaanni imaluunniit allatut naleqquttumik tamanut saqqummiutissagaat. Aalajangersagaq siunnersuutigineqartoq malillugu avatangiisini ajoqusiisoqarsimasoq imaluunniit avatangiisini ajoqusiinissaq annertuumik navianaateqartoq pillugu aalajangiinerup tamanut saqqummiunneqarnera akisussaasuusup akiligassaanik pissaaq.

§ 48-mut

Siunnersuutigineqarpoq Naalakkersuisut avatangiisinut akisussaasuuneq pillugu aalajangersakkanik erseqqinnerusunik aalajangersaanissamut piginnaatinneqassasut. Tamanna siunnersuutip sunniuteqarluarnissaa qulakkeerniarlugu naapertuuttoq paasinarsippat, tamanna siunnersuutip siunertaanut naapertuussimappat, piginnaatitsissummi siunnersuutigineqartumi Naalakkersuisut aalajangersakkanik erseqqinnerusunik aalajangersaasinnaapput.

§ 49-mut

Imm. 1-imut

Naalakkersuisut naliliippata suliassaq avatangiisinut annertuumik sunniuteqarsinnaassasoq, imaluunniit inuiaqatigiinnut tunngasunut annertuumik sunniuteqarsinnaassasoq, ilimagineqartariaqartoq, suliassamut nassuiaat nassiunneqassasoq Naalakkersuisut aalajangiisinaapput.

Imm. 2-mut

Suliassamut nassuiaat tunngavigalugu, pisinnaatitsissummik pigisaqartoq avatangiisinut sunniutaasussanik nalilersuineramik (VVM) aamma inuiaqatigiinni piujuaannartitsisumik ingerlatsinermik naliliinermik (VSB) suliaqarnissamik pisussaaffilerneqassasoq pillugu

Naalakkersuisut aalajangiissapput. Aalajangersagaq malillugu VVM-imut aamma VSB-mut tunngasut, ilanngullugit piareersaataasumik tusarniaaneq aamma tusarniaaneq, pillugit aatsitassanut tunngasunik suliaqarneq pillugu Inatsisartut inatsisaanni aalajangersakkat (aatsitassarsiorfissat angisuut pillugit) toqqaannartumik atuutissapput, taamaattoq ingerlatassat siunnersuummi pineqartunut ilaasut nalinginnaasumik ingerlatassanit aatsitassanut tunngasunik suliaqarneq pillugu Inatsisartut inatsisaanni pineqartunut ilaasunit annertuumik annikinnerusussaasut ilimagineqartariaqarnerata malitsigisaanik naleqqussarneqarsinnaallutik.

Aalajangersakkami aatsitassanut tunngasunik suliaqarneq pillugu Inatsisartut inatsisaanni VVM-imut aamma VSB-imut maleruagassanut innersuussineq taamaalilluni ingerlatassat annikinnerusut ingerlatassatut anginerusutut nammagassaqalersinneqartariaqarnerannut takussutissaanngilaq. Tamatumunnga taarsiullugu VVM-imut imaluunniit VSB-imut maleruagassanik immikkuullarissunik aalajangersaanissap kissaatigineqannginnera, kisianni maleruagassat assigiit nalinginnaasumik annertoqatigiissitsinissamut tunngaviusoq malillugu naleqqussarlugit atuuttussaasut, eqqarsaatigalugu isigineqassaaq.

Imm. 3-mut

Pissutsit imm. 1-imi aamma 2-mi taaneqartut pillugit aalajangersakkanik erseqqinnerusunik Naalakkersuisut aalajangersaanissaannut inatsimmi tunngavissamik aalajangersagaq imaqarpoq. Suleriaasissanik, ilusiliussassanut piumasaaqatinik, piffissamut killigititanik il.il, aatsitassanut tunngasunik suliaqarneq pillugu Inatsisartut inatsisaanni VVM-imut aamma VSB-imut maleruagassat malillugit pisussaniit, sukanninnginnerusunik aalajangersaanissamut Naalakkersuisut tunngavissaqarsorippagu, aalajangersagaq pingaartumik atorpeqassasoq naatsorsuutigineqarpoq.

§ 50-mut

Imm. 1-imut

Aalajangersagaq malillugu, ingerlatassaq annertuumik avatangiisinut sunniuteqartussatut ilimagineqarani, taamaattumillu siunnersuummi § 49 malillugu VVM-imik suliaqarnissamik pisussaaffeqartutut isigineqarani pisoqartillugu, Suliniutissanik Pitsaaliuisussanik Nalilersuisoqassasoq (VFT) tamatumunngalu VFT-imut nassuiaat suliarineqassasoq, Naalakkersuisut aalajangersinnaavaat.

Aalajangersagaq malillugu, VFT-mut tunngasut pillugit aatsitassanut tunngasunik suliaqarneq pillugu Inatsisartut inatsisaanni aalajangersakkat (aatsitassarsiorfissat angisuut pillugit) toqqaannartumik atorpeqassapput, taamaattoq ingerlatassat siunnersuummi pineqartunut ilaasut nalinginnaasumik ingerlatassanit aatsitassanut tunngasunik suliaqarneq pillugu Inatsisartut inatsisaanni pineqartunut ilaasunit annertuumik annikinnerusussaasut ilimagineqartariaqarnerata malitsigisaanik naleqqussarneqarsinnaallutik.

Aalajangersakkami aatsitassanut tunngasunik suliaqarneq pillugu Inatsisartut inatsisaanni VFT-inut maleruagassanut innersuussineq taamaalilluni ingerlatassat annikinnerusut ingerlatassanit annertunerusutut nammagassaqaalersinneqartariaqarnerannut takussutissaanngilaq. Innersuussineq, VFT-inut maleruagassanik immikkuullarissunik aalajangersaanissap kissaatigineqannginnera, kisianni maleruagassat assigiit nalinginnaasumik annertoqatigiissitsinissamut tunngaviusoq malillugu naleqqussarlugit atuuttussaasut, eqqarsaatigalugu isigineqassaaq.

Imm. 2-mut

Pissutsit imm. 1-imi aamma 2-mi taaneqartut pillugit aalajangersakkanik erseqqinnerusunik Naalakkersuisut aalajangersaanissaannut inatsimmi tunngavissamik aalajangersagaq imaqarpoq. Suleriaasissanik, ilusiliussassanut piumasaqaatinik, piffissamut killigititanik il.il, aatsitassanut tunngasunik suliaqarneq pillugu Inatsisartut inatsisaanni VFT-inut maleruagassat malillugit pisussaniit, sukanninnginnerusunik aalajangersaanissamut Naalakkersuisut tunngavissaqarsorippagu, aalajangersagaq pingaartumik atorineqassasoq naatsorsuutigineqarpoq.

§ 51-imut

Imm. 1-imut

Atugassarititaasut suut atuutsillugit akuersissut atorunnaassanersoq imaluunniit uterteqquneqarsinnaanersoq, Naalakkersuisut akuersissummi imaluunniit akuersissuteqarnermi aalajangersaasinnaanissaannut inatsimmi tunngavissamik aalajangersagaq imaqarpoq. Ilanngullugu pingaartumik pisinnaatitsissummik pigisaqartup tungaaniit sumiginnaanarit qanoq ilusillit, akuersissutip imaluunniit akuersissuteqarnerup annaanissaanut tunngavilersuutaasinnaanersut, ilaatigut suliffeqarfiup suussusaa annertussusaalu eqqarsaatigalugit. Taamaaqataani Naalakkersuisut pissutsit matuma siuliani taaneqartut pillugit aalajangiisinaapput.

Imm. 2-mut

Aalajangersagaq malillugu pisinnaatitsissummik pigisaqartoq, uterteqqusinerup malitsigisaanik, Naalakkersuisunut taarsiivigineqarnissamik piumasaqaateqarsinnaanngilaq.

§ 52-imut

Imm. 1-imut

Allaffissornermut tunngasut arlallit pillugit aalajangersakkanik atugassarititaasunillu erseqqinnerusunik aalajangersaanissamut inatsimmi tunngavissamik aalajangersagaq imaqarpoq, ilanngullugu najoqqutassanik nassuissinermi ilusiliussassanut piumasaqaatit kiisalu tamatumunnga suleriaasissat. Aalajangersagaq pingaartumik, kisianni taakkununngaannaanngitsoq – oqartussat najoqqutassanik qarasaasiatigoortumik aallaaviusut

aqqutigalugit nassiuttarnissaannik piunasaqarnissamut periarfissaqarnissaannut tunngatinneqarpoq.

Imm. 2-mut

Aalajangersagaq malillugu akuersissummut akuersissuteqarnermullu allakkiat pisinnaatitsissummik pigisaqartoq sioqqutsisumik akuersiteqqaarnagu tamanut saqqummiunneqarsinnaapput. Aalajangersagaq pisinnaatitaaffiit akuerineqarsimasut pillugit ammanerulersitseqataassaaq allaffissornikkullu aqutsinermut iluaqutaassalluni. Suliaqarnermi akuersissutinut akuersissuteqarnernullu allakkiat, allakkiat assigiissaakkat tunngavigalugit, suliarineqartarput. Taamaattoq akuersissutit akuersissuteqarnerillu aalajangersimasut atugassarititaasut immikkut ittut tunngavigalugit tunniunneqartarnissaat mattunneqarsinnaanngilaq, tamatumalu ammasuunissap paasiuminartuutitsinissallu qulakkeernissaa siunertaralugu allakkiat tamanut saqqummiunneqarsinnaanissaat pisariaqartinneqarnerulersippaa kiisalu siunissami qinnuteqartartussanut ilitsersuutitut atussallutik.

Aalajangersagaq paasissutissat, pisortat ingerlatsineranni paasitinneqarsinnaatitaaneq pillugu Inatsisartut inatsisaat malillugu allagaatinik takunninnissami ilaatinneqanngitsut, tamanut saqqummiunnessaannut periarfissiinermik malitseqanngilaq. Akuersissutinut imaluunniit akuersissuteqarnermut allakkiat ilanngussanik ilanngussartaqarsimappata imaluunniit oqaasertaanni najoqqutassanut allanut itisiliisumik paasissutissartaqartunut innersuussisoqarsimappat, pisortat ingerlatsineranni paasitinneqarsinnaatitaaneq pillugu Inatsisartut inatsisaat malillugu allagaatinik takunninnissami ilaatinneqartussaanningsunik, najoqqutassat taakkua tamanut saqqummiussinissaq sioqqullugu immikkoortinneqassasoq tunngavissaatinneqarpoq.

§ 53-imut

Imm. 1-imut

Aalajangersagaq malillugu Naalackersuisut pissutsit arlallit pillugit aalajangersakkanik imaluunniit atugassarititaasunik aalajangersaasinnaapput.

Aalajangersagaq ilaatigut aatsitassanik Kalaallit Nunaanni suliareqqiisarnermut pitsaassusissanut piunasaqaateqarnissamut ilaalu ilanngullugit periarfissiivoq.

Kalaallit Nunaanni suliareqqiineq ilaatigut kalaallinik sullissisartunik, aatsitassanut suliaasaqarfiup iluani suliareqqiinermit ikiuuttartunik, pilersitsinissamut taakkuninngalu atuinissamut iluaqutaassaaq tunngavissiissallunilu. Tamanna tamatuma saniatigut Kalaallit Nunaanni aatsitassanik piiaaneq pillugu immikkut paasisimasanik ilisimasanillu inerisaanermut attasiinnarnermullu ilaatigut iluaqutaassaaq. Tamatuma aammattaaq ilaatigut kingunerisaanik Kalaallit Nunaanni aatsitassanik suliareqqiinermit sinneqartoorutit Kalaallit Nunaanni akileraaruserneqartassapput. Naalackersuisut taamaalillutik ilaatigut

aalajangersakkanik mianerisassat siunertallu matuma siuliani taaneqartut
naammassinissaannik isumaginnittussanik qulakkeerinnittussanillu
aalajangersaasinnaassapput.

Tamatuma saniatigut aatsitassanik uninngasuuteqarneq inissiivimmiititsisarnerlu aamma
assartuineq, niuerutiginninneq, eqqussuineq avammullu annissuineq pillugit
aalajangersakkanik imaluunniit atugassarititaasunik aalajangersaanissamut Naalakkersuisut
periarfissinneqarput. Assersuutigalugu aatsitassat eqqussorneqartut pillugit
nalunaarsuisoqarsinnaanissaa aammalu ilisimasaqarnerulernissaq qulakkeerniarlugu,
aatsitassanik eqqussineq Naalakkersuisunit akuersissuteqarfigineqassasoq pillugu
maleruagassanik aalajangersaasoqarsinnaavoq.

Tamatuma saniatigut Naalakkersuisut aatsitassanik akuersissummik allagartaliisarneq pillugu
maleruagassanik aalajangersaanissamut aamma periarfissinneqarput. Assersuutigalugu
ujaqqat erlinnartut pillugit nunamit suminggaaneerfianut akuersissummik allagartamik
pilersitsisoqassasoq aalajangerneqarsinnaavoq.

Imm. 2-mut

Aatsitassanik aalajangersimasunik suliareqqiinissamut niuerutiginninnissamullu
Naalakkersuisunit akuersissuteqarfigineqarnissaq pisariaqartoq pillugu aalajangersakkanik
atugassarititaasunillu Naalakkersuisut aalajangersaanissaannut inatsimmi tunngavissamik
aalajangersagaq imaqarpoq. Naalakkersuisut aalajangersagaq malillugu aalajangersakkanik
atugassarititaasunillu annikitsumik aatsitassarsiorlunissamut akuersissutit malillugit
pissinaatitsissummik pigisaqartunut aammalu inunnut allanut imaluunniit suliffeqarfinnut
aatsitassanik aalajangersimasunik suliareqqiisartunut niuerutiginnittartunullu atuuttussanik
aalajangersaasinnaapput.

Assersuutigalugu inuit aamma suliffeqarfiit aatsitassanik suliareqqiinnermik
niuerutiginninnermillu suliaqartut eqqortunik pitsaassuseqartitsinissaannik
qulakkeerinninnissamut, aalajangersagaq atorneqarsinnaavoq. Aamma inuiaqatigiit kalaallit
aatsitassarsiorluni ingerlatassanit sapinngisamik annertunerpaamik pissarsiaqarnissaannik
qulakkeerinninnissamut aalajangersagaq atorneqarsinnaavoq.

§ 54-imut

Nunani tamalaani isumaqatigiissutit imaluunniit maleruagassat, Kalaallit Nunaanni pissutsit
siunnersuummi pineqartunut ilaasut pillugit Namminersorlutik Oqartussanit imaluunniit
Namminersorlutik Oqartussat sinnerlugit Danmarkimit isumaqatigiissutigineqartut,
piviusunnigortinneqarnissaat imaluunniit atorneqarnissaat siunertarlugu, Naalakkersuisut
aalajangersakkanik atugassarititaasunillu aalajangersaanissaannut inatsimmi tunngavissamik
aalajangersagaq imaqarpoq.

Naalackersuisut nunani tamalaani isumaqatigiissutit pissutsinut siunnersuummi matumani ilaatinneqartunut tunngassuteqartut naammassineqarnissaat pillugu maleruagassanik aalajangersaanissamut inatsimmi tunngavissaqarnissaannut aalajangersagaq ilaatigut qulakkeerinneqataassaaq.

§ 55-imut

Imm. 1-imut

Aalajangersagaq malillugu Naalackersuisut pisinnaatitsissummik pigisaqartup allallu suliaqarnerinut ingerlataannullu siunnersuummi pineqartunut ilaasunut nakkutilliisuupput, ilanngullugit aalajangersakkat atugassarititaasullu siunnersuut malillugu aalajangersarneqartut.

Nakkutilliineq assersuutigalugu pisinnaatitsissummik pigisaqartoq sioqqutsisumik ilisimateqqaarnagu ingerlanneqartumik misissugassanik tigusilluni misissuinikkut, ingerlanneqarsinnaavoq. Nakkutilliineq aamma tamatumunnga sivikitsumik ilimasaaraluni imaluunniit akuttunngitsumik, suleriaaseralugu misissuisarnikkut ingerlanneqarsinnaavoq. Nakkutilliinermut oqartussani sulisut aammalu inuit tamatumunnga immikkut piginnaatinneqartut aamma nakkutilliinermik misissuinernillu matuma siuliani taaneqartunit allaanerusunik ingerlatsisinnaapput.

Imm. 2-mut

Aalajangersagaq malillugu nakkutilliinermut oqartussaq sukkulluunniit pisinnaatitsissummik pigisaqartup aamma allat suliffeqarfiinut ingerlataannullu siunnersuummi pineqartunut ilaasunut imaluunniit taakkua ilaannut sukkulluunniit isersinnaapput. Aalajangersagaq malillugu nakkutilliinerup ingerlanneqarnissaanut tamanna pisariaqarpat, nakkutilliinermik oqartussani sulisut taamaalillutik eqqartuussivimmi aalajangiinertaqanngitsumik sukumiisumik kinaassutsimut uppersaammik takutitsillutik tamatumunnga isersinnaapput.

Taamaattoq suliffeqarfimmut ingerlatassanullu siunnersuummi pineqartunut ilaasunut isernissamut, tamanna suliffeqarfiup ingerlataannik nakkutilliinerup isumaginissaanut pisariaqarluni pisoqarneri kisimik tamatumani pineqarput.

Sulisut ikittuinnaat nakkutilliisuni sulisutut kinaassutsiminnik uppersaasinnaasut kisimik aalajangersagaq malillugu isernissamik piunasaqarsinnaanerat erseqqissarniarlugu ”Naalackersuisut” atornissaannut taarsiullugu, oqariaaseq ”nakkutilliinermut oqartussani sulisut” toqqarneqarpoq. Oqaatsimi ”nakkutilliinermut oqartussani sulisut” aamma siunnersortit avataaneersut, siunnersuisartut aamma immikkut ilisimasallit nakkutilliinermut oqartussaq tamatumunnga isumaqatigiissuteqarfigalugu, nakkutilliinermut oqartussaq sinnerlugu imaluunniit peqatigalugu nakkutilliinermik suliaqartut pineqartunut ilaatinneqarput.

§ 56-imut

Imm. 1-imut

Aalajangersakkami allassimavoq Naalakkersuisut siunnersuutip aamma aalajangersakkat aammalu atugassarititaasut siunnersuut malillugu aalajangersagaasut naammassineqarnissaat pillugu peqqusissuteqarnissamut periarfissaqartut. Aamma aalajangersakkami allassimavoq, siunnersuutip aamma aalajangersakkat aammalu akuersissummut atugassarititaasut siunnersuut malillugu aalajangersagaasut malinneqarnissaasa qulakkeernissaa siunertaralugu Naalakkersuisut peqqusissuteqarsinnaasut inerteqquteqarsinnaasullu.

Imm. 2-mut

Aalajangersagaq malillugu peqqusissuteqarneq inerteqquteqarnerlu pisinnaatitsissummik pigisaqartumut imaluunniit allanut siunnersuummi pineqartunut ilaasunut nalunaarutigineqarsinnaavoq. Taakkua assersuutigalugu tassaasinnaapput pisinnaatitsissummik pigisaqartup isumaqatigiissuteqarfigisai.

§ 57-imut

Imm. 1-imut

Pisinnaatitsissummik pigisaqartut allallu suleqatigisat siunnersuummi matumani pineqartunut ilaasut paasissutissiisussaaitaanermik aalajangersakkami pisussaaffilerneqarput.

Aalajangersakkami pineqarput paasissutissat tamarmik, assersuutigalugu siunnersuut malillugu akuersissummik tunineqarnissamik qinnuteqaatip suliarineqarnissaanut atatillugu oqartussat suliarinninnissaanut pisariaqartut imaluunniit paasissutissat siunnersuut malillugu ingerlatassanik tamakkiisumik nakkutilliinissamut atorneqartussat.

Imm. 2-mut

Aalajangersagaq malillugu inunnut imaluunniit ingerlatseqatigiiffinnut aalajangersakkami pineqartunut ilaasunut, taakkua paasissutissanik Naalakkersuisut suliassamik nalilersuinerannut atugassatut Naalakkersuisut pisariaqartitaannik nassiussissasut, peqqusinissamut Naalakkersuisut periarfissaqarput. Paasissutissanik nassiussineq aalajangersimasumik iluseqassasoq, ilanngullugu assersuutigalugu USB-mi, elektroniskimik paasissutissanut filimi imaluunniit immiussivimmi allami naleqquttumi, aalajangernissaanut Naalakkersuisut periarfissaqarput.

§ 58-imut

Imm. 1-imut

Aalajangersagaq akuersissutinik akuersissuteqarnernillu allamut tunniussisarnermut tunngassuteqarpoq.

Akuersissummik imaluunniit akuersissuteqarnermik pisinnaatitsissummik pigisaqartumit suleqatigisamut allamut kimulluunniit toqqaannartumik imaluunniit toqqaannangitsumik tunniussineq imaluunniit nuussineq, piginnittuulersup akuersissut imaluunniit akuersissuteqarneq malillugu ingerlatseqatigiiffimmut pisinnaatitsissummik pigisaqartumut, ilanngullugu ingerlatseqatigiiffik, suliffeqarfik imaluunniit inuk, piumasaqaatit naammassisimanagerai naammassisimannginneraaluunniit apeqqutaatinnagu, tunniussinermut imaluunniit nuussinermut pineqartunut ilaatinneqarpoq.

Akuersissut imaluunniit akuersissuteqarneq ingerlatseqatigiiffimmut imaluunniit inummut akuersissut imaluunniit akuersissuteqarneq malillugu pisinnaatitsissummik pigisaqartumut piumasaqaatinik naammassinissimasumut aammalu siunnersuummi aalajangersakkat malillugit taamaallaat tunniunneqarsinnaavoq imaluunniit nuunneqarsinnaalluni. Tunniussineq taanna Naalakkersuisunit akuersissuteqarfigineqarsimaguni aatsaat pisinnaavoq.

Toqqaannartumik allamut tunniussinermi imaluunniit nuussinermi ilaatinneqarput, pisinnaatitsissummik pigisaqartumit suleqatigisamut allamut kimulluunniit akuersissummik imaluunniit akuersissuteqarnermik tunniussineq imaluunniit nuussineq.

Toqqaannangitsumik allamut tunniussinermi imaluunniit nuussinermi ilaatinneqarput ingerlatseqatigiiffimmi pisinnaatitsissummik pigisaqartumi imaluunniit ingerlatseqatigiiffik pisinnaatitsissummik pigisaqartoq pillugu allanngortitsineq ataaseq arlallilluunniit, tamatumani suleqataasoq imaluunniit suleqataasut ingerlatseqatigiiffimmi aalajangiisuusumik sunniuteqartut, imaluunniit ataasiakkaarlutik imaluunniit ataatsimoorlutik imaluunniit suleqatigiillutik toqqaannartumik imaluunniit toqqaannangitsumik (suleqataasoq alla ataaseq arlallilluunniit aqqutigalugit) ingerlatseqatigiiffiup aningaasaataasa imaluunniit taasisinnaatitaanerisa minnerpaamik affai sinnerlugit piginnittut, nakkutiginnittut imaluunniit atuisinnaatitaasut, allanngortinneqarpata.

Taamaalilluni qularnaveeqqusiussaqarluni taarsigassarsinermut imaluunniit aktiaatinik pisinnaaq pillugu toqqaasinnaanermut atatillugu, pissutsit taakkua ingerlatseqatigiiffimmi aalajangiisuusumik sunniuteqartup imaluunniit sunniuteqartut imaluunniit ataasiakkaarlutik imaluunniit ataatsimoorlutik imaluunniit suleqatigiillutik toqqaannartumik imaluunniit toqqaannangitsumik (suleqataasoq alla ataaseq arlallilluunniit aqqutigalugit) ingerlatseqatigiiffiup aningaasaataasa imaluunniit taasisinnaatitaanerisa minnerpaamik affai sinnerlugit piginnittut, nakkutiginnittut imaluunniit atuisinnaatitaasut, allanngortinneqarnerannik malitseqarsimappata, aatsaat toqqaannangitsumik allamut tunniussisoqarsimassaaq.

Aalajangiisuusumik sunniuteqartumut oqaatsip erseqqinnerusumik isumaa, aktiaatileqatigiiffiit, piginneqatigiilluni ingerlatseqatigiiffiit immaqalu aningaasaatinut ingerlatseqatigiiffiit allat pillugit Kalaallit Nunaannut inatsimmi tamanna pillugu aalajangersakkat tunngaviusullu malillugit nalinginnaasumik aalajangerneqartarpoq. Tamanna

maannakkut tassaavoq aktiaatileqatigiiffiit aamma piginneqatigiilluni ingerlatseqatigiiffiit pillugit inatsisip Kalaallit Nunaannut atuutsinneqalerneranut peqqussut (ingerlatseqatigiiffinnut inatsit). Inatsimmi aamma ingerlatseqatigiiffiit aallarnisaasut pineqartunut ilaatinneqarput.

Aktiaatileqatigiiffiit aamma piginneqatigiilluni ingerlatseqatigiiffiit pillugit inatsisip Kalaallit Nunaannut atuutsinneqalerneranut peqqussut (ingerlatseqatigiiffinnut inatsit) § 7-imi aalajangiisuusumik sunniuteqarneq pillugu aalajangersakkanik erseqqinnerusunik imaqarpoq. Imm. 1 malillugu aalajangiisuusumik sunniuteqarneq tassaavoq suliffeqarfiup immikkoortortasup aningaasaqarnikkut ingerlatsinikkullu aalajangiinerinik aqutsinissamut piginnaatitaaneq. Imm. 2 malillugu pisuni immikkut ittuni taamatut piginnittuaneq aalajangiisuusumik sunniuteqarnerunngitsoq, erseqqissumik uppersarneqarsinnaasimangippat, ingerlatseqatigiiffiup qullersaqarfiusup suliffeqarfik immikkoortortasooq aqutugalugu toqqaannartumik imaluunniit toqqaannangitsumik suliffeqarfiup taasisinnaatitaanerisa affai sinnerlugit pigisarippagit, ingerlatseqatigiiffik qullersaqarfiusooq suliffeqarfimmut immikkoortortasumut tunngatillugu aalajangiisuusumik sunniuteqarpoq. Imm. 3-mi aalajangerneqarpoq, ingerlatseqatigiiffiup qullersaqarfiusup suliffeqarfimmi taasisinnaatitaanerit affai sinnerlugit pigisarinnangippagit, ingerlatseqatigiiffiup qullersaqarfiusup (1) aningaasaliisunut allanut isumaqatigiissuteqarnermini taasisinnaatitaanerit affai sinnerlugit atorsinnaappagit, (2) ileqqoreqqusaq imaluunniit isumaqatigiissut naapertorlugu suliffeqarfimmi aningaasaqarnermut ingerlatsinermullu tunngasut aqunnissaannut piginnaatitaappat, (3) pisortaatitat qullersaanni aammalu oqartussami suliffeqarfimmi aalajangiisuusumik sunniuteqarnermik tigumminnittumi ilaasortat amerlanerussuteqartut toqqarnissaannut imaluunniit ilaasortaajunnaarsinnissaannut piginnaatitaappat imaluunniit (4) ataatsimeersuarnermi imaluunniit oqartussami taamaaqataani taasinerit pissusiviusuni amerlanerussuteqartunik atuisinnaatitaappat, taamaalillunilu suliffeqarfimmi pissusiviusuni aalajangiisuusumik sunniuteqarnerit tigummippagit, aalajangiisuusumik sunniuteqarneq atuussimassaaq. Imm. 4-mi aalajangerneqarpoq, taasisinnaatitaasinnaanerit piuneri sunniuteqarnerilu, ilanngullugit aningaasaatinu piginneqataassutini atsiorsinnaatitaaneq pisinissamillu toqqaasinnaatitaanerit, maannakkut atornerarsinnaasut imaluunniit allangortinneqarsinnaasut, ingerlatseqatigiiffik aalajangiisuusumik sunniuteqarnerisooq pillugu naliliinermi isiginiarneqassasut. Suliffeqarfimmi immikkoortortasumi taasisinnaatitaanerit naatsorsorneqarneranni, taasisinnaatitaanerit aningaasaatinu piginneqataassutinu suliffeqarfiup immikkoortortasup nammineerluni pigisai imaluunniit taassuma immikkoortortaanit suliffeqarfimmit pigineqartut, ilaatinneqassanngillat. Tamanna imm. 5 malillugu pisussaavoq.

Inatsimmi aalajangersakkani tunngaviusut sapinngisamik ingerlatseqatigiiffinnut qullersaqarfiusunut allanut aamma ingerlatseqatigiiffinnut Kalaallit Nunaanni aamma Danmarkimi aningaasaatinu ingerlatseqatigiiffiunngitsunut, ilanngullugit Kalaallit Nunaanni aamma Danmarkimi suliffeqarfiit allat aamma nunani allani aningaasaatinu ingerlatseqatigiiffiit suliffeqarfiillu allat, sanilliullugu taamaaqataanik, aammalu inunnut

ingerlatseqatigiiffimmi pisinnaatitsissummik piginnittuusumi aningaasaatinik piginneqataassutinik piginnittunut sanilliullugu, atorneqassapput.

Allamut tunniussinerup imaluunniit nuussinerup akuerineqarnissaa, tamatumunnga naapertuuttumik pissutissaqanngitsumik akueriومانeqanngissinnaanngilaq. Akuersissuteqarnerup nalunaarutigineqannginnerani ilaatigut, pisussaaffiit pisinnaatitsissummik pigisaqartup pisussaaffigisaasa naammassinissaannut tunngaviusut, allamut tunniussinermi imaluunniit nuussinermi ajorseriartinneqannginnissaat imaluunniit tunngavissaarutsinnginnissaat, qulakkeerneqartussaassaaq.

Allamut tunniussinermi imaluunniit nuussinermi akuersissut imaluunniit akuersissuteqarneq malillugu pisussaaffiit naammassinissaannut tunngaviusut ajorseriartinneqannginnissaasa qulakkeernissaa, allamut tunniussinissaq imaluunniit nuussinissaq sioqqullugu misissornissaanut Naalakkersuisut periarfissaqarnissaat, taamaalilluni aalajangersakkami taamaalilluni ilaatigut siunertaavoq. Aatsitassanut tunngasunik suliaqarnernik pitsaassusilimmik ingerlatsinissamut tunngaviusut, allamut tunniussinermi ajorseriartinneqannginnissaasa qulakkeernissaanut Naalakkersuisut periarfissaqarnissaasa qulakkeernissaa, tamatuma saniatigut aalajangersakkami siunertaavoq.

Aalajangersakkami aammattaaq siunertaavoq, Naalakkersuisut ilaatigut aningaasaqarnermut, akitsuutitut akileraartarnermullu tunngasut mianerinissaannut, aammalu tamanna Namminersorlutik Oqartussanut inuiaqatigiinnullu akileraarutitigut imaluunniit akitsuutitigut sunniuteqarnerlunermik malitseqarsinnaappat, Naalakkersuisut allamut tunniusserit imaluunniit nuusserit akuersissuteqarfiginissaannut itigartitsisinaanissaannut periarfissinneqarnissaannik qulakkeerinninnissaq. Tamanna Kalaallit Nunaanniit nunanut allanut akileraarutitigut sinneqartoorutit nuutillugit iluanaarniapiluttoqarluni, imaluunniit nunanit allaniit Kalaallit Nunaannut akileraarutitigut amigartoorutit nuutillugit iluanaarniapiluttoqarluni, pisoqartillugu taamaallaat pisassaaq.

Ingerlatseqatigiiffimmi pisinnaatitsissummik pigisaqartumi aalajangiisuusumik sunniuteqarneq pillugu allanngortitsisoqarpat, pisinnaatitsissummik pigisaqartup Naalakkersuisut paasissutississagai, Naalakkersuisut ilaatigut siunnersuummi §§ 13 aamma 30 malillugit akuersissummi imaluunniit akuersissuteqarnermi atugassarititaasunik allanik aalajangersaasinnaapput.

Imm. 2-mut

Aalajangersagaq malillugu Naalakkersuisut allamut tunniussinermut akuersissuteqarnermut atatillugu atugassarititaasunik aalajangersaasinnaapput.

Pisinnaatitsissummik pigisaqartunngortup piumasaqaatinut tunniussisumut piumasaqaatigineqartunut naammassininninnissaanut, aammalu oqartussat soqutigisaminnik isumaginninnissamut periarfissaqarnissaannut, ilanngullugu aningaasaqarnikkut soqutigisat

tunniussinermi ajorseriartinneqannginnissaannut, aalajangersagaq qulakkeerinneqataassaaq.

Imm. 3-mut

Akuersissut imaluunniit akuersissuteqarneq eqqartuussivikkut malersuinerimi ilaatinneqanngitsoq, aalajangersakkami allassimavoq. Tassa imaappoq, akuersissummut imaluunniit akuersissuteqarnermut eqqartuussivikkut malersuineq inatsisitigut sunniuteqanngilaq.

Aalajangersagaq imm. 1-imut ataqatigiissillugu isigineqassaaq. Taamaattumik akuersissutip imaluunniit akuersissuteqarnerup assersuutigalugu atuunnerata imaluunniit sunniuteqarnerata misilinneqarnissaanut eqqartuussivikkut suliakkiussinissamik periarfissaqarnissaata isummerfigineqarneranut tunngatillugu, aalajangersagaq takussutissaanngilaq.

Eqqartuussivikkut malersuineq taamaallaat akiligassaqarfinnik malersuinermit taamaallaat eqqarsaatigineqarpoq. Akiligassaqarfigineqartup eqqartuussivik ikiorsiullugu akuersissut manna malillugu akuersissut imaluunniit akuersissuteqarneq tigusinnaanngikkaa, taamaalilluni aalajangersakkami aalajangersarneqarpoq.

§ 59-imut

Imm. 1-imut

Naalackersuisut siunnersuut malillugu suliassanik suliarinninnermut imaluunniit allatut oqartussat suliarinninnerannut atatillugu aningaasartuutaannut matussutissatut aningaasartalerlugit akiliisitsinissaq pillugu aalajangersakkanik atugassarititaasunillu Naalackersuisut aalajangersaanissaannut inatsimmi tunngavissamik aalajangersagaq imaqarpoq. Aalajangersakkami ilaatinneqarput assersuutigalugu suliassanik suliarinninnermut, nakkutilliinnermut, allatut oqartussat suliarinninnerannut, siunnersortinut avataaneersunut ilaalu ilanngullugit aningaasartuutit.

Imm. 2-mut

Akiliutissaq akiliutitut imaluunniit aningaasartuutininik utertitsinertut akilersinneqarsinnaasoq aalajangersakkami aalajangersarneqarpoq.

Akiliutissaq ataatsimut isigalugu suliassanik suliarinninnermut oqartussallu suliarinninnerannut atatillugu Naalackersuisut aningaasartuutaannut naapertuuppat, aningaasartuutit sulluunniit akiliutitut imaluunniit aningaasartuutininik utertitsinertut akilersinneqarsinnaapput. Taamaalilluni Naalackersuisut ataatsimut isigalugu suliassanik suliarinninnermut aamma oqartussat suliarinninnerannut akilersimasaasa imaluunniit atuinissamik naatsorsuutigisaasa, saniatigut akiliutinik imaluunniit aningaasartuutininik utertitsinermik akiliisitsinissaaneq aalajangersakkami siunertarineqanngilaq.

Oqartussat suliarinninnerannut akiliinissaq akiliutitut akilersinneqarsinnaavoq, imaluunniit

suliassanik suliarinninnermi allatullu oqartussat suliarinninneranni, ilanngullugit akuersissutinik akuersissuteqarnernillu tunniussineq ilaalu ilanngullugit, piffissamut atuinnermut pisumut nalunaaquttap akunneranut akigititaq tunngavigalugu akilersinneqarsinnaavoq.

Isertitat aalajangersagaq taanna malillugu tiguneqartut imaluunniit isertitarineqartut namminersorneq pillugu inatsimmi § 7, takuuk namminersorneq pillugu inatsimmi § 7, imm. 2, nr. 1, tamatumunnga maleruagassat malillugu aatsitassarsiordermit isertitaangillat

Imm. 3-mut

Aalajangersakkami allassimavoq, pisinnaatitsissummik pigisaqartoq imaluunniit alla suleqatigisaq siunnersuummi pineqartunut ilaasoq 100.000 koruuninik annertunerusunilluunniit aningaasartalinik siunnersuut malillugu suliassanik suliarinninnermut allatullu oqartussat suliarinninnerannut atatillugu Naalakkersuisut aningaasartuutaannut matussutissanut akiligassaminnik akiliisimangippata, takuuk imm. 1, pisinnaatitsissummik pigisaqartup imaluunniit allap suleqatigisap Naalakkersuisunut aningaasat akiligassat sulluunniit akilerneqarnissaasa tungaanut, Naalakkersuisut pisinnaatitsissummik pigisaqartoq imaluunniit alla suleqatigisaq pillugit suliassap sulluunniit suliarineqarnera aalajangiiffigineqarnissaalu unitsissavaat. Tamatuma saniatigut Naalakkersuisut aamma pisuni taamaattuni, pisinnaatitsissummik pigisaqartup imaluunniit allap suleqatigisap Naalakkersuisunut aningaasat akiligassat sulluunniit akilerneqarnissaasa tungaanut, pisinnaatitsissummik pigisaqartup imaluunniit allap suleqatigisap akuersissut imaluunniit siunnersuut malillugu ingerlataani unitsissagai peqqusissuteqarsinnaapput.

Naalakkersuisut peqqusissuteqarlutik pisoqartillugu, Naalakkersuisut pisinnaatitsissummik pigisaqartoq pillugu suliarinninnerminik unitsitsinnginneranni aammalu suliami sumiluunniit aalajangiinnginneranni, pisinnaatitsissummik pigisaqartoq Naalakkersuisunut aningaasat akiitsorineqartut sulluunniit akilernissaannut naleqquttumik piffissalernerneqassaaq.

Naalakkersuisut siunnersuummut naapertuuttumik aningaasanut akiitsorineqartunut akiliutinik tigusaqannginnissaat aarlerinaateqarpat, Naalakkersuisut pisinnaatitsissummik pigisaqartoq imaluunniit alla pillugu suliami sumiluunniit suliassanik suliarinninnerminnik allatullu oqartussat suliarinninnerannik unitsitsinnaanerit imaluunniit pisinnaatitsissummik pigisaqartumut imaluunniit suleqatigisamut allamut ingerlataannik unitsitseqqusisinnaanerit naapertuuttoq naliliisoqarpoq.

Imm. 4-mut

Siunnersuut malillugu suliassanik suliarinninnermut allatullu oqartussat suliarinninnerannut atatillugu Naalakkersuisut aningaasartuutaannut matussutissatut aningaasanik akiliinissaq pillugu aalajangersakkanik atugassarititaasunillu aalajangersaanissamut inatsimmi tunngavissami ilaatinneqarput pisinnaatitsissummik pigisaqartunut aamma suleqatigisanut allanut siunnersuummi pineqartunut ilaasunut tunngatillugu aningaasartuutinik utertitsilluni akiliutit.

§ 60-imut

Imm. 1-imut

Siunnersuut malillugu ingerlatassanik suliaqarsinnaanissaq siunertaralugu pigisamik aalaakkaasunik pigisanik aalaakkaasunik taarsiissutitalimmik arsaarinnissuteqarnerup ingerlanneqarnissaanut periarfissaqarnermut aalajangersagaq tunngassuteqarpoq. Aalajangersagaq taamaallaat inunnut aamma ingerlatseqatigiiffinnut, akuliunnerup nalaani siunnersuut malillugu pisinnaatitsissummik pigisaqartuusunut iluaqutaasunik atorneqarsinnaavoq.

Suliassaqarfinni Namminersorlutik Oqartussat ataanniittuni pigisanik aalaakkaasunik taarsiissutitalimmik arsaarinnissuteqartarnissamut inatsimmi tunngavissat periaasissallu pillugit maleruagassanik aalajangersaanissamut aalajangiisinnaatitaaneq 1992-imi Namminersornerullutik Oqartussat (ullumikkut Namminersorlutik Oqartussat) tiguaat. Tamanna suliassaqarfinni Namminersornerullutik Oqartussat ataanniittuni pigisanik aalaakkaasunik taarsiissutitalimmik arsaarinnissuteqarneq pillugu inatsimmi nr. 1012, 19. december 1992-imeersumi pivoq. Kalaallit Nunaanni pigisanik aalaakkaasunik taarsiissutitalimmik arsaarinnissuteqarneq aalaakkaasunik taarsiissutitalimmik arsaarinnissuteqarneq pillugu Inatsisartut inatsisaanni nr. 25, 30. november 1992-imeersumi maleruagassiivigineqarpoq.

Danskit pigisanik aalaakkaasunik taarsiissutitalimmik arsaarinnissuteqarnermut inatsisaat 1992-imeersoq Inatsisartut inatsisaannut tunngavigineqarpoq, taamaalillunilu suleriaatsinuinnaq inatsisaalluni. Tamatuma malitsigisaanik siunnersuut manna Inatsisartut inatsisaanni tamatumunnga maleruagassat malillugit pigisanik aalaakkaasunik taarsiissutitalimmik arsaarinnissuteqarnissamut inatsimmi tunngavissamik taamaallaat imaqarpoq, takuuk aamma imm. 2.

Siunnersuut manna malillugu suliaqarnermik pilersitsinissaq ingerlatsinissarlu aammalu ingerlatassanik suliaqarnissaq siunertaralugu, pigisamik aalaakkaasunik pigisanik aalaakkaasunik taarsiissutitalimmik arsaarinnissuteqarneq aallartinneqassasoq, aalajangersakkap malitsigisaanik Naalakkersuisut pisariaqartillugu aalajangersinnaapput.

Pigisanik aalaakkaasunik taarsiissutitalimmik arsaarinnissuteqarneq pisariaqartuusooq, aalajangersagaq malillugu piumasagaataavoq. Pisariaqartoq nalinginnaasunik paasineqassaaq, pigisat aalaakkaasut taarsiissutitalimmik arsaarinnissutiginnissaannut naapertuuttunik allanik periarfissaqanngitsoq.

Nunaminertaq taamaatinneqarani, kisianni siunnersuut manna malillugu suliaqarnermik pilersitsineq ingerlatsinerlu aamma ingerlatassanik suliaqarneq annertoorsuarnik

ajoutissartaqarluni imaluunniit pigisamut aalaakkaasumut, suliffeqarfimmut ilaalu ilanngullugit ajoqusiinermik malitseqarluni, akuliunneq aalajangersagaq malillugu pigisanik aalaakkaasunik taarsiissutitalimmik arsaarinnissuteqarnermut taarsiinissamut tunngavissaliisinnaatillugu, pigisanik aalaakkaasunik taarsiissutitalimmik arsaarinnissuteqarneq pissasoq aamma Naalakkersuisut aalajangiisinnaapput.

Pigisap aalaakkaasup ilaanut pigisanik aalaakkaasunik taarsiissutitalimmik arsaarinnissuteqarnermi pigisap aalaakkaasup ilaata atorpeqarsinnaanera annertuumik ajornerulersinneqarluni pisoqartillugu, pigisamik aalaakkaasumik piginnittoq tamatuminnga oqariartuuteqarpat, pisinnaatitsissummik pigisaqartoq imaluunniit akuersissuteqarnermik piginnittoq pigisap aalaakkaasup tamarmiusup pisiarinissaanut pisussaaffilerneqarsinnaavoq.

Taarsiissutitalimmik arsaarinnissuteqarnermut aningaasartuutit, taarsiissutitalimmik arsaarinnissuteqartarneq pillugu Inatsisartut inatsisaanni § 9, imm. 3 malillugu pisinnaatitsissummik pigisaqartumut imaluunniit akuersissuteqarnermut piginnittumut akiligassanngortinneqassasut naatsorsutigineqarpoq. Tassa imaappoq pigisanik aalaakkaasunik taarsiissutitalimmik arsaarinnissuteqarnermi aningaasartuutit tamarmiusut, pigisamut aalaakkaasumut taarsiissutitalimmik arsaarinnissutigineqartumut taarsiissutissat ilanngullugit, pisinnaatitsissummik pigisaqartup imaluunniit akuersissuteqarnermik pigisaqartup akilissavai.

Imm. 2-mut

Aalajangersakkami aalajangersarneqarpoq, imm. 1 malillugu pigisanik aalaakkaasunik taarsiissutitalimmik arsaarinnissuteqarneq, pigisanik aalaakkaasunik arsaarinnissuteqartarneq pillugu Inatsisartut inatsisaanni maleruagassat malillugit ingerlanneqassasoq.

Inatsisartut inatsisaat pigisanik aalaakkaasunik taarsiissutitalimmik arsaarinnissuteqarnermut oqartussap aalajangiisinnaatitaanera pillugu aalajangersakkanik sukumiisunik imaqarpoq, ilanngullugu pigisanik aalaakkaasunik taarsiissutitalimmik arsaarinnissuteqarnermi periaasissaq aammalu taarsiissutissat tunniunneqarnerat ilaalu ilanngullugit.

§ 61-imut

Imm. 1-imut

Naalakkersuisut aalajangersimasumik annertussusilimmik suliassanik oqartussanut allanut imaluunniit suleqatigisanut namminersortunut suliqartitsisalersinnaanerat aalajangersakkami maleruagassiivigineqarpoq. Aalajangersagaq taamatut suliakkiinissaq pillugu nalunaarummik saqqummiussinissamut inatsimmi tunngavissatut immikkoortutut atuutissaaq. Nalunaarutip taamaattup atuutilerneranik nalunaarutiginninneq atuutilerneralu, innuttaasunut suliffeqarfinnillu ilaalu ilanngullugit tunngatillugu suliakkiussinerup sunniuteqalernissaanut tunngavissaatinneqassaaq.

Aalajangersagaq siunnersuutigineqartoq, assersuutigalugu nakkutilliinermi suliassat suleqatigisanit allanit suliarineqassasut, aalajangernissaanut Naalackersuisunut periarfissiivoq. Aalajangersakkami siunnerfigineqarpoq nakkutilliinerup piginnaasaqarnernut isumalluutinillu atorluaanermut tunngatillugu naapertuunnerpaamik pitsaanerpaamillu aaqqissuunneqarnissaa. Oqartussat allat nakkutilliinermi suliassamik naapertuunnerpaamik isumaginnissinnaappata, suliassaq taakkunani suliarineqassasoq, aalajangerneqarsinnaassaaq.

Aalajangersagaq malillugu aamma suliffeqarfiit namminersortut suliassaqarfimmi immikkut piginnaasaqartut nakkutilliinermik ingerlataqarnissaasa aalajangernissaa aamma periarfissaavoq. Nakkutilliinermi suliassaq suliffeqarfimmut namminersortumut suliakkionneqarpat, Naalackersuisut nakkutilliinermut piginnaatitaaffimminnik atuineranni pisinnaatitaaffiit pisussaaffiillu, suliffeqarfimmi atorneqassasut pillugu Naalackersuisut tamatumunnga atatillugu aalajangersakkanik aalajangersaasinnaapput.

Tamanna pingaartumik nakkutilliinermi suliassaq suliffeqarfimmut namminersortunut suliassanik suliarinninnissamut immikkut imaluunniit pitsaasunik piginnaasaqartunut suliakkionneqarneranni pingaartumik naleqqutissaaq.

Pisortani oqartussat suliassanik aamma inatsisit malillugit piginnaatitaaffinnik suliffeqarfimmut namminersortunut suliakkionneqarneranni assersuutitut taaneqarsinnaavoq umiarsuarnik suussusiliisarneq.

Søfartsstyrelsen 2003-mi American Bureau of Shippingimut, Bureau Veritasimut, Det Norske Veritasimut, Germanischer Lloydimut, Lloyd's Registerimut, Nippon Kaiji Kyokaimut aamma RINA S.p.A.-imut Registro Italiano Navale Groupimut isumaqatigiissuteqarpoq. Isumaqatigiissut danskit imarsiornermut oqartussaasui sinnerlugit suliassanik arlalinnik suliaqarnissamut tunngassuteqarpoq. Suliffeqarfiit isumaqatigiissut malillugu ilaatigut akuersissutinik allagartanik tunniussisinnaapput, iluarsaassinissamik piunasaqarsinnaallutik aammalu takusaanernik suliaqarsinnaallutik. Suliassaqarfimmi tassani ingerlatseqatigiiffiit suussusiliisartut aalajangiinerinik tigusaqartut taamaallaat eqqartuussivinnut aalajangiineq naammagittaalliutigalugu suliakkisinnaapput. Allaffissornikkut naammagittaalliorfissaqanngilaq.

Siunnersuut malillugu oqartussat suliassai oqartussamit allamit imaluunniit suleqatigisamit namminersortumit suliarineqartassasut Naalackersuisut aalajangerpata, oqartussap pineqartup imaluunniit suleqatigisap namminersortup oqartussat suliassaannik suliarinninneq pillugu maleruagassanik atuuttunik naammassinninneranut nakkutilliinissaq Naalackersuisut suliassarilissavaat.

Imm. 2-mut

Aalajangerneqarpat assersuutigalugu nakkutilliinissamut piginnaatitaaffiit pisortani oqartussamut imaluunniit suliffeqarfimmut namminersortumut suliakkionneqassasut,

piginnaatitsissummi allatut aalajangertoqarsimangippat, suleqatigisaq pineqartoq taassumalu sulisui nakkutilliinermut oqartussatut taassumalu sulisuisut piginnaatitaallissapput. Piginnaatitsissummi atugassarititaasunik taamaattunik aalajangersaasoqangippat, taamaalilluni suleqatigisaq pineqartoq aalajangersagaq malillugu assersuutigalugu siunnersuutip matuma aamma aalajangersakkat atugassarititaasullu siunnersuut manna malillugu aalajangersagaasut malinnissaat pillugu peqquisssuteqarnissaq periarfissaavoq. Sulisut nakkutilliinermik suliaqartut tamatuma saniatigut, ingerlatassat siunnersuummi matumani pineqartunut ilaasimappata, tamannalu sulisut nakkutilliinermik suliaqarnerannut pisariaqarpat, aatsitassarsiornermut suliffeqarfimmu ilaasunut tamaginnut taassumalu ingerlataannut isersinnaassapput.

§ 62-imut

Imm. 1-imut

Aalajangersagaq siunnersuutigineqartoq ajoqusiinernut sunulluunniit suliffeqarfiup imaluunniit ingerlatat ajoqusersimasinnaasaannut tunngassuteqarpoq. Ilanngullugit malittaasumik ajoqusiinerit, malitsigisaanik ajoqusernerit aammalu aningaasaqarnerinnakkut ajoqusiinerit annaasaqarnerillu.

Aalajangersakkap atuunnerani ajoqusiinernut, suliaqarnermit imaluunniit ingerlatassanit akuersissummi pineqartunut ilaasunit ajoquserneqartunut, kinaassusersiunngitsumik akisussaasuuneq atuuppoq.

Inuit aamma suliffeqarfiit ilaalu ilanngullugit, siunnersuut manna malillugu suliaqarnermut imaluunniit ingerlatassanut akisussaasuusut imaluunniit siunnersuut manna malillugu suliaqartut imaluunniit ingerlatassanik suliarinnittut, aammalu suliaqarnerminni imaluunniit ingerlataqarnerminni nalinginnaasumik aningaasaqarnikkut isertitaqalersut, ajoqusiinernut suliaqarnerminnut imaluunniit ingerlataqarnerminnut ilaatillugu ajoquserneqartunut taarsiissutissanik akiliissasut pillugu inuiaqatigiinni eqqarsaatigisassanik pingaarnernik aammalu agguaanermut tunngaviusunik aalajangersagaq tunngaveqarpoq.

Tamatuma saniatigut inuit suliffeqarfiillu ilaalu ilanngullugit siunnersuummi pineqartunut ilaasut, ajoqusiinerit taamaalillunilu taarsiinissamut akisussaaffeqalernissaq pinngitsoortinniarlugit killilersimaarniarlugillu naleqquttunik iliuusissanik sillimmateqarnissamik kajumissarlugit, kinaassusersiunngitsumik akisussaaffeqarneq pitsaaliuinermit sunniuteqarsinnaassasoq pillugu ilimagisaqarneq, aalajangersakkami tunngaviuvoq. Tamatuma saniatigut ajoquserneqartup ajoqusiisumut taarsiinissamik piumasqaateqarsinnaanissaa, kinaassusersiunngitsumik akisussaaffeqarnermi qulakkeerneqassaaq, ilanngullugu aamma ajoqusiinerni pisinnaasunut tunngasunik pissuteqartuni.

Tamatuma saniatigut kinaassusersiunngitsumik taarsiinissamut akisussaaffeqarnek pillugu maleruagassani inatsiseqariaatsini mianerisassat assigiinngitsut isiginiarneqassapput. Tamatumunnga pissutaavoq, ajoqusiisup kukkusimaneranut imaluunniit sumiginnaasimaneranut ajoqusertup uppersaanissaata amerlanertigut ajornakusoortusnaanera. Pisinnaatitsissummik pigisaqartup kukkusimaneranut imaluunniit sumiginnaasimaneranut uppersaanissaq siunnersuut malillugu kinaassusersiunngitsumik akisussaaffeqarnermut aaqqissuussinerup pisariaarutsittussaavaa. Taamaattumik ajoqusertup pisinnaatitsissummik pigisaqartup taarsiisussaatitaanera pillugu eqqartuussivimmi suliaassanik ingerlatsinissamik pinngitsuuisinnaaneranut, annertunerusumik kinaassusersiunngitsumik akisussaaffeqarnek malitseqarsinnaassasoq naatsorsuutigineqarpoq.

Tamatuma saniatigut ajoqusiineq ingerlatassanik akuersissummi pineqartunik ilaasunik suliarinninnermi pisinnaatitsissummik pigisaqartumit allaanerusumit ajoqusiinerugaluartoq, pisinnaatitsissummik pigisaqartup nammineerluni ajoqusiisimaneratuut, pisinnaatitsissummik pigisaqartup ajoqusertumut akisussaasuuneranik aalajangersagaq malitseqassaaq.

Kinaassusersiunngitsumik akisussaaffeqarnek, siunnersuut malillugu suliaqarnerup ingerlatassallu Kalaallit Nunaanni pinngortitami sunnertiasumi eqqaaniluunniit, suliaqarnerit imaluunniit ingerlatassat maleruagassanut atuuttunut naapertuuttumik aammalu annertoorujussuarmik mianersorluni peqqissaarussillunilu ingerlanneqanngippata iluarsineqarsinnaanngitsunik ajoqusiisoqarsinnaalluni, pisartussaanerat eqqarsaatigalugu ilaatigut aamma isigineqassaaq.

Imm. 2-mut

Aalajangersakkami ajoquserneqartup nammineq pisuussuteqarnerani taarsiinissap annikillisinneqarnissaa maleruagassiivigineqarpoq.

Ajoqusertup piaaraluni imaluunniit mianersuaalliorujussuarluni iliuuseqarnera imaluunniit iliuuseqannginnera taamaallaat, taarsiinissap atorunnaarneranik imaluunniit annikillisinneqarneranik malitseqarsinnaavoq.

Imm. 3-mut

Nr. 1-imut

Pisinnaatitsissummik pigisaqartup akisussaaffia, ilanngullugu avatangiisini ajoqusiinernut akisussaaffik, sillimmasiissummit matussusiinermi imaluunniit allatut ilusilimmik qularnaveeqqusiinermi ilaatinneqassasoq pillugu aalajangersakkanik atugassarititaasunillu Naalakkersuisut aalajangersaanissaannut inatsimmi tunngavissamik aalajangersagaq imaqarpoq.

Qularnaveeqqusiineq allatut iluseqartoq assersuutigalugu tassaasinnaavoq aningaasartalerlugu kontutut toqqorsiviusussatut ilusiliineq, aningaaserivimmi qularnaveeqqusiineq imaluunniit danskit naalagaaffimmi obligationinik kontumi toqqorsivimmiititsineq. Sillimmasiissut

imaluunniit qularnaveeqqusiissutip ilusiligaanera, suliaqarneq pineqartoq aammalu annertussusaa suussusaalu eqqarsaatigalugit pisariaqarpoq, ilanngullugu taarsiinissamik akisussaaffeqalersinnaaneq pinnaatitsissummik pigisaqartup piffissami akuersissuteqarfiusumi aammalu akuersissutip atorunnaarnerani suliaqarnermut atatillugu iliuusissat malitsigisaannik pilersinnaasoq.

Aammattaq aalajangersagaq malillugu pinnaatitsissummik pigisaqartup ingerlatai pissutsillu tamatumunnga atasut sillimmasiissutini allani attuumassuteqartuni ilaatinneqassasut pillugu aalajangersakkanik atugassarititaasunillu Naalackersuisut aalajangersaasinnaapput. Taamaalilluni pinnaatitsissummik pigisaqartup ingerlatai pissutsillu tamatumunnga atasut pinnaatitsissummik pigisaqartup taarsiinissamik akisussaaffeqarneranut tunngassuteqanngitsut, sillimmasiissummi attuumassuteqartumi ilaatinneqassasut pillugu aalajangersakkanik atugassarititaasunillu Naalackersuisut aamma aalajangersagaq malillugu aalajangersaasinnaapput. Aalajangersakkat atugassarititaasullu taamaattut assersuutigalugu tassaasinnaapput, pinnaatitsissummik pigisaqartup sanaartugai illuutaalu ilaalu ilanngullugit sillimmasiissutini attuumassuteqartuni ilaatinneqassasut.

Nr. 2-mut

Isumaqatigiissuteqarfigineqartut sullississutai ingerlataalu akuersissut malillugu ingerlatassamik suliaqarnermi atorneqarsimappata, pinnaatitsissummik pigisaqartup isumaqatigiissuteqarfigisaasa taarsiinissamut akisussaaffii, ilanngullugu avatangiisinut ajoqusiinernut akisussaaffik, sillimmasiissummi imaluunniit allatut ilusilimmi qularnaveeqqusiissummi ilaatinneqassasut pillugu aalajangersakkanik atugassarititaasunillu Naalackersuisut aalajangersaanissaannut inatsimmi tunngavissamik aalajangersagaq imaqarpoq.

Qularnaveeqqusiineq allatut iluseqartoq assersuutigalugu tassaasinnaavoq aningaasartalerlugu kontutut toqqorsiviusussatut ilusiliineq, aningaaserivimmi qularnaveeqqusiineq imaluunniit danskit naalagaaffimmi obligationinik kontumi toqqorsivimmiittisineq.

Sillimmasiissut imaluunniit qularnaveeqqusiissutip ilusiligaanera suliaqarneq pineqartoq aammalu annertussusaa suussusaalu aammalu isumaqatigiissuteqarfigineqartut ingerlataat eqqarsaatigalugit ingerlanneqassaaq, ilanngullugu taarsiinissamik akisussaaffeqalersinnaaneq isumaqatigiissuteqarfigineqartup piffissami akuersissuteqarfiusumi aammalu akuersissutip atorunnaarnerani suliaqarneranut atatillugu iliuusissat malitsigisaannik pilersinnaasoq.

§ 63-imut

Aalajangersakkami avatangiisinut ajoqusiinernut taarsiisarneq maleruagassii vigineqarpoq aammalu oqaatsitigut aalajangersimasunik allannguuteqartillugu aatsitassanut ikummatissanullu inatsimmi § 67-imik ingerlatitseqqinnerulluni.

Imm. 1-imut

Siunnersuutigineqarpoq ingerlatassanut siunnersuummi matumani pineqartunut ilaatillugu ajoqusiinernut nunamik, imaani, immap naqqanik, nunap iluanik, imermik imaluunniit silaannarmik mingutsitsinermeersunut, avatangiisinut ajoqusiinernut taarsiisarneq pillugu siunnersuummi matumani maleruagassat atuutissasut. Oqaatsit "nuna, imaq, immap naqqa, nunap ilua, imeq aamma silaannaq" atituumik paasineqassapput. Tamanna tunngavigalugu oqaatsimi "imeq" ilaatigut ilaatinneqarput imeq nunap iluaneersoq, kuuk, tatsit aamma imaq. Oqaaseq "mingutsitsineq" siunnersuummi nassuiarneqanngilaq, kisianni avatangiisinut inatsisini allani Kalaallit Nunaanni atuuttuni nassuiaasernerup assinganik nassuiarneqassalluni. Imm. 2 malillugu mingutsitsineq imaluunniit sajuppillannerit ilaalu ilanngullugit ingerlatassanut siunnersuummi pineqartunut ilaasunut ilaatillugu pisimassapput. Ingerlatassat siunnersuummi pineqartunut ilaatinneqanngitsut taamaalilluni siunnersuut malillugu taarsiinissamik akisussaaffeqarnermik malitseqarsinnaanngillat.

Imm. 2-mut

Siunnersuutigineqarpoq maleruagassat imm. 1-imi taaneqartut taamaaqataanik mingutsitsinernut allatullu silap pissusaanut tunngasunut imaluunniit pinngortitamut pitsaangitsumik sunniinernut aamma nipiliornernit, sajuppillatsitsinernit, kissartunit, qaammaqutinit assigisaanniillu akornusersuinernut atuutissasut.

§ 64-imut

Aalajangersakkami avatangiisinut ajoqusiinernut taarsiisarneq pillugu siunnersuummi maleruagassat malillugu ajoqusiinernit taarsiivigineqartussaataasut allatorneqarput. Aalajangersagaq oqaatsitigut aqqissuussinikkullu allannguuteqartillugu aatsitassanut ikummatissanullu inatsimmi § 68-imik ingerlatitseqqinneruvoq.

Aalajangersagaq inatsisitigut inissisimanernut atuuttumut naapertuuttumik ilusiligaavoq aammalu oqariaatsip "ajoqusiineq" siunnersuummi matumani qanoq paasineqarnissaa nassuiarneqarluni. Tamatuma kingorna, tamatumunnga immikkut inatsimmi tunngavissaqanngippat, aningaasaqarnikkuunngitsoq annaasanut taarsiisoqarsinnaanngilaq. Aammattaaq inunnet taarsiisarnernut inatsisitigut illersugaasunut ilaasutut isigineqartariaqartunut, aningaasaniinnaq nalilinnut aatsaat taarsiisoqarsinnaavoq.

Nr. 1-imut

Aalajangersakkami aalajangersarneqarpoq, inummut ajoqusiinernut aamma pilersuisumik annaasaqarnermut, avatangiisini mingutsitsinernit pilersinneqartumut taarsiisoqarsinnaasoq. Oqariaatsimi "inummut ajoqusiineq" aamma tarnikkut anniaatit tupannermik pissuteqartut pineqartunut ilaatinneqarput. Taamaattoq pineqartoq inunnet taarsiivigineqartussaataasunut ilaasimappat aatsaat tamatumunnga taarsiivigineqarnissaq piumasaqaatigineqarsinnaavoq, assersuutigalugu pineqartoq nammineerluni navianartorsiorsimalluni imaluunniit toqqaannartumik timikkut ajoqusersimalluni pisoqartillugu.

Tunniussinissat aalajangersakkami matumani pineqartunut ilaasut, taarsiinissamut akisussaaffeqarnej pillugu maleruagassani nalinginnaasuni erseqqinnerusumik maleruagassiivigineqarpoq. Tamatuma aalajangersakkap oqaasertaani erseqqissumik allassimannginnera apeqqutaatinagu, taamaalilluni pineqartup pilersuisumik annaasaqarnermut taarsiivigineqarnissamut pisinnaatitaanera apeqqutaatinagu, aamma ilisinermit aningaasartuuteqarsimasumut "ilisinermit aningaasartuutitut naleqquttunut" taarsiisoqarsinnaasoq tunngavissaatinneqarpoq, takuuk Kalaallit Nunaanni taarsiinissamut akisussaaffeqarnermut inatsisip atuutilerana pillugu peqqussummut nalunaarummi ("taarsiinissamut akisussaaffeqarnermut inatsi") § 12.

Nr. 2-mut

Pigisanik ajoqusiinermit avatangiisini mingutsitsinermit pilersinneqartumut taarsiisoqarsinnaasoq, aalajangersakkami aalajangersarneqarpoq. Aalajangersakkami pingaartumik pigisani aalaakkaasuni aamma pigisani nuunneqarsinnaasuni, ilanngullugit atortut puttasut, ajoqusiineq pineqartunut ilaatinneqarpoq. Savaatilik avatangiisini mingutsitsineq pissutigalugu narsaatiminik naatitaminillu aseruiffigineqartoq taamaalilluni aalajangersagaq malillugu tamatumani annaasaminut taarsiivigineqarnissamut periarfissaqarpoq. Aalajangersakkami aammattaq ilavoq ingerlatsinermi annaasaqarnej, assersuutigalugu pigisami aalaakkaasumi imaluunniit pigisami nuunneqarsinnaasumi ajoqusiinermit attuumassuteqartoq. Tassani tunngavissaatinneqarpoq ingerlatsinermi annaasaqarnej pigisami aalaakkaasumi imaluunniit pigisami nuunneqarsinnaasumi pigisaanik ajoqusertoqarnerata malitsigisaannut naapertuutissasoq. Ingerlatsinermi annaasaqarnej pigisat ajoqusernerannut attuumassuteqanngippat, aalajangersagaq manna malillugu taarsiisoqarsinnaanngilaq, kisianni immaqa nr. 3-mi aalajangersagaq malillugu pisinnaalluni.

Nr. 3-mut

Aalajangersagaq manna malillugu aningaasaqarnerinnakkut annaasaqarnermut taarsiisoqassaaq. Annaasaqarnej sumiiffiup qanoq issusaa malillugu suut naatsorsuutigisariaqarnermut imaluunniit naammagittarfigisariaqarnermut saniatigut, avatangiisini ajorseriartitsinermik pissuteqassasoq, aalajangersagaq malillugu taarsiivigineqarnissamut tunngavissaatinneqarpoq.

Aalajangersagaq malillugu kina aningaasaqarnikkut (ingerlatsinermit) annaasaqarnermut taarsiinissamik piumasaqarsinnaanersoq pillugu apeqqut, nalinginnaasumik taarsiisarnermut inatsisini tunngaviusut tunngavigalugit eqqartuussivimmi suleriaatsimi aalajangerneqartariaqarpoq, ilanngullugit taamaaqataanni pisartut pillugit aammalu taarsiisarnermut inatsisitigut illersorneqartut soqutigisaat aamma inuit taakkunanani ilaasut pillugit maleruagassat.

Nr. 4-mut

Aalajangersagaq malillugu ajoqusiinerup pinngitsoortinnissaanut imaluunniit pitsaaliorneqarneranut aningaasartuutitut naleqquttunut taarsiisoqarsinnaavoq. Nr. 1-3 malillugit ajoqusiinerup pereersimasup killilersimaarnissaa siunertaralugu aammalu ajoqusiinerup pilersinnaasup pinngitsoortinnissaa siunertaralugu aningaasartuutitut akiliunneqarnissamut aalajangersagaq pisinnaatitsivoq. Taamaalilluni aalajangersagaq ajoquserneqartup taarsiisarnermut inatsisini tunngaviusut nalinginnaasut malillugit annaasaqarnissaminik pinngitsoortitsinissamut imaluunniit killilersimanninnissamut ("annaasaqarnerup killilersimaarnissaanut pisussaaffeqarneq") pisussaaffeqarneranut atalluinnarpoq.

Tamat iluaqutissaannik, soorlu silaannaq aamma imaq ilaalu ilanngullugit, mingutsitsinerup peerneqarnissaa nr. 1-3 malillugit ajoqusiinerup pinngitsoortinnissaa imaluunniit killilersimaarnissaa siunertaralugu pisariaqarpat, tamatumunnga atasunut aningaasartuutitut naleqquttunut taarsiisinaanissamut aalajangersakkami periarfissiisoqarpoq. Assersuutigalugu tassaasinnaapput sumiiffimmik mingutsinneqartumik misissuinermut aammalu akuutissanut uumaatsunut laboratoriani ilaalu ilanngullugit akuutissanik mingutsitsisartunik erseqqinnerusumik misissueqqissaarnissamut aningaasartuutit naleqquttut. Ilaatigut "aningaasartuutit naleqquttuunissaat" pillugu piumasaqaammiippoq, ajoquserneqartup sapinngisamik annertunerpaamik aningaasartuuteqarnissami killilersimaarnissaa isumagissagaa.

Nr. 1-3 malillugit ajoqusiinerup pinngitsoortinnissaanut imaluunniit killilersimaarnissaanut iliuusissanik kina suliaqarsinnaatitaanersoq aammalu akisussaasuusup tamatumunnga taarsiinissaanik piumasaqarsinnaatitaanersoq, siunnersuummi erseqqinnerusumik maleruagassiivigineqanngilaq.

Taamaattumik apeqqut taanna inuit taarsiisarnermut inatsisitigut illersugaasut pillugit inatsisini inissisimaneq atuuttoq tunngavigalugu aalajangiiffigineqartariaqarpoq. Tamatuma kingorna aallaaviussaaq, inuk maannakkut pigisamut imaluunniit pigisamut aalaakkaasumut ilaalu ilanngullugit pineqartumut atuisinnaatitaasoq imaluunniit atuisinnaatitaajunnartoq, pinngitsoortitsinissamut iliuuseqarsinnaasoq, tamatumunngalu aningaasartuutit akisussaasuusumit taarserneqarnissaannik piumasaqarsinnaasoq.

Aalajangersagaq malillugu aammattaaq avatangiisini iluarseeqqinnermut aningaasartuutit naleqquttut taarserneqarnissaat piumasarineqarsinnaavoq. Aalajangersakkami siunertaavoq, ajoquserneqartup aningaasartuutit avatangiisinut ajoqusiinnginnermi (mingutsitsineq) pitsaassusaattut ilersinnissaannut pisariaqartut matussusertinnissaannik pisinnaatitaaffeqalersinnissaa. Tamanut iluaqutaasussanik mingutsitsinerup pinngitsoortinnissaanut imaluunniit killilersimaarnissaanut iliuusissanik aallartitsisoqarsinnaappat, tamatumunnga aningaasartuutit aalajangersagaq malillugu

taarserneqarsinnaassapput. Taamaattoq aningaasartuutit "naleqquttutut" isigineqartariaqarpata, aatsaat taakkua taarserneqarsinnaapput.

Arlaannaalluunniit taakkununga immikkut pisinnaatitaanngitsoq, tamanit iluaqutigineqartunut ilisarnaataammat, inuit, ilanngullugit avatangiisinut kattuffiit, avatangiisinik mingutsitsinerup pinngitsoortinnissaanut imaluunniit iluarseeqqinnissamut aningaasartuuteqarsimasut, tamatumunnga immikkut inatsimmi tunngavissaqarpat aatsaat akisussaasuusumit taarsiivigineqarnissamik piumasqaarsinnaapput. Tamatumunnga pissutaavoq pineqartup atuisinnaatitaanermut tunngavissarititaasumik nalinginnaasumik naammassinnissinnaasussaannginnera, taanna malillugu taarsiivigineqarnissamik piumasqaateqarsinnaanissamut ajoquserneqartoq maannakkut imaluunniit immaqa iluaqutigineqartunik ajoquserneqarsimasunik atuisinnaatitaasussaammat.

Avatangiisinut oqartussat pinngitsoortitsinissamut iliuusissanik suliaqarnissamik imaluunniit avatangiisinik iluarseeqqinnissamik pisinnaatitaappata imaluunniit pisussaaffeqarpata, tamatumunnga aningaasartuutit aalajangersagaq malillugu taamatuttaaq taarserneqarsinnaasussaapput.

Nr. 1-3 malillugit ajoqusiinernik pinngitsoortitsinermut imaluunniit pitsaaliuinnermut imaluunniit avatangiisinik iluarseeqqinnermut aningaasartuutit akilerneqareersimanissaat aalajangersakkap malitsigissanngilaa. Taamaattoq aningaasartuutit akilerneqareersimanngippata, aningaasartaasa naleqquttumik pinngitsoortitsinissamut iliuusissanik suliaqarnermut imaluunniit avatangiisinik iluarseeqqinnermut atorneqarniartut naammattumik uppersaasaosqareersimatinnagu taarsiinissamut akisussaasuusoq aningaasanik tunniussiumanngissinnaasoq aalajangersakkami tunngavissaatinneqarpoq.

§ 65-imut

Aalajangersagaq oqaatsitigut aalajangersimasunik allannguuteqartillugu aatsitassanut ikummatissanullu inatsimmi § 69-imik ingerlatitseqqinneruvoq.

Imm. 1-imut

Aalajangersagaq siunnersuutigineqartoq malillugu ingerlatassanut siunnersuummi matumani pineqartunut ilaasunut ilaatillugu mingutsitsisimasoq, ajoqusiineq pisinnaagaluarpalluunniit, ajoqusiinermut mingutsitsinerup malitsigisaanut taarsiissaaq. Ingerlatassamut siunnersuummi matumani ilaasumut ilaatillugu ajoqusiinernik malitseqartumik mingutsitsisup, imm. 1-imi aalajangersakkami kinaassusersiunngitsumik taarsiinissamut akisussaaffeqarnera (pisuussuseqarani akisussaasuusoq) atuutsinneqalerpoq.

Ajoqusiineq ingerlatassanit siunnersuummi matumani ilaasumit, suliffeqarfimmit kinaassusersiunngitsumik akisussaaffeqartuusumit suliarineqartunit, pilersinneqarsimappat, aatsaat aalajangersagaq malillugu taarsiinissamut akisussaasuuneq atuutissaaq. Ajoqusiineq

pissutsinik immikkut ingerlatanut taakkununga attuumassuteqanngitsunik pissuteqarpat, suliffeqarfik taamaalilluni aalajangersagaq malillugu kinaassusersiunngitsumik taarsiinissamut akisussaasuussanngilaq.

Kinaassusersiunngitsumik akisussaasuuneq siunnersuummi § 62-imi aalajangersagaq malillugu akisussaasuusumut atasuuvoq. Inuk suliffeqarfimmi sulisuusoq, aammalu kinaassusersiunngitsumik tunngaveqartumik taarsiinissamut akisussaasuunermik malitseqartumik iliuuseqartoq, taamaalilluni taamaallaat taarsiisarnermut maleruagassat nalinginnaasut malillugit akisussaasuusaaq, takuuk ilaatigut taarsiinissamik akisussaaffeqarnermut inatsimmi §§ 19 aamma 23.

Aalajangersagaq malillugu kinaassusersiunngitsumik akisussaasuunermut, taarsiinissamut akisussaasuusup pissusilersorsimanera (iliuuseqarluni imaluunniit iliuuseqarani) mingutsitsinermik kinguneqarsimalluni, aammalu mingutsitsineq taanna ajoqusiinermik kinguneqarsimasoq (pisoq pisup tulliani pissutaasoq), ajoqusetup uppersaanissaa nalinginnaasumik tunngavissaatinneqarpoq. Taamaattoq ajoqusetup uppersaanermini uppersaanermut inatsisini tunngavissat nalinginnaasut malillugit qasukkaanernik iluaquserneqarsinnaanissaa, tunngavissaatinneqarpoq.

Ajoqusiineq unammilleqatigiittunik imaluunniit ataatsimooqatigiinnik pissuteqarluni pisoqartillugu, kinaassusersiunngitsumik akisussaasuunerup atuuffissaannut aalajangersakkami erseqqinnerusumik isummerfigineqanngillat. Taamaattumik apeqqut taanna inatsisini inissisimaneq atuuttoq malillugu aalajangiiffigineqartariaqarpoq.

Akisussaasuusoq pinngortitap nukiisa sunneeqataaneranni mingutsitsisimappat, taamaalilluni taakkua ajoqusiisuusut takuneqarsinnaalluni, aalajangersagaq malillugu akisussaasuutitsisoqassasoq aallaavigineqarpoq. Taamaattoq tamatumani pinngortitami pisut eqqoriarneqarsinnaasut imaluunniit sioqqutsisumik naatsorsuutigineqarsinnaasut tassani pineqartut, tunngavissaatinneqarpoq. Taamaalilluni pinngortitami pisoqarnera aallartitsisuuppat, akuttunngitsumik pisartuulluni (qerinartoq, anorersuaq, annertoorsuarmik nittaatsaq il.il.) akisussaasuusoq kinaassusersiunngitsumik akisussaaffeqalersinnaassaaq.

Kisiannili pinngortitami ajunaarnersuaqarpat, soorlu nuna sajulluni, kaavittuliortorsuarmik anorersuarluni assigisaanilluunniit eqqoriarneqarsinnaanngitsumik pisoqarluni, pisunut taakkununga tunngatillugu taassuma erseqqissumik ilaatitsinnginnermik imaqannginnera apeqqutaatinnagu, aalajangersagaq malillugu akisussaatsisoqassanngilaq. Ajoqusiisup taarsiinissamut akisussaasuunerata qasukkartinnissaa pillugu apeqqut, taamatuttaaq inatsisitigut inissisimaneq atuuttoq malillugu aalajangerneqartariaqarpoq. Taamaaliornermi akisussaaffik naapertuutinngitsumik nanertuisussaappat imaluunniit allatigut pissutsit immikkut ittut tamanna naleqqutsippassuk, pingaartumik ajoqusiisup taarsiinissamut akisussaasuunerata taarsiinissamik akisussaaffeqarnermut inatsimmi § 24, imm. 1-imi

aalajangersagaq naapertorlugu appartinneqarsinnaanera imaluunniit atorunnaarsinnaanera innersuussutigineqarsinnaavoq.

Nammaqatigiillutik akisussaasuusut ajoqusiisut arlaqartillugit, taarsiinissamut akisussaaffiup taakkua iluanni agguarneqarnissaa pillugu apeqqu, taamatutaaq pingaartumik taarsiinissamik akisussaaffeqarnermut inatsimmi § 25 naapertorlugu inatsisitigut inissisimaneq atuuttoq tunngavigalugu aalajangiiffigineqartariaqarpoq, taanna malillugu akisussaasuunerup qanoq issusaa aammalu allatigut pisut eqqarsaatigalugit suut naleqquttutut isigineqartariaqarnermut malillugu agguaneq pisariaqarluni.

Imm. 2-mut

Siunnersuutigineqarpoq, ajoqusiinermut ingerlatassap aalajangersakkanut saneqqunneqarsinnaanngitsunut, pisortani oqartussamit aalajangersagaasunut naapertuuttumik ingerlanneqarnera pissutaappat, imm. 1 malillugu akisussaasuuneq atuutilissanngitsoq.

Imm. 2-mi aalajangersagaq malillugu suliaqarnerup peqqussutinut saneqqunneqarsinnaanngitsunut, pisortani oqartussamit aalajangersagaasunut, naapertuuttumik ingerlanneqarnera ajoqusiinermut pissutaappat, kinaassusersiunngitsumik akisussaasuuneq atuutilissanngilaq. Akisussaasuunnginnissamut piumasaqaatit naammassineqartut, akisussaasuusup uppersartussaavaa. Taamaalilluni suliffeqarfik akuersissummut imaluunniit akuersissuteqarnermut pisortani oqartussamit tunniunneqartumut naapertuuttumik iliuuseqarsimagaluortoq, akisussaasuusup imm. 1 malillugu avatangiisinut ajoqusiinermut kinaassusersiunngitsumik tunngavilimmik taarsiinissamut akisussaasunngorsinnaanera, aalajangersakkami mattunneqanngilaq.

Aalajangersakkami akisussaasuusoq allanik akisussaatinneqannginnissamut tunngaviusunik ilaalu ilanngullugit patsisilersornissamut mattunneqanngilaq, soorlu assersuutigalugu tamatumunnga nalinginnaasumik pisuussutinut inatsisini maleruagassanut naapertuuttumik ajornartoorneq.

Akisussaasuusoq, kinaassusersiunngitsumik taarsiinissamut akisussaaffeqarnermi pineqartunut ilaatinneqartoq, ajoqusiineq allap piaarluni imaluunniit mianersuaalliorujussuarluni pilersissimagaa innersuussutigalugu akisussaasuutinneqassanngitsoq pillugu maleruagassanik erseqqinnerusunik imaqanngilaq. Taamaattumik kinaassusersiunngitsumik taarsiinissamut akisussaasuuneq aamma pisumi tassani atuutissaaq. Taamaattoq akisussaasuusoq taarsiinissamik akisussaaffeqarnermut inatsimmi § 25-mi aalajangersagaq malillugu allamut aningaasartuutiminik taarseeqqusisinnaassaaq, taamatullu suliffeqarfiup ajoquserneqartumut taarsiinissamut akisussaaffeqarnera pisuni immikkut ittuni taarsiinissamik akisussaaffeqarnermut inatsimmi § 24 malillugu qasukkartinneqarsinnaassapput. Taarsiinissamik akisussaaffeqarnermut inatsimmi § 24, imm. 2-mi aalajangersagaq nalinginnaasoq, ajoquserneqartup taarsiivigineqarnissamik piumasaqaataa nammineq pisuunera imaluunniit aarlerinaataasumut

akuersisimanera pissutigalugu appartinneqassanersoq imaluunniit atorunnaassanersoq pillugu apeqqummut aamma atuuppoq.

Imm. 3-mut

Inunnik ajoqusertoqartillugu imaluunniit pilersuisup annaaneqarnerani, ajoqusertup nammineq pisuussuteqarnerani taarsiissutissap appartinneqarnissaa aalajangersakkami maleruagassiivigineqarpoq.

Ajoqusertup imaluunniit toqusup piaaraluni imaluunniit mianersuaalliorujussuarluni iliuuseqarnera imaluunniit iliuuseqannginnera kisimi taarsiissutissap atorunnaarneranik imaluunniit appartinneqarneranik malitseqarsinnaavoq.

Imm. 4-mut

Pisuni allani ajoqusersup nammineq pisuussuteqarnerani taarsiissutissap appartinneqarnissaa aalajangersakkami maleruagassiivigineqarpoq.

Ajoqusertup piaaraluni imaluunniit mianersuaalliorujussuarluni iliuuseqarnera imaluunniit iliuuseqannginnera kisimi taarsiissutissap atorunnaarneranik imaluunniit appartinneqarneranik malitseqarsinnaavoq.

§ 66-imut

Aalajangersakkami avatangiisinut ajoqusiinernut taarsiisarneq pillugu siunnersuummi maleruagassat saneqqunneqarnissaat pillugu isumaqatigiissutinut maleruagassiiviuvoq aammalu aatsitassanut ikummatissanullu inatsimmi § 70-imik ingerlatitseqqinnerulluni.

Imm. 1-imut

Siunnersuutigineqarpoq ajoqusiinerup pinissaa sioqqullugu isumaqatigiissuteqartoqarsimappat, aammalu saneqqutsinissaq ajoqusertumut iluaqutaassanngippat, avatangiisinut ajoqusiinermut taarsiisarneq pillugu siunnersuummi matumani maleruagassat saneqqunneqarnissaat pillugu isumaqatigiissut atuutissanngitsoq.

Aalajangersakkamut tunngaviuvoq, ajoquserneqartup isumaqatigiissutip ajoqusiinerup pinnginnerani isumaqatigiissutigineqarsimasup sunniutissaannik paasisimanninniarnerninik ajornakusoortitsisussaanera.

Avatangiisini ajoquseereernerup kingorna isumaqatigiissutit isumaqatigiissutigineqartut aalajangersakkami pineqartunut ilaatinneqanngillat, taamaalilluni assersuutigalugu taarsiinissamut akisussaasuusoq isumaqatiginninniarnikkut isumaqatigiissuteqarnissamut ilaalu ilanngullugit periarfissaqassalluni.

Aalajangersagaq aammattaaq avatangiisinut ajoqusiineq pillugu sillimmasiissutit pillugit isumaqatigiissutinut tunngassuteqanngilaq, taakkua qanga isumaqatigiissutigineqarsimanersut apeqqutaanani, takuuk aammattaaq imm. 2.

Imm. 2-mut

Aalajangersakkami erseqqissarneqarpoq, avatangiisinut akisussaasuusumut avatangiisinut akisussaaffik aamma avatangiisini ajoqusiinernut taarsiisarneq pillugit maleruagassat malillugit piumasaqaateqarfigineqarsinnaanermut akisussaasutut sillimmasiinissamik kissaateqartumut imm. 1-imi maleruagassaq akornusiinermik malitseqassanngitsoq. Taarsiisussaataasoq tamatuma kingorna nalinginnaasumik pisartutut ajoquserneqartoq sillimmasiisarfimminut innersuussinnaavaa.

§ 67-imit

Aalajangersagaq oqaatsitigut allannguuteqarluni aatsitassanut ikummatissanullu inatsimmi § 71-imi ingerlatitseqqinneruvoq, tamatumalu malitsigisaanik kapitalimi avatangiisinut ajoqusiinernut taarsiisarneq pillugu maleruagassat, ajoquserneqartoq isumaqatigiissutip iluani imaluunniit avataani taarsiisarneq pillugu maleruagassat nalinginnaasut malillugit imaluunniit aalajangersakkat kapitalini allani imaluunniit inatsisini allani maleruagassat naapertorlugit aalajangersagaasut naapertorlugit taarsiivigineqarsinnaaneranut killiliinatik.

Inatsimmi assigiinngitsutigut assersuutigalugu ajoqusiinernut sumiiffimmi pineqartumi pisunut kinaassusersiunngitsumik taarsiinissamut akisussaasuuneq pillugu maleruagassat aalajangersarneqarput. Avatangiisini mingutsitsineq pissutigalugu ajoquserneqartoq, inatsisit allat naapertorlugit maleruagassat, siunnersuummi matumani aalajangersakkanit, pitsaaneruseqarpoq inatsisitigut inissisimalersitsippata, ajoquserneqartoq inatsimmi maleruagassat immikkut ittut taakkua malillugit taarsiivigineqarnissamik piumasaqarsinnaassaaq. Avatangiisini mingutsitsineq pissutigalugu ajoquserneqartoq taamaalilluni siunnersuummi aalajangersakkat malillugit imaluunniit inatsimmi aalajangersakkat allat, pineqartumut iluaqutaanerusinnaasut, malillugit taarsiivigineqarnissamik piumasaqarnissaq qinersinnaavaat.

Aalajangersakkami aammattaaq avatangiisini ajoqusiinernut taarsiisarneq pillugu maleruagassat suliaasaqarfinni inatsimmi aalajangersagaanngitsuni eqqartuussivimmi suleriaatsimi aalajangersagaasut, aammalu maleruagassat siunnersuummi allassimasut, akornanni pissutsinut maleruagassiisoqarpoq. Taamaalilluni aalajangersagaq isumaqatigiissutip iluani imaluunniit avataani ajoquserneqartup maleruagassat nalinginnaasut malillugit taarsiivigineqarnissamik piumasaqarnissamik periarfissaqarneranut killiliinngilaq.

Akisussaasuunermut maleruagassat nalinginnaasut aamma avatangiisini ajoqusiinernut taarsiisarneq pillugu maleruagassat assigiinngissuteqartillugit, avatangiisini ajoqusiinernut

taarsiisarneq pillugu siunnersuummi matumani maleruagassat, akisussaasuunermut maleruagassanit nalinginnaasunit, salliutinneqassapput.

§ 68-imut

Siunnersuutigineqarpoq avatangiisinut ajoqusiinernut taarsiisarneq aamma pissutsit kapitali 12-imi taaneqartut pillugit aalajangersakkanik erseqqinnerusunik aalajangersaanissamut Naalakkersuisut piginnaatinneqassasut, ilanngullugu avatangiisinut ajoqusiinernut taarsiisarneq pillugu nunami namminermi imaluunniit nunani tamalaani maleruagassat, isumaqatigiissutit imaluunniit malittarisassat atorneqarnissaat pillugu. Eqqarsaataavoq tamanna siunnersuutip matuma sunnuteqarluarnissaata aammalu siunnersuutip siunertaanut naapertuunnissaata qulakkeernissaanut naapertuutillugu, Naalakkersuisut aalajangersakkami siunnersuutigineqartumi inatsimmi tunngavissaq atorlugu maleruagassat ilassusersinnaagaat.

§ 69-imut

Imm. 1-imut

Aalajangiinerit siunnersuut naapertorlugu aqutsisoqarfimmit aalajangiiffigineqartut naammagittaalliuutigineqarsinnaanerit aalajangersakkami aalajangersarneqarpoq. Aalajangersagaq taamaalilluni aalajangiinerit Naalakkersuisoqarfimmit /Naalakkersuisunit aalajangiiffigineqartut naammagittaalliuutigineqarsinnaanerannik malitseqanngilaq.

Aalajangersagaq malillugu aalajangiinerup aqutsisoqarfimmit aalajangiiffigineqartup naammagittaalliuutigineqarnera Naalakkersuisunut suliaqarsutitigineqarsinnaavoq. Suliaqarnermi aqutsisoqarfimmut naalakkersuisoqarfik suliaqarsutitigineqarsinnaavoq akisussaasuusooq naammagittaalliorfissatut oqartussaasussaana nalinginnaasuusaaq.

Imm. 2-mut

Aalajangiinerup aqutsisoqarfimmit ataaniittumit aalajangiiffigineqarsimasup Naalakkersuisunut naammagittaalliuutigineqarluni tunniunneqarnissaanut naammagittaalliornissamut piffissamut killigititaq sapaatit akunnerinik 6-inik sivilissuseqartoq, aalajangersakkami aalajangersarneqarpoq.

Aalajangersagaq naammagittaalliornissamut killigititap aallartinnera pillugu maleruagassamik marlunnik imaqqarpoq. Aalajangersagaq suliami pineqartumut nalunaarutigineqarsimappat, naammagittaalliornissamut killigititaq nalunaarutiginninnerup ulluanit aallartittutut naatsorsorneqassaaq. Aalajangiineq tamanut ammasumik nalunaarutigineqarsimappat, naammagittaalliornissamut killigititaq tamanut ammasumik nalunaarutiginninnerup ulluanit naatsorsorneqassaaq. Tamatuma saniatigut naammagittaalliornissamut piffissamut killigititaq pillugu maleruagassamik ataatsimik aalajangersagaq imaqqarpoq.

Naammagittaalliornissamut killigititaq arfininngornermi imaluunniit ullumi nalliuttumi naassapat, naammagittaalliornissamut killigititaq ulluinnaap tullianut sivitsorneqassaaq.

Naammagittaalliornissamut killigititap naareernerata kingorna naammagittaalliuut Naalakkersuisunut suliakkiunneqarsinnaanngilaq.

Imm. 3-mut

Aalajangersagaq malillugu naammagittaalliuut allaganngorlugu tunniunneqassaaq, assersuutigalugu elektroniskimik attaveqatigiinneq atorlugu, soorlu assersuutigalugu e-mail, aammalu naammagittaalliuut oqartussamut aalajangiisimasumut tunniunneqassalluni.

Imm. 4-mut

Imm. 4-mi siunnersuutigineqarpoq akuersissutip, akuersissuteqarnerup imaluunniit immikkut ittumik akuersissuteqarnerup naammagittaalliuutigineqarnera, Naalakkersuisut allamik aalajangiisimanngippata, kinguartitsinermik sunniuteqassanngitsoq.

Imm. 5-imut

Akuersissutit, akuersissuteqarnerit aamma immikkut ittumik akuersissuteqarnerit aalajangersimasut naammagittaalliornissamut killigititap iluani atorneqaqqusaanngitsut, pillugu aalajangersakkanik Naalakkersuisut aalajangersagaq malillugu aalajangersaasinnaapput.

§ 70-imut

Imm. 1-imut

Aalajangersakkami, aalajangiinermik eqqartuussivinnut suliakkiinissamut ataatsimut isigalugu piffissamut killiliussaq ukiumut ataatsimut, aalajangersarneqarpoq. Ataatsimut isigalugu ukiumik ataatsimik piffissamut killiliinerup toqqarneqarnerani, pissutsit taakkua pillugit inatsisitigut inissisimanerup pisariitsuullunilu ersarissuunissaa qulakkeerneqassaaq. Siunnersuummi aatsitassanut ikummatissanullu inatsit malillugu inatsisitigut inissisimaneq ingerlateqqinneqarpoq.

Aalajangersagaq, aalajangiineq pillugu eqqartuussisunut suliassanngortitsinermut, atuutissaaq, ilanngullugu assersuutigalugu aalajangiinerup atuunnerata imaluunniit sunniuteqarnerata eqqartuussivimmi misilinneqarnera, aammalu aalajangiineq pillugu imaluunniit aalajangiinermut atatillugu taarsiinissamik piumasaqaateqarneq, akiliinissamik piumasaqarnerit allat imaluunniit piumasaqaatit allat.

Aalajangersakkami siunertaavoq, innuttaasut, oqartussat inuussutissarsiortullu piffissamut killiliussap naapertuuttup iluani inaarutaasumi inatsisitigut inissisimanerminnik paasisaqarnissaannik qulakkeerininnissaq. Pisinnaatitsissummik pigisaqartut allallu siunnersuummi suliassarfiup iluani ingerlatassanik suliaqartut, aamma suliassap piffissap

sivisuup qaangiutereernerani eqqartuussivinnut imaluunniit eqqartuussivimmut isumaqatigissitsiniartartumut suliaqatigissississaa nalornisoorutigiginagu aalajangiinerit tatigalugit iliuuseqarsinnaanissaq pisariaqartippaat.

Aalajangersakkat assingusut danskit inatsisaanniipput. Danskit avatangiisinik allanngutsaaliuineq pillugu inatsisaanni pissutsit inatsimmi pineqartunut ilaasut pillugit eqqartuussivinnut suliaqatigissississamut aallaaviusumik qaammatini 6-ini piffissamut killiliussaq atuuppoq. Taamaattoq avatangiisinik allanngutsaaliuineq pillugu danskit inatsisaanni pisuni aalajangersimasuni ukiumik ataatsimik piffissamut killiliisoqartarpoq. Pilersaarusiorneq pillugu danskit inatsisaanni aamma eqqartuussivinnut aalajangiinerit suliaqatigissississamut qaammatini 6-inik piffissamut killiliuineq atuuppoq.

Piffissap naleqquttup iluani ersarissumik inaarutaasumillu inatsisitigut inissisimatitsinissamut inuiaqatigiinni pisariaqartitsisoqartillugu, ilaatigut inuiaqatigiinni soqutigisanik pingaaruteqartunik maleruagassiineq, avatangiisinik allanngutsaaliuineq pilersaarusiorneq pillugit danskit inatsisaanni assigiissutaavoq. Pisariaqartitsineq taamaattoq aamma siunnersuummi suliaqatigissississamut iluani atuuppoq.

Imm. 2-mut

Aalajangersagaq piffissamut killiliussap aallartiffissaa pillugu maleruagassanik marlunnik imaqarpoq. Killigititaq suliami pineqartumut aalajangiinerup nalunaarutigineqarnerata ulluanit naatsorsorneqassaaq. Aalajangersagaq suliaqatigissississamut pineqartumut nalunaarutigineqarpat, piffissamut killiliussaq nalunaaruteqarnermut ulloq taanna aallarnerfigalugu naatsorsorneqassaaq. Taamaattoq aalajangersagaq tamanut ammasumik nalunaarutigineqarpat, piffissamut killiliussaq tamatigut tamanut saqqummiussinermut ulloq taanna aallarnerfigalugu naatsorsorneqassaaq. Aalajangersakkami aamma piffissamut killiliussap naanissaa pillugu maleruagassamik aalajangersaasoqarpoq. Piffissamut killiliussaq nalinginnaasooq arfininngornermi imaluunniit nalliuttumi naappat, piffissamut killiliussaq ulluinnarmut tullermut sivitsorneqassaaq. Piffissamut killiliussaq assersuutigalugu sisamangorneq 1. februar 2024 aallartippat, eqqartuussivinni suliaqatigissississamut piffissamut killiliussaq kingulleq tassaassaaq ulloq 1. februar 2025. Ulloq 1. februar 2025 arfininngornerummat, aammalu ulloq 2. februar 2025 sapaataalluni, suliaqatigissississamut piffissamut killiliussaq kingulleq taamaalilluni tassaassaaq ataasinngorneq ulloq 3. februar.

Imm. 3-mut

Naalackersuisut allamik aalajangiisimangippata, aalajangiinerup eqqartuussivinnut suliaqatigissississamut kinguartitsinermik sunniuteqassanngitsoq, aalajangersakkami aalajangersarneqarpoq.

Aalajangiinerup eqqartuussivinnut suliaqatigissississamut kinguartitsinermik sunniuteqarpat, suliaq aalajangiineq atorunnaarsinnagu imaluunniit allanngortinnagu aalajangiiffigineqarpat

imaluunniit suliassaq tigujuananeqanngippat, taamaatinneqarpat imaluunniit allatut atorunnaarpat, aatsaat aalajangiineq atuutilissaaq.

Kinguartitsinermik sunniuteqartitsinissaq pillugu apeqqutip nalilersorneqarnerani ilaatigut aalajangiineq inuiaqatigiinnut imaluunniit pissutsinut pingaarutilinnut allanut annertuunik sunniuteqarnerlussinnaassanersoq eqqarsaatigineqassaaq. Taamaattoq oqaatigineqartutut aallaaviatigut aalajangiinerup eqqartuussivinnut suliakkiunneqarnera kinguartitsinermik sunniuteqartussaangilaq.

Imm. 4-mut

Aalajangiineq siunnersuummi pineqartunut ilaasoq taamaallaat eqqartuussivinnut Kalaallit Nunaanni aalajangiisinnaatitaasunut suliakkiunneqarsinnaasoq, aalajangersakkami aalajangersarneqarpoq.

Akiliisitsinissamut suliassani unnerluussinermut oqartussamit ingerlanneqartuni, eqqartuussiviup sorliup suliassaq suliarissaneraa, tamatumunnga eqqartuussisarnermut inatsimmi maleruagassat malillugit aalajangerneqassaaq.

§ 71-imut

Pisinnaatitsissummik pigisaqartup aamma Naalakkersuisut akornanni aaqqiagiinngissuteqarnerit, assersuutigalugu akuersissutip atorunnaareernerata kingorna pilersut, aalajangersagaq malillugu § 70-imi aalajangersakkanut naapertuuttumik suli aalajangiiffigineqartassapput. Aaqqiagiinngissuteqarnerit taamaattut ilaatigut pissutsinut pisussaaffinnullu akuersissutip atorunnaareernerata kingorna atuutiinnartunut ilaatigut tunngassuteqarsinnaapput.

§ 72-imut

Imm. 1-imut

Aalajangersakkami allassimavoq Naalakkersuisut kina pinngitsaaliissummik akiliisinneqartussatut pisussaaffilersinnaaneraat.

Aalajangersakkami siunertaavoq, kimigiisersinnaassuseqarsinnaanermik atuutilersitsinissaq, inuit suliffeqarfiillu paasissutissanik taakkua tunniussinissamik pisussaaffeqarfigisaannik tunniussinissamut, peqqusissuteqarnermik inerteqquteqarnermillu malinninnissaannik aammalu pisussaaffimminnut qularnaveeqqusiinissaannut sunniuteqarluartitsilersinnaasoq.

Pinngitsaaliissummik akiliisitsisarnerit pineqaatissiissutaanngillat, kisianni iliuseqartussaataanerup pinngitsaaliissummik pitinniarnernut sakkusaallutik.

Aalajangersagaq annertuumik unammilleqatigiinneq pillugu Inatsisartut inatsisaanni (unammilleqatigiinnermut inatsit) § 37-mut assinguvoq.

Pisinnaatitsissummik pigisaqartoq suleqatigisallu allat siunnersuummi pineqartunut ilaasut assersuutigalugu siunnersuut malillugu paasissutissanik suliaqarnerannut imaluunniit ingerlatassanut siunnersuummi pineqartunut ilaasunut oqartussat suliarinninnerannut pisariaqartunik tamaginnik tunniussissapput.

Matuma siuliani allassimasoq taamaallaat siunnersuummi aalajangersakkanut, taanna malillugu inuup imaluunniit suliffeqarfiup Naalakkersuisunut paasissutissanik tunniussisussaananeranut, imaluunniit taanna malillugu Naalakkersuisut inuup imaluunniit suliffeqarfiup paasissutissanik Naalakkersuisunut tunniussinissaanik piumasaqarsinnaanerannut, assersuutissaavoq. Aalajangersakkat taamaattut malillugit paasissutissanik piumasarineqartunik tunniussinngitsoq, aalajangersagaq manna malillugu pinngitsaaliissummik akiliisinneqarnissamik pisussaaffilerneqarsinnaassaaq.

Aalajangersagaq malillugu pinngitsaaliissummik akiliisitsinerit, paasissutissat attuumassuteqartut tunniunneqarnissaasa, peqqusissuteqarnerup imaluunniit inerteqquteqarnerup naammassineqarnissaata imaluunniit qularnaveeqqusiissutissap piumasarineqartup qularnaveeqqusiissutigineqarnissaata tungaanut ullormut imaluunniit sapaatip akunnikkaartumik akiliisitsinertut aalajangersarneqassapput.

Pinngitsaaliissummik akiliisitsinerit annertussusaat ataasiakkaatigut naliliineq aallaavigalugu aalajangersarneqassapput. Tassunga atatillugu nalinginnaasumik annertoqatigiimmik pinninnissamut tunngaviusoq atuuppoq. Tamanna ilaatigut isumaqarpoq, pinngitsaaliissummik akiliisitsinerit kukkuluttornermut naleqqutinngitsuussanngitsut.

Pinngitsaaliissummik akiliisitsinerup aalajangersarneqarnerani pinngitsaaliissummik akiliisinneqartussami aningaasaqarnikkut pisinnaassuseqarneq eqqarsaatigineqassaaq, taamaalilluni pinngitsaaliissuteqarneq sunniuteqassalluni. Taamatuttaaq kukkuluttornerup annertussusaa suussusaalu eqqarsaatigineqassapput.

Pinngitsaaliissummik akiliisitsinerit ullormut minnerpaamik 1.000 korduuniussasoq naatsorsuutigineqarpoq imaluunniit sapaatip akunnikkaartumik 5.000 korduuniusariaqarluni, aammalu ullormut ataasiaannarluni imaluunniit sapaatip akunneranut ataasiaannarluni pinngitsaaliissummik akiliisitsisoqartassasoq naatsorsuutigineqarpoq.

Pinngitsaaliissummik akiliisitsinerit ulloq pineqartoq aallarnerfigalugu pisussaaffiliunneqassapput. Naalakkersuisut tamanna sioqqullugu pinngitsaaliissummik akiliisitsinerit ulloq taaneqartoq aallarnerfigalugu peqqussutigineqarnissaat aammalu kukkuluttornerup qanoq malitseqarnissaa pillugit suliffeqarfimmut imaluunniit inummut

nalunaaruteqarsimanissaat, pinngitsaaliissummik akiliisitsinerit peqqussutiginiissaannut tunngavissaatinneqarpoq.

Pinngitsaaliissummik akiliisitsinissamik peqqusissuteqarluni piffissap aalajangersimasup kingorna paasissutissat attuumassuteqartut tunniunneqanngiinnarpata, peqqusissuteqarneq imaluunniit inerteqquteqarneq attuumassuteqartoq malinneqanngiinnarpata imaluunniit piumasarineqartumik qularnaveeqqusiisoqanngiinnarpata, pinngitsaaliissummik akiliisitsinerit qaffanneqarsinnaapput.

Imm. 2-mut

Aalajangersagaq malillugu pinngitsaaliissummik akiliisitsinerit, imm. 1 malillugu pisussaaffiliunneqarsinnaasut, annertussusissaat pillugu aalajangersakkanik Naalakkersuisut aalajangersaassapput.

Taamaalilluni Naalakkersuisut aalajangersagaq malillugu pinngitsaaliissummik akiliisitsinissamik pisussaaffiliisinnaalinninneranni, nalunaarutininik ataatsimik arlariinnilluunniit, akiliisitsinerit aalajangersagaq naapertorlugu pisussaaffiliunneqarsinnaasut qanoq annertutiginiissaannik aalajangersaaviumik, atuutsitsilertoqartussaassaaq.

§ 73-imut

Imm. 1-imut

Aalajangersakkami aalajangersarneqarpoq, § 6, § 7, imm. 1-imik, § 9, imm. 1-2-mik, § 10, imm. 1-3-mik, § 11, imm. 1-imik, § 29, imm. 1-imik aamma § 30, imm. 1-imik unioqquitsilluni ingerlatassanik suliaqartoq akiliisinneqarnissamik pineqaatissinneqarsinnaasoq.

Aalajangersagaq, siunnersuutip akuersissutit imaluunniit akuersissuteqarnerit siunnersuut malillugu tunniunneqartut malillugit ingerlatassat suliarineqarnissaat siunnersuummi matumani tamarmiusumi tunngavigineqarneranut, ataqatigiissillugu isigineqassaaq, taamaalilluni ingerlatassat siunnersuutip siunertaanut naapertuuttumik suliarineqarnissaat qulakkeerneqassalluni.

Imm. 2-mut

Nr. 1-3-mi pissutsit arlallit, piaaraluni imaluunniit mianersuaalliorujussuarluni pisoqarsimatillugu akileeqqusinerimik malitseqarsinnaasut, aalajangersakkami allassimapput .

Nr. 1-imut

Imm. 2, nr. 1-imi aalajangersakkami aalajangersarneqarpoq, inatsisit allat malillugit qaffasinnerusumik pineqaatissiineq pisussaasimangippat, piaaraluni imaluunniit mianersuaalliorujussuarluni paasissutissanik eqqunngitsunik imaluunniit paatsuungatitsisunik tunniussisoq imaluunniit paasissutissanik siunnersuut malillugu imaluunniit aalajangersakkat

imaluunniit atugassarititaasut siunnersuut malillugu aalajangersarneqartut malillugit oqartussap piumasarisaannik nipangiussiinnartoq, akiliisitsinermik pineqaatissinneqassasoq.

Oqartussat suliarinnissinnaanissaannut aamma siunnersuut manna malillugu nakkutilliinissamut ilaalu ilanngullugit, paasissutissanik attuumassuteqartunik tamaginnik eqqortumik tunniussinissap pisariaqarneranut sanilliullugu aalajangersagaq isigineqassaaq.

Nr. 2-mut

Imm. 2, nr. 2-mi aalajangersakkami aalajangersarneqarpoq, inatsisit allat malillugit qaffasinnerusumik pineqaatissiineq pisussaasimangippat, aalajangersakkanik imaluunniit akuersissummut atugassarititaasunik imaluunniit akuersissuteqarnermik siunnersuut malillugu imaluunniit aalajangersakkat imaluunniit atugassarititaasut siunnersuut malillugu aalajangersarneqartut malillugit tunniunneqartunik piaaraluni imaluunniit mianersuaalliorujussuarluni unioqutitsisoq, akiliisitsinermik pineqaatissinneqassasoq.

Ingerlatassat siunnersuutip siunertaanut naapertuuttumik suliarineqarnissaat aalajangersakkami qulakkeerneqassaaq. Unioqutitsineq annertuujuppat, tamanna pisortat ingerlatsineranni maleruagassanut tunngaviusunullu naapertuuppat, ilanngullugit kinaassusersiunnginnissaq, annertoqatigiimmik pinninnissaq naligiimmillu pinninnissaq, akuersissutip tunuartinneqarnissaa pillugu Naalakkersuisut aamma aalajangiisinnaapput.

Nr. 3-mut

Imm. 2, nr. 3-mi aalajangersakkami aalajangersarneqarpoq, inatsisit allat malillugit qaffasinnerusumik pineqaatissiineq pisussaasimangippat, peqqusissuteqarnermik imaluunniit inerteqquteqarnermik siunnersuummi aalajangersakkat imaluunniit akuersissummut atugassarititaasut imaluunniit siunnersuut malillugu akuersissuteqarnek imaluunniit aalajangersakkat siunnersuut malillugu aalajangersagaasut malillugit Naalakkersuisunit nalunaarutigineqartumik piaaraluni imaluunniit mianersuaalliorujussuarluni malinninnginneq, akiliisitsinermik pineqaatissinneqassasoq.

Peqqusissuteqarnerup inerteqquteqarnerullu nalunaarutigineqareersimasup naammassineqarnissaata qulakkeersinnaanissaata, siunnersuut manna malillugu oqartussat suliassaannik oqartussat isumaginnissinnaanissaannut pisariaqarneranut sanilliullugu aalajangersagaq isigineqassaaq. Taamaalilluni peqqusissuteqarnermik imaluunniit inerteqquteqarnermik sumiginnaasoq akiliisitsinermik pineqaatissinneqarsinnaavoq.

Imm. 3-mut

Aalajangersakkanik siunnersuut malillugu aalajangersagaasunik unioqutitsineq Kalaallit Nunaannut pinerluttulerinermut inatsit malillugu akiliisitsinermik imaluunniit allanik pineqaatissiinermik pineqaatissinneqarsinnaasoq pillugu aalajangersakkanik Naalakkersuisut aalajangersaanissaannut inatsimmi tunngavissamik aalajangersagaq imaqarpoq. Aalajangersakkap malitsigisaanik Naalakkersuisut allatut aalajangiippata, siunnersuut manna

malillugu pineqaatissiissutissanut maleruagassat, pineqaatissiinernut aalajangersakkanik unioqutitsinermut pineqaatissiissutaasinnaasunut tamakkiisumik allattoreqanngillat.

Imm. 4-mut

Aalajangersagaq inatsisitigut pisussaataitasunut pisinnaatitaasunullu, aalajangersakkanik imm. 1-3-mi taaneqartunik unioqutitsisunut tunngassuteqarpoq. Aalajangersagaq malillugu taakkua aamma tamatuminnga unioqutitsinerminni pinerlunnernut inatsisitigut akisussaatinneqarlutik pineqaatissinneqarsinnaassapput.

Unioqutitsisoq tassaappat Namminersorlutik Oqartussat, kommuni imaluunniit kommunit ataatsimoorfiat, kommunini aqutsineq pillugu Inatsisartut inatsisaanni pineqartunut ilaasoq, aalajangersagaq malillugu taamaaqatai atuutissapput.

Imm. 5-imut

Imm. 1-2 imaluunniit aalajangersakkat imaluunniit atugassarititaasut imm. 3 malillugu aalajangersarneqartut malillugit akiliisitsinissamik suliassaq, aalajangersagaq malillugu allaffissornikkut akiliisitsinikkut aalajangiiffigineqarsinnaavoq. Inatsisitigut isumannaatsuutitsinissaq eqqarsaatigalugu, unioqutitsinerit ersaritsillugit, pisariusuutinnagu aammalu uppersaatitigut nalornissuteqartinnagu, allaffissornikkut akiliisitsinerit taamaallaat atorineqarsinnaapput.

Taamatuttaaq akileeqqusissummik tigusaqartup pisuulluni nalunaarutiginninnera (akiliisitsinissaq akueralugu) aammalu piffissamut killiliussap erseqqinnerusumik aalajangersagaasup iluani akiliisitsissummik akiliinera, allaffissornikkut akileeqqusilluni suliassap naammassinissaanut tunngavissaatinneqarput.

Unioqutitsineq ersarinngippat, pisariuppat aammalu uppersaatitigut annertuunik nalornissuteqartoqarpat, suliassaq politiinut aamma unnerluussinermut oqartussanut ingerlateqqinneqartussaassaaq, taakkua tamatuma kingorna suliassaq nalilersussallugu sularissallugulu. Akileeqqusissummik tigusaqartoq pisuulluni nalunaarutiginninngippat (akiliisitsinissaq akuerinagu) aammalu piffissamut killiliussap erseqqinnerusumik aalajangersarneqartup iluani akiliisitsissut akilerneqanngippat, taamaaqatai atuutissapput.

Taamatuttaaq aalajangersagaq malillugu, unnerluussutip imarisassaannut piumasaqaatit pillugit aammalu unnerluutigineqartup oqaaseqarnissamut pisussaaffeqannginnera pillugit eqqartuussisaatsimut inatsimmi maleruagassat, siunnersuut malillugu akileeqqusinernut taamaaqataanik atuupput.

Akiliisitsinerup annertussusaa ataasiakkaatigut missiliuilluni naliliineq aallaavigalugu aalajangersarneqassaaq. Tassunga atatillugu nalinginnaasumik annertoqqatigiimmik pinninnissamut tunngaviusoq atuutissaaq. Tamatuma ilaatigut kingunerisaanik akiliisitsineq kukkuluttornermut naapertuutinnigsumik annertussuseqassanngilaq.

Akiliisitsinissaq unioqqutitsinerup sakkortussusaa eqqarsaatigalugu aalajangersarneqassaaq, ilanngullugu isumannaallisaanikkut aarlerinaataasinnaasut allat unioqqutitsinerup malitsigisassai, aammalu unioqqutitsinerup annertussusaa kiisalu tamatumani iluanaarutigineqartoq imaluunniit iluanaarutigisassatut siunertarineqartoq.

Aalajangersagaq assersuutigalugu isumannaallisaanermut peqqussutit ersarissumik unioqqutinneqartut paasineqarluni pisoqartillugu imaluunniit aatsitassat annikinnerusut imaluunniit aatsitassat nalitunnginnerusut Naalakkersuisut akuersissuteqartinnagit Kalaallit Nunaanniit anninniarsarineqarlutik, Naalakkersuisut nakkutilliinerannut atatillugu atorneqarsinnaassaaq.

Imm. 6-imut

Aalajangersakkami aalajangersarneqarpoq akiliisitsinerit siunnersuut imaluunniit siunnersuut malillugu aalajangersakkat malillugit pineqaatissiissutigineqartut, nunap karsianut tutsinneqassasut.

§ 74-imut

Imm. 1-imut

Aatsitassat pisussaanani imaluunniit aalajangersakkanik imaluunniit atugassarititaasunik aalajangersarneqartunik unioqqutitsilluni katersorneqartut, piiarneqartut imaluunniit atorneqartut arsaarinnissutigineqarsinnaanerit, aalajangersakkami inatsimmi tunngavissalernerqarpoq.

Imm. 2-mut

Aatsitassat pisussaanani imaluunniit aalajangersakkanik imaluunniit atugassarititaasunik aalajangersarneqartunik unioqqutitsilluni Kalaallit Nunaanniit anninniarsarineqartut imaluunniit anninneqartut arsaarinnissutigineqarsinnaasut, aalajangersakkami inatsimmi tunngavissalernerqarpoq.

Imm. 3-mut

Aatsitassanik pissarsinerup nalaani pissarsisup akuersissummik peqarani aatsitassanik katersisoqartoq, paaasoqartoq imaluunniit atuisoqartoq ilisimallugu imaluunniit ilisimasariaqaraluarlugu, aatsitassat akuersissummik peqarani katersorneqartut, piiarneqartut imaluunniit atorneqartut, imaluunniit taakkua nalingisa arsaarinnissutigineqarnissaannut aalajangersakkami periarfissiisoqarpoq.

Tamanna ilaatigut imm. 1-imi aalajangersakkap avaqqutaarneqarnissaata pakkersimaarneqarnissaanut, taamaalillunilu Namminersorlutik Oqartussat nunatsinni aatsitassarsiornermik suliaqarnermit isertitaqarnissaata qulakkeernissaanut, iluaqutaassaaq.

Imm. 4-mut

Aalajangersagaq malillugu aamma iluanaarutininik imaluunniit aningaasanik taakkununga naapertuuttunik, aatsitassat pisusaanani imaluunniit aalajangersakkanik imaluunniit atugassarititaasunik aalajangersarneqartunik unioqquutitsilluni katersorneqarnerannut, piiarneqarnerannut imaluunniit imm. 2 malillugu atorneqarnerannut atatillugu pissarsiarineqartunik imaluunniit pisusaanani imaluunniit aalajangersakkanut imaluunniit atugassarititaasunut aalajangersarneqartunik unioqquutitsilluni imm. 2 malillugu Kalaallit Nunaannit anninneqartunik imaluunniit anniseriaraluarneqartunik Naalakkersuisut arsaarinnissinnaapput.

Aningaasartaasa annertussusissaasa aalajangersarnissaanut naammattunik tunngavissaqarsimanngippat, aningaasat ataasiakkaatigut naliliineq malillugu iluanaarutigineqartunut naapertuuttut nalilerneqartut, Naalakkersuisut arsaarinnissutigissavaat.

Imm. 5-imut

Aalajangersakkami allassimavoq, Kalaallit Nunaannut pinerluttulerinermut inatsimmi pinerluttuliornermi arsaarinnissuteqartarneq imaluunniit tamatumunnga naapertuuttut aningaasartat pillugit maleruagassat, imm. 1-4 malillugit Naalakkersuisut arsaarinnissuteqarnerannut atuuttut.

Pinerluttuliornermi imaluunniit aningaasani tamatumunnga naapertuuttuni iluanaarutininik arsaarinnittarneq pillugu aalajangersakkat taaneqartut taakkua Kalaallit Nunaannut pinerluttulerinermut inatsit kingusinnerusukkut allannguuteqartoq pillugu inatsimmut nalunaarummi nr. 1045, 7. september 2017-imeersumi atuuttumi §§ 166-170-imi aalajangersagaapput.

Kalaallit Nunaannut pinerluttulerinermut inatsimmi §§ 166-170-imi arsaarinnittarneq pillugu aalajangersakkat taamaalillutik, iluanaarutininik imaluunniit aningaasanik taakkununga naapertuuttunik, aatsitassanik pisusaanani imaluunniit imm. 1 malillugu aalajangersakkat imaluunniit atugassarititaasut unioqquutillugit katersorneqarnerannut, piiarneqarnerannut imaluunniit atorneqarnerannut atatillugu pissarsiarineqartunik, imaluunniit imm. 2 malillugu pisusaanani imaluunniit aalajangersakkat imaluunniit atugassarititaasut aalajangersagaasut unioqquutillugit Kalaallit Nunaanniit anninneqartunik imaluunniit anninniarsarineqartunik Naalakkersuisut arsaarinninnerannut, taamaaqataannik atuupput.

Imm. 6-imut

Aalajangersakkami allassimavoq Naalakkersuisut imm. 1, 2 aamma 3 malillugit nammineerlutik arsaarinnissinnaasut.

Kalaallit Nunaannut pinerluttulerinermut inatsit malillugu oqartussaq attuumassuteqartoq, pissutsit politiinut nalunaarutigineqarsimappata, pinerluttulerinermut inatsimmi

tamatumunnga maleruagassat malillugit tassaavoq arsaarinnissinnaasoq.

Imm. 7-imut

Siunnersuut malillugu sapinngisamik aatsitassat arsaarinnissutigineqartut nunap karsianut iluaqutaasussamik tuniniarneqassapput. Taamatut tuniniaaneq siunnersuutip siunertaa tunngavigalugit tamatumunngalu naapertuuttumik pissaaq, ilanngullugu aatsitassarsiorluni ingerlatassanit isertitat inuiaqatigiinnut tutsinneqassallutik.

Naalakkersuisut aatsitassat naleqarpiangitsut naliliisoqarpat, aatsitassat arsaarinnissutigineqartut tuniniarneranniit allaanerusumik iliorlutik igissinnaavaat.

§ 75-imut

Aalajangersagaq siunnersuutip piffissamut atuutilernissaanut tunngassuteqarpoq.

Siunnersuutigineqarpoq siunnersuut ulloq 1. juli 2024.

§ 76-imut

Imm. 1-imut

Pisoq inatsisini marluusuni pineqartunut ilaasimatillugu, siunnersuutip aamma aatsitassanut ikummatissanullu inatsisip maannakkut atuuttup imminnut atassuteqarnerat aalajangersakkami aalajangersaavigineqarpoq. Aalajangersagaq malillugu allamik erseqqissumik aalajangiisoqarsimatinnagu, siunnersuut atorneqassaaq (tassa imaappoq: aatsitassanut ikummatissanullu inatsit atorneqassanani).

Imm. 2-mut

Pisoq inatsisini marluusuni pineqartunut ilaasimatillugu, siunnersuutip aamma aatsitassanut tunngasunik suliaqarneq pillugu Inatsisartut inatsisaata imminnut atassuteqarnerat aalajangersakkami aalajangersaavigineqarpoq. Aalajangersagaq malillugu allanik erseqqissumik aalajangiisoqarsimatinnagu, siunnersuut atorneqassanngilaq.

§ 77-imut

Imm. 1-imut

Aalajangersagaq malillugu aatsitassat pillugit ingerlatassat, ilanngullugit katersineq, piaaneq atuinerlu, siunnersuummi aammalu aatsitassanut ikummatissanullu maannakkut atuuttumi pineqartunut ilaasut, aammalu siunnersuutip atuutilernissaa sioqqullugu suliarineqarsimasut, siunnersuummi pineqartunut ilaatinneqarput.

Aalajangersagaq malillugu aammattaaq aatsitassarpianut, ingerlatassani matuma siuliani

taaneqartuni katersorneqartunut, piiarneqartunut imaluunniit atorneqartunut siunnersuut atuuppoq.

Imm. 2-mut

Kalaallit Nunaanni illuliassami imaluunniit attaveqaasersuutitut suliaassami illuliornermut atortussatut imaluunniit sanaartornermut atortussatut atugassanik ujaraqqanik, ujaqqanik assigisaannillu aatsitassanik katersinissamut piiaanissamullu akuersissuteqarnerit, siunnersuutip atuutilernerani akuerineqareersimasut, atuuttussaaginnarnissaat aalajangersakkami qulakkeerneqassaaq. Siunnersuut aamma Inatsisartut inatsisaata atuutilernerani atortussanut akuersissuteqarnernut taamaattunut, akuersissuteqarnerit taamaattut malillugu pisinnaatitaasunut aamma ingerlatassanut akuersissuteqarnerit taamaattut malillugit suliarineqartunut atuutissaaq.

Imm. 3-mut

Aammattaaq aalajangersakkami aalajangersarneqarpoq, siunnersuut ingerlatassat pissutsillu aatsitassanut tunngasut, aatsitassanut ikummatissanullu inatsimmi pineqartunut ilaasut, pillugit aalajangiinernut, aammalu siunnersuutip atuutilernissaa sioqqullugu aalajangiiffiqarsimasunut, atuuttoq.

Imm. 4-mut

Aalajangersakkami aalajangersarneqarpoq, aatsitassanut Inatsisartut inatsisaata atuutilinnginnerani arsaarinnissutigineqartunut, Inatsisartut inatsisaat atuuttoq.

Imm. 5-imut

Aalajangersakkami aalajangersarneqarpoq, Inatsisartut inatsisaanni kapitali 2 sumiiffinni aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi, ulloq 1. oktober 2024 tikitsinnagu tunniunneqarsimasumi, pineqartunut ilaasuni atuutissanngitsoq. Sumiiffiit taakku sulia aatsitassanut ikummatissanullu inatsimmi pineqartunut ilaassapput.

Aalajangersakkamut siunertaavoq, sumiiffinnut allanik tunngaveqartumik akuersissummik tunniussivigineqarsimasunut tunngatillugu Inatsisartut inatsisaata kingumoortumik atuutilersumik atuutilersinneqannginnissaa.

Taamaattoq sumiiffinni aatsitassarsiorluni misissuinissamut pineqartunut ilaasuni najukkameersut katersisarnert pillugu aatsitassanut ikummatissanullu inatsimmi aalajangersakkat annikinnerusumik allanngortinneqarput. Inatsisartut inatsisaanni "aalajangersimasumik najugaqartumut" nassuiaassut aatsitassanut ikummatissanullu inatsimmut nuutinneqarpoq, aammalu akuersissummik peqarani katersisarnernut 100.000 koruuninik killiliineq peerneqarpoq. Tamanna allaffissornermik pissuteqartumik pivoq aammalu sumiiffiit pineqartut iluanni ingerlatassat annertussusaannut sunniuteqassasoq naatsorsuutigineqarani. Taamatullu akuersissutit pineqartut kisermaassisussaatitaalluni

akuersissutitut inissisimanerannut tamanna sunniuteqassanngilaq.

Aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissut, ulloq 1. oktober 2024 tikitsinnagu tunniunneqarsimasoq, malillugu pisinnaatitsissummik pigisaqartup sumiiffik akuersissummik pigisaminiittoq, akuersissummut atugassarititaasut allanngortinnerisigut aatsitassanut ikummatissanullu inatsimmut taarsiullugu Inatsisartut inatsisaanni aalajangersakkani pineqartunut ilaatilissallugu toqqarsinnaavaa.

Imm. 6-imut

Aalajangersakkami allassimavoq, aatsitassat pillugit aalajangersakkat, akuersissutinut akuersissuteqarnernullu atugassarititaasut nalinginnaasut aamma atugassarititaasut, siunnersuutip atuutilererata nalaani atuuttut, aalajangersakkat ilaalu ilanngullugit atorunnaarsinneqarnissaasa imaluunniit aalajangersakkanik nutaanik siunnersuut malillugu aalajangersarneqartunik taarserneqarnissaasa tungaanut, atuutiinnassasut.

Tusarniaanermut allakkiaq

Oqartussanut kattuffinnullu tusarniaaneq

Inatsisissatut siunnersuummut missingiut piffissami 2023-mi ulloq 12. oktobari aallartittumik ullup 17. novembarip tungaanut Naalackersuisut tusarniaanermut nittartagaanni www.naalackersuisut.gl-imi tamanut saqqumitinneqarpoq.

Siunnersuut piffissami tassani oqartussani, kattuffinni ilaalu ilanngullugit, makkunani tusarniaassutigineqarpoq:

Asiaq, Avannaata Kommunia, DCE, GEUS, Nunatta Eqqartuussivia, Sulisitsisut, Pinngortitaleriffik, Kalaallit Nunaanni Politiit, ICC, Kommune Kujalleq, Kommune Qeqertalik, Kommuneqarfik Sermersooq, Nunatta Nakorsaaneqarfia, Nunatta Katersugaasivia Allagaateqarfialu, Nuna Advokaatit, Nunagreen, NUSUKA, Qeqqata Kommunia, SIK, Tusass, Ilanngaaserisoqarfik, Transparency International Greenland, WWF, Urani naamik, Mingutsitsinngitsumut Allanngoriartortitsinermut Siunnersuisooqatigiit, Ataavartumik Nukissiorneq, Nuup Kangerluata Ikinngutai, Visit Greenland, pisinnaatitsissummik pigisaqartut aatsitassat ikummatissallu pillugit Inatsisartut inatsisaat malillugu piiasaanissamut akuersissummik peqartut tamarmik aamma annikitsumik aatsitassarsiorinissamut akuersissut malillugu pisinnaatitsissummik pigisaqartut tamarmik.

Makkua tusarniaanermut akissuteqaammik nassiussipput:

Amaroq Minerals Ltd, Anglo American, BDO, Bluejay Mining Plc, Bo Eder-Jensen, Energy Transition Minerals Limited, Greenfields Exploration Limited, Greg Barnes, Sulisitsisut, Grønlandsbanken, Hudson Resources Inc., Kaali Fencker, Kommune Kujalleq, Kommuneqarfik Sermersooq, Lumina Sustainable Materials A/S, Aqqartartut suliffeqarfiat MASIK, Nalik Ventures, Nuna Advokaatit, Palle Møller, Qeqqata Kommunia, Resource 500 aamma Resource 500 Fevti, SIK, Transparency International Greenland. Naalackersuisut tamatumani saniatigut kinaassutsiminik isertuussisunit tusarniaanermut akissuteqaatit pingasut tiguaat.

Oqaaseqaatit tiguneqartut matuma kinguliani naalisarlugit nalinginnaasumik allannilerlugit issuarneqarput, Naalackersuisut oqaaseqaatai uingasumik allassimallutik.

Makku oqaaseqaatissaqarsimangillat: Qeqqata Kommunia.

Amaroq Minerals Ltd

Amaroq Minerals Ltd-ip najukkameersut aatsitassanik piiasaanissaannik oqilisaassinisaaq pillugu siunnersuutip siunertaa tapersorsorpaa, aammalu aatsitassarsiorfiutileqatigiiffiit

aamma najukkaneersut assigiinngitsunik aatsitassanik siunnerfeqartut, ataatsimoorlutik piusinnaasariaqaraluartut kissaatigineqarnera paasisinnaallugu.

Amaroq Minerals Ltd-ip aatsitassarsiorluni misissuinissamut akuersissutip pigisamik kisermaassisussaataitaalluni pisinnaatitaaffittut inissisimanera isumanerluutigaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataitaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik, aatsitassarsiorluni misissuinissamut akuersissummi pineqartunut ilaasunik, saniatigut tunisassiassatut taamaallaat piiaaqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataitaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorineqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Amaroq Minerals Ltd-ip aammattaaq allat ingerlataannik, aningaasaliisartunit taarsigassarsititsisartuniillu piumasagaatigineqartunut naapertuutinningsunik, nalunaarusiornissamik pinngitsaalineqarsinnaaneq isumanerluutigalugu oqaatigaa.

Piumasagaatinut aningaasaliisartunit taarsigassarsititsisartuniillu piumasagaatigineqartartunut Naalakkersuisut sunniisinnaanngillat. Aningaasaliisartut taarsigassarsititsisartullu sumiiffinni allap ingerlatai pillugit nalunaarusianik piumasagaassappata, ingerlatat siunnersuut malillugu suliarineqartut pillugit nalunaarusiat, ingerlatat allat sumiiffimmi suliarineqartut, assersuutigalugu assaalluni suliaqarneq annertunerusumik ingerlanneqarluni, pillugit nalunaarusianit, annertunerusumik allaanerunaviannngillat, ilanngullugit inuussutissarsiorluni ingerlatat.

Amaroq Minerals Ltd-ip aamma sumiiffimmi akuersissuteqarfimminni najukkaneersut

ingerlataqarnerannut atatillugu ajutoortoqarluni pisoqassappat, tusaamasaanermik ajoquserneqarsinnaanera aarleqqutigalugu aamma oqaatigaa.

Ajutoorneq sumiiffimmi akuersissuteqarfiusumi aatsitassarsiorluni ingerlatassanik suliaqarnerup nalaani pisoq, ajutoornerup allanik ingerlatassanik suliaqarnerup nalaani pisimaneraniit, pisinnaatitsissummik pigisaqartup tusaamaneqarneranik ajoqusiinerusinnaammat, Naalackersuisut paasilluarsinnaavaat. Taamaattoq ajoqusiineq pisimasoq pisinnaatitsissummik pigisaqartup ingerlatassanik suliaqarneranut atassuteqarani pisimappat, ajutoorneq annertuumik pakkersimaarniarneqarsinnaassaaq. Pisinnaatitsissummik pigisaqartup uppersarsarneqarsinnaasunik annaasaqarsinnaanerata pingaaruteqanngitsumik aarlerinaateqarnera, najukkameersut sumiiffimmi ingerlatassanik suliaqarnissaannik akuersiumannginnermut tunngavilersuutigineqarsinnaanngilaq.

Kiisalu Amaroq Minerals Ltd-ip sumiiffimmi akuersissuteqarfiusumi najukkameersut ingerlataqarnerisa, peqarfimmik paasinarsisinneqartumik tusaamanerlutsitsilersinnaanera aarleqqutigaa.

Najukkameersut akuersissummik peqaratik ingerlataqarnerisa annertussusissaat isumanerluutigalugu tusarniaanermut akissuteqaatini arlalinni oqaatigineqarmat, ingerlatassanut taakkununga killiliineq ilanngunneqarpoq, taamaalillutik najukkameersut akuersissummik peqaratik ingerlatassanik suliaqartut sullup isaariaanik itersalianillu nunamut sanilliullugu uuttorlugu 1 meterimit itinerusunik pilersitseqqusaanatik, takuuk siunnersuummi § 7, imm. 2. Najukkameersut akuersissummik peqaratik ingerlataat taamaalillutik taamaallaat peqarfinnik nunap qaavata ateralaannguaniittunik annertuumik annertussusilimmik sunniisinnaassapput.

Anglo American

Anglo Americanip najukkameersut aatsitassanik piaanissamut periarfissarissaarnerulernerisa tungaanut ineriartortitsineq taperserpaa, kisianni taamaattoq oqaatigalugu, inatsit siunnersuutigineqartoq nunani tamalaani suleriaatsinut pitsaanerpaanut naapertuunnersoq, misilittakkatik misissueqqissaarnerillu tunngavigalugit, aarleqqutigalugu. Anglo American pingaartumik isumaqarpoq, najukkameersut akuersissummik peqaratik ingerlassaat erseqqinnerusumik maleruagassiivigineqannginnerisa isumanerluutigineqarsinnaanut tamanna pissutissaqalersitsisoq, ilanngullugu akisussaaffimmik inissiinissaq ajornakusoorsinnaasoq, tassami nalunaarsuisoqartussaangimmat.

Naalackersuisut tassunga atatillugu oqaatigissavaat, ammanerulersitsinissaq aammalu sumiiffimmi maleruagassiinnginnerunissaq, siunnersuummi siunertaasut pingaarnerit ilagigaat. Najukkameersut akuersissummik peqaratik ingerlatassanik suliaqartut inatsisit nalinginnaasut malittussaagaat, takuuk § 7, imm. 1 "inatsisit allat ataqqillugit".

Peqqinnissamut isumannaallisaaanermullu piumasaaqateqannginneq pissutigalugu

najukkaneersut suliaqartuusut peqqissusaat isumannaassusaallu isumanerluutigalugu Anglo Americanip oqaatigaa.

Najukkaneersut siunnersuut malillugu akuersissummik peqaratik ingerlatassanik suliaqartut, isumannaallisaanermut peqqinnissamullu piumasaqaatit, allanut tamaginnut assingusunik ingerlatassanik suliaqartunut piumasaqaatigineqartartut, assingi malittussaavaat. Assersuutigalugu sakkunik tigummiannartakkanik atuinermi, allanut atasumik sakkumik atuisussanngoraanni isumannaallisaanermut atortoq immikkuullarissoq pisariaqarpat, siunnersuut malillugu ingerlatassanut sakkumik atuigaanni, isumannaallisaanermut atortoq taanna aamma pisariaqartussaavoq.

Anglo Americanip saliinissamut piumasaqaateqannginneq alapernaarsuisussaannnginnerlu pissutigalugit, avatangiisini naasqartunilu ajoqusiinissaq isumanerluutigalugu oqaatigaa.

Tusarniaaffigineqartut arlallit avatangiisinut pinngortitamullu ajoqusiinissat isumanerluutigalugit oqaatigaa, taamaattumik avatangiisinik innarlitsaaliuinissamut maleruagassat nalinginnaasut malinneqarnissaat pillugu piumasaqaat erseqqissarneqarpoq, takuuk siunnersuummi § 6, imm. 1.

Anglo Americanip aammattaaq kuuitt allallu sumiiffiit imeqartut, nunami suliaqarnerup malitsigisaanik neriorneqalernissaat ajoquserneqarnissaallu isumanerluutigalugu oqaatigaa.

Akuersissummik peqarani ingerlatassat tassani pineqarmata, suliaqartussaqaq taamaalluni sumiiffinnut ingerlatassat suliarineqarfissaannut pisinnaatitaaffeqarani, naatsorsuutigineqarpoq ingerlatassat annertussusaat killeqartumik annertussuseqartussaasut. Najukkameersoq ingerlatassanik annertunerusunik suliaqarnissamik kissaateqarpat, aningaasaliinissaq pisariaqarluni, pineqartup najukkani aatsitassanut tunngasunik suliaqarnissamut kisermaassisussaatitaalluni akuersissummik qinnuteqarluni sumiiffimmut pisinnaatitaaffimminik qulakkeerinninnissaa ilimagineqarpoq, taanna malillugu ingerlatassat ataasiakkaat Naalackersuisunit akuersissuteqarfigineqarnissaat piumasaqaataassalluni aammalu atugassarititaasut attuumassuteqartut malinneqartussaassallutik.

Sulisussanik atuisinnaaneq, inooqatigiinnerup ingerlasarnerini allanngoriartornerit, sumiiffiit akornanni pisoqarneri aammalu avataaneersut sunniinissaat, tamatuma saniatigut Anglo Americanip eqqaavai.

Taamatut isumanerluuteqarneq Kalaallit Nunaannit isigalugu attuumassuteqartoq takuneqarsinnaanngilaq.

Anglo Americanip aammattaaq najukkaneersut akornanni peqarfiit nalitunerusunut akerleriissutigineqalersinnaanerat mianersoqqussutigaa.

Siunnersuut akerleriissuteqalernissamut pissutissaqalersitsissasoq naatsorsuutigineqanngilaq. Ajornartorsiut siunnersuummi imaluunniit inatsisini atuuttuni sammineqanngilaq, taamaalillunilu akerleriittoqalersinnaanera allannguuteqanngilaq. Aamma ajornartorsiutip maleruagassiiviginissaa tunngavissaqarsorineqanngilaq, tassami maannamut taaneqartutut ittunik akerleriittoqarnerinik nalunaarsuisoqarsimangimmat.

Kiisalu nalunaarsuisannginneq pissutigalugu najukkaneersut akisussaassusilimmik piianaanerat tapersorsorniapiloornarsinnaasoq, aammalu najukkaneersut akuersissummik peqaratik akileraaruserniapiloornarsinnaasut, Anglo Americanip tikkuarpaa.

Ammanerulersitsinermi maleruagassiinnginnerulernermilu siunnersuutigineqartutut ittuni, innuttaasut ingerlatassanik pineqartunik suliaqartut inatsisit malillugit akisussaassusilimmillu iliuuseqartut oqartussat tatigisariaqarpaat, ilanngullugu akileraartarnermut oqartussat maleruagassat atuuttut malillugit isertitassai taamaatinneqartut.

BDO

Najukkani aatsitassanut tunngasunik suliaqarnerup sapinngisamik orniginartunngortinnissaa naleqquttoq, BDO-p pingaarnertigut isumaqatigaa.

Taamaattoq najukkaneersut sumiiffinni aatsitassarsiorluni misissuinissamut akuersissutini pineqartunut ilaasuni ingerlatassanik suliaqarnissamut annertusisamik periarfissaqalerneranni, aatsitassarsiorfissat aningaasalersornissaat ajornakusuulersinnaasoq, BDO-p isumanerluutigaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit

ikummatissiassallu (uulia gassilu) ilaanatik. Siunissami Naalackersuisut suleriaaseq allannortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinnqornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Bluejay Mining Plc

Bluejay Mining Plc-ip ilimagaa aatsitassanut ikummatissanullu inatsit malillugu aatsitassarsiorluni misissuineri ingerlatat Kalaallit Nunaanni naammattumik aningaasarsiorlunissat Naalackersuisut isumaqqannginnerat, Naalackersuisut aatsitassanut suliaaqqarfimmi inatsisinik iluarsaassinerannut tunngavilersuutigineqartoq.

Taamaattoqanngilaq.

Bluejay Mining Plc aammattaaq isumaqqarpoq, inatsisiliornerup ingerlanerani naammattumik akuutinneqarsimanatik, taamaattumillu Bluejay Mining Plc-imut naleqqunnerusumik aaqqiissutissarsisinaanissamut, siunnersuut tunuartinneqartariaqaraluartoq.

Siunnersuut inatsisit malittarisassallu, Inatsisartut inatsisaannut siunnersuutini suliaqarnermut saqqummiussinermullu atuuttut, malillugit suliarineqarpoq. Naalackersuisut akuttunngitsumik suliffissuit oqaloqatigisarpaat, aammalu piffissap tusarniaaffiusup ingerlanerani ilaatigut Bluejay Mining Plc-ip peqataaffigisaanik ataatsimiititsisoqarpoq, aammalu tusarniaanermut akissuteqaammik, allakkiami matumani sammineqartussamik, aammalu siunnersuummi allannortitsinermik kinguneqarsinnaasumik, nassiussinissamut periarfissaqarluni. Siunnersuummut Bluejay Mining Plc-imut naleqqussagaasumut nutaamut tunngatillugu, Inatsisartut inatsisaat tamanut atuuttussaavoq aammalu inatsimmik sapinngisamik annertunerpaamik soqutigisaqartut tamaasa eqqarsaatigalugit suliaqarnissaq Naalackersuisut siunertaraat.

Bluejay Mining Plc-ip aatsitassarsiorluni misissuinissamut akuersissutip pigisami kismaassissusaatitaalluni pisinnaatitaaffittut inissisimanagera isumanerluutigalugu oqaatigaa, ilanngullugu tamatuma aningaasalersuinissaq ajornakusoortilersinnaagaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutit atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kismaassissusaatitaaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allannortinneqarpoq,

taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinnngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allannngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinnngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Bluejay Mining Plc isumaqarpoq, najukkanik aatsitassanut tunngasunik suliaqarnerup suuneranik Naalakkersuisut paasinninnerat eqqumiitsuusoq, tassami naak sulisut arlallit Kalaallit Nunaanni najugaqaraluartut, Bluejay Mining Plc-ip ingerlatai najukkameersutut isigineqanngimmata.

Taaguummi "najukkami aatsitassanut tunngasunik suliaqarneq", ingerlatassat pineqartut suliarinissaannut najukkamut atassuteqartuunissaq, imaluunniit aatsitassat piiarneqartussat najukkami atorneqartussaasut, innersuussutigineqarpoq. Aatsitassarsiorluni misissuinissamut akuersissutinut tunngatillugu assingusunik piumasaqaateqanngilaq.

Siunnersuut malillugu najukkaneersut aatsitassanik annissiniarneranni, avammut annissinissamut akuersissuteqartoqarnissaata piumasaqaatigineqannginnerata kingunerisaanik, inuiaqatigiit kalaallit akileraarutinit isertitassat annaasussaagaat, aammattaaq isumanerluutigalugu Bluejay Mining Plc-ip oqaatigaa.

Najukkaneersut inuussutissarsiutigalugu aatsitassanik annissisussat, inuussutissarsiortutut allatuulli akileraarutitigut nakkutigineqartussaapput. Inuussutissarsiummut tassungarpiaq immikkut nakkutiginninnermi iliuusissanik atuutsitsinissaq tunngavissaqartoq takuneqarsinnaanngilaq.

aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissutinik tunniussinermi taamatut piumasaqaateqartoqarmat, akuersissutip tunniunneqannginnerani najukkani aatsitassanut tunngasunik suliaqarnissamut kisermaassisussaataalluni akuersissutinik qinnuteqaatit tamanut ammasumik tusarniaassutigineqartussaannginnerat, Bluejay Mining Plc-ip eqqumiigaa. Bluejay Mining Plc isumaqarpoq, najukkami aatsitassanut tunngasunik suliaqarnissamut kisermaassisussaataalluni akuersissut malillugu ingerlatassat,

aatsitassarsiorluni misissuinissamut akuersissut malillugu ingerlatassaniit, annertunerusumik avatangiisinut aarlerinartorsiortitsisussaasut.

Aatsitassanut tunngasunik suliaqarnissamut kisermaassisussaataalluni akuersissutit sumiiffimmut 1 kvadratkilometerimut tunniunneqartarput, tassalu sumiiffimmut annikitsuaqqamut. Akuersissut malillugu ingerlatassat tamarmik Naalakkersuisunit akuersissuteqarfigineqartussaapput, aammalu ingerlatassat avatangiisinut annertuumik sunnuteqarsinnaasut suliarineqarnissaat kissaatigineqarpat, avatangiisinik nalilersuisoqarnissaa piunasaqaatigineqarsinnaavoq. Aatsitassarsiorluni misissuinissamut akuersissutinik tunniussinissamut tamanut ammasumik tusarniaanissap piunasaqaatigineqarneranut tunngavilersuutaasunut tunngatillugu takukkit aatsitassanut tunngasunik suliaqarneq pillugu Inatsisartut inatsisaannut nassuiaatit.

Bluejay Mining Plc aamma isumaqarpoq, siunnersuut isumannaallisaanermut avatangiisillu illersorneqarnissaannut malitassanik appasinnerusunik kinguneqarsinnaasoq, aammalu assersuutigalugu kina akuutissanik uumaatsunik kuutsitsisoornermut akisussaasuunersoq paasiniapiloornarsinnaasoq.

Tusarniaanermut akissuteqaatip tassunga tunngasortaa paatsoornermik tunngaveqarpassippoq, tassami siunnersuummi najukkameersut akuersissummik peqanngitsut, akuutissanik uumaatsunik atuinnissamut pisinnaatitaaffilerneqanngillat. Isumannaallisaanermut avatangiisinullu tunngatillugu, najukkameersut akuersissummik peqanngitsut allat tamaasa assigalugit malitassat assigiit isiginiartussaavaat. Avatangiisinut tunngasunut tunngatillugu tamanna erseqqissarniarlugu siunnersuummi aalajangersagaq, tamatuminnnga erseqqissaasoq, ilanngunneqarpoq, takuuk siunnersuummi § 6, imm. 1.

Kiisalu Bluejay Mining Plc-ip tikkuarpaa, najukkameersut aamma aatsitassarsiorluni misissuinerlut ingerlatseqatigiiffiit akornanni suleqatigiinnissamik tunngavissiisunik siunnersuummi kajumissaaruteqanngitsoqat, aammalu aqqissuussineq siunnersuutigalugu, taanna malillugu suleqatigiinnissamut isumaqatigiissuteqarnissaq siunertaralugu najukkameersut pisinnaatitsissummik pigisaqartunut saaffiginnissinnaallutik.

Kalaallit Nunaanni isumaqatigiissuteqarnissamut kiffaannqissuseqarneq atuuppoq, aammalu najukkameersut pisinnaatitsissummillu pigisaqartut akornanni isumaqatigiissuteqarsinnaanerup akuliuffiginissaa Naalakkersuisut suliasarinngilaat. Najukkameersut suleqatigiinnissamut isumaqatigiissuteqarnissaq siunertaralugu aatsitassarsiorluni misissuinerlut ingerlatseqatigiiffinnut saaffiginninnissamut periarfissaqareerput.

Bo Eder-Jensen

Bo Eder-Jensenip siunnersuutip tamanut ammasumik tusarniaassutigalugu

nassiunneqarsimasup allannguuteqartinninnissaa taperserpaa, tassami tamanna tamaginnut suliassamik oqilisaasussaammat.

Energy Transition Minerals Limited

Energy Transition Minerals Limitedip tamakkiisunut Sulisitsisunit tusarniaanermut akissuteqaat taperserpaa, takukkit matuma kingulianiittut.

Energy Transition Minerals Limitedip nunani tamalaani misilittakkat aallaavigalugit inassutigaa, najukkaneersut akuersissummik peqaratik aatsitassanut tunngasunik ingerlatassanik suliaqarnissamut annertusisamik pisinnaatitaaffeqalersinneqassanngitsut. Ilaatigut aaqqissuussaasumik pinerluttuliortarneq nakuusernertalimmillu isumaqatigiinngittarnerit eqqaaneqarput.

Taamatut isumanerluuteqarneq Kalaallit Nunaannit isigalugu attuumassuteqartoq takuneqarsinnaanngilaq.

Energy Transition Minerals Limitedip aatsitassarsiorluni misissuinissamut akuersissutip pigisami kisermaassisussaataalluni pisinnaatitaaffittut inissisimanagera isumanerluutigalugu oqaatigaa, isumaqarlunilu akuersissutinut atuutereersunut tunngatillugu taarsiissutitalimmik piginnikkunnaarsitsinermut akuliuttoqartoq tassani pineqarsinnaasoq.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinnqornernik ulorianartunik akullit ikummatissiassallu (uulia gassilu) ilaanatik. Siunissami Naalackersuisut suleriaaseq allanngortinniarpaa, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorineqartartut ilaatinneqartallissallutik, tassa imaappoq aatsitassat tamarmik, ilaatinneqaratik aatsitassat qinnqornernik ulorianartunik akullit, ikummatissiassat, ujaqqat pinneraasiassat aammalu

aatsitassat katersugaatigineqartartut erseqqinnerusumik aalajangerneqartut ilai.

Greenfields Exploration Limited

Najukkaneersut sumiiffinni aatsitassarsiorluni misissuinissamut akuersissutini pineqartunut ilaasuni siunnersuut malillugu ingerlatassaminnik suliaqarnissamik kissaateqartut, sumiiffimmut ingerlaalinnginnerminni aatsitassarsiorluni misissuinissamut akuersissut malillugu pisinnaatitsissummik pigisaqartoq ilisimatittassagaat, Greenfields Exploration Limitedip siunnersuutigaa.

Greenfields Exploration Limitedip siullermik pingaarnertullu taamatut siunnersuuteqarneq, isumannaallisaanermut tunngatillugu ajornartorsiulersinnaanermik, tunngavilersorpaa, tassami aatsitassarsiorluni misissuineri ingerlatassat najukkani suliaqartuusunut navianarsinnaammata.

Sumiiffimmi ingerlatanik sunik suliaqarneq apequtaatinnagu, sumiiffinni aatsitassarsiorluni misissuinissamut akuersissummi pineqartunut ilaasuni angalaarnissaq imaluunniit uningaarnissaq inertequtaanngilaq. Aatsitassarsiorluni misissuineq pillugu ingerlatassat kisimik pisinnaatitsissummik pigisaqartunut inniminnigaapput. Assersuutigalugu sumiiffimmi aatsitassarsiorluni misissuiffigineqartumi aatsitassanik maaniinnarmiittunik katersinissaq, inatsisini atuuttuni akuerisaavoq, taamatullu sumiiffimmi aatsitassarsiorluni misissuiffigineqartumi aallaaniarnissaq imaluunniit pisunnissaq akuerisaavoq. Aatsitassarsiorluni misissuinissamut akuersissummi pisinnaatitsissummik pigisaqartoq, sumiiffimmukarnissamut sumiiffimmilu ingerlataqarnissamut maleruagassiinissamut, immikkut piginnaatinneqanngilaq. Inuk siunnersuut malillugu ingerlatassanik suliaqartoq, inunnut allanut, sumiiffimmi angalaartunut sanilliullugu annertunerusumik navianartorsiortussaannngilaq.

Najukkaneersut aatsitassarsiorluni misissuinissamut akuersissut malillugu ingerlatassanut akornusersueqqusaanngitsut, najukkaneersut pisinnaatitsissummik pigisaqartup isumannaallisaanermut ilitsersuutai malittussaagaat aammalu pisinnaatitsissummik pigisaqartoq taarsiinissamik akisussaatinneqalersinnaanngitsaq, siunnersuummi maleruagassiivigineqarnersoq, Greenfields Exploration Limitedip apeqqutigaa.

Siunnersuummi § 10, imm. 3-mi aalajangersagaq, najukkaneersut sumiiffimmi aatsitassarsiorluni misissuinissamut akuersissummi pineqartunut ilaasumi akuersissummik peqaratik ingerlatassanik suliaqartut, pisinnaatitsissummik pigisaqartup ingerlatai ataqqissagaat, erseqqissaaviusoq, ilanngunneqarpoq.

Isumannaallisaanermi ilitsersuinerit malinneqarnissaat pillugu apeqqummut tunngatillugu, tamanna najukkaneersunut, siunnersuut malillugu ingerlatassanik suliaqartunut, allanut sumiiffimmi angalaartunut atuuttut assingi, atuuttussaapput.

Taarsiinissamut akisussaasuunermut tunngatillugu, tamanna taarsiinissamut akisussaasuuneq pillugu maleruagassat nalinginnaasut, aammalu maleruagassat aatsitassanut tunngasunik suliaqarneq pillugu Inatsisartut inatsisaat malillugu atuuttut, malillugit maleruagassiivigineqarpoq.

Greenfields Exploration Limitedip siunnersuutigaa, najukkaneersunut aatsitassanut tunngasunik suliaqarnermik ingerlatsisunut akuersissutit piumasarineqassasut aammalu nalunaarusiornissamut piumasaqaatinik aalajangersaasoqassasoq. Ilaatigut allassimavoq nalunaarusiornissaq piumasaqaatigineqanngippat, saliinissamut 250.000 koruunit killiliunneqartut nakkutigineqarsinnaanngitsut.

Najukkaneersut aatsitassanik piiaasinnaanerisa oqilisaavigineqarnissaa, siunnersuummi siunertaasut pingaarnerit ilagaat. Ingerlatassat siunnersuut malillugu akuersissummik peqarani suliarineqarsinnaasut annikitsuaraapput, akuersissutinik, akuersissuteqarnermik nalunaarusiortarnissamillu piumasaqaateqarnissaq naapertuutinningsumik nammagassiivallaartussaalluni.

Naalackersuisut 250.000 koruuninik killiliinerup malinneqarnerata nakkutigineqarnissanut periarfissaqarnerannut tunngatillugu, Greenfields Exploration Limitedip siunnersuutit imarisai paatsoorsimavai. 250.000 koruuninik killiliineq, najukkani aatsitassanut tunngasunik suliaqarnissamut kisermaassisussaataitaalluni akuersissutinut, ingerlatassanik akuersissuteqarnissaq pillugu piumasaqaatinik nalunaarusiornermullu piumasaqaatinik malinnittussaataitaasunut, atuuppoq.

Greenfields Exploration Limitedip siunnersuutigaa, najukkaneersut sumiiffimmi aatsitassarsiorluni misissuinissamut akuersissummi pineqartunut ilaasumi ingerlatassanik suliaqartut nipangiussisimasussaataitaaneq malittussaassagaat.

Najukkaneersut siunnersuut malillugu ingerlatassanik suliaqartut, pisinnaatitsissummik pigisaqartoq imaluunniit taassuma ingerlatai pillugit ilisimasaqalernissamut periarfissaqarnerat, allaniit sumiiffimmi angalaartuniit, pitsaanerunngilaq.

Greenfields Exploration Limitedip siunnersuutigaa, pisinnaatitsissummik pigisaqartoq najukkameersumut siunnersuut malillugu ingerlatassanik suliaqartumut ajornartoornermi ikiuuttoq, suliniuteqarnerminut taarsiivigineqartassasoq pillugu maleruagassanik aalajangersaasoqassasoq.

Pisinnaatitsissummik pigisaqartoq najukkameersumut siunnersuut malillugu ingerlatassanik suliaqartumut, taamatullu sumiiffimmi angalaartunut allanut, ikiuunnissamik assigiimmik pisussaaffeqarpoq.

Greenfields Exploration Limitedip siunnersuutigaa, najukkaneersut qassit, sumiiffimmi

aalajangersimasumi piffissap aalajangersimasup iluani, siunnersuut malillugu ingerlatassanik suliaqaqqusaanersut, killissanik aalajangersaasoqassasoq.

Taamatut naalackersuinermi nalunaarsuinissaq pisariaqartussaavoq, aammalu oqartussani inunnilu siunnersuut malillugu ingerlatassanik suliaqarusuttuni allaffissornikkut isumalluutininik annertuunik atuinissaq pisariaqartussaalluni. Siunnersuut malinneqanngilaq.

Greenfields Exploration Limitedip aatsitassarsiorluni misissuinissamut akuersissutit kisermaassisussaataitaalluni pisinnaatitaaffittut inissisimanerat isumanerluutigalugu oqaatigaa, ilanngullugu tamatuma aningaasalersuinissaq ajornakusoortilersinnaagaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqquusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataitaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalackersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Greenfields Exploration Limited allappoq, najukkaneersut sumiiffinni aatsitassarsiorluni misissuinissamut akuersissutini pineqartunut ilaasuni ingerlatassanik suliaqarnissamut periarfissaqarneranni, Kalaallit Nunaat nunatut aatsitassarsiorfissatut orniginannginnerulersinneqarsinnaasoq.

Naalackersuisut najukkaneersut sumiiffinni aatsitassarsiorluni misissuinissamut akuersissutini pineqartunut ilaasuni ingerlatassanik suliaqarnissamut periarfissinnissaat pillugu Naalackersuisut siunnersuutaat pingaartinneqarpoq, taanna malillugu

aatsitassarsiorfiutileqatigiiffiit aammalu najukkaneersut aatsitassanik piiaanissamik kissaateqartut, iluaquserniarneqartussaallutik.

Greg Barnes

Greg Barnes isumaqarpoq, aatsitassat qinngornernik ulorianartunik akullit pillugit inatsit innersuussutigalugu, maleruagassat assigiit najukkaneersunut aammalu suliffissuarnut atuuttariaqaraluartut.

Najukkaneersut aatsitassanik qinngornernik ulorianartunik akulinnik piiaaqqusaanngillat, takukkit siunnersuummi §§ 6, imm. 2 aamma 13, imm. 1.

Greg Barnes isumaqarpoq najukkaneersut, Naalackersuisunut aamma pisinnaatitsissummik pigisaqartunut aatsitassarsiorluni misissuinissamut akuersissutinik peqartunut, ingerlatatik pillugit nalunaarusiortussaasariaqaraluartut.

Taamatut naalackersuinermi nalunaarsuinissaq pisariaqartussaavoq, aammalu oqartussani inunnilu siunnersuut malillugu ingerlatassanik suliaqarusuttuni allaffissornikkut isumalluutinik annertuunik atuinissaq pisariaqartussaalluni.

Najukkaneersut aamma pisinnaatitsissummik pigisaqartut isumannaallisaaneq eqqarsaatigalugu, aappaata ingerlatassat qaqugu suliariniarnerai, ilisimasariaqaraluaat, Greg Barnesip tikkuarpaa, najukkaneersut qaartiterutissanik atuisarnerit assersuutitut taavaa.

Najukkaneersut akuersissummik peqaratik atortut tiggummaannartakkat kisiisa atoqqusaavaat, taamaalillutillu qaartitereqqusaanngillat. Najukkameersut siunnersuut malillugu ingerlatassanik suliaqartut, allanit sumiiffimmi angalaartunit, annertunerusumik aarlerinaateqartussaanngillat.

Greg Barnes-ip aatsitassarsiorluni misissuinissamut akuersissutit kisermaassisussaatitaalluni pisinnaatitaaffittut inissisimanerat isumanerluutigalugu oqaatigaa, ilanngullugu tamatuma aningaasalersuinissaq ajornakusoortilersinnaagaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummik pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaatitaaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummik pineqartunut ilaatinneqartunik taamaallaat saniatigut tunisassiassatut

piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Sulisitsisut

Sulisitsisut aatsitassarsiorluni misissuinissamut akuersissutit kisermaassisussaataalluni pisinnaatitaaffittut inissisimanerat isumanerluutigalugu oqaatigaat, ilanngullugu tamatuma aningaasalersuinissaaq ajornakusoortilersinnaagaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Sulisitsisut IFC-imi malitassat unioqqutinneqarnissaat aammalu ESG-imi malitassat appasinnerunissaat isumanerluutigalugit oqaatigaat, aammalu siunnersuutigalugu, ajornartorsiutit taakkua pakkersimaarniarlugit, sumiiffimmi piiaanermik suliassamut suliakkiussanut najoqqutassap tusarniaassutigalugu nassiunneqarneraniit ingerlatassanik suliaqartoqaqusaanngitsoq pillugu aalajangersakkamik ilanngussisoqassasoq.

Tusarniaanermut akissuteqaat siunnersuummi allanngortitsinermik kinguneqarpoq, aammalu siunnersuummi aalajangersimasumik najugaqartut akuersissummik peqaratik aammalu aalajangersimasumik najugaqartuunngitsut, sumiiffinni suliakkiissutinut najoqqutassap tamanut ammasumik tusarniaassutigalugu nassiunneqareernerani, aatsitassanut tunngasunik suliaqarneq pillugu Inatsisartut inatsisaanni § 44 malillugu suliakkiissutinut najoqqutassami pineqartunut ilaasuni ingerlatassanik suliaqaqusaanngitsut pillugu siunnersuummi §§ 10, imm. 1, nr. 3-mi aamma 11, imm. 2, nr. 3-mi aalajangersakkat ilanngunneqarlutik.

Sulisitsisut tikkuarpaat, ajutoornernut akisussaaffiup inissinneqarnissaa, siunnersuummi maleruagassiivigineqanngitsoq.

Taarsiinissamut akisussaaffik taarsiinissamut akisussaaffeqarneq pillugu maleruagassat nalinginnaasut, aammalu maleruagassat aatsitassanut tunngasunik suliaqarneq pillugu

Inatsisartut inatsisaat malillugu atuuttut, malillugit maleruagassiivigineqarpoq.

Sulisitsisut allapput, najukkani sulisussat sulilersinnissaat kajungernannginneruleriaannaasoq, tassami najukkani sulisut atorfinitsinneqarnertik unammillertussanik ingerlatassanik suliaqarnissamut atonerlussinnaammassuk.

Najukkaneersut aatsitassanik aatsitassarsiorluni misissuinissamut akuersissummi pineqartunut ilaasunik saniatigut tunisassiassatut taamaallaat piiaaqqusaasut, siunnersuummi § 10, imm. 2-mi aalajangersakkami ilanngunneqarpoq, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaatitaallutik pisinnaatitaaffeqarnerannik qulakkeerinnissaaq. Sulisut najukkaneersut taamaalillutik siunnersuut innersuussutigalugu ingerlatassanik unammillerfiusussanik suliaqarsinnaanngillat.

Sulisitsisut allapput, aatsitassarsiorfissanut aningaasaliinissaq siunnersuummi kajungernannginnerulersinneqartoq, taamaalillunilu piiaanissamut akuersissummik pissarsinissaq ajornakusoornerulersoq, kiisalu annikitsumik aatsitassarsiorluni ingerlatassat suliffeqarfittut annertunerusutut unammilleqatigiinnermullu tunngatillugu attuumassuteqartut ineriartortinneqannginnissaat, pingaaruteqarluinnartuusoq, tassami tamanni tunngaviatigut aatsitassarsiorluni misissuinissamut aamma piiaanissamut piumasaqaatinut unioqqutitsinerusussaammat.

Siunnersuummi sumiiffinni piiaanissamut akuersissummi pineqartunut ilaatinneqartuni ingerlatassanik suliaqarnissaq periarfissinneqanngilaq, taamaattumillu piiaanissamut suliassamut aningaasalersuinissamut periarfissat sunnersinnaasariaqarnagit.

Najukkaneersut pisinnaatitsissummik pigisaqartut suliassaminnik ineriartortitsinissaasa akornusernissaannit tunngavilersuutissaqartoq takuneqarsinnaanngilaq. Paarlattuanik siunnersuummi siunertaasut pingaarnerit ilagaat najukkaneersut pisinnaatitsissummik pigisaqartut aatsitassarsiorfissanik annertunerusunik ineriartortitsinissamut pitsaanerusunik periarfissaqalersinnissaat. Najukkaneersut ineriartornerat aatsitassarsiorfissaallu tunngaviatigut aatsitassarsiorluni misissuinissamut aamma piiaanissamut piumasaqaatinut unioqqutitsinerusussaasut, paatsoornermik tunngaveqarsimassaaq.

Sulisitsisut isumaqanngillat najukkaneersut aamma pisinnaatitsissummik pigisaqartut akornanni oqaloqatigiinnissaq siunnersuummi siuarsarneqartoq aammalu arlalinnik siunnersuuteqarluni.

Sulisitsisut taamaalillutik siunnersuutigaat, annikitsumik aatsitassarsiornissamut pisinnaatitsissummik pigisaqartut akuersissutip tusarniaassutigineqarluni takkunnerani, sumiiffimmuut soqutiginninnertik oqaatigisinnaagaat.

Siunnersuut malillugu pisinnaatitsissummik pigisaqartut, allatuulli, aatsitassanut tunngasunik suliaqarneq pillugu Inatsisartut inatsisaat malillugu akuersissutinik tunniussinermut atatillugu tamanut ammasumik tusarniaanermut nalaani, tusarniaanermut akissuteqaammik nassiussisinnaapput.

Sulisitsisut aammattaaq aaqqiissutissamik siunnersuuteqarput, tassani illuatungeriit akornanni isumaqatigiissuteqartoqarsinnaanani pisoqartillugu, najukkaneersut pisinnaatitsissummik pigisaqartut sumiiffinnut aatsitassarsiorluni misissuinissamut akuersissummi pineqartunut ilaasunut periarfissinneqarnissaat pillugu Naalakkersuisut aalajangiisinnaassallutik.

Naalakkersuisut pisinnaatitsissummik pigisaqartut allat sumiiffimmi kisermaassisussaataitaalluni akuersissummi pineqartunut ilaasumi ingerlatassanik suliaqarnissamut akuersissummik tunineqarnissaat pillugu aalajangiisinnaassappata, tamanna ajoquseerujussuartaavaoq. Siunnersuut malinneqanngilaq.

Sulisitsisut siunnersuutigaat, sumiiffinni misissueqqaarnissamut akuersissutini pineqartunut ilaasuni annikitsumik aatsitassarsiorluni ingerlatassanut periarfissiisoqartassasoq.

Misissueqqaarnissamut akuersissutit kisermaassisussaataitaaffeqanngitsumik tunniunneqartarput, aammalu aalajangersimasumik najugaqartut aamma aalajangersimasumik najugaqartuunngitsut, qaammatini siuliini pingasuni nunatsinniissimasut, siunnersuut malillugu sumiiffinni taakkunani ingerlatassanik suliaqarsinnaapput. Aammattaaq aalajangersimasumik najugaqartut siunnersuummi § 14-imi piumasaqaatinik naammassinnittut, najukkami aatsitassanut tunngasunik suliaqarnissamut kisermaassisussaataitaalluni akuersissummik qinnuteqarsinnaapput.

Sulisitsisut allapput, "social contract"-imik isumaqatigiissuteqarnikkut, ingerlatseqatigiiffik sumiiffimmi akuersissummik peqartoq suleqatigalugu, najukkani sumiiffimmu iluaqutaasumik aatsitassarsiorluni ingerlatassat ineriartortinneqarsinnaasut.

"Social contract" qanoq isumaqartinneqarneris paasinanngilaq, kisianni isumaqatigiissut qanoq taagorneqarneris apeqqutaatinagu pisinnaatitsissummik pigisaqartoq inatsimmik unioqutitsinngitsumik isumaqatigiissuteqarnissamik killilersugaanngilaq.

Sulisitsisut isumaqarput, siunnersuummi Kalaallit Nunaanni suliffeqarfiit nalunaarsorneqartarnerat pillugu § 31-mi aalajangersagaq sukannernerulersinneqartariaqaraluartoq, taamaalilluni aamma najukkani/nunap immikkoortuani sulisussanik sulisoqarnissaq piumasaqaatigineqartassalluni.

§ 30 malillugu akuersissuteqarnermut atugassarititaasunik aalajangersaanissamut, ilanngullugu najukkameersunik/nunap immikkoortuaneersunik sulisoqarnissaq pillugu, Naalakkersuisut siunnersuummi § 32, imm. 2 malillugu periarfissaqarput.

Sulisitsisut siunnersuutigaat matusinissamut aningaasartuutissanut, najukkani aatsitassanut tunngasunik suliaqarnissamut kisermaassisussaataitaalluni akuersissutinut 250.000 koruuninik aningaasartalerlugu killiliusaaq, qaffanneqartariaqaraluartoq imaluunniit allanngorarsinnaalersinneqartariaqaraluartoq, tassami sumiiffiit ilaanni ingerlatassat annikikkaluartut saliiinermut atatillugu assartuussinermut aningaasartuutit annertoorujussuusinnaammata.

Aatsitassanut tunngasunik suliaqarneq pillugu Inatsisartut inatsisaat malillugu akuersissummik piumasaqaateqalinnginnermi, najukkani aatsitassanut tunngasunik suliaqarnissamut kisermaassisussaataitaalluni akuersissutip ataani ingerlatassat qanoq annertutigisinnaanersut, kinaassusersiunngitsumik tunngavissarititaasumik atuutsitsinissamut, aningaasanut killiliusaaq aalajangersarneqarpoq. Sumiiffiup tikikkuminaannerunerani, assartuussinermut aningaasartuutit saliiinermut aningaasartuutini sanilliussilluni annertunerpaasussaapput. Tunngavissarititaasup taassuma toqqarneqarneranut pissutaasut ilagaat, saliiisoqarani pisoqartillugu nunap karsiata aningaasartuutininik matussusiisussanngortarnera. Assartuussinermut aningaasartuutit qanoq annertutiginerat apeqqutaanani, Nunap karsiata aningaasartuutai taamaaginnartussaapput.

Oqaatigineqassaaq, najukkani aatsitassanut tunngasunik suliaqarnissamut kisermaassisussaataitaalluni akuersissummiit piiaanissamut akuersissummumt ikaarsaarnissaq, aatsitassanut tunngasunik suliaqarneq pillugu Inatsisartut inatsisaata akuerineqarnerani oqinnerujussuannngortussaasoq.

Sulisitsisut allapput, sanaartugassanut akigititassanut isumaqatigiissutissat, Inatsisartut inatsisaanni pineqartunut ilaalertussatut naatsorsuutigineqartut, annertussusissat eqqarsaatigalugit, §§ 23-mi aamma 24-mi uppernarsaanissamut piumasaqaatit annertoorujussoorpasittut.

Pilersaarutit §§ 23 aamma 24 malillugit suliarineqartussat, suliassap annertussusaanut annertoqatigiissinneqartussaapput. pilersaarutinut piumasaqaatit suliassani annikinnerusuni killeqartussaapput.

Siunnersuummi §§ 36 ff-imi avatangiisinut piumasaqaatit annertoorujussoorpasittut, tamatumunngalu aningaasartuutissat suliassani Inatsisartut inatsisaanni pineqartunut ilaasuni akimmisaartitsisutut malunnarsinnaasut, Sulisitsisut tikkuarpaa.

Ingerlatassanut allanut sanilliullugu ingerlatassanut siunnersuummi pineqartunut ilaasunut avatangiisinut piumasaqaatit qasukkartinnissaat Naalakkersuisut tungaanniit kissaatigineqarsimannngilaq.

Sulisitsisut oqaatigaat inuinnaat sumiiffinni akuersissuteqarfiusumi angalaarnissaat

navianaateqanngitsoq.

Sumiiffimmi ingerlatanik sunik suliaqarneq apeqqutaatinnagu, sumiiffinni aatsitassarsiorluni misissuinissamut akuersissummi pineqartunut ilaasuni angalaarnissaq imaluunniit uningaarnissaq inerteqqutaanngilaq. Aatsitassarsiorluni misissuineq pillugu ingerlatassat kisimik pisinnaatitsissummik pigisaqartunut inniminnigaapput. Assersuutigalugu sumiiffimmi aatsitassarsiorluni misissuiffigineqartumi aatsitassanik maaniinnarmiittunik katersinissaq, inatsisini atuuttuni akuerisaavoq, taamatullu sumiiffimmi aatsitassarsiorluni misissuiffigineqartumi aallaaniarnissaq imaluunniit pisunnissaq akuerisaavoq. Aatsitassarsiorluni misissuinissamut akuersissummi pisinnaatitsissummik pigisaqartoq, sumiiffimmukarnissamut sumiiffimmilu ingerlataqarnissamut maleruagassiinissamut, immikkut piginnaatinneqanngilaq. Inuk siunnersuut malillugu ingerlatassanik suliaqartoq, inunnut allanut, sumiiffimmi angalaartunut sanilliullugu annertunerusumik navianartorsiortussaannngilaq.

Siunnersuut aningaasanik pinerlunnikkut pissarsiarineqartunik malunnaarsarinissamut atorneqarsinnaanerit aarlerinaateqarnersoq, Naalakkersuisoqarfiup isumaliutersuutigisimaneraa, aammalu aarlerinaataasut taamaattut qanoq sillimaffigineqarnissaat eqqarsaatigineqarsimanersoq, Sulisitsisut apeqqutigaat.

Inuussutissarsiutini allani pisartunit aningaasanik pinerlunnikkut pissarsiarineqartunik malunnaarsarinissamut periarfissaqarnerunera takuneqarsinnaanngilaq.

Sulisitsisut isumaqarput, allannguutit akuersissutitut atuutereersunut sunniisussaannngitsut aammalu kingumoortumik atuutilertussatut atuutsinneqalertussaannngitsut, siunnersuummi ersarissumik allassimasariaqaraluartoq.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataaallutik pisinnaatitaaffeqarnerinik qulakkeerinnissaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi

aatsitassat tamarmik ilaatinneqarput, aatsitassat qinnqornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalluni aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinnqornernik ulorianartunik akullit, ikummatissiassat, ujaqqat pinnerasaasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Sulisitsisut isumaqarput, annikitsumik aatsitassarsiornermut suliffeqarfiit pisinnaatitsissummik pigisaqartup sumiiffianut annerunerusumut atasumik inissinneqarnissaannik kissaatigineqartut, pisinnaatitsissummik pigisaqartup aamma annikitsumik aatsitassarsiornermik suliaqartup akornanni isumaqatigiissuteqarneq aallaavigalugu taamaallaat pisariaqaraluartoq, siunnersuummi ersarissumik allassimasariaqaraluartoq.

Pisinnaatitsissummik pigisaqartooq, taassuma angissusaa apeqqutaatinnagu, taamaallaat sumiiffimmi akuersissummi pineqartunut ilaatinneqartumi pisinnaatitaaffeqarpoq. Naalakkersuisut taamaallaat aatsitassanut tunngasunik suliaqarnissamut akuersissummik tunniussinissamik piginnaatitaanerat aalajangiusimaannarneqartariaqarpoq.

Sulisitsisut isumaqarput, kalaallit sulisussat ineriartortinnissaannut/ilinniartinnissaannut sulisorinissaannullu kajumissuseqalersitsinissaq killilerneqanngitsoq, siunnersuummi allassimasariaqaraluartoq.

Siunnersuut kalaallit sulisussat ineriartortinnissaannut/ilinniartinnissaannut kajumissuseqalersitsinissamut sunniuteqartooq takuneqarsinnaanngilaq.

Sulisitsisut isumaqarput, pisinnaatitsissummik pigisaqartut IFC-imi malitassanut imaluunniit ESG-p siunertaqarfigineqarneranut assigiissaarinissamut periarfissaqarnerat nalorninarooqalersinneqanngitsoq, siunnersuummi ersarissumik allassimasariaqaraluartoq.

Allanngortinneqartuni siunnersuutip IFC-imi malitassanut aamma ESG-imit tunngatillugu pisinnaatitsissummik pigisaqartunut sunniuteqarnera takuneqarsinnaanngilaq.

Sulisitsisut isumaqarput, piumasaqaatit aatsitassarsiorluni misissuinermit piumasaqaatigineqartut "nunani tamalaani malitassanit" aamma "best praxis"-init erseqqinnerusumik, aammalu aatsitassarsiorluni misissuinerup annertussusaa eqqarsaatigineqarluni, nassuarneqarnerat, siunnersuummi ersarissumik allassimasariaqaraluartoq.

"nunani tamalaani malitassat" aamma "best available praxis" oqaatsit allanngorartuurtut atorneqarput, piffissap ingerlanerani allanngoriartortarlutik.

Taamaattumik erseqqinnerusumik maleruagassiniissaq nalunaarutitut ilusilimmi isumagineqarpat pitsaanerpaasussaavoq.

Sumiiffinni akuersissuteqarfiusuni kisermaassisussaataitanermut tunngatillugu nalorninartogartinneqalernerata annertunerunerani, aningaasaliisartut annasaqarsinnaanerata annerunerulertartoq, Sulisitsisut tikkuarpaat.

Kisermaassisussaataitanermut tunngatillugu nalorninartogartarnera peerneqarpoq, takukkit matuma siulianiittut.

Sulisitsisut isumaqarput, annikitsumik aatsitassarsiornissamut suliassat atituumik isigalugit, aningaasanik pinerlunnikkut pissarsiarineqartunik malunnaarsaarinerminni aqqutigineqarnissaat ajornaatsuusussaasoq.

Matuma siuliani oqaatigineqareersutut, Naalakkersuisut isumaqanngillat sumiiffiup taassuma iluani pinerlunnikkut aningaasarsianik malunnaarsaariniissaq, inuussutissarsiutinit allanit aarlerinaateqarnerusoq.

Grønlandsbanken

Grønlandsbanken aallaaviatigut siunnersuutip pingaarnertigut siunertaanut akuersaartumik isumaqarpoq, tamanna ilaatigut najukkani suliaqartuusut aatsitassanik nalituunik nassaarniarnissamut, aningaasarsiorfiginissaannullu periarfissatut soqutiginaateqarnerusutut isigalugu. Tamanna aningaaseriviup neriulluarnartutut isigaa. Ilaatigut nunamut ataatsimoorussamut kikkut tamarmik pisinnaatitaaffeqarnerannut tamanna pissusissamisoortumik nangissutaavoq, ilaatigullu tamanna Kalaallit Nunaanni nunap sannaat pillugu najukkani ilisimasat pissusissamisoortumik najukkaniitinnissaannik siuarsaasinnaalluni.

Taamaattoq Grønlandsbankenip ingerlatseqatigiiffiit aatsitassarsiorniluni misissuineramik suliaqartut kisermaassisussaataallutik pisinnaatitaaffiit siunnersuutip sunniuteqarnissaa, kiisalu siunnersuutip taarsiissutitalimmik piginnikkunnaarsitsilluni akuliuffiulersinnaanerata aarlerinaateqarnera, isumanerluutigaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorniluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorniluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataitaneq aalajangiuisimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorniluni misissuinissamut

akuersissummi pineqartunut ilaatinneqartunik taamaallaat saniatigut tunisassiassatut pīiaaqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaatitaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorineqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Ingerlatseqatigiiffiup assersuutigalugu diamantinik ujaasinissamut aatsitassarsiorluni misissuinissamut akuersissummik peqartup, akuersissut atoqqusaanngikkaa, allallu tamarmik sumiiffimmut aatsitassarsiorluni misissuiffiusumukaqusaallutik aammalu diamantinik atortussiassanik tigusequsaallutik, ersarilluinnartumik kukkunertut Grønlandsbankenip isigaa.

Grønlandsbankenip isummersorneri Naalakkersuisut paasilluarsinnaavaat, aammalu sumiiffimmi aatsitassarsiorluni misissuinissamut akuersissummi pineqartunut ilaasumi, najukkameersut akuersissummik peqanngitsut aatsitassanik akuersissummi pineqartunut ilaatinneqartunik pīiaanissamut pisinnaatitaannginneranni, ajornartorsiut iluarsineqarsimassaaq.

Grønlandsbanken aammattaq isumaqarpoq, siunnersuut tuaviuussatut oqimaaqatigiinngitsutullu isikkoqartoq aammalu "taakkua akerleraatigut" eqqarsartaaseqarnermut takussutissaasoq.

Naalakkersuisut isumaqarput, najukkaneersut sumiiffinni aatsitassarsiorluni misissuinissamut akuersissutini pineqartunut ilaatinneqartuni pīiaanissamut pisinnaatitaanerisa killilersorneqarnissaannut siunnersuutigineqartuni, inatsisissatut siunnersuutip oqimaaqatigiinnerunissaa anguneqarsimasoq.

Naalakkersuisut isumaqanngillat, siunnersuut "taakkua akerleraatigut" eqqarsartaaseqarnermut takussutissaanngitsoq. Naalakkersuisut pisinnaatitsissummik pigisaqartut najukkaneersullu akornanni suleqatigiinnissaa kaammattuutigiuannarsimavaat.

Hudson Resources Inc.

Hudson Resources Inc.-ip erseqqissarpaa, akisussaassusilimmik maleruagassiiviusumillu ingerlasoqarluni najukkaneersut suliaqartuusut suleqatiginissaat akuersaartumik

isumaqarfigalugu. Taamaattoq siunnersuummut Naalakkersuisut tusarniaassutigalugu nassiussimasaannut, arlalinnik isornartoqartitsipput.

Hudson Resources Inc.-ip aatsitassarsiorluni misissuinissamut akuersissutit kisermaassisussaataitaalluni pinsinnaatitaaffittut inissisimanerat isumanerluutigalugu oqaatigaa, ilanngullugu tamatuma aningaasalersuinissaq ajornakusoortilersinnaagaa.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataitaaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqusaallutik, tamannalu siunissami pinsinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataitaallutik pinsinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorineqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Hudson Resources Inc. allappoq, Naalakkersuisut ingerlatassat aalajangersimasumik najugaqartut suliarisaat, taakkualu avatangiisinut qanoq ajoqusiisinnaanerat, nakkutigisinnaangikkaat, kiisalu aatsitassat qanoq annertutigisut piiarneqarsimanersut tunineqarsimanersullu akileraartarnermut oqartussat ilisimasinnaangikkaat, aammalu nunani allani najukkaneersut aatsitassanik nalitoorujussuarnik piiasinnaanerannut taakkualu niuerfinni nakkutigineqanngitsuni tunisisinnaanerannut assersuutissaqartoq, tikkuarlugu.

Siunnersuummi siunertaasut pingaarnerit ilaat tassaavoq, inuit ataasiakkaat aatsitassanik katersinissamut piiaanissamullu periarfissaqarnerisa ammanerulersinneqarnissaa pisariinnerulersinneqarnissaalu, tamatumalu ilaatigut kingunerisaanik suliassaqarfik nakkutigineqannginnerusussaavoq. Taamaalilluni najukkaneersut akuersissummik peqaratik aatsitassanik katersinerannut piiaanerannullu atatillugu akuersissuteqarnissaaq

nalunaarusiortarnissarlu piumasaqaatigineqanngillat. Atortut tigummiannartakkat kisimik atoqqusaammata, akuersissummik peqarani ingerlatassanik suliaqarnissaq killilimmik annertussuseqassasoq naatsorsuutigineqarpoq. Taamaattoq tusarniaaffigineqartut arlallit assingusunik isumanerluuteqarput, aammalu tusarniaanermut akissuteqaatit siunnersuummi allanngortitsinernik kinguneqarput. Taamaalliluni siunnersuummi § 7, imm. 2-mi aalajangersagaq ilanngunneqarpoq, taanna malillugu akuersissummik peqarani piiaanermi sullup isaariaannik imaluunniit itersanik, nappaarissunik nallaarissunillu, nunamut sanilliullugu uuttorlugu 1 meterinit itinerusunik, pilersitsisoqaqusaanani. Siunnersuummi § 6, imm. 1-imi erseqqissarneqarpoq, ingerlatassani aalajangersimasumik najugaqartunit aamma aalajangersimasumik najugaqartuunngitsunit akuersissummik peqarani suliarineqartuni, avatangiisinik allanngutsaaliuinerlut maleruagassat atuuttut nalinginnaasut malinneqartussaasut.

Akilerartarnermut oqartussat nakkutiginninnerannut tunngatillugu, siunnersuutigineqartut ammanerulersitsinissami maleruagassiinnginnerulernissamilu, innuttaasut ingerlatassanik pineqartunik suliaqartut, inatsisit malillugit akisussassusilimillu iliuuseqarnerat, oqartussat tatigisariaqarpaat, ilanngullugu akilerartarnermut oqartussat maleruagassat atuuttut malillugit isertitassai taamaatinneqartut.

Hudson Resources Inc. isumaqarpoq, aatsitassarsiorluni misissuinissamut akuersissutit malillugit pisinnaatitsissummik pigisaqartunut najukkamilu suliaqartuusunut avatangiisinik mianerinninnissamik isumannaallisaanermillu assigiinngitsunik piumasaqaateqartoqarnera ajornartorsuutitaqartoq, aammalu taamatut assigiinngisitsineq najukkani suliaqartuusussat, aatsitassarsiorluni misissuinissamut akuersissutit malillugit pisinnaatitsissummik pigisaqartunut piumasaqaatit assingunik, naammassinninnissamut aningaasaqarnikkut pisinnaasaqannginnerat tunngavilersuutigineqartoq ilimagalugu.

Tusarniaanermut akissuteqaatip tassunga tunngasortaa paatsoornermik tunngaveqarpassippoq. Isumannaallisaanermut avatangiisinullu piumasaqaatit piumasaqaatigineqartut, ingerlatassanut suliarineqartussanut tunngassuteqarput, aammalu ingerlatassat najukkani suliaqartuusunit imaluunniit aatsitassarsiorluni misissuinissamut akuersissutit malillugit pisinnaatitsissummik pigisaqartunit suliarineqarnerut apeqqutaanani.

Isumannaallisaaneq, peqqinnissaq avatangiisillu pillugit maleruagassat assigiit najukkani suliaqartuusunut, taamatullu aatsitassarsiorluni misissuinissamut akuersissutit malillugit pisinnaatitsissummik pigisaqartunut atuunnissaat siunnersuummi qulakkeerneqassasoq, Hudson Resources Inc.-ip siunnersuutigaa.

Matuma siuliani taaneqartut, aatsitassarsiorluni misissuinissamut akuersissutit malillugit pisinnaatitsissummik pigisaqartunut aamma najukkaneersunut suliaqartuusunut isumannaallisaanermut, peqqinnissamut avatangiisinullu tunngasut pillugit maleruagassat

asigiinnigitsut atuutsinneqanngillat.

Hudson Resources Inc.-ip siunnersuutigaa, aatsitassanut tunngasunik suliaqarneq pillugu Inatsisartut inatsisaat malillugu pisinnaatitsissummik pigisaqartunut nalunaarusiornissamut piumasagaatit assingi najukkaneersunit suliaqartuusussanit malinneqartussanngortinneqassasut, aammalu nalunaarusiornissaq aningaasaqarnikkut nanertuutaanngitsoq tunngavilersuutigalugu.

Najukkaneersunut suliaqartuusussanut akuersissut imaluunniit akuersissuteqarneq malillugu ingerlatassanik suliaqartussanut tunngatillugu, aallaaviatigut aatsitassanut tunngasunik suliaqarneq pillugu Inatsisartut inatsisaat malillugu pisinnaatitsissummik pigisaqartunut nalunaarusiornissamut piumasagaataasartut assingi, atuuttussaapput.

Aalajangersimasumik najugaqartunut, akuersissummik peqaratik ingerlatassanik suliaqartussanut tunngatillugu, inuit ataasiakkaat aatsitassanik katersinissamut piiaanissamullu periarfissaqarnerannik ammanerulersitsinissaq pisariinnerulersitsinissarlu pillugit siunnersuutip siunertaanut naapertuuttumik, nalunaarusiortarnissaq pillugu piumasagaateqartoqarniannigilaq. Nalunaarusiornissaq aningaasaqarnikkut nanertuutaanngitsoq, Naalakkersuisut isumaqatiginngilaat. Siunnersuut malinneqanngilaq.

Hudson Resources Inc.-ip siunnersuutigaa, inatsimmi atuutsitsilersoqassasoq, taanna malillugu aatsitassarsiorluni misissuinissamut akuersissutit malillugit pisinnaatitsissummik pigisaqartut allat sumiiffimmi akuersissuteqarfiusumi aatsitassanut tunngasunik suliaqarnernik ingerlataqarnissaasa akueriumannginnissaanik pisinnaatitaassallutik. Pisinnaatitsissummik pigisaqartut najukkaneersunut suliaqartussanut sumiiffimmukarsinnaatitsinissaq pillugu isumaqatigiissuteqarsinnaassasut.

Siunnersuut allanngortinneqarpoq, taamaalillutik aatsitassarsiorluni misissuinissamut akuersissutit malillugit pisinnaatitsissummik pigisaqartut aamma aalajangersimasumik najugaqartuusut, sumiiffimmi ataatsimi aatsitassanik assigiinnik piiaasinnaanatik. Taamaalilluni illuatungeriit akornanni unammilleqatigiinneq pisinnaajunnaarmat, Naalakkersuisut inatsisinik taamaattunik atuutsitsilernissaq pissutissaqarsorinnigilaat. Pisinnaatitsissummik pigisaqartoq aatsitassanut akuersissummi pineqartunut ilaasunut tunngatillugu, najukkameersunut isumaqatigiissuteqarnissamut kiffaanngissuseqarpoq. Siunnersuut malinneqanngilaq.

Kaali Fencker

Sumiiffiit amerliartuinnartut kisermaassisussaatitaalluni akuersissutini pineqartunut ilanngutsinneqartarneranni, aatsitassarsiorlunilik takornariartitsinermik suliaqartut Kaali Fenckerip eqqarsaatigeqquai.

Sumiiffinnut piiaanissamut akuersissummi pineqartunut ilaasunut tunngatillugu, piiaanermiit

allaanerusumik aatsitassanut tunngasunik allanik suliaqartoqarsinnaanngilaq, ilanngullugu aamma aatsitassarsiorluni takornariartitsineq.

Sumiiffinnut aatsitassarsiorluni misissuinissamut akuersissutini atuutereersuni pineqartunut ilaasunut tunngatillugu, pisinnaatitsissummik pigisaqartup sumiiffimmi aatsitassarsiorluni takornariartitsinermik ingerlataqarnissanik suliaqarnissaq pillugu isumaqatigiissuteqarfigineqarnissaa suli pisariaqartussaavoq.

Sumiiffinnut aatsitassarsiorluni misissuinissamut akuersissutini nutaani pineqartunut ilaatinneqartunut tunngatillugu, aatsitassanut aatsitassarsiorluni misissuinissamut akuersissummi pineqartunut ilaatinneqanngitsunut tunngasunut, inatsit malillugu aatsitassarsiorluni takornariartitsineq ingerlanneqarsinnaassaaq.

Kaali Fenckerip siunnersuutigaa, sumiiffik aatsitassarsiorluni misissuiffigineqartoq ujaqqanik pinnersaasiassanik peqarfeqarluni ilisimaneqartoq, utertinneqarpat, taanna kisermaassisussaatitaalluni akuersissummi ilaatinneqarunnaassasoq, imaluunniit taamaanngippat sumiiffik makitsinikkut pisinnaatitsissummik pigisaqartunut nutaanut tunniunneqartassasoq, tassami innuttaasut tamarmik naligiimmik pisinnaatitaaffeqartariaqaraluarmata.

Aatsitassanik piiaanissamut periarfissat sumiiffimmiit sumiiffimmut allanngorartorujussuusussaapput. Taamaattumik sumiiffik aalajangersimasoq qanoq neqeroortitsivigineqassanersoq nammineq aalajangiisarnissaq Naalakkersuisut kissaatigaat. Siunnersuut malinneqanngilaq.

Kommune Kujalleq

Inuit ataasiakkaat najukkami aatsitassanut tunngasunik suliaqarnissamut kisermaassisussaatitaalluni akuersissummik peqartut, sumiiffimmut inunnit arlalinnit immikkut soqutigineqartunut inississinnaanerat isumanerluutigalugu Kommune Kujalliup oqaatigaa.

Suliassaq ineriartortinneqassappat sumiiffimmut kisermaassisussaatitaalernissamut periarfissaqarnissaq pingaaruteqarpoq. Assersuutigalugu sumiiffimmi kisermaassisussaatitaanngikkaanni aningaasalersuisussarsinissaq ajornakusoortorujussuusussaavoq. Taamaattumik kisermaassisussaatitaalluni akuersissummik tunineqarnissamut periarfissaq aalajangiusimaannarneqarpoq.

Siunnersuummi § 5, imm. 2-imi 250.000 koruuninik killiliineq eqaatsunngortinneqassasoq, Kommune Kujalliup siunnersuutigaa, taamaalilluni najukkani aatsitassarsiorfissanut niuerutiginninnissaq sioqqutsisumik killilerneqariinnginniassammat.

Aatsitassanut tunngasunik suliaqarneq pillugu Inatsisartut inatsisaat malillugu

akuersissummik piunasaqaateqalinnginnermi, najukkani aatsitassanut tunngasunik suliaqarnissamut kisermaassisussaatitaalluni akuersissutip ataani ingerlatassat qanoq annertutigisinnaanersut, kinaassusersiunngitsumik tunngavissarititaasumik atuutsitsinissamut, aningaasanut killiliusaaq aalajangersarneqarpoq.

Oqaatigineqassaaq, najukkani aatsitassanut tunngasunik suliaqarnissamut kisermaassisussaatitaalluni akuersissummiit piaanissamut akuersissummut ikaarsaarnissaaq, aatsitassanut tunngasunik suliaqarneq pillugu Inatsisartut inatsisaata akuerineqarnerani oqinnerujussuannngortussaasoq.

Kommune Kujalleq allappoq, killiliinerit, soorlu "taamaallaat atortunik motorilinnik tigummaaannartakkanik atuinissaaq", aatsitassarsiorfissat "rubininik nuniannermit" allaanerusumik annikinninngorlugit atorineqassappata, sukannerpallaartut aammalu siunnersuutigalugu entreprenørmaskiinat aalajangersimasut ukiup qanoq ilinerini aalajangersimasunik atorineqartassasut.

Taamaallaat aalajangersimasumik najugaqartut akuersissummik peqaratik ingerlataat atortunik tigummaaannartakkanik atuinissamik killilernerqarput. Ingerlatassat ataasiakkaat qanorluunniit akuersissuteqarfigineqartinnagit entreprenørmaskiinanik atuinissap akuerinissaa Naalakkersuisut avatangiisinut isumannaatsuusorinngilaat.

Kommuneqarfik Sermersooq

Kommuneqarfik Sermersuup suliassaqarfimmi inatsisinut atuuttunut sanilliullugu allannguutissatut siunnersuut qujaruppaa.

Lumina Sustainable Materials A/S

Lumina Sustainable Materials A/S-ip siunnersuutigaa, "najukkami aatsitassanut tunngasunik suliaqarneq" allanngortinneqassasoq uunga "annikitsumik aatsitassarsiorluni ingerlatassat" imaluunniit oqaasertai allatut nunani tamalaani ilisarnarnerusunngorlugit, tassami aatsitassarsiorfiutileqatigiiffiup aamma siunnersuut malillugu pisinnaatitsissummik pigisaqartup akornanni isumaqatigiinngitsoqalissappat, tamat akornanni ingerlatseqatigiiffiup nunanit allanit pigineqartup aamma najukkani inuiaqatigiit akornanni suliassatut isikkoqalersinnaammat.

Siunnersuutip qulequtaa eqqaassanngikkaanni, oqaaseq "najukkami aatsitassanut tunngasunik suliaqarneq" taamaallaat "najukkami aatsitassanut tunngasunik suliaqarnissamut kisermaassisussaatitaalluni akuersissutinut" atorineqarpoq, tassalu inatsisit atuuttut malillugit kisermaassisussaatitaalluni annikitsumik aatsitassarsiorinissamut akuersissummut naapertuuttumik. Akuersissut taamaattoq taamaallaat sumiiffimmuut akuersissummi pineqartumut tunngassuteqarmat, aammalu sumiiffinni aatsitassarsiorinissamut akuersissummi pineqartunut ilaareersuni akuersissutinik taamaattunik qinnuteqartoqarsinnaanani, aatsitassarsiorfiutileqatigiiffiit aamma

akuersissutit taamaattut malillugit pisinnaatitsissummik pigisaqartut akornanni isumaqatigiinngitsoqalertarnissaa qaqutigoortorujussuusussaavoq.

Akuersissut taamaattoq malillugu suliassat annikitsumik annertussusilimmik killiffeqarneq qaangerlugu ineriartortinneqarsinnaanngitsutut isigineqalernissaa pinngitsoortinniarlugu, Naalakkersuisut siunnersuummi taaguutip ”kisermaassisussaataitaalluni annikitsumik aatsitassarsiornissamut akuersissummiit” ”najukkami aatsitassanut tunngasunik suliaqarnissamut kisermaassisussaataitaalluni akuersissutinngorlugu” allanngortinnissaa toqqarpaat. Taaguutip Naalakkersuisunit siunnersuutigineqartup aammalu taaguutip Lumina Sustainable Materials A/S-ip siunnersuutigisaata akornanni toqqaanissamut taamaalilluni, najukkani aatsitassanut tunngasunik suliaqarnissamut kisermaassisussaataitaalluni akuersissutini aningaasaliisartuusinnaasut taaguummik paasinnissinnaanerannik mianerinninnissap aammalu pisinnaatitsissummik pigisaqartut assigiinngitsut akornanni isumaqatigiinngitsoqarneranut atatillugu tamat taaguut qanoq paasisinnaassaneraat, oqimaaqatigiissaarinissaq apequtaavoq. Naalakkersuisut isumaqanngillat isumaqatigiinngitsoqarneranik tamat paasinninnissaannik mianerinninnissaq, allanngortitsinermut tunngavilersuutigineqarsinnaanngitsoq- Siunnersuut malinneqanngilaq.

Lumina Sustainable Materials A/S allappoq, najukkaneersut qassit sumiiffimmi ataatsimi ingerlatassanik suliaqarsinnaanerannut amerlanerpaaffiliilluni siunnersuummi aalajangersaasoqanngitsoq, tamannalu peqqinnissamut, isumannaallisaanermut, avatangiisini sunniinernut, nunap sannaata innarligassaannginneranut il.il. tunngatillugu suliffeqarfimmut annertuumik aarlerinaateqartussaasoq.

Siullertut taamatut killiliisoqassappat akuersissutinut aalajangersaariaaseqarnissaq pisariaqartussaavoq, tassami taamaassappat kikkut sumiiffinnukarsinnaassanersut aalajangiisooqartariaqalissammat. Aammattaaq tamanna allaffissornikkut oqimaatsuusussaavoq, tassami nunarput tamakkerlugu sumiiffiit ilaannut annikinnerusunut aggulunneqartussanngussammat. Pissutsit marluusut taakkua tamarmik siunnersuutip siunertaanut akerliupput.

Peqqinnissamut, isumannaallisaanermut avatangiisinullu tunngatillugu, inuit qassit sumiiffimmi suliffeqarfiup soqutigisaqarfigisaani angalaaqusaanersut killeqanngilaq. Najukkameersut siunnersuut malillugu ingerlatassanik suliaqartut, allanit sumiiffimmi angalaartunit, annertunerusumik aarlerinaateqartussaanngillat.

Avatangiisinut sunniinernut nunallu sannaata innarligassaannginneranut tunngatillugu, avatangiisit allanngutsaaliornissaannut maleruagassat nalinginnaasut isiginiarneqassasut siunnersuummi § 10, imm. 1-imi erseqqissarneqarpoq. Akuersissummik peqarani ingerlatassanut suliarineqartussanut tunngatillugu killiliineq siunnersuummi § 6, imm. 2-mi ilanngunneqarpoq, taanna malillugu sullut isaariaannik imaluunniit itersalianik, nappaarissunik imaluunniit nallaarissunik, nunamut sanilliullugu uuttorlugu 1 meterinit

itinerusunik pilersitsisoqaqqusaanani.

Lumina Sustainable Materials A/S allappoq, aalajangersimasumik najugaqartut ingerlataanni ingerlatseqatigiiffiit ingerlataat akornusersorneqannginnersut qanoq nalilersorneqartassanersoq, siunnersuummi ersarissumik allassimanngitsoq.

Tusarniaanermut akissuteqaat siunnersuutip allanngortinneqarneranik kinguneqarpoq. Siunnersuummi § 10, imm. 3-mi aalajangersagaq ilanngunneqarpoq, taanna malillugu aalajangersimasumik najugaqartut aamma aalajangersimasumik najugaqartuunngitsut, siunnersuut malillugu ingerlatassanik suliaqartut, ingerlatat aatsitassarsiorluni misissuinissamut akuersissut malillugu ingerlanneqartut, ataqqisussaallugit. Aammattaaq ingerlatassat ataqqineqartussat tassaasut ingerlatassat Naalakkersuisunit akuerineqarsimasut, aalajangersakkamut nassuiaatini erseqqissarneqarpoq.

Najukkameersut ingerlatseqatigiiffiup isumannaallisaanermut malittareqqusaannik Naalakkersuisut qanoq qulakkeerinnissinnaanersut, Lumina Sustainable Materials A/S-ip apeqqutigaa.

Aalajangersimasumik najugaqartut aamma aalajangersimasumik najugaqartuunngitsut siunnersuut malillugu ingerlatassanik suliaqartut, aammalu sumiiffinni aatsitassarsiorluni ingerlatassanik suliaqarfiusuni angalaartut, ingerlatseqatigiiffiup isumannaallisaanermut malittareqqusaasa malinnissaannik, inuit sumiiffimmi angalaartut allat assigalugit, pisussaaffeqarput.

Lumina Sustainable Materials A/S allappoq, aatsitassarsiorfimmi tunisassiorneq ingerlasoq suliaralugu, aammalu najukkaneersut takornariarlu amerlanerusut sumiiffimmut akuersissuteqarfigisaminnut angalaartalissappata, isumannaallisaanermi aarlerinartorsiornerulernissaq takusinnaallugu.

Aalajangersimasumik najugaqartut aamma aalajangersimasumik najugaqartuunngitsut sumiiffinni piiaanissamut akuersissuummi pineqartunut ilaatinneqartuni siunnersuut malillugu ingerlatassanik suliaqaqqusaanngillat, takuuk siunnersuummi §§ 10, imm. 1, nr. 2 aamma 11, imm. 4, nr. 2.

Lumina Sustainable Materials A/S allappoq, siunnersuut naammattumik ersarissuusoq isumaqarnatik, aammalu tamatuma malitsigisaanik Naalakkersuisut nammineq isumartik malillugu aalajangiisinaasut.

Naalakkersuisut taamatut isumaqarneq isumaqatiginngilaat.

Lumina Sustainable Materials A/S allappoq, siunnersuutip malitsigisaanik taarsiissutitalimmik piginnikkunnaarsitsinissaq apeqqutaalersinnaasoq.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput.

Aalajangersimasumik najugaqartut aamma aalajangersimasumik najugaqartuunngitsut sumiiffinni aatsitassarsiorluni misissuinissamut akuersissummi pineqartunut ilaasuni ingerlatassai pillugit siunnersuummi aalajangersakkat, sumiiffinni aatsitassarsiorluni misissuinissamut akuersissummi siunnersuutip atuutilernissaa sioqqullugu tunniunneqarsimasumi atuutissanngillat. Sumiiffinni taakkunani kisermaassisussaataaneq taamaalilluni maannamut pisartutut aalajangiisimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq.

Lumina Sustainable Materials A/S-ip siunnersuutigaa, "Small-scaler"-ip aamma ingerlatseqatigiiffiup akornanni "social contract" isumaqatigiissutigineqarsinnaalluni ilusiliamik suliaqartoqassasoq. Taamatut isumaqatigiissuteqartoqarsinnaanani pisoqarnissaannut naammagittaalliortarfiliortoqassasoq.

“Social contract” qanoq isumaqartinneqarnermaq aammalu “small-scaler” sunut tunngassuteqarnermaq paasinangilaq, kisianni isumaqatigiissutip qanoq taagorneqarnera apeqquataatinnaq, pisinnaatitsissummik pigisaqartoq isumaqatigiissutinik, inatsisinik unioqquitsinngitsunik, isumaqatigiissuteqarnissamut kiffaanngissuseqarpoq.

Naammagittaalliortarfik pillugu apeqqummut tunngatillugu, naammagittaalliortarfik sumiiffimmi kisermaassisussaataalluni akuersissummi pineqartunut ilaasumi ingerlatassanik suliaqarnissamut akuersissummik pisinnaatitsissummik pigisaqartunut allanut tunniussinissaq pillugu aalajangiisinnaassappat, tamanna ajoqusiisorujussuusinnaavoq. Siunnersuut malinneqannngilaq.

Lumina Sustainable Materials A/S-ip siunnersuutigaa, akuersissut tusarniaassutigineqalerpat annikitsumik aatsitassarsiorlunissamut pisinnaatitsissummik pigisaqartut sumiiffimmut soqutiginninnertik paasitissinnaassagaat.

Siunnersuut malillugu pisinnaatitsissummik pigisaqartut, allatuulli, aatsitassanut tunngasunik suliaqarneq pillugu Inatsisartut inatsisaat malillugu akuersissutinik tunniussinermut atatillugu tamanut ammasumik tusarniaanerp nalaani, tusarniaanermut akissuteqaammik nassiussisinnaapput.

Aqqartartut suliffeqarfiat MASIK

Aqqartartut suliffeqarfiata MASIK isertortukkut akunnermiliuttutut suliaqarnissaq isumanerluutigalugu oqaatigaa, aammalu suliaqarneq siunnersuummi pineqartunut ilaasoq tamarmi inunnit Kalaallit Nunaanni aalajangersimasumik najugaqartunit aammalu tamakkiisumik akileraartussaataitaasunit, ingerlanneqartussanngorlugu siunnersuutip

ilusilersorneqarnissaa siunnersuutigalugu.

Suliaqarneq siunnersuummi pineqartunut ilaasoq tamarmik inunnit Kalaallit Nunaanni aalajangersimasumik najugaqartunit tamakkiisumillu akileraartussaataasunit ingerlanneqassasoq pillugu eqartumik piumasagaateqarnermi, aatsitassarsiorfissanik ineriartortitsinissamut kigaalaqusersuineritut isikkoqarsinnaavoq. Ilaatigut Kalaallit Nunaanni sulisussaaleqisoqarsinnaavoq, ilaatigullu pisariaqartunik paasisimasalinnik Kalaallit Nunaanniittoqanngissinnaavoq, assersuutigalugu aatsitassat misissugassat akuttunngitsumik nunani allani misissoqqissaarneqartussanngorlugit nassiunneqartarput. Siunnersuut malinneqanngilaq.

Oqaatigineqassaaq Naalakkersuisut siunnersuut malillugu akuersissutinut akuersissuteqarnernullu atugassarititaasunik aalajangersaasinnaammata, ilanngullugu najukkaneersunik/nunap immikkoortuineersunik sulisoqarnissaq pillugu.

Aqqartartut suliffeqarfiat MASIK isumaqarpoq siunnersuummi § 5, imm. 2-mi 250.000 koruuninik aningaasartaliilluni killiliineq appasippallaartoq.

Aatsitassanut tunngasunik suliaqarneq pillugu Inatsisartut inatsisaat malillugu akuersissummik piumasagaateqalinnginnermi, najukkani aatsitassanut tunngasunik suliaqarnissamut kisermaassisussaataalluni akuersissutip ataani ingerlatassat qanoq annertutigisinnaanersut, kinaassusersuunngitsumik tunngavissarititaasumik atuutsitsinissamut, aningaasanut killiliussaq aalajangersarneqarpoq. Tunngavissarititaasup taassuma toqqarneqarneranut pissutaasut ilagaat, saliisoqarani pisoqartillugu nunap karsiata aningaasartuutininik matussusiisussanngortarnera.

Oqaatigineqassaaq, najukkani aatsitassanut tunngasunik suliaqarnissamut kisermaassisussaataalluni akuersissummiit piiiaanissamut akuersissummut ikaarsaarnissaq, aatsitassanut tunngasunik suliaqarneq pillugu Inatsisartut inatsisaata akuerineqarnerani oqinnerujussuannngortussaasoq.

Aqqartartut suliffeqarfiat MASIK allappoq, ingerlatassat siunnersuummi § 5-imi aningaasartaliilluni killilikkanit suliarineqarsinnaasut eqqarsaatigalugit, §§ 23-mi aamma 24-mi uppernarsaasiinissamut piumasagaatit annertooujussuusut.

Pilersaarutit §§ 23 aamma 24 malillugit suliarineqartussat, suliassap annertussusaanut annertoqatigiissinneqartussaapput. pilersaarutinut piumasagaatit suliassani annikinnerusuni killeqartussaapput.

Siunnersuummi §§ 36 ff-imi avatangiisinut piumasagaatit, inatsisinut atuuttunut sanilliullugu, annertooujussuarmik sukannerulersitsinerusut, Aqqartartut suliffeqarfiata MASIK-ip tikkuarpaa.

Siunnersuut malillugu avatangiisinut piumasagaatit annertunerpaatigut maannakkut piumasagaatinut naapertuupput.

Nalik Ventures

Nalik Venturesip tamanna inuiaqatigiinnut pingaarnertigut iluaqutaasinnaappat, najukkami aatsitassanut tunngasunik suliaqarneq ineriartortinneqarsinnaalerlugu suliniutinik ingerlatsisoqarnera aallaaviatigut qujaruppa. Taamaattoq Nalik Ventures isumaqarpoq aatsitassanut ikummatissanullu inatsisip allanngortinneqarnissaa tunuarsimaarfingineqassasoq, tassami tamanna nalorninartorsiortitsilertarmat.

Naalackersuisut ajornartorsiut ilisimaaraat. Inatsisip allanngortinneqarnera tamatigut nalorninartorsiortitsilertarpoq. Taamaattoq pisumi matumani inatsisip allanngortinnissaa naapertuuttutut isigineqarpoq, tassami aatsitassanut suliassaqarfiup iluani najukkani suliaqartuusut sapinngisamik pitsaanerpaanik atugassaqartinneqarnissaat kissaatigineqarmat.

Aatsitassarsiorluni misissuinissamut akuersissutit tunniunneqareersimasut siunnersuummi maleruagassani nutaani ilaatinneqassanngitsut, Nalik Venturesip inassutigaa.

Tusarniaaffigineqartut arlallit assingusunik siunnersuuteqarput, aammalu tusarniaanermut akissuteqaatit siunnersuummi allanngortitsinernik kinguneqarput. Aalajangersimasumik najugaqartut aamma aalajangersimasumik najugaqartuunngitsut sumiiffinni aatsitassarsiorluni misissuinissamut akuersissummi pineqartunut ilaasuni ingerlatassai pillugit siunnersuummi aalajangersakkat, sumiiffinni aatsitassarsiorluni misissuinissamut akuersissummi siunnersuutip atuutilernissaa sioqqullugu tunniunneqarsimasumi atuutissanngillat. Sumiiffinni taakkunani kisermaassisussaatitaaneq taamaalilluni maannamut pisartutut aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq.

Nuna Advokaatit

Aatsitassanut Ikummatissanullu Aqutsisoqarfik pillugu aalajangersakkanik siunnersuut imaqanngitsoq, Nuna Advokaatit oqaatigaat, aammalu oqartussat suliarinninnerat Aatsitassanut Ikummatissanullu Aqutsisoqarfimmi imaluunniit tassunga atasumi inissinneqarnissaa kaammattuutigalugu.

Siunnersuut Aatsitassanut Ikummatissanullu Aqutsisoqarfik pillugu aalajangersakkanik imaqanngilaq, tassami Inatsisartut Naalackersuisullu pillugit Inatsisartut inatsisaanni § 23, imm. 1 naapertorlugu Naalackersuisut Siulittaasuata susassaqarfiit Naalackersuisunut ilaasortat akornanni agguaattarmagit.

Aallaaviatigut Aatsitassanut Ikummatissanullu Aqutsisoqarfik aamma Aatsitassanut

Suliassaqarfinnut Avatangiisinut Aqutsisoqarfik siunnersuut malillugu oqartussat sularinninnerannik isumaginnittuusussaapput.

Nuna Advokaatit oqaatigaat "najukkami aatsitassanut tunngasunik suliaqarnerup" nassuiaassutaa taamaallaat akuersissutit naapertorlugit najukkami aatsitassanut tunngasunik suliaqarnermut tunngatinneqartoq takuneqarsinnaasoq, taamaalillunilu siunnersuummi § 6 malillugu akuersissummik peqaratik ingerlatassanik suliaqarnek pineqartunut ilaatinneqarani.

Tamanna ilumoorpoq.

Siunnersuutip aatsitassarsiorluni misissuinissamut akuersissutit malillugit pisinnaatitsissummik pigisaqartut kisermaassisussaataitanerannut innarliinerusinnaanera, immaqalu aamma taarsiissutitalimmik piginnikkunnaarsitsinertut akuliunnerusinnaanera, isumanerluutigalugu Nuna Advokaatit oqaatigaat. Nuna Advokaatit siunnersuutigaat ikaarsaarnissamut aalajangersakkamik ilanngussisoqassasoq, taanna malillugu sumiiffiit aatsitassarsiorluni misissuinissamut akuersissutini atuuttuni pineqartunut ilaasut aatsitassanut ikummatissanullu inatsimmi aalajangersakkanit suli maleruagassiivigineqassallutik.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataitaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataaallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Suliami pineqartut arlallit sumiiffiup akuersissuteqarfiusup ataatsip iluani ingerlatassanik

suliaqartussaatiillugit, pisinnaatitaaffiit unammilleqatigiittut pillugit aaqqiagiinngittoqalersinnaanera isumanerluutigalugu, Nuna Advokaatit oqaatigaat.

Tusarniaanermut akissuteqaat siunnersuutip allanngortinneqarneranik kinguneqarpoq. Siunnersuummi § 7, imm. 3-mi aalajangersagaq ilanngunneqarpoq, aalajangersimasumik najugaqartut § 7, imm. 1 malillugu ingerlatassanik suliaqartut, taamaaliorderminni sumiiffimmi ingerlatassat suliarineqarfianni pisinnaatitaaffeqalersinnaanngitsut, tassani erseqqissarneqarluni.

Inunnut isumannaallisaanermut avatangiisinilu ajoqusiinernut tunngatillugu akisussaaffiit ajornartorsiutaalernissaannut, tamatumalu malitsigisaanik taarsiinissamut akisussaaffeqarnek pillugu aaqqiagiinngissuteqalernissamut tunngatillugu isumanerluuteqarluni Nuna Advokaatit oqaatigaat, aammalu aatsitassarsiorfiutileqatigiiffiit aamma najukkaneersut aatsitassanut tunngasunik suliaqarnerisa akornanni isumannaallisaanermi ungasissusissat, najukkaneersut ingerlataminnut atatillugu aatsitassarsiorfiutileqatigiiffiit isumannaallisaanermut malittarisassiaasa malinnissaannik pisussaaffeqarnerat, saliinissamut pisussaaffeqarnek il.il. pillugit maleruagassanik ersarissunik aalajangersaasoqassasoq, siunnersuutigalugu.

Inuit siunnersuut malillugu ingerlatassaminnik suliaqartut, aatsitassarsiorfiutileqatigiiffiup isumannaallisaanermut malittarisassiaannik malinninnissamut, sumiiffimmi angalaartut allat assigalugit, pisussaaffeqarput. Akisussaaffeqarnek pillugu suliaassaasinnaasut taarsiinissamut akisussaaffeqarnek pillugu maleruagassat nalinginnaasut malillugit aalajangiiffigineqartussaapput. Siunnersuut malinneqanngilaq.

Nuna Advokaatit siunnersuutigaat, isumaqatigiissummut ilusiliamik suliaqartoqassasoq, imaluunniit taamaanngippat inunnut sumiiffimmi akuersissuteqarfiusumi ingerlatassanik suliaqartunut nalunaarsuinissamik pisussaaffeqarnek/nalunaarutiginninnissamut pisussaaffeqarnek, atuutilersinneqalissasoq.

Kalaallit Nunaanni isumaqatigiisuteqarnissamut kiffaanngissuseqarnek atuuppoq, aammalu najukkaneersut pisinnaatitsissummillu pigisaqartut akornanni isumaqatigiisuteqarsinnaanerup akuliuffiginissaa Naalakkersuisut suliaassarinnigilaat.

Nalunaarsuinissamik pisussaaffeqarnermut/nalunaarutiginninnissamut pisussaaffeqarnermut tunngatillugu, suliaasaqarfimmi ammanerulersitsinissaq maleruagassiinnginnerulernissarlu, siunnersuummi siunertaasut pingaernerit ilagigaat, Naalakkersuisut oqaatigaat. Kiisalu sumiiffimmi allat angalaarnerinik nalunaarsuisoqarnissaa piumasaqaatigineqanngitsoq. Siunnersuut malinneqanngilaq.

Siunnersuummi § 14, imm. 4 malillugu pisinnaatitsissummik pigisaqartoq qaammatisiutit malillugit ukiut tamaasa akuersissutinik 5-inik tunineqarsinnaasoq pillugu Nuna Advokaatit erseqqissaaqqusipput.

Inatsimmi § 14, imm. 4 innersuussutigineqarpoq, "Pisinnaatitsissummik pigisaqartoq piffissami akuersissuteqarfiusumi tamarmi qaammatisiutit malillugit ukiumi ataatsimi akuersissutit 5-it angullugit tunineqarsinnaavoq. Kinaluunniit ataatsikkut ingerlatseqatigiiffinni pisinnaatitsissummik pigisaqartuusuni 5-init amerlanerusuni aalajangiisuusumik sunniuteqarsinnaanngilaq." Allassimavoq "tunineqarsimasinnaavoq" imaanngitsoq "tunineqarsinnaavoq". Taamaalilluni pisinnaatitsissummik pigisaqartoq ataatsikkut akuersissutini 5-init amerlanerusuni pisinnaatitsissummik pigisaqartuusinnaanngilaq.

Pisinnaatitsissummik pigisaqartup piffissami akuersissuteqarfigineqaqaartumi akuersissut aammalu akuersissut malillugu ingerlatassat pillugit pisussaaffiit tamaasa naammassisimappatigit aammalu aatsitassanik piiaanissaq imaluunniit niuerutigalugit ingerlatassat allat pillugit ingerlatassat suliaralugit "aallartissimappat", pisinnaatitsissummik pigisaqartoq siunnersuummi § 15, imm. 3 malillugu piffissap akuersissuteqarfiusup sivitsorneqarnissaanut pisinnaatitaasoq, Nuna Advokaatit tikkuarpaat. Niuerutigalugit ingerlatassat allat assersuutigalugu tassaasinnaapput aatsitassarsiortitsilluni takornariartitsineq pillugu ingerlatassat. Ingerlatassap aallartissimanissaa pillugu piumasaqaat aalajangersakkami ersarluttorujussuarmik nassuiarneqarpoq, ilanngullugu aalajangersakkap naammassineqarnissaanut suut piumasaqaataanersut appasinnerpaaffissaa, taamaalillunilu "nunaminertamik inniminniinissap" aarlerinaateqarnera annertuujuvoq, tassani allat sumiiffimmi aatsitassarsiortutik ingerlataqarnissaat (aamma najukkaneersut allat) mattunneqassalluni.

Najukkami aatsitassanut tunngasunik suliaqarnissamut kisermaassisussaataalluni akuersissutip sivitsorneqarnerani ingerlatassanut piumasarineqartunut piumasaqaatit, aatsitassanut ikummatissanullu inatsit malillugu kisermaassisussaataalluni annikitsumik aatsitassarsiornissamut akuersissutit sivitsorneqarneranni suleriaaseq atuuttoq malillugu pisartut assigisussaavaat.

Pisinnaatitsissummik pigisaqartup salinissamut iluarseqqinnissamullu pisussaaffeqarnera pillugu siunnersuummi § 27, imm. 1 aammalu avatangiisini ajoqusiinernut akisussaaffeqarneq pillugu siunnersuummi § 65, imm. 1-imi aalajangersagaq, aalajangersimasumik najugaqartunut akuersissummik peqaratik ingerlatassanik suliaqartunut atuutinngitsoq, Nuna Advokaatit tikkuarpaat, aammalu isumaqarluni taakkua assingusunik pisussaaffilerneqartariaqaraluartut.

Tusarniaaffigineqartut arlallit avatangiisinut pinngortitamullu ajoqusiinissat isumanerluutigalugit oqaatigaat, taamaattumik avatangiisinik innarlitsaaliuinissamut maleruagassat nalinginnaasut malinneqarnissaat pillugu piumasaqaat erseqqissarneqarpoq, takuuk siunnersuummi § 6, imm. 1.

Nuna Advokaatit siunnersuutigaat, aatsitassanik suliaqarnermut inatsimmut aamma aatsitassanut ikummatissanullu inatsimmut naapertuuttumik akuersissutit aamma akuersissuteqarnerit allamut tunniunneqartarnerat pillugu siunnersuummi § 58, imm. 1, toqqaannartumik aamma toqqaannangitsumik allanut tunniussinernut atuutissasoq.

Tusarniaanermut akissuteqaat siunnersuutip allanngortinneqarneranik kinguneqarpoq. Siunnersuummi § 58, imm. 1, aatsitassanut tunngasunik suliaqarnej pillugu Inatsisartut inatsisaanni § 69-imut naapertuuttunnngortinneqarpoq.

Nuna Advokaatit taarsiissutitalimmik piginnikkunnaarsitsisarnej pillugu siunnersuummi § 60, imm. 1 erseqqissaquaat.

Tusarniaanermut akissuteqaat aalajangersakkamut nassuiaatini allanngortitsinermik kinguneqarpoq. Oqaaseq "pigisaq" annertunerusumik erseqqissarneqanngilaq, tassami oqaaseq taanna atituumik paasillugu paasineqartussaammat, tunngaviusumik inatsimmut aamma taarsiissutitalimmik piginnikkunnaarsitsisarnej pillugu Inatsisartut inatsisaannut naapertuuttumik. Taamaattoq erseqqissarneqarpoq, taarsiissutitalimmik piginnikkunnaarsitsineq siunnersuut malillugu pisinnaatitsissummik pigisaqartunut iluaqutaasumik, taamaallaat siunnersuut malillugu ingerlanneqarsinnaasoq.

Nuna Advokaatit allapput, taarsiinissamut akisussaaffeqarnej aamma sillimmasiisussaataaneq/qularnaveeqqusiisarnej pillugit § 62, imm. 1-imi aamma 3-mi siunnersuummi aalajangersakkat, aamma aalajangersimasumik najugaqartunut siunnersuummi § 7 malillugu akuersissummik peqaratik ingerlatassanik suliaqartunut atuuttariaqaraluartut.

Aalajangersimasumik najugaqartut allallu siunnersuut malillugu akuersissummik peqaratik ingerlatassanik suliaqartut, tamatumunnga maleruagassat nalinginnaasut malillugit taarsiinissamut akisussaaffeqartussaapput sillimmasiisussaataasussaallutillu. § 7 malillugu ingerlatassanik suliaqarnissamut akuersissummik imaluunniit akuersissuteqarnissamik piumasagaateqartoqanngimmat, ingerlatassat taakkua suliarineqarnerannut atatillugu qularnaveeqqusiinissaq piumasagaatigineqarsinnaasussaannngilaq.

Palle Møller

Palle Møllerip annikitsumik aatsitassarsiornissamut pisinnaatitsissummik pigisaqartut aatsitassanut ikummatissanullu inatsimmi suliassaqarfimmi maleruagassanik isornartorsiunerat tusaaniarneqarsimammat aallaaviatigut qujamasuutigaa, kisianni taamaattoq siunnersuummi § 20, imm. 3, aatsitassanik aalajangersimasunik tuniniaaneq imaluunniit annissineq, aatsitassat nalilerneqariinngippata ingerlanneqaqqusaanngitsut, pillugu aalajangersakkanik erseqqinnerusunik aalajangersaanissamut Naalakkersuisunut inatsimmi tunngavissiisoq, apeqquserlugu.

Naalackersuisut tuniniaalinnginnermi aatsitassanik nalilersuinissaq nalinginnaasumik piumasagaatiginiannikkaat, siunnersuummi nutaaliornert ilagilluinnarpaat. Assersuutigalugu diamantinik nalunaarsuinissaq pillugu nunani tamalaani isumaqatigiissutit malillugit piumasagaatit naammassineqarsinnaanissaat qulakkeerniarlugu aalajangersagaq ilanngunneqarpoq.

Resource 500 aamma Resource 500 Fevti

Resource 500 aamma Resource 500 Fevti najukkani aatsitassanik soqutigisaqarnerup tapersorsorneqarnissaa pillugu siunnersuummi siunertaq aallaaviatigut tapersorsorpaa, kisianni siunnersuut saqqummiunneqartoq akerleralugu. Ingerlatseqatigiiffiit isumaqarput, ingerlatseqatigiiffiit nunani tamalaani misilittagaat aallaavigalugit, siunnersuut ajornartorsiutinik arlalippassuarnik pilersitsisinnaavoq aammalu isumaqatigiinninnernik arlalinnik malitseqarsinnaasoq.

Ingerlatseqatigiiffiit oqaatigisai arlallit tunngavilersorneqanngillat, aammalu nunani nalinginnaasumik sanilliuttakkatsinni ajornartorsiutit ernumagineqartut ajornartorsiutaanerat ilisimasaqarfiginagu.

Resource 500 aamma Resource 500 Fevti isumaqanngillat aalajangersimasumik najugaqartunut ukiuni 2-ni atassuteqarsimanissamut piumasagaat naammattoq. Isumaqarput inuit sumiiffimmi akuersissuteqarfiusumi imaluunniit eqqaani, ingerlatassanik suliaqarnissamik kissaateqarfigisaminni, najugaqarnissaat piumasagaatigineqassasoq.

Innuttaasut tamarmik aatsitassanik paaanissamut naligiimmik periarfissaqarnissaat Naalackersuisut kissaatigaat. Siunnersuut malinneqanngilaq. Taamaattoq ukiunik marlunnik atassuteqarsimanissamut piumasagaat ukiunut 5-inut qaffanneqarpoq, takuuk siunnersuummi § 5, imm. 3.

Resource 500 aamma Resource 500 Fevti siunnersuutigaat siunnersuut malillugu ingerlatassat tamarmik akuersissut tunngavigalugu suliarineqassasut, inuit siunnersuut malillugu ingerlatassanik suliaqarnissamik kissaateqartut misilitsittarnissaat atuutilersinneqalissasoq kiisalu inunnit siunnersuut malillugu ingerlatassanik suliaqartunit annertuunik nalunaarusiortarnissat piumasagaatigineqassasoq.

Siunnersuummi siunertaasut pingaarnerit ilaat tassaavoq, inuit ataasiakkaat aatsitassanik katersinissamut paaanissamullu periarfissaqarnerisa ammanerulersinneqarnissaa pisariinnerulersinneqarnissaalu. Siunnersuut malinneqanngilaq.

Resource 500 aamma Resource 500 Fevti aatsitassat suut aalajangersimasumik najugaqartut piiarsinnaaneraat erseqqissaanissaq ujartorpaat.

Aalajangersimasumik najugaqartut aatsitassanik paaanissamut periarfissaqarneranni

aallaaviatigut aatsitassat tamarmik pineqartunut ilaatinneqarput, aatsitassat qinngornernik ulorianartunik akullit ilaanatik, takuuk siunnersuummi § 6, imm. 2. Aammattaaq aatsitassarsiorluni misissuinissamut akuersissutit malillugit pisinnaatitsissummik pigisaqartut kisermaassisussaataitanerisa qulakkeernissaa siunertaralugu siunnersuummi § 10, imm. 2-mi aalajangersagaq ilanngunneqarpoq, taanna malillugu aalajangersimasumik najugaqartut taamaallaat aatsitassanik aatsitassarsiorluni misissuinissamut akuersissutini pineqartunut ilaasunik saniatigut tunisassiassatut piiaaqqusaallutik.

Resource 500 aamma Resource 500 Fevti sakkut tigummiannartakkat suut atoqqusaanersut erseqqissaanissaq ujartorpaat.

Aalajangersimasumik najugaqartut tamatumunnga akuersissummik piunasaqaateqartoqarani, sakkunik siunnersuummi § 7, imm. 1-imut nassuiaatini nassuiarneqartunik, atueqqusaapput. Oqaatigineqassaaq Naalakkersuisut siunnersuummi § 12, imm. 2 naapertorlugu sakkut suut atoqqusaanersut pillugu aalajangersakkanik erseqqinnerusunik aalajangersaasinnaammata.

Aatsitassanik piiaanermut itinerpaaffissamik annertunerpaaffissamillu, putuliat matoornissaannik nunallu sannaanut paasissutissanik nalunaarsuinissamut pisussaaffeqarnermik Resource 500 aamma Resource 500 Fevti ujartuipput.

Itinerpaaffissaq annertunerpaaffissarlu pillugit apeqqummut tunngatillugu, tusarniaaffigineqartut arlallit akuersissummik peqarani ingerlatassat annertussusaat pillugu isumanerluuteqarlutik oqaatigaat, aammalu tusarniaanermut akissuteqaatit siunnersuummi allanngortitsinermik kinguneqarput. Taamaalilluni siunnersuummi § 7, imm. 2-mi aalajangersagaq ilanngunneqarpoq, taanna malillugu najukkaneersut akuersissummik peqaratik ingerlatassanik suliaqartut, nunamut sanilliullugu uuttorlugu 1 meterinit itinerusunik sullut isaariaannik itersalianillu pilersitseqqusaanatik.

Putuliat matoornissaannut pisussaaffeqarnissamut tunngatillugu, tusarniaaffigineqartut arlallit avatangiisini pinngortitamilu ajoqusiinissaq isumanerluutigalugu oqaatigaat. Taamaattumik avatangiisinik allanngutsaaliuinnermut maleruagassat nalinginnaasut malinneqarnissaat pillugu piunasaqaat erseqqissarneqarpoq, takuuk siunnersuummi § 6, imm. 1.

Nunap sannaanut paasissutissanik nalunaarsuisarnissamut tunngatillugu, siunnersuummi siunertaasut pingarnerit ilaat tassaavoq, inuit ataasiakkaat aatsitassanik katersinissamut piiaanissamullu periarfissaqarnerisa ammanerulersinneqarnissaa pisariinnerulersinneqarnissaalu. Siunnersuut malinneqannigilaq.

Aalajangersimasumik najugaqartut, sumiiffimmi aalajangersimasumi ingerlatassanik suliaqarsinnaasut, amerlassusaannik killiliinissaq Resource 500 aamma Resource 500 Fevti

ujartorpaat.

Siullertut taamatut killiliisoqassappat akuersissutinut aalajangersaariaaseqarnissaq pisariaqartussaavoq, tassami taamaassappat kikkut sumiiffinnukarsinnaassanersut aalajangiisoqartariaqalissammat. Aammattaaq tamanna allaffissornikkut oqimaatsuusussaavoq, tassami nunarput tamakkerlugu sumiiffiit ilaannut annikinnerusunut aggulunneqartussangussammat. Pissutsit marluusut taakkua tamarmik siunnersuutip siunertaanut akerliupput.

Resource 500 aamma Resource 500 Fevti isumaqarput siunnersuummi § 8, imm. 2, nr. 1 naapertorlugu aalajangersimasumik najugaqartuunngitsut akuersissuteqarfigineqaratik anniseqqusaasaannut 1 kg-nik killiliineq ersarinngitsoq, tassami aatsitassat assigiinngitsut assigiinngissuteqarmata.

Aalajangersimasumik najugaqartuunngitsut annissinissaannut tunngavissalimmik killiliiniarluni 1 kg-nik killiliineq toqqarneqarpoq.

SIK

Qinnuteqartunik sioqqanik milluaanissamut angallatinik nunani allani nalunaarsorsimasunik atuiniartunik, atortussiassanut akuersissutinik qinnuteqartut akornanniittoqassasoq SIK-ip ilimagaa, tamannalu unammilleqatigiinnermik equititsisussaavoq.

Siunnersuummi umiarsuarnik nalunaarsuisarneq isummerfigineqanngilaq. Apeqqut taanna inatsisini allani maleruagassiivigineqartussaavoq.

Transparency International Greenland

Transparency International Greenland siunnersuummi peqquserluttarneq pillugu aalajangersakkanik maqaasisaqarpoq.

Peqquserluttarneq pillugu aalajangersakkat nalinginnaasumik atuuttariaqaraluarput, taamaattumillu inatsimmi allami ataatsimut isigalugu oqartussat suliarinninnerannut tamarmut tunngassuteqartumiittariaqaraluarluni.

Transparency International Greenlandip oqaatigaa, siunnersuummi § 1, imm. 3 naapertorlugu oqartussat suliarinninnerat 'ataatsimoortuulluni akuutitsiviusariaqartoq'. Taamaattoq allagaatinik takunninnissamik qinnuteqarnerit oqartussat akuusut ilaannut ingerlatinneqarsinnaassasut Transparency International Greenlandip naatsorsuutigaa.

Allagaatinik takunninnissaq pillugu qinnuteqarnerit oqartussat akuusut arlaannut suli ingerlatinneqarsinnaasussaapput.

Transparency International Greenland isumaqarpoq nunani tamalaani tunngaviusut

akuerisaasut, siunnersuummi § 35, imm. 2-mi innersuussutigineqartut, iluaqutaasumik eqqaaneqarsinnaasut.

Nunani tamalaani tunngaviusut akuerisaasut oqaasiuvoq ineriartortuartoq, piffissap ingerlanerani allanngoriartortartoq. Taamaattumik erseqqinnerusumik maleruagassiineq nalunaarutitut ilusilimmi isumagineqassappat pitsaanerusussaavoq.

Nalunaarusiat siunnersuummi § 50, imm. 1 malillugu suliarineqartut, (VFT-imut nassuiaatit, avatangiisinut tunngasut pillugit nassuiaatit annikinnerusut), tamanut ammasumik saqqummiunneqartassanersut aammalu nalunaarusiat taakkua ingerlaavartumik nutarterneqartassanersut, Transparency International Greenlandip apeqputigaa.

Nassuiaat pillugu tamanut ammasumik tusarniaaneq pillugu aalajangersakkanik aalajangersaasoqarsimappat, VFT-inut nassuiaatit tamanut ammasumik saqqummiunneqartussaapput. VFT-inut nassuiaatit, ingerlatassanut qinnuteqaatini ataasiakkaani tamaginni akuerineqartartussaapput.

Kinaassutsiminnik isertuussillutik tusarniaanermi peqataasut

Aalajangersimasumik najugaqartut nalitoorujussuit sumiiffimmit aatsitassarsiorluni misissuinissamut akuersissummi pineqartunut ilaasumit peersinnaagaat, tusarniaanermi peqataasup kinaassutsiminik isertuussisup tikkuarpaa.

Najukkaneersut akuersissummik peqaratik ingerlatassanik suliaqarnerannut killiliinerit siunnersuummi § 7, imm. 2-mi ilanngunneqarput. Siunnersuut allanngortinneqarpoq, taamaalillutik najukkaneersut taamaallaat aatsitassanik aatsitassarsiorluni misissuinissamut akuersissutini pineqartunut ilaasunik saniatigut tunisassiassatut piiaaqqusaallutik, takuuk siunnersuummi § 10, imm. 2.

Atortut tigummiannartakkat suut atoqqusaanersut erseqqissarneqarnissaa, tusarniaanermi peqataasup kinaassutsiminik isertuussisup ujartorpaa.

Aalajangersimasumik najugaqartut tamatumunnga akuersissummik piunasaqaateqartoqarani, assersuutigalugu sakkunik siunnersuummi § 7, imm. 1-imut nassuiaatini nassuiarneqartunik, atueqqusaapput. Oqaatigineqassaaq Naalakkersuisut siunnersuummi § 12, imm. 2 naapertorlugu sakkut suut atoqqusaanersut pillugu aalajangersakkanik erseqqinnerusunik aalajangersaasinnaammata.

Avatangiisini nunamilu ajoqusiinernut akisussaaffik pisinnaatitsissummik pigisaqartup aammalu inuit akuersissummik peqaratik ingerlatassanik suliaqartut akornanni qanoq agguarneqarnersoq, tusarniaanermi peqataasut kinaassutsiminnik isertuussisut marluk apeqputigaa.

Nunami ajoqusiinernut akisussaaffik tamanna pillugu maleruagassat nalinginnaasut malillugit aalajangerneqassaaq.

Tusarniaanermi peqataasut kinaassutsiminik isertuussisut marluk aatsitassarsiorluni misissuinissamut akuersissutit kisermaassisussaataitanertut inissisimanerat isumanerluutigalugu oqaatigaat, aammalu taarsiissutitalimmik piginnikkunnaarsitsineq tassani pineqarsinnaasooq tikkuarlugu.

Tusarniaaffigineqartut arlallit assingusumik isumanerluuteqarput, aammalu tusarniaanermut akissuteqaatit siunnersuummi allannguuteqartitsinermik kinguneqarput. Ilaatigut sumiiffinni aatsitassarsiorluni misissuinissamut akuersissutini pineqartunut ilaasuni najukkaneersut ingerlatassat pillugit siunnersuummi aalajangersakkat, sumiiffinni siunnersuutip atuutilinnginnerani aatsitassarsiorluni misissuinissamut akuersissummi pineqartunut ilaasuni, atuutissanngillat. Sumiiffinni taakkunani maannamut pisartutut kisermaassisussaataitaneq aalajangiusimaannarneqarpoq, takuuk siunnersuummi § 77, imm. 5-imi ikaarsaariarnermi aalajangersagaq. Ilaatigut siunnersuut allanngortinneqarpoq, taamaalilluni najukkaneersut aatsitassanik aatsitassarsiorluni misissuinissamut akuersissummi pineqartunut ilaatinneqartunik taamaallaat saniatigut tunisassiassatut piiaaqqusaallutik, tamannalu siunissami pisinnaatitsissummik pigisaqartut aatsitassanut akuersissummi pineqartunut ilaasunut kisermaassisussaataitallutik pisinnaatitaaffeqarnerinik qulakkeerinnissaaq, takuuk siunnersuummi § 10, imm. 2.

Suleriaaseq atuuttoq malillugu aatsitassarsiorluni misissuinissamut akuersissummi aatsitassat tamarmik ilaatinneqarput, aatsitassat qinngornernik ulorianartunik akullit ikummatissiassallu (uulia gassilu) ilaanatik. Siunissami Naalakkersuisut suleriaaseq allanngortinniarpaat, taamaalilluni aallaaviatigut aatsitassarsiorluni misissuinissamut akuersissutini taamaallaat aatsitassat suliffissuaqarnermi atorneqartartut ilaatinneqartalissallutik, tassa imaappoq aatsitassat tamarmik, ilaatinneqaratik aatsitassat qinngornernik ulorianartunik akullit, ikummatissiassat, ujaqqat pinneraasiassat aammalu aatsitassat katersugaatigineqartartut erseqqinnerusumik aalajangerneqartut ilai.

Pisinnaatitsissummik pigisaqartut aamma aalajangersimasumik najugaqartut ingerlataat kattunneqarsinnaanngippata, qanoq inissisimasooqassanersoq, tusarniaanermi peqataasut kinaassutsiminnik isertuussisut marluk apeqqutigaat.

Tusarniaaffigineqartut arlallit taamatut pisoqarnissaa pillugu isumanerluuteqarlutik oqaatigaat, aammalu tusarniaanermut akissuteqaatit siunnersuummi allanngortitsinernik kinguneqarput. Taamaalilluni siunnersuummi § 10, imm. 3-mi aalajangersagaq ilanngunneqarpoq, taanna malillugu sumiiffinni aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi pineqartunut ilaasuni §§ 7 aamma 8 malillugit katersineq piiaanerlu, ingerlatat aatsitassarsiorluni misissuinissamut akuersissut malillugu suliarineqartut ataqqillugit,

suliarineqartussaallutik.

Aalajangersimasumik najugaqartut sumiiffinni akuersissuteqarfiusuni ingerlatassanik suliaqartut, pisinnaatitsissummik pigisaqartumit akuersissuteqarfigineqassasut pillugu siunnersuummik tusarniaanermi peqataasoq kinaassutsiminik isertuussisoq saqqummiussivoq.

Ilaatigut aalajangersimasumik najugaqartut akuersissummik peqaratik ingerlataat annikitsuinnaasussaapput, ilaatigullu taakkua pisinnaatitsissummik pigisaqartup ingerlatai ataqqisussaavaat. Tamatuma saniatigut innuttaasut tamarmik naligiimmik periarfissaqarnissaat Naalackersuisut pingaartittorujussuaat. Siunnersuut malinneqanngilaq.

Aalajangersimasumik najugaqartut, sumiiffimmi aalajangersimasumi ingerlatassanik suliaqarsinnaasut amerlassusissaannut tunngatillugu isumanerluuteqarluni tusarniaanermi peqataasup kinaassutsiminik isertuussisup oqaatigaa.

Inuit sumiiffimmi aalajangersimasumi ingerlatassanik suliaqaqqusaasut amerlassusissaannik killiliisoqassappat nalunaarsuisarnissaq pisariaqartussaavoq, aammalu oqartussat inuillu siunnersuut malillugu ingerlatassanik suliaqarnissamik kissaateqartut allaffissornikkut isumalluutinik annertuunik atuisariaqartussaallutik. Siunnersuut malinneqanngilaq.

Tusarniaanermi peqataasoq kinaassutsiminik isertuussisoq allappoq, siunnersuut akuutissanik uumaatsunik atuineq pillugu aalajangersakkanik imaqartariaqaraluartoq, aammalu najukkaneersut sumiiffinnut aatsitassarsiorfiusunukarsinnaannginnissaat akuerineqassasoq.

Aalajangersimasumik najugaqartut akuersissummik peqaratik ingerlatassa atortut tigummiannartakkat atorlugit suliareqqusaapput. Taamaalilluni akuersissummik peqarani akuutissat uumaatsut atornissaat inerteqqutaavoq. Siunnersuummi § 10, imm. 2-mi allassimavoq, sumiiffinni aatsitassanut tunngasunik suliaqarneq pillugu Inatsisartut inatsisaat malillugu pīaanissamut akuersissutini pineqartunut ilaasuni siunnersuut malillugu ingerlatassanik suliaqartoqaqqusaanngitsoq.

Aalajangersimasumik najugaqartut siunnersuut malillugu atortussiassanik maaniinnarmiittunik, aammalu qaarsumi manngertumiinngitsoq, taamaallaat ingerlatassanik suliaqartoqaqqusaasoq, tusarniaanermi peqataasup kinaassutsiminik isertuussisup naatsorsuutigaa.

Tamanna kukkulluni naatsorsuutiginninneruvoq. Aalajangersimasumik najugaqartut ingerlatassa atortussiassanut maaniinnarmiittunut killeqartinneqanngillat.

Siunnersuummi IFC-imi aamma ESG-imi malitassanut tunngatillugu nalornilersitsisoqarnissaa isumanerluutigalugu tusarniaanermi peqataasup kinaassutsiminik

isertuussisup oqaatigaa.

Siunnersuut, allannguutit allanngortinneqartut atuutsillugit, pisinnaatitsissummik pigisaqartuni IFC-imi aamma ESG-imi malitassanut tunngasuni sunniisoqarnissaa, takuneqarsinnaanngilaq.

Sumiiffimmi, piiaanissamut suliassami suliakkiussanut najoqqutassap akuerineqarneraniit, ingerlatassanik suliaqartoqaqqusaanngitsoq pillugu aalajangersakkamik ilanngussisoqassasoq, tusarniaanermi peqataasup siunnersuutigaa.

Tusarniaanermut akissuteqaat siunnersuummi allanngortitsinermik kinguneqarpoq, aammalu siunnersuummi aalajangersimasumik najugaqartut akuersissummik peqaratik aammalu aalajangersimasumik najugaqartuunngitsut, sumiiffinni suliakkiissutinut najoqqutassap tamanut ammasumik tusarniaassutigalugu nassiunneqareernerani, aatsitassanut tunngasunik suliaqarneq pillugu Inatsisartut inatsisaanni § 44 malillugu suliakkiissutinut najoqqutassami pineqartunut ilaasuni ingerlatassanik suliaqaqqusaanngitsut pillugu siunnersuummi §§ 10, imm. 1, nr. 3-mi aamma 11, imm. 4, nr. 3-mi aalajangersakkat ilanngunneqarlutik.

Allannguutit matuma siuliani taaneqartut saniatigut tamanut ammasumik tusarniaareernerup kingorna, nunatsinni aatsitassanit isumalluutit innuttaasunut iluaqutaanissaat qulakkeerniarlugu, inuit qaammatinik pingasunit sivikinnerusumik nunatsinniissimasut, tamanna aalajangersimasumik najugalimmit aqqissuunneqartumik ilitsersuisoqarluni angalaarnermi peqataanerup nalaani pisimanngippat, aatsitassanik katersinissaasa piiaanissaasalu inerteqqutigineqarnera, kiisalu inuit taakkua aatsitassanik annissinissamik kissaateqarpata, avammut annissinissamut akuersissummik peqarnissaq imaluunniit aatsitassat aalajangersimasumik najugalimmit pisiarineqarsimasut uppernarsaateqarnissaq, pillugu piunasaqaat ilanngunneqarpoq. Tamatumunnga takuuk siunnersuummi § 9, imm. 1-3.

Aammattaq aatsitassat ilisimatusarnermik siunertalimmik katersorneqarsimasut, avammut annissinissamut akuersissuteqarfigineqarani anninneqarsinnaasut, pillugu aalajangersagaq ilanngunneqarpoq. Tamatumunnga takuuk siunnersuummi § 9, imm. 4.